

史

記

漢司馬遷撰
宋裴駰集解
唐司馬貞索隱
唐張守節正義

史記

第九冊

卷一〇二至卷一一七(傳)

中華書局

史記卷一百二

張釋之馮唐列傳第四十二

張廷尉釋之者，堵陽人也，〔一〕字季。有兄仲同居。以訾爲騎郎，〔二〕事孝文帝，十歲不得調，無所知名。釋之曰：「久宦減仲之產，不遂。」欲自免歸。中郎將袁盎知其賢，惜其去，乃請徙釋之補謁者。〔三〕釋之既朝畢，因前言便宜事。文帝曰：「卑之，毋甚高論，令今可施行也。」〔四〕於是釋之言秦漢之間事，秦所以失而漢所以興者久之。文帝稱善，乃拜釋之爲謁者僕射。

〔一〕〔索隱〕韋昭堵音緒，又音如字，地名，屬南陽。

〔正義〕應劭曰：「哀帝改爲順陽，水東南入蔡。」〔括地志〕云：「順

陽故城在鄧州穰縣西三十里，楚之郢邑也。及蘇秦傳云：『楚北有郢陽』，並謂此也。」

〔三〕〔集解〕蘇林曰：「顧錢若出穀也。」如淳曰：「漢儀注訾五百萬得爲常侍郎。」〔索隱〕訾音子移反。〔字苑〕云：「貴，積財也。」

〔三〕〔正義〕

〔百官表〕云：「謁者，掌賓讚受事，員十七人，秩比六百石」也。

〔四〕〔索隱〕案：卑，下也。欲令且卑下其志，無甚高談論，但令依時事，無說古遠也。

釋之從行，登虎圈。^{〔二〕}上問上林尉^{〔三〕}諸禽獸簿，十餘問，尉左右視，盡不能對。虎圈
嗇夫^{〔三〕}從旁代尉對上所問禽獸簿甚悉，欲以觀其能口對響應無窮者。文帝曰：「吏不當
若是邪？」尉無賴。^{〔四〕}乃詔釋之拜嗇夫爲上林令。釋之久之前曰：「陛下以絳侯周勃何如
人也？」上曰：「長者也。」又復問：「東陽侯張相如何如人也？」上復曰：「長者。」釋之曰：「
夫絳侯、東陽侯稱爲長者，此兩人言事曾不能出口，豈數此嗇夫諛諛^{〔五〕}利口捷給哉！且
秦以任刀筆之吏，吏爭以亟疾苛察相高，然其敝徒文具耳，^{〔六〕}無惻隱之實。以故不聞其
過，陵遲而至於二世，天下土崩。今陛下以嗇夫口辯而超遷之，臣恐天下隨風靡靡，爭爲口
辯而無其實。且下之化上疾於景響，舉錯不可不審也。」文帝曰：「善。」乃止不拜嗇夫。

〔一〕正義 求遠反。

〔二〕索隱 漢書表上林有八丞十二尉。百官志尉秩三百石。

〔三〕正義 掌虎圈。百官表有鄉嗇夫，此其類也。

〔四〕集解 張晏曰：「才無可恃。」

〔五〕集解 晉灼曰：「音牒。」索隱 音牒。漢書作「喋喋」，口多言。

〔六〕索隱 案：謂空具其文而無其實也。

上就車，召釋之參乘，徐行，問釋之秦之敝。具以質言。^{〔一〕}至宮，上拜釋之爲公車令。

〔一〕集解如淳曰：「質，誠也。」

頃之，太子與梁王共車入朝，不下司馬門，^{〔二〕}於是釋之追止太子、梁王，無得人殿門。遂劾不下公門不敬，奏之。薄太后聞之，文帝免冠謝曰：「教兒子不謹。」薄太后乃使使承詔赦太子、梁王，然後得人。文帝由是奇釋之，拜爲中大夫。

〔二〕集解如淳曰：「宮衛令：諸出入殿門公車司馬門，乘輅傳者皆下，不如令，罰金四兩。」

頃之，至中郎將。從行至霸陵，居北臨廁。^{〔一〕}是時慎夫人從，上指示慎夫人新豐道，曰：「此走邯鄲道也。」^{〔二〕}使慎夫人鼓瑟，上自倚瑟而歌，^{〔三〕}意慘悽悲懷，顧謂羣臣曰：「嗟乎！以北山石爲椁，^{〔四〕}用紵絮^{〔五〕}斷陳，綦漆其間，^{〔六〕}豈可動哉！」左右皆曰：「善。」釋之前進曰：「使其中有可欲者，雖錮南山猶有郤；^{〔七〕}使其中無可欲者，雖無石椁，又何戚焉！」文帝稱善。其後拜釋之爲廷尉。

〔一〕集解李奇曰：「霸陵北頭廁近霸水，帝登其上，以遠望也。」如淳曰：「居高臨垂邊曰廁也。」蘇林曰：「廁，邊側也。」韋昭曰：「高岸夾水爲廁也。」索隱劉氏廁音初吏反。按：李奇曰「霸陵北頭廁近霸水」。蘇林曰「廁，

邊側也」。包愷音側，義亦兩通也。

〔三〕集解 張晏曰：「慎夫人，邯鄲人也。」如淳曰：「走音奏，趨也。」索隱 音奏。案：走猶向也。

〔三〕集解 漢書音義曰：「聲氣依倚瑟也。」書曰「聲依永」。案：謂歌聲合於瑟聲，相依倚也。

〔四〕正義 顏師古云：「美石出京師北山，今宜州石是。」

〔五〕索隱 上張呂反，下息慮反。

〔六〕集解 徐廣曰：「斲，一作『錯』。」駟案：漢書音義曰「斲絮，以漆著其間也」。案：斲音側，略反。絮音女居反。案：斲陳絮以漆著其間也。

〔七〕集解 張晏曰：「錮，鑄也。」帝北向，故云「北山」；迴顧南向，故云「南山」。案：張晏云「錮，鑄也」。帝北向，故云「北山」；迴顧向南，故云「南山」。今案：大顏云「北山青石肌理密，堪爲碑槨，至今猶然。故秦本紀作

阿房或作酈山石槨是也」。故帝欲北山之石爲槨，取其精牢。釋之答言，但使薄葬，冢中無可貪，雖無石槨，有何憂焉。若使厚殉，冢中有物，雖并錮南山，猶爲人所發掘也。言「南山」者，取其高厚之意，張晏殊失其旨也。

頃之，上行出中渭橋，〔一〕有一人從橋下走出，乘輿馬驚。於是使騎捕，屬之廷尉。釋之治問。曰：「縣人來，〔二〕聞蹕，匿橋下。久之，以爲行已過，卽出，見乘輿車騎，卽走耳。」廷尉奏當，一人犯蹕，當罰金。〔三〕文帝怒曰：「此人親驚吾馬，吾馬賴柔和，令他馬，固不敗傷我乎？」而廷尉乃當之罰金。〔四〕釋之曰：「法者天子所與天下公共也。」今法如此而更重

之，是法不信於民也。且方其時，上使立誅之則已。今既下廷尉，廷尉，天下之平也，一傾而天下用法皆爲輕重，民安所措其手足？唯陛下察之。」良久，上曰：「廷尉當是也。」

〔一〕〔集解〕張晏曰：「在渭橋中路。」瓚曰：「中渭橋兩岸之中。」〔索隱〕張晏、臣瓚之說皆非也。案今渭橋有三所：

一所在城西北咸陽路，曰西渭橋；一所在東北高陵道，曰東渭橋；其中渭橋在古城之北也。

〔三〕〔集解〕如淳曰：「長安縣人。」

〔三〕〔集解〕如淳曰：「乙令『蹕先至而犯者罰金四兩』。蹕，止行人。」〔索隱〕案：崔浩云「當謂處其罪也」。案：百

官志云「廷尉平刑罰，奏當所應。郡國讞疑罪，皆處當以報之」也。

〔四〕〔索隱〕小顏云：「公謂不私也。」

其後有人盜高廟坐前玉環，捕得，文帝怒，下廷尉治。釋之案律盜宗廟服御物者爲奏，奏當弃市。上大怒曰：「人之無道，乃盜先帝廟器，吾屬廷尉者，欲致之族，而君以法奏之，」非吾所以共承宗廟意也。」釋之免冠頓首謝曰：「法如是足也。」且罪等，然以逆順爲差。今盜宗廟器而族之，有如萬分之一，假令愚民取長陵一抔土，陛下何以加其法乎？」久之，文帝與太后言之，乃許廷尉當。是時，中尉條侯周亞夫與梁相山都侯王恬開見釋之持議平，乃結爲親友。張廷尉由此天下稱之。

〔一〕〔索隱〕案：法者，依律以斷也。

〔三〕〔集解〕徐廣曰：「足，一作『止』也。」

〔三〕集解如淳曰：「俱死罪也，盜玉環不若盜長陵土之逆也。」

〔四〕集解張晏曰：「不欲指言，故以取土譬也。」

〔索隱〕杯音步侯反。案：禮運云「汙尊而杯飲」，鄭氏云「杯，手掬

之，字從手」。字本或作「盃」，言一勺一杯，兩音並通。又音普迴反。杯者，埽之未燒之名也。張晏云「不欲指

言，故以取土譬」者，蓋不欲言盜開長陵及說傷迫近先帝故也。

〔五〕集解徐廣曰：「一作『聞』」。漢書作『啓』。啓者，景帝諱也，故或爲『聞』。

後文帝崩，景帝立，釋之恐，〔一〕稱病。欲免去，懼大誅至，欲見謝，則未知何如。用王生計，卒見謝，景帝不過也。

〔一〕索隱謂帝爲太子時，與梁王入朝，不下司馬門，釋之曾劾，故恐也。

王生者，善爲黃老言，處士也。嘗召居廷中，三公九卿盡會立，王生老人，曰「吾讎解」，〔二〕顧謂張廷尉：「爲我結讎。」〔三〕釋之跪而結之。既已，人或謂王生曰：「獨柰何廷辱張廷尉，使跪結讎？」王生曰：「吾老且賤，自度終無益於張廷尉。張廷尉方今天下名臣，吾故聊辱廷尉，使跪結讎，欲以重之。」諸公聞之，賢王生而重張廷尉。

〔二〕正義上萬越反，下閑買反。

〔三〕索隱結音如字，又音計。

張廷尉事景帝歲餘，爲淮南王相，猶尚以前過也。久之，釋之卒。其子曰張摯，字長公，

官至大夫，免。以不能取容當世，故終身不仕。〔一〕

〔一〕索隱 謂性公直，不能曲屈見容於當世，故至免官不仕也。

馮唐者，其大父趙人。父徙代。漢興徙安陵。唐以孝著，爲中郎署長，〔一〕事文帝。文帝輦過，〔二〕問唐曰：「父老何自爲郎？」〔三〕家安在？唐具以實對。文帝曰：「吾居代時，吾尚食監高祛數爲我言趙將李齊之賢，戰於鉅鹿下。今吾每飯，意未嘗不在鉅鹿也。」〔四〕父知之乎？唐對曰：「尚不如廉頗、李牧之爲將也。」上曰：「何以？」唐曰：「臣大父在趙時，爲官〔卒〕〔率〕將，〔五〕善李牧。臣父故爲代相，善趙將李齊，知其爲人也。」上既聞廉頗、李牧爲人，良〔六〕說，而搏髀曰：「嗟乎！吾獨不得廉頗、李牧時爲吾將，吾豈憂匈奴哉！」唐曰：「主臣！〔七〕陛下雖得廉頗、李牧，弗能用也。」上怒，起入禁中。良久，召唐讓曰：「公柰何衆辱我，獨無閒處乎？」唐謝曰：「鄙人不知忌諱。」

〔一〕集解 應劭曰：「此云孝子郎也。」或曰以至孝聞。

索隱 案：謂爲郎署之長也。

〔二〕索隱 過音戈。謂文帝乘輦，會過郎署。

〔三〕索隱 案：崔浩云「自，從也。帝詢唐何從爲郎」。又小顏云「年老矣，乃自爲郎，怪之也」。

〔四〕集解張晏曰：「每食念監所說李齊在鉅鹿時。」

〔五〕集解徐廣曰：「一云『官士將』。」駢案：晉灼曰「百人爲徹行，亦皆帥將也」。

〔索隱〕注「百人爲徹行將帥」，

案國語「百人爲徹行，行頭皆官師」。賈逵云「百人爲一隊也。官師，隊大夫也」。

〔六〕集解如淳曰：「良，善也。」

〔七〕索隱案：樂彥云「人臣進對前稱『主臣』，猶上書前云『昧死』」。案：志林云「馮唐面折萬乘，何言不懼」，主臣

爲驚怖，其言益著也。又魏武謂陳琳云「卿爲本初檄，何乃言及上祖」，琳謝云「主臣」，益明主臣是驚怖也。解

已見前志也。

當是之時，匈奴新大人朝，〔一〕殺北地〔二〕都尉。〔三〕上以胡寇爲意，乃卒復問唐曰：「公何以知吾不能用廉頗、李牧也？」唐對曰：「臣聞上古王者之遣將也，跪而推轂，曰：『闔以內者，〔四〕寡人制之；闔以外者，將軍制之。軍功爵賞皆決於外，歸而奏之。此非虛言也。』臣大父言，李牧爲趙將居邊，軍市之租皆自用饗士，〔五〕賞賜決於外，不從中擾也。委任而責成功，故李牧乃得盡其智能，遣選車千三百乘，〔六〕穀騎萬三千，〔七〕百金之士十萬，〔八〕是以北逐單于，破東胡，〔九〕滅澹林，〔一〇〕西抑彊秦，南支韓、魏。當是之時，趙幾霸。〔二〕其後會趙王遷立，其母倡也。〔三〕王遷立，乃用郭開讒，卒誅李牧，〔二〕令顏聚代之。〔四〕是以兵破士北，爲秦所禽滅。今臣竊聞魏尚爲雲中守，〔二〕其軍市租盡以饗士卒，〔出〕私養錢，〔二〕五日一椎牛，〔二〕饗賓客軍吏舍人，是以匈奴遠避，不近雲中之塞。虜曾一

人，尚率車騎擊之，所殺甚衆。夫士卒盡家人子，〔一〕起田中從軍，安知尺籍伍符。〔二〕終日力戰，斬首捕虜，上功莫府，〔三〕一言不相應，〔三〕文吏以法繩之。其賞不行而吏奉法必用。臣愚，以爲陛下法太明，賞太輕，罰太重。且雲中守魏尚坐上功首虜差六級，陛下下之吏，削其爵，罰作之。由此言之，陛下雖得廉頗、李牧，弗能用也。〔三〕臣誠愚，觸忌諱，死罪死罪！文帝說。是日令馮唐持節赦魏尚，復以爲雲中守，而拜唐爲車騎都尉，主中尉及郡國車士。〔三〕

〔一〕索隱 上音朝，早也。下音乃何反，縣名，屬安定也。

〔正義〕在原州百泉縣西北十里，漢朝邯鄲是也。

〔二〕正義 北地郡，今寧州也。

〔三〕索隱 案：都尉姓孫名印。

〔四〕集解 韋昭曰：「此郭門之間也。門中概曰閭。」

〔索隱〕 概音其月反。

〔正義〕 閭音苦本反。謂門限也。

〔五〕索隱 案：謂軍中立市，市有稅。稅卽租也。

〔六〕索隱 案：六韜書有選車之法。

〔七〕索隱 如淳云：「穀音構。穀騎，張弓之騎也。」

〔八〕集解 服虔曰：「良士直百金也。」或曰直百金，言重。

〔索隱〕 晉灼云：「百金取其貴重也。」服虔曰：「良士直

百金也。」劉氏云：「其功可賞百金者。」事見管子及小爾雅。

〔九〕索隱 案：崔浩云：「烏丸之先也。國在匈奴之東，故云東胡也。」

〔一〇〕**集解** 徐廣曰：「澹，一作『檐』。」 **索隱** 澹，丁甘反。一本作「檐檻」。

〔一一〕**索隱** 幾音祈。

〔一二〕**索隱** 按：列女傳云「邯鄲之倡」。 **正義** 趙幽王母，樂家之女也。

〔一三〕**索隱** 按：開是趙之寵臣。戰國策云秦多與開金，使爲反間。

〔一四〕**索隱** 聚音似喻反。漢書作「聚」。本齊將也。 **正義** 絕庚反。

〔一五〕**集解** 漢書曰：「尚，槐里人也。」 **正義** 雲中郡故城在勝州榆林縣東北三十里。

〔一六〕**集解** 服虔曰：「私廩假錢。」 **索隱** 按：漢書「市肆租稅之人爲私奉養」，服虔曰「私廩假錢」是也。或云官所

別廩給也。

〔一七〕**索隱** 椎音直追反，擊也。

〔一八〕**索隱** 按：謂庶人之家子也。

〔一九〕**集解** 如淳曰：「漢軍法曰吏卒斬首，以尺籍書下縣移郡，令人故行，不行奪勞二歲。五符亦什伍之符，約節度也。」或曰以尺簡書，故曰尺籍也。 **索隱** 按：尺籍者，謂書其斬首之功於一尺之板。伍符者，命軍人伍伍相

保，不容姦詐。注「故行不行」，案謂故命人行而身不自行，奪勞二歲也。「故」與「雇」同。

〔二〇〕**索隱** 按：莫訓大也。又崔浩云「古者出征無常處，以幕爲府舍，故云莫府」。「莫」當爲「幕」，古字少耳。

〔二一〕**索隱** 音乙陵反，謂數不同也。

〔二二〕**集解** 班固稱「楊子曰孝文帝親詘帝尊以信亞夫之軍，曷爲不能用頗、牧？彼將有激」。

〔二三〕**集解** 服虔曰：「車戰之士。」

七年，景帝立，以唐爲楚相，免。武帝立，求賢良，舉馮唐。唐時年九十餘，不能復爲官，乃以唐子馮遂爲郎。遂字王孫，亦奇士，與余善。

太史公曰：張季之言長者，守法不阿意；馮公之論將率，有味哉！有味哉！語曰「不知其人，視其友」。二君之所稱誦，可著廊廟。書曰「不偏不黨，王道蕩蕩；不黨不偏，王道便便」。張季、馮公近之矣。

〔一〕【集解】徐廣曰：「一作『辨』。」

【索隱述贊】張季未偶，見識袁盎。太子懼法，嗇夫無狀。驚馬罰金，盜環悟上。馮公白首，味哉論將。因對李齊，收功魏尚。

史記卷一百三

萬石張叔列傳第四十三

萬石君〔一〕名奮，其父趙人也，〔二〕姓石氏。趙亡，徙居溫。〔三〕高祖東擊項籍，過河內，時奮年十五，爲小吏，侍高祖。高祖與語，愛其恭敬，問曰：「若何有？」對曰：「奮獨有母，不幸失明。家貧。有姊，能鼓琴。」高祖曰：「若能從我乎？」曰：「願盡力。」於是高祖召其姊爲美人，以奮爲中涓，〔四〕受書謁，徙其家長安中戚里，〔五〕以姊爲美人故也。其官至孝文時，積功勞至大中大夫。無文學，恭謹無與比。

〔一〕正義 以父及四子皆二千石，故號奮爲萬石君。

〔二〕正義 洛州邯鄲本趙國都。

〔三〕正義 故溫城在懷州溫縣三十里，漢縣在也。

〔四〕正義 顏師古云：「中涓，官名。居中而涓絮也。」如淳云：「主通書謁出入命也。」

〔五〕索隱 小顏云：「於上有姻戚者皆居之，故名其里爲戚里。」長安記戚里在城內。

文帝時，東陽侯張相如爲太子太傅，免。選可爲傅者，皆推奮，奮爲太子太傅。及孝景卽位，以爲九卿；迫近，憚之，^{〔一〕}徙奮爲諸侯相。奮長子建，次子甲，次子乙，^{〔二〕}次子慶，皆以馴行孝謹，^{〔三〕}官皆至二千石。於是景帝曰：「石君及四子皆二千石，人臣尊寵乃集其門。」號奮爲萬石君。

〔一〕集解 張晏曰：「以其恭敬履度，故難之。」

〔二〕集解 徐廣曰：「一作『仁』。」 正義 顏師古云：「史失其名，故云甲乙耳，非其名也。」

〔三〕集解 徐廣曰：「馴，一作『訓』。」 索隱 馴音巡。

孝景帝季年，萬石君以上大夫祿歸老于家，以歲時爲朝臣。過宮門闕，萬石君必下車趨，見路馬必式焉。子孫爲小吏，來歸謁，萬石君必朝服見之，不名。子孫有過失，不譙讓，^{〔一〕}爲便坐，^{〔二〕}對案不食。然後諸子相責，因長老肉袒固謝罪，改之，乃許。子孫勝冠者在側，雖燕^{〔三〕}居必冠，申申如也。僮僕訢訢如也，^{〔四〕}唯謹。上時賜食於家，必稽首俯伏而食之，如在上前。其執喪，哀戚甚悼。子孫遵教，亦如之。萬石君家以孝謹聞乎郡國，雖齊魯諸儒質行，皆自以爲不及也。

〔一〕索隱 上才笑反。譙讓，責讓。

〔三〕索隱 上于僞反，下「便」音婢，縣反。蓋謂爲之不處正室，別坐他處，故曰便坐。坐音如字。便坐，非正坐處也。故王者所居有便殿、便房，義亦然也。音婢見反，亦通也。

〔三〕索隱 燕謂閒燕之時。燕，安也。

〔四〕集解 晉灼曰：「訢，許慎曰古『欣』字。」韋昭曰：「聲和貌。」

建元二年，郎中令〔一〕王臧以文學獲罪。皇太后以爲儒者文多質少，今萬石君家不言而躬行，乃以長子建爲郎中令，少子慶爲內史。〔二〕

〔一〕正義 百官表云郎中令秦官，掌居宮殿門戶。武帝太初元年更名光祿勳也。

〔二〕正義 百官表云內史，周官，秦因之，掌治京師。景帝分置左內史。武帝太初元年，更名京兆尹，左內史名左馮翊也。

建老白首，萬石君尚無恙。建爲郎中令，每五日洗沐歸謁親，〔一〕入子舍，〔二〕竊問侍者，取親中裙廁綌，身自浣滌，〔三〕復與侍者，不敢令萬石君知，以爲常。建爲郎中令，事有可言，屏人恣言，極切，至廷見，如不能言者。是以上乃親尊禮之。

〔一〕集解 文穎曰：「郎五日一下。」正義 孔文祥云：「建爲郎中令，卽光祿勳，九卿之職也。直五日一下也。」按：

五日一下直，洗沐。

〔二〕索隱 案劉氏謂小房內，非正堂也。小顏以爲諸子之舍，若今諸房也。

〔三〕集解徐廣曰：「脩，築垣短板也，音住。廁，謂廁溷垣牆，建隱於其側浣滌也。一讀『脩』爲『竇』，竇音豆。言

建又自洗滌廁竇。廁竇，瀉除穢惡之穴也。」呂靜曰：「械，箭，製器也，音威豆。」駱案蘇林曰：「脩音投。」賈逵解

周官，械，虎子也。箭，行清也。」孟康曰：「廁，行清；箭，行中受糞者也。東南人謂鑿木空中如曹謂之箭。」晉灼

曰：「今世謂反閉小袖衫爲『侯箭（廁）』，此最廁近身之衣也。」索隱案：親謂父也。中幫，近身衣也。蘇林曰

「脩音投，又音豆。」孟康曰：「廁，行清；脩，行清中受糞函也。言建又自洗盪廁竇。竇者，洗除穢汗之穴也。」又

晉灼云：「今世謂反閉小袖衫爲『侯脩』，此最廁近身之衣。」而徐廣云：「脩，短板，以築廁牆」，未知其義何從，恐非

也。

萬石君徙居陵里。〔一〕內史慶醉歸，人外門不下車。萬石君聞之，不食。慶恐，肉袒請

罪，不許。舉宗及兄建肉袒，萬石君讓曰：「內史貴人，人間里，里中長老皆走匿，而內史坐

車中自如，固當！」乃謝罷慶。慶及諸子弟入里門，趨至家。

〔一〕集解徐廣曰：「陵，一作『鄰』。」

〔索隱〕小顏云：「陵里，里名，在茂陵，非長安之戚里也。」

〔正義〕茂陵邑中里

也。茂陵故城，漢茂陵縣也，在雍州始平縣東北二十里。

萬石君以元朔五年中卒。長子郎中令建哭泣哀思，扶杖乃能行。歲餘，建亦死。諸子

孫咸孝，然建最甚，甚於萬石君。

建爲郎中令，書奏事，事下，建讀之，曰：「誤書！」『馬』者與尾當五，今乃四，不足一。〔二〕

上譴死矣！」甚惶恐。其爲謹慎，雖他皆如是。

〔一〕集解服虔曰：「作『馬』字下曲而五，建時上事書誤作四。」

〔正義〕顏師古云：「『馬』字下曲者尾，并四點爲四

足，凡五。」

萬石君少子慶爲太僕，御出，上問車中幾馬，慶以策數馬畢，舉手曰：「六馬。」慶於諸子中最爲簡易矣，〔一〕然猶如此。爲齊相，舉齊國皆慕其家行，不言而齊國大治，爲立石相祠。

〔一〕〔正義〕漢書「慶爲太僕，御出，上問車中幾馬，慶以策數馬畢，舉手曰『六馬』」。按：慶於兄弟最爲簡易矣，然猶如此也。

元狩元年，上立太子，選羣臣可爲傅者，慶自沛守爲太子太傅，七歲遷爲御史大夫。

元鼎五年秋，丞相有罪，罷。〔二〕制詔御史：「萬石君先帝尊之，子孫孝，其以御史大夫慶爲丞相，封爲牧丘侯。」是時漢方南誅兩越，東擊朝鮮，北逐匈奴，西伐大宛，中國多事。天子巡狩海內，修上古神祠，封禪，興禮樂。公家用少，桑弘羊等致利，王溫舒之屬峻法，兒寬等推文學至九卿，更進用事，事不關決於丞相，丞相醇謹而已。在位九歲，無能有所匡言。嘗欲請治上近臣所忠、九卿咸〔三〕宣罪，不能服，反受其過，贖罪。

〔一〕集解趙周坐酎金免。

〔索隱〕案漢書而知也。

〔二〕集解服虔曰：「音『減損』之『減』。」

元封四年中，關東流民二百萬口，無名數者四十萬，〔一〕公卿議欲請徙流民於邊以適之。上以爲丞相老謹，不能與其議，乃賜丞相告歸，而案御史大夫以下議爲請者。丞相慙不任職，乃上書曰：「慶幸得待罪丞相，罷駑無以輔治，城郭倉庫空虛，民多流亡，罪當伏斧質，上不忍致法。願歸丞相侯印，乞骸骨歸，避賢者路。」天子曰：「倉廩既空，民貧流亡，而君欲請徙之，搖蕩不安，動危之，而辭位，君欲安歸難乎？」〔三〕以書讓慶，慶甚慙，遂復視事。

〔一〕索隱案：小顏云「無名數，若今之無戶籍」。

〔二〕索隱難音乃彈反。言欲歸於何人。

慶文深審謹，然無他大略，爲百姓言。後三歲餘，太初二年中，丞相慶卒，謚爲恬侯。慶中子德，慶愛用之，上以德爲嗣，代侯。後爲太常，坐法當死，贖免爲庶人。慶方爲丞相，諸子孫爲吏更至二千石者十三人。及慶死後，稍以罪去，孝謹益衰矣。

建陵侯〔一〕衛綰者，代大陵人也。〔二〕綰以戲車爲郎，〔三〕事文帝，功次遷爲中郎將，醇謹無他。孝景爲太子時，召上左右飲，而綰稱病不行。〔四〕文帝且崩時，屬孝景曰：「綰長者，

善遇之。」及文帝崩，景帝立，歲餘不唯呵，^{〔五〕}綰，綰日以謹力。

〔一〕〔正義〕括地志云：「漢建陵縣故城在沂州丞縣界也。」

〔二〕〔索隱〕地理志縣名，在代。^{〔正義〕}括地志云：「大陵縣城在并州文水縣北十二里。」按：代王耳時都中都，大陵

屬焉，故言代大陵人也。

〔三〕〔集解〕應劭曰：「能左右超乘也。」如淳曰：「櫟機轡之類。」〔索隱〕按：應劭云「能左右超乘」。案今亦有弄車

之戲。櫟音歷，謂超踰之也。轡音衛，謂車軸頭也。

〔四〕〔集解〕張晏曰：「恐文帝謂豫有二心以事太子。」

〔五〕〔索隱〕誰何二音。誰何猶借訪也。一作「譙呵」。譙，責讓也，言不嗔責綰也。

景帝幸上林，詔中郎將參乘，還而問曰：「君知所以得參乘乎？」綰曰：「臣從車士幸得以功次遷爲中郎將，不自知也。」上問曰：「吾爲太子時召君，君不肯來，何也？」對曰：「死罪，實病。」上賜之劍。綰曰：「先帝賜臣劍凡六，劍不敢奉詔。」上曰：「劍，人之所施易，^{〔一〕}獨至今乎？」綰曰：「具在。」上使取六劍，劍尚盛，未嘗服也。郎官有譴，常蒙其罪，不與他將爭；有功，常讓他將。上以爲廉，忠實無他腸，^{〔二〕}乃拜綰爲河閒王太傅。吳楚反，詔綰爲將，將河閒兵擊吳楚有功，拜爲中尉。三歲，以軍功，孝景前六年中封綰爲建陵侯。

〔一〕〔集解〕如淳曰：「施讀曰移。言劍者人之所好，故多數移易買換之也。」〔索隱〕上音移，下音亦。

〔二〕〔索隱〕小顏云：「心腸之內無他惡也。」

其明年，上廢太子，誅栗卿之屬。^{〔一〕}上以爲綰長者，不忍，乃賜綰告歸，而使郅都治捕栗氏。既已，上立膠東王爲太子，召綰，拜爲太子太傅。久之，遷爲御史大夫。五歲，代桃侯舍^{〔二〕}爲丞相，朝奏事如職所奏。^{〔三〕}然自初官以至丞相，終無可言。天子以爲敦厚，可相少主，尊寵之，賞賜甚多。

^{〔一〕}集解蘇林曰：「栗太子舅也。」如淳曰：「栗氏親屬也，卿，其名也。」索隱栗姬之兄弟。蘇林云栗太子之舅也。

^{〔二〕}正義顏師古云：「太子廢爲臨江王，故誅其外家親屬也。」

^{〔三〕}正義故桃城在渭州胙城縣東三十里，劉舍所封也。

^{〔三〕}索隱以言但守職分而已，不別有所奏議也。

爲丞相三歲，景帝崩，武帝立。建元年中，丞相以景帝疾時諸官囚多坐不辜者，而君不任職，免之。其後綰卒，子信代。坐酎金失侯。

塞侯^{〔一〕}直不疑者，南陽人也。^{〔二〕}爲郎，事文帝。其同舍有告歸，誤持同舍郎金去，已而金主覺，妄意不疑，^{〔三〕}不疑謝有之，買金償。而告歸者來而歸金，而前郎亡金者大慙，以此稱爲長者。文帝稱舉，稍遷至太中大夫。^{〔四〕}朝廷見，人或毀曰：「不疑狀貌甚美，然獨無

柰其善盜嫂〔五〕何也。不疑聞，曰：「我乃無兄。」然終不自明也。

〔一〕正義 上音先代反。古塞國，今陝州桃林縣以西至潼關，皆桃林塞地也。

〔二〕索隱 案：塞，國名，今桃林之塞也。直，姓也；不疑，名也。與雋不疑同字。

〔三〕索隱 謂妄疑其盜取將也。

〔四〕集解 徐廣曰：「漢書云稱爲長者，稍遷至太中大夫，無『文帝稱舉』四字。」

〔五〕索隱 案：小顏云盜謂私之。

吳楚反時，不疑以二千石將兵擊之。景帝後元年，拜爲御史大夫。天子修吳楚時功，乃封不疑爲塞侯。武帝建元年中，與丞相綰俱以過免。

不疑學老子言。其所臨，爲官如故，唯恐人知其爲吏跡也。不好立名稱，稱爲長者。不疑卒，子相如代。孫望，坐酎金失侯。〔一〕

〔一〕索隱 漢書作彭祖，坐酎金，國除。

郎中令周文者，名仁，其先故任城人也。〔二〕以醫見。景帝爲太子時，拜爲舍人，積功稍遷，孝文帝時至太中大夫。景帝初即位，拜仁爲郎中令。

〔一〕正義 任城，兗州縣也。

仁爲人陰重不泄，常衣敝補衣溺袴，〔一〕期爲不絜清，〔二〕以是得幸。景帝入卧内，於後宮祕戲，〔三〕仁常在旁。至景帝崩，仁尚爲郎中令，終無所言。上時問人，〔四〕仁曰：「上自察之。」然亦無所毀。以此景帝再自幸其家。家徙陽陵。上所賜甚多，然常讓，不敢受也。諸侯羣臣賂遺，終無所受。

〔一〕集解 服虔曰：「質重不泄人之陰謀也。」張晏曰：「陰重不泄，下溼，故溺袴，是以得比宦者，出入後宮。仁有子孫，先未得此病時所生。」韋昭曰：「陰重，如今帶下病泄利。」

〔索隱〕案：其解二，各有理。服虔云「周仁性質重，不泄人之陰謀也」。小顏云「陰，密也，爲性密重，不泄人言也。霍去病少言不泄，亦其類也」。其人又常衣弊補衣及溺袴，故爲不絜清之服，是以得幸入卧内也。又張晏云「陰重不泄，陰下溼，故溺袴，是以得比宦者，出入後宮也。仁有子孫者，先未得此疾病所生也」。二者未知誰得其實也。

〔三〕索隱 謂心中常期不絜之服，則「期」是「故」之意也。小顏亦同。〔正義〕清，清淨；期，猶常也。言爲不絜淨，下溼，故得人卧内後宮，比宦者。

〔三〕索隱 謂後宮中戲劇所宜祕也。

〔四〕正義 顏師古云：「問以他人之善惡也。」

武帝立，以爲先帝臣，重之。仁乃病免，以二千石祿歸老，子孫咸至大官矣。

御史大夫張叔者，名歐，〔一〕安丘侯說之庶子也。〔二〕孝文時以治刑名言，〔三〕事太子。然歐雖治刑名家，〔四〕其人長者。景帝時尊重，常爲九卿。至武帝元朔四年，韓安國免，詔拜歐爲御史大夫。自歐爲吏，未嘗言案人，專以誠長者處官。官屬以爲長者，亦不敢大欺。上具獄事，有可卻，卻之；不可者，不得已，爲涕泣面對而封之。其愛人如此。

〔一〕集解 史記音隱曰：「歐，於友反。」 索隱 歐音烏後反。漢書作「歐」，孟康音驅也。

〔二〕集解 徐廣曰：「張說起於方與縣，從高祖以入漢也。」 索隱 說音悅。

〔三〕集解 韋昭曰：「有刑名之書，欲令名實相副也。」 索隱 案劉向別錄云：「申子學號曰『刑名家』者，循名以責

實，其尊君卑臣，崇上抑下，合於六經也。」說者云刑名家即太史公所說六家之二也。

〔四〕正義 刑，刑家也。名，名家也。在太史公自有傳，言治刑法及名實也。

老病篤，請免。於是天子亦策罷，以上大夫祿歸老于家。家於陽陵。子孫咸至大官矣。

太史公曰：仲尼有言曰「君子欲訥於言，〔一〕而敏於行」，其萬石、建陵、張叔之謂邪？是

以其教不肅而成，不嚴而治。塞侯微巧，〔三〕而周文處調，〔三〕君子譏之，爲其近於佞也。然斯可謂篤行君子矣！

〔一〕集解徐廣曰：『訥』字多作『詘』，音同耳。古字假借。』

〔三〕索隱功微。案：直不疑以吳楚反時爲二千石將，景帝封之，功微也。

爲吏跡，不好立名稱，稱爲長者，是微巧也。

〔三〕索隱周文處調者，謂爲郎中令，陰重，得幸出入卧內也。正義上時問人，仁曰「上自察之」；上所賜，常不

受；又諸侯羣臣賂遺，終無所受。此爲處調。故君子譏此二人，爲其近於佞也。

【索隱述贊】萬石孝謹，自家形國。郎中數馬，內史匍匐。綰無他腸，塞有陰德。刑名張歐，垂涕恤獄。敏行訥言，俱嗣芳躅。

史記卷一百四

田叔列傳第四十四

田叔〔一〕者，趙陘城人〔二〕也。其先，齊田氏苗裔也。叔喜劍，學黃老術於樂巨公〔三〕所。叔爲人刻廉自喜，喜游諸公。〔四〕趙人舉之趙相趙午，午言之趙王張敖所，趙王以爲郎中。數歲，切直廉平，趙王賢之，未及遷。

〔一〕〔索隱〕案下文，字少卿。

〔二〕〔索隱〕陘音刑。按：縣名也，屬中山。

〔三〕〔索隱〕本燕人，樂毅之後。〔正義〕樂，姓；巨公，名。

〔四〕〔正義〕喜音許記反。諸公謂丈人行也。

會陳豨反代，〔一〕漢七年，高祖往誅之，過趙，趙王張敖自持案進食，禮恭甚，高祖箕踞罵之。是時趙相趙午等數十人皆怒，謂張王曰：「王事上禮備矣，今遇王如是，臣等請爲亂。」趙王齧指出血，曰：「先人失國，微陛下，臣等當蟲出。」〔二〕公等柰何言若是！毋復出口

矣！於是貫高等曰：「王長者，不倍德。」卒私相與謀弑上。會事發覺，〔三〕漢下詔捕趙王及羣臣反者。於是趙午等皆自殺，唯貫高就繫。是時漢下詔書：「趙有敢隨王者梟三族。」唯孟舒、田叔等十餘人赭衣自髡鉗，稱王家奴，隨趙王敖至長安。貫高事明白，趙王敖得出，廢爲宣平侯，乃進言田叔等十餘人。上盡召見，與語，漢廷臣毋能出其右者，上說，盡拜爲郡守、諸侯相。叔爲漢中守十餘年，會高后崩，諸呂作亂，大臣誅之，立孝文帝。

〔一〕集解 徐廣曰：「七年，韓王信反，高帝征之。十年，代相陳豨反。」

〔二〕索隱 案：謂死而蟲出也。左傳「齊桓公死，未葬，蟲流於戶外」是也。

〔三〕集解 徐廣曰：「九年十二月捕貫高等也。」

孝文帝既立，召田叔問之曰：「公知天下長者乎？」對曰：「臣何足以知之！」上曰：「公，長者也，宜知之。」叔頓首曰：「故雲中守孟舒，長者也。」是時孟舒坐虜大人塞盜劫，雲中尤甚，免。上曰：「先帝置孟舒雲中十餘年矣，虜曾一人，孟舒不能堅守，毋故士卒戰死者數百人。長者固殺人乎？公何以言孟舒爲長者也？」叔叩頭對曰：「是乃孟舒所以爲長者也。夫貫高等謀反，上下明詔，趙有敢隨張王，罪三族。然孟舒自髡鉗，隨趙王敖之所在，欲以身死之，豈自知爲雲中守哉！漢與楚相距，士卒罷敝。匈奴冒頓新服北夷，來爲邊害，孟舒知士卒罷敝，不忍出言，士爭臨城死敵，如子爲父，弟爲兄，以故死者數百人。孟舒

豈故驅戰之哉！是乃孟舒所以爲長者也。」於是上曰：「賢哉孟舒！復召孟舒以爲雲中守。」

後數歲，叔坐法失官。梁孝王使人殺故吳相袁盎，景帝召田叔案梁，具得其事，還報。景帝曰：「梁有之乎？」叔對曰：「死罪！有之。」上曰：「其事安在？」田叔曰：「上毋以梁事爲也。」上曰：「何也？」曰：「今梁王不伏誅，是漢法不行也；如其伏法，而太后食不甘味，卧不安席，此憂在陛下也。」景帝大賢之，以爲魯相。

魯相初到，民自言相，訟王取其財物百餘人。田叔取其渠率二十人，各笞五十，餘各搏二十，〔一〕怒之曰：「王非若主邪？何自敢言若主！」魯王聞之大慙，發中府錢，〔二〕使相償之。相曰：「王自奪之，使相償之，是王爲惡而相爲善也。」相毋與償之。於是王乃盡償之。

〔一〕索隱 搏音博。

〔二〕正義 王之財物所藏也。

魯王好獵，〔一〕相常從人苑中，〔二〕王輒休相就館舍，相出，常暴坐〔三〕待王苑外。王數使人請相休，終不休，曰：「我王暴露苑中，我獨何爲就舍！」魯王以故不大出游。

〔一〕正義 魯共王，景帝子，都兗州曲阜縣故魯城中。

〔二〕〔正義〕括地志云：「嬰相圃在兗州曲阜縣南三十里。」禮記云孔子射於嬰相之圃，觀者如堵牆也。」

〔三〕〔索隱〕上音步卜反。

數年，叔以官卒，魯以百金祠，少子仁不受也，曰：「不以百金傷先人名。」

仁以壯健爲衛將軍。〔一〕舍人，數從擊匈奴。衛將軍進言仁，仁爲郎中。數歲，爲二千石丞相長史，失官。其後使刺舉三河。〔二〕上東巡，仁奏事有辭，上說，拜爲京輔都尉。〔三〕月餘，上遷拜爲司直。〔四〕數歲，坐太子事。〔五〕時左丞相自將兵，〔六〕令司直田仁主閉守城門，坐縱太子，下吏誅死。仁發兵，長陵令車千秋上變仁，仁族死。〔七〕

〔一〕〔集解〕張晏曰：「衛青也。」

〔二〕〔正義〕百官表云：「監御史，秦官，掌監郡，漢省，丞相遣御史分刺州，不常置也。」案：三河，河南、河東、河內也。

〔三〕〔正義〕百官表云：「右扶風、左馮翊、京兆尹是爲三輔。」元鼎四年，置三輔都尉。服虔云：「皆治長安城中也。」

〔四〕〔集解〕漢書百官表曰：「武帝元狩五年，初置司直，秩比二千石，掌佐丞相舉不法。」〔正義〕百官表云：「武帝元

狩五年，初置司直，秩比二千石，掌佐丞相舉不法也。」

〔五〕〔正義〕謂戾太子。

〔六〕〔集解〕徐廣曰：「劉屈氂時爲丞相也。」

〔七〕〔集解〕徐廣曰：「涇城，縣名也。」〔正義〕今定州也。

太史公曰：孔子稱曰「居是國必聞其政」，田叔之謂乎！義不忘賢，明主之美以救過。仁與余善，余故并論之。

褚先生曰：臣爲郎時，聞之曰田仁故與任安相善。任安，滎陽人也。少孤貧困，爲人將車〔一〕之長安，留，求事爲小吏，未有因緣也，因占著名數。〔二〕武功，扶風西界小邑也，谷口蜀剗道近山。〔三〕安以爲武功小邑，無豪，易高也，〔四〕安留，代人爲求盜亭父。〔五〕後爲亭長。〔六〕邑中人民俱出獵，任安常爲人分麋鹿雉兔，部署老小當壯劇易處，衆人皆喜，曰：「無傷也，任少卿〔七〕分別平，有智略。」明日復合會，會者數百人。任少卿曰：「某子甲何爲不來乎？」諸人皆怪其見之疾也。其後除爲三老，〔八〕舉爲親民，出爲三百石長，〔九〕治民。坐上行出游共帳不辦，斥免。

〔一〕索隱 將車猶御車也。

〔二〕索隱 言卜占而自占著家口名數，隸於武功，猶今附籍然也。占音之豔反。

〔三〕正義 括地志云：「漢武功縣在渭水南，今盤屋縣西界也。駱谷間在雍州之盤屋縣西南二十里，開駱谷道以通梁州也。」按：行谷有棧道也。

〔四〕索隱 易音以豉反。言邑小無豪，易得高名也。

〔五〕集解郭璞曰：「亭卒也。」正義安留武功，替人爲求盜亭父也。應劭云：「舊時亭有兩卒，其一爲亭父，掌關

閉掃除；一爲求盜，掌逐捕盜賊也。」

〔六〕正義百官表云：「十里一亭，亭有長也。」

〔七〕正義少卿，安字。

〔八〕正義百官表云：「十亭一鄉，鄉有三老一人，掌教化也。」

〔九〕正義百官表云：「萬戶已上爲令，秩千石至六百石；減萬戶爲長，秩五百石至三百石。皆有丞、尉也。」

乃爲衛將軍舍人，與田仁會，俱爲舍人，居門下，同心相愛。此二人家貧，無錢用
以事將軍家監，家監使養惡齧馬。兩人同牀卧，仁竊言曰：「不知人哉家監也！」任安
曰：「將軍尚不知人，何乃家監也！」衛將軍「一」從此兩人過平陽主，主家令兩人與騎
奴同席而食，此二子拔刀列斷席別坐。主家皆怪而惡之，莫敢呵。

〔一〕正義衛青也。

其後有詔募擇衛將軍舍人以爲郎，將軍取舍人中富給者，令具輦馬絳衣玉具劍，
欲人奏之。會賢大夫少府趙禹來過衛將軍，將軍呼所舉舍人以示趙禹。趙禹以次問
之，十餘人無一人習事有智略者。趙禹曰：「吾聞之，將門之下必有將類。」傳曰：「不知
其君視其所使，不知其子視其所友。」今有詔舉將軍舍人者，欲以觀將軍而能得賢者

文武之士也。今徒取富人子上之，又無智略，如木偶人衣之綺繡耳，將柰之何？」於是趙禹悉召衛將軍舍人百餘人，以次問之，得田仁、任安，曰：「獨此兩人可耳，餘無可用者。」衛將軍見此兩人貧，意不平。趙禹去，謂兩人曰：「各自具牽馬新絳衣。」兩人對曰：「家貧無用具也。」將軍怒曰：「今兩君家自爲貧，何爲出此言？鞅鞅如有移德於我者，何也？」將軍不得已，上籍以聞。有詔召見衛將軍舍人，此二人前見，詔問能略，相推第也。田仁對曰：「提桴鼓立軍門，使士大夫樂死戰鬪，仁不及任安。」任安對曰：「夫決嫌疑，定是非，辯治官，使百姓無怨心，安不及仁也。」武帝大笑曰：「善。」使任安護北軍，使田仁護邊田穀於河上。此兩人立名天下。

〔一〕〔集解〕徐廣曰：「移猶施。」

其後用任安爲益州刺史，〔一〕以田仁爲丞相長史。〔三〕

〔一〕〔正義〕地理志云武帝改曰梁州。百官表云：「元封五年，初置部刺史，掌奉詔條察州，秩六百石，員十三。」按：若今採訪按察六條也。

〔三〕〔正義〕百官表云：「丞相有兩長史，秩千石。」

田仁上書言：「天下郡太守多爲姦利，三河尤甚，臣請先刺舉三河。三河太守皆內倚中貴人，與三公有親屬，無所畏懼，宜先正三河以警天下姦吏。」是時河南、河內太

守皆御史大夫杜父兄弟也，「一」河東太守石丞相子孫也。「二」是時石氏九人爲二千石，方盛貴。田仁數上書言之。杜大夫及石氏使人謝，謂田少卿曰：「吾非敢有語言也，願少卿無相誣汙也。」仁已刺三河，三河太守皆下吏誅死。仁還奏事，武帝說，以仁爲能不畏疆禦，拜仁爲丞相司直，威振天下。

「一」集解 杜，杜周也。

「二」正義 謂石慶。

其後逢太子有兵事，丞相自將兵，使司直主城門。司直以爲太子骨肉之親，父子之間不甚欲近，去之諸陵過。是時武帝在甘泉，使御史大夫暴君「一」下責丞相「何爲縱太子」，丞相對言「使司直部守城門而開太子」。上書以聞，請捕繫司直。司直下吏，誅死。

「一」集解 徐廣曰：「暴勝之爲御史大夫。」

是時任安爲北軍使者護軍，太子立車北軍南門外，召任安，與節令發兵。安拜受節，入，閉門不出。武帝聞之，以爲任安爲詳邪，「一」不傳事，何也？「二」任安答辱北軍錢官小吏，小吏上書言之，以爲受太子節，言「幸與我其鮮好者」。「三」書上聞，武帝曰：「是老吏也，見兵事起，欲坐觀成敗，見勝者欲合從之，有兩心。安有當死之罪甚衆，吾

常活之，今懷詐，有不忠之心。」下安吏，誅死。

〔一〕集解 徐廣曰：「佯，或作『詳』也。」索隱 詳音羊。謂詐受節不發兵，不傳會太子也。

〔二〕索隱 不傳事可也。傳音附，謂不附會也。

〔三〕索隱 鮮音仙。謂太子請其鮮好之兵甲也。

夫月滿則虧，物盛則衰，天地之常也。知進而不知退，久乘富貴，禍積爲崇。故范蠡之去越，辭不受官位，名傳後世，萬歲不忘，豈可及哉！後進者慎戒之。

【索隱述贊】田叔長者，重義輕生。張王既雪，漢中是榮。孟舒見廢，抗說相明。按梁以禮，相魯得情。子仁坐事，刺舉有聲。

史記卷一百五

扁鵲倉公列傳第四十五

〔索隱〕王劭云：「此醫方，宜與日者、龜策相接，不合列於此，後人誤也。」
〔正義〕此傳是醫方，合與龜策、日者相次。以淳于意孝文帝時醫，奉詔問之，又爲齊太倉令，故太史公以次述之。扁鵲乃春秋時良醫，不可別序，故引爲傳首，太倉公次之也。

扁鵲者，〔一〕勃海郡鄭人也，〔二〕姓秦氏，名越人。少時爲人舍長。〔三〕舍客長桑君〔四〕過，〔五〕扁鵲獨奇之，常謹遇之。長桑君亦知扁鵲非常人也。出入十餘年，乃呼扁鵲私坐，閒與語曰：〔六〕「我有禁方，年老，欲傳與公，公毋泄。」扁鵲曰：「敬諾。」乃出其懷中藥予扁鵲：「飲是以上池之水，三十日當知物矣。」〔七〕乃悉取其禁方書盡與扁鵲。忽然不見，殆非人也。扁鵲以其言飲藥三十日，視見垣一方人。〔八〕以此視病，盡見五藏癥結，〔九〕特以診脈〔一〇〕爲名耳。爲醫或在齊，〔一一〕或在趙。在趙者名扁鵲。

〔一二〕〔正義〕黃帝八十一難序云：「秦越人與軒轅時扁鵲相類，仍號之爲扁鵲。又家於盧國，因命之曰盧醫也。」

〔三〕集解徐廣曰：「鄭當爲『鄭』。鄭，縣名，今屬河閒。」索隱案：勃海無鄭縣，當作鄭縣，音莫，今屬河閒。

〔三〕索隱爲舍長。劉氏云：「守客館之帥。」正義長音丁丈反。

〔四〕索隱隱者，蓋神人。

〔五〕正義過音戈。

〔六〕正義閒音閑。

〔七〕索隱案：舊說云上池水謂水未至地，蓋承取露及竹木上水，取之以和藥，服之三十日，當見鬼物也。

〔八〕索隱方猶邊也。言能隔牆見彼邊之人，則眼通神也。

〔九〕正義五藏謂心、肺、脾、肝、腎也。六府謂大小腸、胃、膽、膀胱、三焦也。王叔和脈經云：「左手脈橫，癥在左；

右手脈橫，癥在右。脈，頭大者在上，頭小者在下。兩手脈，結上部者濡，結中部者緩，結三里者豆起。陽邪來見浮洪，陰邪來見沈細，水穀來見堅實。」

〔一〇〕索隱診，鄒氏音丈忍反，劉氏音陳忍反。司馬彪云：「診，占也。」

〔一一〕正義號盧醫。今濟州盧縣。

當晉昭公時，〔一〕諸大夫彊而公族弱，趙簡子爲大夫，專國事。簡子疾，五日不知人，〔二〕大夫皆懼，於是召扁鵲。扁鵲入視病，出，董安于問扁鵲，扁鵲曰：「血脈治也，而何怪！昔秦穆公嘗如此，七日而寤。寤之日，告公孫支與子輿，〔三〕曰：『我之帝所甚樂。吾所以久

者，適有所學也。〔四〕帝告我：『晉國且大亂，五世不安。其後將霸，未老而死。霸者之子且令而國男女無別。』公孫支書而藏之，秦策於是出。夫獻公之亂，文公之霸，而襄公敗秦師於殽而歸縱淫，此子之所聞。今主君之病與之同，不出三日必閒，閒必有言也。」

〔一〕索隱案左氏，簡子專國在定、頃二公之時，非當昭公之世。且趙世家敘此事亦在定公之初。

〔二〕索隱案：韓子云「十日不知人」，所記異也。

〔三〕索隱案：二子皆秦大夫。公孫支，子桑也。子與未詳。

〔四〕索隱適音釋。言我適來有所受教命，故云學也。

居二日半，簡子寤，語諸大夫曰：「我之帝所甚樂，與百神游於鈞天，廣樂九奏萬舞，不類三代之樂，其聲動心。有一熊欲援我，帝命我射之，中熊，熊死。有羆來，我又射之，中羆，羆死。帝甚喜，賜我二笥，皆有副。吾見兒在帝側，帝屬我一翟犬，曰：『及而子之壯也以賜之。』帝告我：『晉國且世衰，七世而亡。』」羆姓將大敗周人於范魁之西，〔二〕而亦不能有也。〔一〕董安于受言，書而藏之。以扁鵲言告簡子，簡子賜扁鵲田四萬畝。

〔一〕正義晉定公、出公、哀公、幽公、烈公、孝公、靜公爲七世。靜公二年，爲三晉所滅。據此及趙世家，簡子疾在定公之十一年也。

〔二〕正義羆，趙氏本姓也。周人謂衛也。晉亡之後，趙成侯三年，伐衛，取鄉邑七十三是也。賈逵云「小阜曰魁」也。

其後扁鵲過虢。「一」虢太子「二」死，「三」扁鵲至虢宮門下，問中庶子喜方者「四」曰：「太子何病，國中治穰過於衆事？」中庶子曰：「太子病血氣不時，交錯而不得泄，暴發於外，則爲中害。精神不能止邪氣，邪氣畜積而不得泄，是以陽緩而陰急，故暴蹙而死。」「五」扁鵲曰：「其死何如時？」曰：「鷄鳴至今。」曰：「收乎？」「六」曰：「未也，其死未能半日也。」「言臣齊勃海秦越人也，家在於鄭，未嘗得望精光侍謁於前也。聞太子不幸而死，臣能生之。」中庶子曰：「先生得無誕之乎？何以言太子可生也！」臣聞上古之時，醫有俞跗「七」治病不以湯液醴灑「八」鑱石橋引，案扞毒熨「九」一撥見病之應，因五藏之輸「一〇」乃割皮解肌，訣脈結筋，搦髓腦，揲荒「一一」爪幕「一二」湔浣「一三」腸胃，漱滌五藏，練精易形。先生之方能若是，則太子可生也；不能若是而欲生之，曾不可以告咳嬰之兒。」終日，扁鵲仰天歎曰：「夫子之爲方也，若以管窺天，以郄視文。越人之爲方也，不待切脈「一四」望色「一五」聽聲「一六」寫形「一七」言病之所在。聞病之陽，論得其陰；聞病之陰，論得其陽。「一八」病應見於大表，不出千里，決者至衆，不可曲止也。「一九」子以吾言爲不誠，試入診太子，當聞其耳鳴而鼻張，「二〇」循其兩股以至於陰，當尚溫也。」

「一」正義 陝州城，古虢國。又陝州河北縣東北下陽故城，古虢，卽晉獻公滅者。又洛州汜水縣古東虢國。而未知

扁鵲過何者，蓋號至此並滅也。

〔三〕**集解** 傳玄曰：「號是晉獻公時先是百二十餘年滅矣，是時焉得有號？」**索隱** 案：傳玄云「號是晉獻所滅，先

此百二十餘年，此時焉得有號」，則此云「號太子」，非也。然案號後改稱郭，春秋有郭公，蓋郭之太子也。

〔三〕**正義** 下云「色廢脈亂」，故形靜如死狀也。

〔四〕**索隱** 喜音許既反。喜，好也，愛也。方，方技之人也。**正義** 中庶子，古官號也。喜方，好方術，不書姓名也。

〔五〕**索隱** 歷音厥。**正義** 釋名云：「歷，氣從下歷起上行，外及心脅也。」

〔六〕**集解** 收謂棺斂。

〔七〕**索隱** 音與附。下又音跌。**正義** 與附二音。應劭云：「黃帝時將也。」

〔八〕**正義** 上音禮，下山解反。

〔九〕**索隱** 鑣音士咸反，謂石針也。擣音九兆反，謂爲按摩之法，天擣引身，如熊顧鳥伸也。扞音玩，亦謂按摩而玩弄身體使調也。毒熨謂毒病之處以藥物熨帖也。

〔一〇〕**索隱** 音束注反。**正義** 八十一難云：「肺之原出於太淵，心之原出於太陵，肝之原出於太衝，脾之原出於太

白，腎之原出於太谿，少陰之原出於兌骨，膽之原出於丘虛，胃之原出於衝陽，三焦之原出於陽池，膀胱之原出於京骨，大腸之原出於合谷，小腸之原出於腕骨。十二經皆以輸爲原也。」按：此五藏六府之輸也。

〔二〕**集解** 徐廣曰：「揲音舌。」**索隱** 揲音女角反。揲音舌。荒，膏荒也。

〔三〕**索隱** 幕音漠。漠，病也。謂以爪決之。**正義** 以爪決其闌幕也。

〔三〕**正義** 上子錢反，下胡管反。

〔一四〕正義黃帝素問云：「待切脈而知病。寸口六脈，三陰三陽，皆隨春夏秋冬夏觀其脈之變，則知病之逆順也。」楊玄操云：「切，按也。」

〔一五〕正義素問云：「面色青，脈當弦急；面色赤，脈當浮而短；面色黑，脈當沈浮而滑也。」

〔一六〕正義素問云：「好哭者肺病，好歌者脾病，好妄言者心病，好呻吟者腎病，好叫呼者肝病也。」

〔一七〕正義素問云：「欲得溫而不欲見人者藏家病，欲得寒而見人者府家病也。」

〔一八〕正義八十一難云：「陰病行陽，陽病行陰，故令幕在陰，俞在陽。」楊玄操云：「腹爲陰，五藏幕皆在腹，故云幕皆在陰。背爲陽，五藏俞皆在背，故云俞皆在陽。內藏有病則出行於陽，陽俞在背也。外體有病則入行於陰，陰幕在腹也。」鍼法云：「從陽引陰，從陰引陽也。」

〔一九〕索隱止，語助也。不可委曲具言。正義言皆有應見，不可曲言病之止住所在也。

〔二〇〕正義音漲。

中庶子聞扁鵲言，目眩然而不瞋，〔一〕舌橋然而不下，〔二〕乃以扁鵲言入報虢君。虢君聞之大驚，出見扁鵲於中闕，曰：「竊聞高義之日久矣，然未嘗得拜謁於前也。先生過小國，幸而舉之，偏國寡臣，〔三〕幸甚。有先生則活，無先生則棄捐填溝壑，長終而不得反。」言未卒，因噓唏服臆，〔四〕魂精泄橫，流涕長潛，〔五〕忽忽承映，〔六〕悲不能自止，容貌變更。扁鵲曰：「若太子病，所謂『尸蹩』者也。夫以陽入陰中，動胃〔七〕續〔八〕緣，〔九〕中經維絡，〔一〇〕別下於三焦、膀胱，〔一一〕是以陽脈下遂，〔一二〕陰脈上爭，〔一三〕會氣閉而不通，〔一四〕陰上而陽內行，下

內鼓而不起，上外絕而不爲使，上有絕陽之絡，下有破陰之紐，^{〔二〕}破陰絕陽，^{〔之〕}色^{〔已〕}廢^{〔二〕}脈亂，故形靜如死狀。太子未死也。夫以陽入陰支蘭藏者生，^{〔二七〕}以陰入陽支蘭藏者死。凡此數事，皆五藏蹙中之時暴作也。良工取之，^{〔二〕}拙者疑殆。」

〔一〕索隱 眩音縣。瞋音舜。

〔二〕索隱 橋音紀兆反。橋，舉也。

〔三〕索隱 謂號君自謙，云己是偏遠之國，寡小之臣也。

〔四〕索隱 上音皮力皮，下音憶。

〔五〕集解 徐廣曰：「一云『言未卒，因涕泣交流，噓唏不能自止』也。」索隱 潛音山。長潛謂長垂淚也。

〔六〕索隱 音接。映卽睫也。承映，言淚恆垂以承於睫也。

〔七〕正義 八十一難云：「脈居陰部反陽脈見者，爲陽入陰中，是陽乘陰也，脈雖時沈澹而短，此謂陽中伏陰也。脈居陽部而陰脈見者，是陰乘陽也，脈雖時沈滑而長，此謂陰中伏陽也。胃，水穀之海也。」

〔八〕索隱 音直延反。

〔九〕正義 纏音直延反。纏緣謂脈纏繞胃也。素問云「延緣落，絡脈也」，恐非此義也。

〔一〇〕集解 徐廣曰：「維，一作『結』。」正義 八十一難云：「十二經脈，十五絡脈，陽維陰維之脈也。」

〔二〕正義 八十一難云：「三焦者，水穀之道路，氣之所終始也。上焦在心下，下鬲在胃上口也。中焦在胃中脘，不上不下也。下焦在臍下，當膀胱上口也。膀胱者，津液之府也，溺九升九合也。」言經絡下于三焦及膀胱也。

〔三〕集解 徐廣曰：「一作『隊』。」

〔三〕正義遂音直類反。素問云：「陽脈下遂難反，陰脈上爭如弦也。」

〔四〕正義八十一難云：「府會太倉，藏會季脅，筋會陽陵泉，髓會絕骨，血會鬲俞，骨會大杼，脈會大淵，氣會三焦，此謂八會也。」

〔五〕正義女九反。素問云：「紐，赤脈也。」

〔六〕集解徐廣曰：「一作『發』。」

〔七〕正義素問云：「支者順節，蘭者橫節，陰支蘭膽藏也。」

〔八〕正義八十一難云：「知一爲下工，知二爲中工，知三爲上工。上工者十全九，中工者十全八，下工者十全六。」呂廣云：「五藏一病輒有五，解一藏爲下工，解三藏爲中工，解五藏爲上工也。」

扁鵲乃使弟子子陽〔一〕厲鍼砥石，〔二〕以取外三陽五會。〔三〕有閒，太子蘇乃使子豹爲五分之熨，以八減之齊〔四〕和煮之，以更〔五〕熨兩脅下。太子起坐。更適陰陽，但服湯二旬而復故。故天下盡以扁鵲爲能生死人。扁鵲曰：「越人非能生死人也，此自當生者，越人能使之起耳。」

〔一〕索隱陽，扁鵲之弟子也。

〔二〕索隱鍼音針。厲謂磨也。砥音脂。

〔三〕正義素問云：「手足各有三陰三陽：太陰，少陰，厥陰；太陽，少陽，陽明也。五會謂百會、胸會、聽會、氣會、臑會也。」

〔四〕〔案隱〕五分之熨，八減之齊。案：言五分之熨者，謂熨之令溫暖之氣入五分也。八減之齊者，謂藥之齊和所減有八。並越人當時有此方也。

〔五〕〔正義〕格彭反。

扁鵲過齊，齊桓侯客之。〔一〕人朝見，曰：「君有疾在腠理，〔二〕不治將深。」桓侯曰：「寡人無疾。」扁鵲出，桓侯謂左右曰：「醫之好利也，欲以不疾者爲功。」後五日，扁鵲復見，曰：「君有疾在血脈，不治恐深。」桓侯曰：「寡人無疾。」扁鵲出，桓侯不悅。後五日，扁鵲復見，曰：「君有疾在腸胃閒，不治將深。」桓侯不應。扁鵲出，桓侯不悅。後五日，扁鵲復見，望見桓侯而退走。桓侯使人問其故。扁鵲曰：「疾之居腠理也，湯熨之所及也；在血脈，鍼石之所及也；其在腸胃，酒醪之所及也；其在骨髓，雖司命無奈之何。今在骨髓，臣是以無請也。」後五日，桓侯體病，使人召扁鵲，扁鵲已逃去。桓侯遂死。

〔一〕〔集解〕傳玄曰：「是時齊無桓侯。」駟謂是齊侯田和之子桓公午也。

〔案隱〕案：傳玄曰「是時齊無桓侯」。裴駟

云：「謂是齊侯田和之子桓公午也。」蓋與趙簡子頗亦相當。

〔二〕〔正義〕上音湊，謂皮膚。

使聖人預知微，能使良醫得蚤從事，則疾可已，身可活也。人之所病，病疾多，〔一〕而醫

之所病，病道少。^{〔一〕}故病有六不治：驕恣不論於理，一不治也；輕身重財，二不治也；衣食不能適，三不治也；陰陽并，藏氣不定，四不治也；形羸不能服藥，五不治也；信巫不信醫，六不治也。有此一者，則重難治也。

〔一〕〔正義〕病厭患多也，言人厭患疾病多甚也。

〔二〕〔集解〕徐廣曰：「所病猶療病也。」

扁鵲名聞天下。過邯鄲，聞貴婦人，卽爲帶下醫；過雒陽，聞周人愛老人，卽爲耳目痹^{〔一〕}醫；來人咸陽，聞秦人愛小兒，卽爲小兒醫；隨俗爲變。秦太醫令李醯自知伎不如扁鵲也，使人刺殺之。至今天下言脈者，由扁鵲也。

〔一〕〔索隱〕音必二反。

太倉公者，齊太倉長，臨菑人也，姓淳于氏，名意。^{〔一〕}少而喜醫方術。高后八年，更受師同郡元里公乘陽慶。^{〔二〕}慶年七十餘，無子，使意盡去其故方，更悉以禁方予之，傳黃帝、扁鵲之脈書，五色診病，^{〔三〕}知人死生，決嫌疑，定可治，及藥論，甚精。受之三年，爲人治

病，決死生多驗。然左右行游諸侯，不以家爲家，或不爲人治病，病家多怨之者。

〔一〕正義括地志云：「淳于國城在密州安丘縣東北三十里，古之斟灌國也。」春秋「州公如曹」，傳云「冬，淳于公如曹」。

注水經云：「淳于縣，故夏后氏之斟灌國也，周武王以封淳于公，號淳于國也。」

〔二〕正義百官表云公乘，第八爵也。顏師古云：「言其得乘公之車也。」

〔三〕正義八十一難云：「五藏有色，皆見於面，亦當與寸口尺內相應也。」其面色與相應，已見前也。

文帝四年中，人上書言意，以犯罪當傳西之長安。〔一〕意有五女，隨而泣。意怒，罵曰：「生子不生男，緩急無可使者。」於是少女緹縈傷父之言，〔二〕乃隨父西。上書曰：「妾父爲吏，齊中稱其廉平，今坐法當刑。妾切痛死者不可復生而刑者不可復續，〔三〕雖欲改過自新，其道莫由，終不可得。妾願人身爲官婢，以贖父刑罪，使得改行自新也。」書聞，上悲其意，此歲中亦除肉刑法。〔四〕

〔一〕索隱傳音竹戀反。傳，乘傳送之。

〔二〕索隱緹音啼。縈音紆營反。

〔三〕集解徐廣曰：「一作『贖』。」

〔四〕集解徐廣曰：「案年表孝文十二年除肉刑。」正義漢書刑法志云：「孝文帝卽位十三年，除肉刑三。」孟康云：

「黥劓二，左右趾一，凡三也。」班固詩曰：「三王德彌薄，惟後用肉刑。太倉令有罪，就遞長安城。自恨身無子，困急獨煢煢。小女痛父言，死者不可生。上書詣闕下，思古歌雞鳴。憂心摧折裂，晨風揚激聲。聖漢孝文帝，惻然

感至情。百男何憤憤，不如一緹縈。」

意家居，詔召問所爲治病死生驗者幾何人也，主名爲誰。

詔問故太倉長臣意：「方伎所長，及所能治病者？」〔一〕有其書無有？皆安受學？受學幾何歲？嘗有所驗，何縣里人也？何病？醫藥已，其病之狀皆何如？具悉而對。」臣意對曰：

〔二〕集解徐廣曰：「一作『焉』，焉亦治。」

自意少時，喜醫藥，醫藥方試之多不驗者。至高后八年，〔一〕得見師臨菑元里公乘陽慶。慶年七十餘，意得見事之。謂意曰：「盡去而方書，非是也。慶有古先道遺傳黃帝、扁鵲之脈書，五色診病，知人生死，決嫌疑，定可治，及藥論書，甚精。我家給富，心愛公，欲盡以我禁方書悉教公。」臣意卽曰：「幸甚，非意之所敢望也。」臣意卽避席再拜謁，受其脈書上下經、五色診、奇咳〔二〕術、揆度陰陽外變、藥論、石神、接陰陽禁書，受讀解驗之，可一年所。明歲卽驗之，有驗，然尚未精也。要事之三年所，卽嘗已爲人治，診病決死生，有驗，精良。今慶已死十年所，臣意年盡三年，年三十九歲也。

〔一〕集解徐廣曰：「意年三十六。」

〔三〕集解 奇音羈。咳音該。

〔正義〕八十一難云：「奇經八脈者，有陽維，有陰維，有陽蹻，有陰蹻，有衝，有督，有

任，有帶之脈。凡此八者，皆不拘於經，故云奇經八脈也。」顧野王云：「胲當突也。」又云：「胲指毛皮也。」藝文志有五音奇胲用兵二十六卷。許慎云：「胲，軍中約也。」

齊侍御史成自言病頭痛，臣意診其脈，告曰：「君之病惡，不可言也。」卽出，獨告成弟昌曰：「此病疽〔一〕也，內發於腸胃之閒，後五日當臍腫，〔二〕後八日嘔膿〔三〕死。」成之病得之飲酒且內。成卽如期死。所以知成之病者，臣意切其脈，得肝氣。肝氣濁〔四〕而靜，〔五〕此內關之病也。〔六〕脈法曰：「脈長而弦，不得代四時者，〔七〕其病主在於肝。和卽經主病也，〔八〕代則絡脈有過。」〔九〕經主病和者，其病得之筋髓裏。其代絕而脈賁者，病得之酒且內。所以知其後五日而臍腫，八日嘔膿死者，切其脈時，少陽初代。代者經病，病去過人，人則去。絡脈主病，當其時，少陽初關一分，故中熱而膿未發也，及五分，則至少陽之界，〔一〇〕及八日，則嘔膿死，故上二分而膿發，至界而臍腫，盡泄而死。熱上則熏陽明，爛流絡，流絡動則脈結發，脈結發則爛解，故絡交。熱氣已上行，至頭而動，故頭痛。

〔一〕集解 七如反。

〔二〕正義 上於恭反，下之勇反。

〔三〕正義 女東反。

〔四〕集解 徐廣曰：「一作『瞋』。」

〔五〕集解 徐廣曰：「一作『清』。」

〔六〕正義 八十一難云：「關遂入尺爲內關。」呂廣云：「脈從關至尺澤，名內關也。」

〔七〕正義 王叔和脈經云：「來數而中止，不能自還，因而復動者，名曰代。代者死。」素問曰：「病在心，愈在夏，甚於冬；病在脾，愈在秋，甚於春；病在肺，愈在冬，甚於夏；病在腎，愈在春，甚於夏；病在肝，愈在夏，甚於秋也。」

〔八〕正義 王叔和脈經云：「脈長而弦，病於肝也。」素問云：「得病於筋，肝之和也。」

〔九〕正義 素問云：「脈有不及，有太過，有經，有絡。和卽經主病，代則絡有過也。」八十一難云：「關之前者，陽之動也，脈當見九分而浮。過者法曰太過，減者法曰不及。遂上魚際爲溢，爲外關內格，此陰乘之脈也。關以後者，陰之動也，脈當見一寸而沈。過者法曰太過，減者法曰不及。遂入尺爲覆，爲內關外格，此陽乘之脈也。故曰覆溢，是其真藏之脈，人不病而死也。」呂廣云：「過九分，出一寸，各名太過也。不及九分，至二分或四分五分，此太過。不滿一寸，見八分或五分六分，此不及。」

〔十〕集解 徐廣曰：「一作『分』。下章曰『肝與心相去五分，故曰五日盡』也。」正義 王叔和脈經云：「分別三門

（鏡）〔境〕界脈候所主，云從魚際至高骨，卻行一寸，其中名曰寸口；其自高骨從寸至尺，名曰尺澤，故曰尺。寸後尺前，名曰關。陽出陰入，以關爲界，陽出三分，故曰三陰三陽。陽生於尺，動於寸；陰生於寸，動於尺。寸主射上焦，出頭及皮毛，竟手。關主射中焦，腹及於腰。尺主射下焦，少腹至足也。」

齊王中子諸嬰兒小子病，召臣意診切其脈，告曰：「氣鬲病。病使人煩懣，食不下，

時嘔沫。病得之〔一〕心憂，數忤食飲。〔二〕臣意卽爲之作下氣湯以飲之，一日氣下，二日能食，三日卽病愈。所以知小子之病者，診其脈，心氣也，濁〔三〕躁而經也，此絡陽病也。脈法曰「脈來數疾去難而不一者，病主在心」。周身熱，脈盛者，爲重陽。〔四〕重陽者，邊心主。〔五〕故煩懣食不下則絡脈有過，絡脈有過則血上出，血上出者死。此悲心所生也，病得之憂也。

〔一〕索隱 忤音疑乙反。忤者，風痺忤然不得動也。

〔二〕集解 徐廣曰：「一作『瞋』，又作『猛』。」

〔三〕索隱 上音直隴反。

〔四〕集解 徐廣曰：「邊音唐。邊者，盪也。謂病盪心者，猶刺其心。」

〔正義〕八十一難云：

「手心主中宮，在中部。」楊玄操云：「手心主胞絡也。自臍已上至帶肓爲中焦也。」

齊郎中令循病，衆醫皆以爲蹙人中，而刺之。臣意診之，曰：「湧疝也，〔一〕令人不得前後洩。」〔二〕循曰：「不得前後洩三日矣。」臣意飲以火齊湯，〔三〕一飲得前〔後〕洩，再飲大洩，三飲而疾愈。病得之內。所以知循病者，切其脈時，右口氣急，〔四〕脈無五藏氣，右口〔五〕脈大而數。數者中下熱而湧，左爲下，右爲上，皆無五藏應，故曰湧疝。中熱，故溺赤也。〔六〕

〔一〕索隱上音勇。下音訕，所諫反。鄒誕生疝音山也。

〔二〕索隱搜音所留反。前搜謂小便。後搜，大便也。

〔三〕正義飲，於禁反。

〔四〕集解徐廣曰：「右，一作『有』。」正義王叔和脈經云：「右手寸口乃氣口也。」

〔五〕正義謂右手寸口也。

〔六〕正義溺，徒弔反。

齊中御府長信病，臣意入診其脈，告曰：「熱病氣也。然暑汗，脈少衰，不死。」曰：「此病得之當浴流水而寒甚，已則熱。」信曰：「唯，然！」〔一〕往冬時，爲王使於楚，至菑縣〔二〕陽周水，而菑橋梁頗壞，信則擊〔三〕車轅未欲渡也，馬驚，卽墮，信身入水中，幾死，吏卽來救信，出之水中，衣盡濡，有閒而身寒，已熱如火，至今不可以見寒。」臣意卽爲之液湯火齊逐熱，一飲汗盡，再飲熱去，三飲病已。卽使服藥，出入二十日，身無病者。所以知信之病者，切其脈時，并陰。脈法曰「熱病陰陽交者死」。切之不交，并陰。并陰者，脈順清而愈，其熱雖未盡，猶活也。腎氣有時閒濁，〔四〕在太陰脈口而希，是水氣也。腎固主水，故以此知之。失治一時，卽轉爲寒熱。

〔一〕正義唯，惟癸反。

〔二〕正義菑，密州縣。

〔三〕正義音牽。

〔四〕集解徐廣曰：「一作『𦵏』。」

齊王太后病，召臣意入診脈，曰：「風痺客𦵏，〔一〕難於大小溲，溺赤。」臣意飲以火齊湯，一飲卽前後溲，再飲病已，溺如故。病得之流汗出漚。〔二〕漚者，去衣而汗晞也。所以知齊王太后病者，臣意診其脈，切其太陰之口，溼然風氣也。脈法曰「沈之而大堅，〔三〕浮之而大緊者，〔四〕病主在腎」。腎切之而相反也，脈大而躁。大者，膀胱氣也；躁者，中有熱而溺赤。

〔一〕索隱痺，病也，音寔。𦵏音普交反，字或作「胞」。

〔二〕正義漚音單旱（也）〔反〕。𦵏亦作「胞」，膀胱也。言風痺

之病客居在膀胱。

〔三〕索隱劉氏音巡。

〔四〕正義沈，一作「深」。王叔和脈經云：「脈大而堅，病出於腎也。」

〔五〕正義緊音吉忍反。素問云：「脈短實而數，有似切繩，名曰緊也。」

齊章武里曹山跗病，〔一〕臣意診其脈，曰：「肺消痺也，加以寒熱。」卽告其人曰：「死，不治。適其共養，此不當醫。」〔二〕治。法曰「後三日而當狂，妄起行，欲走，後五日死」。卽如期死。山跗病得之盛怒而以接內。所以知山跗之病者，臣意切其脈，肺氣熱也。脈法曰「不平不鼓，形弊」。〔三〕此五藏高之遠數以經病也，故切之時不平而

代。^{〔四〕}不平者，血不居其處；代者，時參擊並至，乍躁乍大也。此兩絡脈絕，故死不治。所以加寒熱者，言其人尸奪。尸奪者，形癢；形癢者，不當關灸鑱石及飲毒藥也。臣意未往診時，齊太醫先診山跗病，灸其足少陽脈口，而飲之半夏丸，病者卽泄注，腹中虛；又灸其少陰脈，是壞肝剛絕深，如是重損病者氣，以故加寒熱。所以後三日而當狂者，肝一絡連屬結絕乳下陽明，^{〔五〕}故絡絕，開陽明脈，陽明脈傷，卽當狂走。後五日死者，肝與心相去五分，故曰五日盡，盡卽死矣。

〔一〕索隱 跗，方符反。

〔二〕索隱 適音釋。共音恭。案：謂山跗家適近所持財物共養我，我不敢當，以言其人不堪療也。

〔三〕集解 徐廣曰：「一作『散』。」^{〔正義〕}王叔和脈經云：「平謂春肝木王，其脈細而長；夏心火王，其脈洪大而

散；六月脾土王，其脈大阿阿而緩；秋肺金王，其脈浮濇而短；冬腎水王，其脈沈而滑；名平脈也。」

〔四〕正義 素問云：「血氣易處曰不平，脈候動不定曰代。」

〔五〕正義 素問云：「乳下陽明，胃絡也。」

齊中尉潘滿如病少腹痛，^{〔一〕}臣意診其脈，曰：「遺積瘕也。」^{〔二〕}臣意卽謂齊太僕臣饒、內史臣繇曰：「中尉不復自止於內，則三十日死。」後二十餘日，溲血死。病得之酒且內。所以知潘滿如病者，臣意切其脈深小弱，其卒然合^{〔三〕}合也，是脾氣也。^{〔四〕}右

脈口氣至緊小，〔三〕見瘕氣也。以次相乘，故三十日死。三陰俱搏者，〔六〕如法；不俱搏者，決在急期；一搏一代者，近也。故其三陰搏，澁血如前止。〔七〕

〔一〕〔正義〕少音式妙反。王叔和脈經云：「脈急，疝瘕少腹痛也。」

〔二〕〔索隱〕劉氏音加雅反，舊音遐，鄒氏音嫁。〔正義〕龍魚河圖云：「犬狗魚鳥不熟食之，成瘕痛。」

〔三〕〔集解〕徐廣曰：「一云『來然合』。」

〔四〕〔正義〕卒音蔥忽反。卒，一本作「來」。素問云：「疾病之生，生於五藏。五藏之合，合於六府。肝合氣於膽，心合氣於小腸，脾合氣於胃，肺合氣於大腸，腎合氣於膀胱。三焦內主勞。」

〔五〕〔正義〕上音結忍反。

〔六〕〔正義〕如淳云：「音徒端反。」素問云：「左脈口曰少陰，少陰之前名厥陰，右脈口曰太陰，此三陰之脈也。」

〔七〕〔集解〕徐廣曰：「前，一作『筋』也。」

陽虛侯相趙章病，召臣意。衆醫皆以爲寒中，臣意診其脈曰：「迴風。」〔一〕迴風者，飲食下噎〔二〕而輒出不留。法曰「五日死」，而後十日乃死。病得之酒。所以知趙章之病者，臣意切其脈，脈來滑，是內風氣也。飲食下噎而輒出不留者，法五日死，皆爲前分界法。〔三〕後十日乃死，所以過期者，其人嗜粥，故中藏實，中藏實故過期。師言曰：「安穀者過期，不安穀者不及期。」

〔一〕〔集解〕迴音洞。言洞徹入四支。〔索隱〕下云「飲食下噎輒出之」，是風疾洞徹五藏，故曰迴風。

〔三〕集解音益，謂喉下也。

〔三〕正義分，扶問反。

齊北王病，召臣意診其脈，曰：「風蹶胸滿。」卽爲藥酒，盡三石，病已。得之汗出伏地。所以知齊北王病者，臣意切其脈時，風氣也，心脈濁。〔一〕病法「過入其陽，陽氣盡而陰氣入」。陰氣入張，則寒氣上而熱氣下，故胸滿。汗出伏地者，切其脈，氣陰。陰氣者，病必入中，出及澆水也。〔二〕

〔一〕集解徐廣曰：「一作『𦵏』。」

〔三〕索隱澆音士咸反。正義顧野王云：「手足液，身體灼。音常灼反。」

齊北宮司空命婦〔一〕出於〔二〕病，衆醫皆以爲風入中，病主在肺，〔三〕刺其足少陽脈。臣意診其脈，曰：「病氣疝，客於膀胱，難於前後洩，而溺赤。病見寒氣則遺溺，使人腹腫。」出於病得之欲溺不得，因以接內。所以知出於病者，切其脈大而實，其來難，是蹶陰之動也。〔四〕脈來難者，疝氣之客於膀胱也。腹之所以腫者，言蹶陰之絡結小腹也。蹶陰有過則脈結動，動則腹腫。臣意卽灸其足蹶陰之脈，左右各一所，卽不遺溺而洩清，小腹痛止。卽更爲火齊湯以飲之，三日而疝氣散，卽愈。

〔一〕集解徐廣曰：「一作『奴』。奴蓋女奴。」

〔二〕正義 命婦名也。

〔三〕集解 徐廣曰：「一作『肝』。」

〔四〕正義 鄭〔云〕：「厥陰之脈也。」

故濟北王阿母〔一〕自言足熱而滿，臣意告曰：「熱蹶也。」則刺其足心各三所，案之無出血，病旋已。〔三〕病得之飲酒大醉。

〔一〕集解 徐廣曰：「濟，一作『齊王』。」

〔索隱〕案：是王之嬪母也。

〔正義〕服虔云：「乳母也。」鄭〔云〕：「慈己

者。」

〔二〕索隱 言尋則已止也。

〔正義〕謂旋轉之間，病則已止也。

濟北王召臣意診脈諸女子侍者，至女子豎，豎無病。臣意告永巷長曰：「豎傷脾，不可勞，法當春嘔血死。」臣意言王曰：「才人女子豎何能？」王曰：「是好爲方，多技能，爲所是案法新。」〔一〕往年市之民所，四百七十萬，曹偶四人。〔二〕王曰：「得毋有病乎？」臣意對曰：「豎病重，在死法中。」王召視之，其顏色不變，以爲不然，不賣諸侯所。至春，豎奉劍從王之廁，王去，豎後，王令人召之，卽仆於廁，〔三〕嘔血死。病得之流汗。流汗者，〔同〕法病內重，毛髮而色澤，脈不衰，此亦〔關〕內〔關〕之病也。

〔一〕集解 徐廣曰：「所，一作『取』。」

〔索隱〕謂於舊方技能生新意也。

〔二〕索隱 案：當今之四千七百貫也。曹偶猶等輩也。

〔三〕索隱 仆音赴，又音步北反。

齊中大夫病齩齒，〔一〕臣意灸其左太陽明脈，卽爲苦參湯，日嗽三升，出入五六日，病已。得之風，及卧開口，食而不嗽。

〔二〕正義 上丘羽反。釋名云：「齩，朽也。蟲齧之，缺朽也。」

菑川王美人懷子而不乳，〔一〕來召臣意。臣意往，飲以葭藹，〔二〕藥一撮，以酒飲之，旋乳。〔三〕臣意復診其脈，而脈躁。躁者有餘病，卽飲以消石一齊，出血，血如豆比五六枚。〔四〕

〔一〕索隱 乳音人喻反。乳，生也。

〔二〕正義 浪宕二音。

〔三〕索隱 旋乳者，言迴旋卽生也。

〔四〕索隱 比音必利反。

齊丞相舍人奴從朝入宮，臣意見之食閨門外，望其色有病氣。臣意卽告宦者平。平好爲脈，學臣意所，臣意卽示之舍人奴病，告之曰：「此傷脾氣也，當至春鬲塞不通，不能食飲，法至夏泄血死。」宦者平卽往告相曰：「君之舍人奴有病，病重，死期有日。」相君曰：「卿何以知之？」曰：「君朝時入宮，君之舍人奴盡食閨門外，平與倉公立，卽

示平曰，病如是者死。」相卽召舍人（奴）而謂之曰：「公奴有病不？」舍人曰：「奴無病，身無痛者。」至春果病，至四月，泄血死。所以知奴病者，脾氣周乘五藏，傷部而交，故傷脾之色也，望之殺然黃，「一」察之如死青之茲。衆醫不知，以爲大蟲，「三」不知傷脾。所以至春死病者，胃氣黃，黃者土氣也，土不勝木，故至春死。所以至夏死者，脈法曰「病重而脈順清者曰內關」，內關之病，人不知其所痛，心急然無苦。若加以一病，死中春；一愈順，及一時。其所以四月死者，診其人時愈順。愈順者，人尚肥也。奴之病得之流汗數出，「灸」於火而以出見大風也。

〔一〕集解 徐廣曰：「殺音蘇葛反。」

〔正義〕殺，蘇亥反。

〔三〕索隱 卽蛭虫也。

菑川王病，召臣意診脈，曰：「蹶上「一」爲重，頭痛身熱，使人煩懣。」「三」臣意卽以寒水拊其頭，「三」刺足陽明脈，左右各三所，病旋已。病得之沐髮未乾而卧。診如前，所以蹶，頭熱至肩。

〔一〕正義 時掌反。蹶，逆氣上也。

〔三〕正義 亡本反。非但有煩也。

〔三〕索隱 拊音附，又音撫。

齊王黃姬兄黃長卿家有酒召客，召臣意。諸客坐，未上食。臣意望見王后弟宋建，告曰：「君有病，往四五日，君要脅痛不可俛仰，〔一〕又不得小溲。不亟治，病即入濡腎。及其未舍五藏，急治之。病方今客腎濡，〔二〕此所謂『腎痺』也。」宋建曰：「然，建故有要脊痛。往四五日，天雨，黃氏諸倩〔三〕見建家京下方石，〔四〕即弄之，建亦欲效之，效之不能起，即復置之。暮，要脊痛，不得溺，至今不愈。」建病得之好持重。所以知建病者，臣意見其色，太陽色乾，腎部上及界要以下者枯四分所，故以往四五日知其發也。臣意即爲柔湯使服之，十八日所而病愈。

〔一〕正義 上音免。

〔二〕正義 濡，溺也。病方客在腎，欲溺，腎也。

〔三〕集解 徐廣曰：「倩者，女壻也。」駟案：方言曰「東齊之間，壻謂之倩」。郭璞曰「言可假倩也」。正義 倩音七姓反。

〔四〕集解 徐廣曰：「京者，倉廩之屬也。」

濟北王侍者韓女病要背痛，寒熱，衆醫皆以爲寒熱也。臣意診脈，曰：「內寒，月事不下也。」即竄以藥，〔一〕旋下，病已。病得之欲男子而不可得也。所以知韓女之病者，診其脈時，切之，腎脈也，澁而不屬。澁而不屬者，其來難，堅，故曰月不下。肝脈弦，

出左口，故曰欲男子不可得也。

〔一〕**索隱** 謂以燠燠之，故云。竄音七亂反。

臨菑汜〔二〕里女子薄吾病甚，衆醫皆以爲寒熱篤，當死，不治。臣意診其脈，曰：「蟯瘕。」〔三〕蟯瘕爲病，腹大，上膚黃羸，循之戚戚然。臣意飲以芫華一撮，卽出蟯可數升，病已，三十日如故。病蟯得之於寒溼，寒溼氣宛〔四〕篤不發，化爲蟲。臣意所以知薄吾病者，切其脈，循其尺，〔五〕其尺索刺羸，而毛美奉髮，〔六〕是蟲氣也。其色澤者，中藏無邪氣及重病。

〔一〕**索隱** 汜音凡。

〔二〕**集解** 徐廣曰：「蟯音饒。」

索隱 音饒，舊音遼遐。

正義 人腹中短蟲。

〔三〕**集解** 音鬱。

索隱 又如字。

〔四〕**正義** 王叔和云：「寸，關，尺。寸謂三分，尺謂八分。寸口在關上，尺在關下。寸、關、尺共有一寸九分也。」

〔五〕**集解** 徐廣曰：「奉，一作『奏』，又作『秦』。」

索隱 循音巡。案：謂手循其尺索也。刺音七賜反。羸音七胡反。

言循其尺索，刺人手而羸，是婦人之病也。徐氏云奉一作「奏」，非其義也。又云一作「秦」，秦謂螭首，言髮如螭螭，事蓋近也。

齊淳于司馬病，臣意切其脈，告曰：「當病迴風。迴風之狀，飲食下噎輒後之。」〔一〕病得之飽食而疾走。淳于司馬曰：「我之王家食馬肝，食飽甚，見酒來，卽走去，驅疾

至舍，卽泄數十出。」臣意告曰：「爲火齊米汁飲之，七八日而當愈。」時醫秦信在旁，臣意去，信謂左右閣都尉^{〔三〕}曰：「意以淳于司馬病爲何？」曰：「以爲迴風，可治。」信卽笑曰：「是不知也。」淳于司馬病，法當後九日死。」卽後九日不死，其家復召臣意。臣意往問之，盡如意診。臣卽爲一火齊米汁，使服之，七八日病已。所以知之者，診其脈時，切之，盡如法。其病順，故不死。

〔一〕集解 徐廣曰：「如廁。」

〔二〕索隱 案：閣者，姓也，爲都尉。一云閣卽宮閣，都尉掌之，故曰閣都尉也。

齊中郎破石病，臣意診其脈，告曰：「肺傷，不治，當後十日丁亥洩血死。」卽後十一日，洩血而死。破石之病，得之墮馬僵石上。所以知破石之病者，切其脈，得肺陰氣，其來散，數道至而不一也。色又乘之。所以知其墮馬者，切之得番陰脈。^{〔二〕}番陰脈入虛裏，乘肺脈。肺脈散者，固色變也乘之。所以不中期死者，師言曰「病者安穀卽過期，不安穀則不及期」。其人嗜黍，黍主肺，故過期。所以洩血者，診脈法曰「病養喜陰處者順死，養喜陽處者逆死」。其人喜自靜，不躁，又久安坐，伏几而寐，故血下泄。

〔一〕索隱 番音芳袁反。

齊王侍醫遂病，自練五石服之。臣意往過之，遂謂意曰：「不肖有病，幸診遂也。」

臣意卽診之，告曰：「公病中熱。論曰『中熱不洩者，不可服五石』。石之爲藥精悍，公服之不得數洩，亟勿服。色將發臃。」遂曰：「扁鵲曰『陰石以治陰病，陽石以治陽病』。夫藥石者有陰陽水火之齊，故中熱，卽爲陰石柔齊治之；中寒，卽爲陽石剛齊治之。」臣意曰：「公所論遠矣。」扁鵲雖言若是，然必審診，起度量，立規矩，稱權衡，合色脈，〔二〕表裏有餘不足順逆之法，參其人動靜與息相應，乃可以論。論曰『陽疾處內，陰形應外者，不加悍藥及鑱石』。夫悍藥入中，則邪氣辟矣，〔三〕而宛氣愈深。〔三〕診法曰『二陰應外，一陽接內者，不可以剛藥』。剛藥入則動陽，陰病益衰，陽病益箸，邪氣流行，爲重困於俞，〔四〕忿發爲疽。」意告之後百餘日，果爲疽發乳上，人缺盆，死。〔三〕此謂論之大體也，必有經紀。拙工有一不習，文理陰陽失矣。

〔一〕集解 徐廣曰：「合，一作『占』。」

〔二〕索隱 辟音必亦反，猶聚也。

〔三〕索隱 愈音庾。

〔四〕集解 徐廣曰：「音始喻反。」

〔五〕索隱 按：缺盆，人乳房上骨名也。

齊王故爲陽虛侯時，病甚，〔一〕衆醫皆以爲臞。臣意診脈，以爲痺，根在右脅下，大

如覆杯，令人喘，逆氣不能食。臣意卽以火齊粥且飲，六日氣下，卽令更服丸藥，出入六日，病已。病得之內。診之時不能識其經解，大識其病所在。

〔一〕〔集解〕徐廣曰：「齊悼惠王子也，名將廬，以文帝十六年爲齊王，卽位十一年卒，謚孝王。」

臣意嘗診安陽武都里成開方，開方自言以爲不病，臣意謂之病苦沓風，〔一〕三歲四支不能自用，使人瘖，〔二〕瘖卽死。今聞其四支不能用，瘖而未死也。病得之數飲酒以見大風氣。所以知成開方病者，診之，其脈法奇咳言曰「藏氣相反者死」。〔三〕切之，得腎反肺，〔四〕法曰「三歲死」也。

〔一〕〔索隱〕沓音徒合反，風病之名也。

〔二〕〔集解〕徐廣曰：「一作『脊』，音才亦反。」

〔索隱〕瘖者，失音也，讀如音。又作「厝」。厝者，置也。言使人運置其

手足也。

〔三〕〔集解〕徐廣曰：「反，一作『及』。」

〔四〕〔集解〕徐廣曰：「反，一作『及』。」

安陵阪里公乘項處病，〔一〕臣意診脈，曰：「牡疝。」〔二〕牡疝在鬲下，上連肺。病得之內。臣意謂之：「慎毋爲勞力事，爲勞力事則必嘔血死。」處後蹴〔三〕踖，〔四〕要歷寒，汗出多，卽嘔血。臣意復診之，曰：「當旦日日夕死。」〔五〕卽死。病得之內。所以知項

處病者，切其脈得番陽。〔六〕番陽人虛裏，處旦日死。一番一絡者，〔七〕牡疝也。

〔一〕索隱案：公乘，官名也。項，姓；處，名。故上云倉公之師，元里公乘陽慶，亦然也。

〔二〕索隱上音母，下音色諫反。

〔三〕集解徐廣曰：「一作『踰』。」

〔四〕正義上千六反，下九六反，謂打毬也。

〔五〕索隱案：旦日，明日也。言明日之夕死也。

〔六〕索隱脈病之名曰番陽者，以言陽脈之翻入虛裏也。

〔七〕集解徐廣曰：「絡，一作『結』。」

臣意曰：他所診期決死生及所治已病衆多，久頗忘之，不能盡識，不敢以對。

問臣意：「所診治病，病名多同而診異，或死或不死，何也？」對曰：「病名多相類，不可知，故古聖人爲之脈法，以起度量，立規矩，縣權衡，案繩墨，調陰陽，別人之脈各名之，與天地相應，參合於人，故乃別百病以異之，有數者能異之，〔一〕無數者同之。然脈法不可勝驗，診疾人以度異之，乃可別同名，命病主在所居。今臣意所診者，皆有診籍。所以別之者，臣意所受師方適成，師死，以故表籍所診，期決死生，觀所失所得者合脈法，以故至今知之。」

〔一〕索隱數音色住反。謂術數之人乃可異其狀也。

問臣意曰：「所期病決死生，或不應期，何故？」對曰：「此皆飲食喜怒不節，或不當飲藥，或不當鍼灸，以故不中期死也。」

問臣意：「意方能知病死生，論藥用所宜，諸侯王大臣有嘗問意者不？」及文王病時，「一不求意診治，何故？」對曰：「趙王、膠西王、濟南王、吳王皆使人來召臣意，臣意不敢往。文王病時，臣意家貧，欲爲人治病，誠恐吏以除拘臣意也，二故移名數，左右三不脩家生，出行游國中，問善爲方數者事之久矣，四見事數師，五悉受其要事，盡其方書意，及解論之。身居陽虛侯國，因事侯。侯入朝，臣意從之長安，以故得診安陵項處等病也。」

〔一〕集解 徐廣曰：「齊文王也，以文帝十五年卒。」

〔二〕集解 徐廣曰：「時諸侯得自拜除吏。」

〔三〕正義 以名籍屬左右之人。

〔四〕索隱 數音「術數」之「數」。

〔五〕正義 上色庚反。

問臣意：「知文王所以得病不起之狀？」臣意對曰：「不見文王病，然竊聞文王病喘，頭痛，目不明。臣意心論之，以爲非病也。以爲肥而蓄精，身體不得搖，骨肉不相任，故喘，不當醫治。脈法曰『年二十脈氣當趨，年三十當疾步，年四十當安坐，年五十當安卧，年六十

已上氣當大董』。〔一〕文王年未滿二十，方脈氣之趨也而徐之，不應天道四時。後聞醫灸之卽篤，此論病之過也。臣意論之，以爲神氣爭而邪氣入，非年少所能復之也，以故死。所謂氣者，當調飲食，擇晏日，車步廣志，以適筋骨血肉脈，以瀉氣。故年二十，是謂『易賀』，〔二〕法不當砭灸，砭灸至氣逐。」

〔一〕〔集解〕徐廣曰：「董謂深藏之。一作『董』。」

〔索隱〕董音謹。

〔二〕〔集解〕徐廣曰：「一作『賀』，又作『質』。」

問臣意：「師慶安受之？聞於齊諸侯不？」對曰：「不知慶所師受。慶家富，善爲醫，不肯爲人治病，當以此故不聞。慶又告臣意曰：『慎毋令我子孫知若學我方也。』」

問臣意：「師慶何見於意而愛意，欲悉教意方？」對曰：「臣意不聞師慶爲方善也。意所以知慶者，意少時好諸方事，臣意試其方，皆多驗，精良。臣意聞菑川唐里公孫光善爲古傳方，〔一〕臣意卽往謁之。得見事之，受方化陰陽及傳語法，〔二〕臣意悉受書之。臣意欲盡受他精方，公孫光曰：『吾方盡矣，不爲愛公所。』〔三〕吾身已衰，無所復事之。是吾年少所受妙方也，悉與公，毋以教人。』臣意曰：『得見事侍公前，悉得禁方，幸甚。意死不敢妄傳人。』居有閒，公孫光閒處，〔四〕臣意深論方，見言百世爲之精也。師光喜曰：『公必爲國工。吾有所善者皆疏，同產處臨菑，善爲方，吾不若，其方甚奇，非世之所聞也。吾年中時，〔五〕嘗欲

受其方，楊中倩〔六〕不肯，曰「若非其人也」。胥與公往見之，〔七〕當知公喜方也。其人亦老矣，其家給富。』時者未往，會慶子男殷來獻馬，因師光奏馬王所，意以故得與殷善。光又屬意於殷曰：『意好數，〔八〕公必謹遇之，其人聖儒。』〔九〕卽爲書以意屬陽慶，以故知慶。臣意事慶謹，以故愛意也。』

〔一〕索隱 謂好能傳得古方也。

〔正義〕 謂全傳寫得古人之方書。

〔二〕集解 徐廣曰：「法，一作『五』。」

〔三〕索隱 言於意所，不愛惜方術也。

〔四〕正義 上音閑，下昌汝反。

〔五〕索隱 案：年中謂中年時也。中年亦壯年也，古人語自爾。

〔六〕索隱 倩音七見反，人姓名也。

〔七〕集解 徐廣曰：「胥猶言須也。」

〔八〕索隱 數，色句反。謂好術數也。

〔九〕索隱 言意儒德，慕聖人之道，故云聖儒也。

問臣意曰：「吏民嘗有事學意方，及畢盡得意方不？何縣里人？」對曰：「臨菑人宋邑。〔一〕邑學，臣意教以五診，〔二〕歲餘。濟北王遣太醫高期、王禹〔三〕學，臣意教以經脈高下及奇絡結，〔四〕當論俞〔五〕所居，及氣當上下出入邪〔正〕逆順，以宜鑱石，定砭灸處，歲餘。」

菑川王時遣太倉馬長馮信正方，臣意教以案法逆順，論藥法，定五味及和齊湯法。高永侯家丞杜信，喜脈，來學，臣意教以上下經脈五診，二歲餘。臨菑召里唐安來學，臣意教以五診上下經脈，奇咳，四時應陰陽重，未成，除爲齊王侍醫。」

〔一〕集解 徐廣曰：「一作『昆』。」

〔二〕正義 謂診五藏之脈。

〔三〕集解 徐廣曰：「一作『蝟』。」

〔四〕正義 素問云：「奇經八脈，往來舒時，一止而復來，名之曰結也。」

〔五〕正義 式喻反。

問臣意：「診病決死生，能全無失乎？」臣意對曰：「意治病人，必先切其脈，乃治之。敗逆者不可治，其順者乃治之。心不精脈，所期死生視可治，時時失之，臣意不能全也。」

太史公曰：女無美惡，居宮見妒；士無賢不肖，入朝見疑。故扁鵲以其伎見殃，倉公乃匿迹自隱而當刑。緹縈通尺牘，父得以後寧。故老子曰「美好者不祥之器」，豈謂扁鵲等邪？若倉公者，可謂近之矣。

【索隱述贊】上池祕術，長桑所傳。始候趙簡，知夢鈞天。言占虢嗣，尸歷起焉。倉公贖罪，陽慶推賢。效驗多狀，式具于篇。

〔正義〕胃大一尺五寸，徑五寸，長二尺六寸，橫尺，受水穀三斗五升，其中常留穀二斗，水一斗五升。凡人食，入於口而聚於胃中，穀熟，傳入小腸也。小腸大二寸半，徑八分分之少半，長三丈二尺，受穀二斗四升，水六升三合合之大半。回腸（小）〔大〕腸，謂受穀而傳入於大腸也。大四寸，徑一寸半，長二丈二尺，受穀一斗，水七升半。廣腸大八寸，徑二寸半，長二尺八寸，受穀九升三合八分分之一。故腸胃凡長五丈八尺四寸，合受水穀八斗七升六合八分分之一，此腸胃長短受水穀之數也。〔甲乙經〕「腸胃凡長丈六尺四寸四分」，從口至腸而數之。此徑從胃至腸而數之，故短也。肝重四斤四兩，左三葉，右四葉，凡七葉，主藏魂。肝者，幹也。於五行爲木，其體狀有枝幹也。肝之神七人，老子名曰明堂官，蘭臺府，從官三千六百人。又云肝神六：童子三，女子三。心重十二兩，中有七孔，三毛，盛精汁三合，主藏神。心，纖也，所識纖微也。其神九，太尉公名曰絳官，太始、南極老人，員光之身，其從官三千六百人。又爲帝王，身之王也。脾重二斤三兩，扁廣三寸，長五寸，有散膏半斤，主（裏）〔裏〕血溫五藏，主藏意。脾，裨也。在助氣，主化穀。其神云光玉女子母，其從官三千六百人。肺重三斤三兩，六葉兩耳，凡八葉，主藏魂魄。肺，宰也。言其氣宰，故短也，鬱也。其神八人，太和君名曰玉堂官，尚書府。其從官三千六百人。又云肺神十四：童子七，女子七也。腎有兩枚，重一斤一兩，主藏志。腎，引也。腎屬水，主引水氣，灌注諸脈也。其神六人，司徒、司空、司命、司錄、司隸校尉、尉卿也。膽在肝之短葉間，重三兩三銖，盛精汁三合。膽，敢也。言人有膽氣而能果敢也。其神五人，太一道君居紫房官中，其從官三千六百人。胃重二斤十四兩，紆曲屈伸，長二尺六寸，大一尺五寸，徑五寸，盛穀二斗，水一斗五升。胃，圍也。言圍受食物也。其神十二人，五元之氣，諫議大夫也。小腸重二斤十四兩，長三丈二尺，廣二寸半，徑八分分之

少半，迴積十六曲，盛穀二斗四升，水六升三合合之大半。腸，暢也。言通暢胃氣，牽去穢也。其神二人，元梁使者也。大腸重三斤十二兩，長二丈一尺，廣四寸，徑一寸半，當齊，右迴十六曲，盛穀一斗水七升半。大腸卽迴腸也。其迴曲，因以名之。其神二人，元梁使者也。膀胱重九兩二銖，縱廣九寸，盛溺九升九合。膀，橫也。胱，廣也。體短而又名胞。胞，虛空也，主以虛承水液。口廣二寸半。脣至齒長九分。齒已後至會厭，深三寸半，大容五合也。舌重十兩，長七寸，廣二寸半。舌，泄也。言可舒泄言語也。咽門重十兩，廣二寸半，至胃長一尺六寸。咽，嚥也。言咽物也。又謂之咽，主地氣。胃爲土，故云主地氣也。喉嚨重十二兩，廣二寸，長一尺二寸九節。喉嚨，空虛也。言其中空虛，可以通氣息焉。心，肺之系也，呼吸之道路。喉嚨與咽並行，其實兩異，而人多惑也。肛門重十二兩，大八寸，徑二寸太半，長二尺八寸，受穀九升三合八分合之一。肛，缸也。言其處似車缸，故曰缸門。卽廣腸之門，又名（臆）〔臆腸〕也。

手三陽之脈，從手至頭長五尺，五六合三丈。一手有三陽，兩手爲六陽，故云五六三丈。手三陰之脈，從手至胸中長三尺五寸，三六一丈八尺，五六三尺，合二丈一尺。兩手各有三陰，合爲六陰，故云三六一丈八尺也。足三陽之脈，從足至頭長八尺，六八合四丈八尺。兩足各有三陽，故曰六八四丈八尺也。足三陰之脈，從足至胸長六尺五寸，六六三丈六尺，五六三尺，合三丈九尺。兩足各有三陰，故云六六三丈六尺也。按：足太陰、少陰皆至舌下，厥陰至於項上。今言至胸中者，蓋據其相接之次者也。人兩足躡脈，從足至目長七尺五寸，二七一丈四尺，二五一尺，合一丈五尺。督任脈各長四尺五寸，二四八尺，二五一尺，合九尺。凡脈長一十六丈二尺也，此所謂十二經脈長短之數也。督脈起於膝頭，上於面，至口齒縫，計此不止長四尺五

寸，當取其上極於風府而言之也。手足各十二脈，爲二十四，并督任兩躡四脈，都合二十八脈，以應二十八宿。凡長十六丈二尺，營衛行周此數，則一度也。寸口，脈之大會，手太陰之動也。太陰者，脈之會也。肺，諸藏主，蓋主通陰陽，故十二經皆手太陰，所以決吉凶者。十二經有病，皆寸口，知其何經之動浮沈滑瀦逆順，知其死生之兆也。人一呼脈行三寸，一吸脈行三寸，呼吸定息，脈行六寸。十二經，十五絡，二十七氣，皆候於寸口，隨呼吸上下。呼脈上行三寸，吸脈下行三寸，二十七氣皆逐上下行，無有息時。人一日一夜凡一萬三千五百息。脈行五十周於身，漏水下百刻。營衛行陽二十五度，行陰二十五度。度爲一周也，故五十度復會於手太陰。寸口者，五藏六府之所終始，故法於寸口也。人一息行六寸，百息六丈，千息六十丈，一萬三千五百息合爲八百一十丈。陽脈出行二十五度，陰脈入行二十五度，陰陽出入行二十五度，陰陽呼吸覆行周畢度數也。脈行身畢，卽水下百刻亦畢。謂一旦夜刻盡，天明，日出東方，脈還得寸口，當更始也。故寸口者，五藏六府之所終始也。

肺氣通於鼻，鼻和則知臭香矣。肝氣通於目，目和則知白黑矣。脾氣通於口，口和則知穀味矣。心氣通於舌，舌和則知五味矣。腎氣通於耳，耳和則聞五音矣。五藏不和，則九竅不通，六府不和，則留爲癰也。

史記卷一百六

吳王濞列傳第四十六

吳王濞^{〔一〕}者，高帝兄劉仲之子也。^{〔二〕}高帝已定天下七年，立劉仲爲代王。而匈奴攻代，劉仲不能堅守，奔國亡，閒行^{〔三〕}走雒陽，自歸天子。天子爲骨肉故，不忍致法，廢以爲郅陽侯。^{〔四〕}高帝十一年秋，淮南王英布反，東并荆地，劫其國兵，西度淮，擊楚，高帝自將往誅之。劉仲子沛侯濞年二十，有氣力，以騎將從破布軍蘄西會甄，^{〔五〕}布走。荆王劉賈爲布所殺，無後。上患吳、會稽輕悍，無壯王以填之，^{〔六〕}諸子少，乃立濞於沛爲吳王，^{〔七〕}王三郡五十三城。已拜受印，高帝召濞相之，謂曰：「若狀有反相。」心獨悔，業已拜，因拊其背，^{〔八〕}告曰：「漢後五十年東南有亂者，豈若邪？」^{〔九〕}然天下同姓爲一家也，慎無反！濞頓首曰：「不敢。」

〔一〕案隱案：澎濞字也，音披位反。

〔二〕集解徐廣曰：「仲名喜。」

〔三〕索隱 謂獨行從他道逃走。聞音紀閑反。

〔四〕索隱 地理志馮翊縣名，在郿水之陽。音合。〔正義〕郿陽故城在同州河西縣南三十里。

〔五〕索隱 地名也。在郿縣之西。會音古兌反。甄音鍾。

〔六〕索隱 填音鎮。

〔七〕集解 徐廣曰：「十二年十月辛丑。」

〔八〕索隱 拊音撫。

〔九〕集解 徐廣曰：「漢元年至景帝三年反，五十有三年。」駟案：應劭曰「克期五十，占者所知。若秦始皇東巡以厭氣，後劉項起東南，疑當如此耳」。如淳曰「度其貯積足用爲難，又吳楚世不賓服」。〔索隱案：應氏之意，以後

五十年東南有亂，本是占氣者所說，高祖素聞此說，自以前難未弭，恐後災更生，故說此言，更以戒薄。如淳之說，亦合事理。

會孝惠、高后時，天下初定，郡國諸侯各務自拊循其民。吳有豫章郡銅山，〔一〕漚則招致天下亡命者〔益〕盜鑄錢，煮海水爲鹽，以故無賦，國用富饒。〔二〕

〔一〕集解 韋昭曰：「今故鄣。」〔索隱案：鄣郡後改曰故鄣。或稱「豫章」爲衍字也。〕〔正義〕括地志云：「秦兼

天下，以爲鄣郡，今湖州長城縣西南八十里故章城是也。」銅山，今宣州及潤州句容縣有，並屬章也。

〔三〕集解 如淳曰：「鑄錢煮鹽，收其利以足國用，故無賦於民。」〔正義〕按：既盜鑄錢，何以收其利足國之用？吳國之民又何得無賦？如說非也。言吳國山既出銅，民多盜鑄錢，及煮海水爲鹽，以山海之利不賦之，故言無賦也。其民無賦，國用乃富饒也。

孝文時，吳太子入見，^{〔一〕}得侍皇太子飲博。吳太子師傅皆楚人，輕悍，又素驕，博爭道，不恭，皇太子引博局提吳太子，殺之。^{〔二〕}於是遣其喪歸葬。至吳，吳王愠^{〔三〕}曰：「天下同宗，死長安卽葬長安，何必來葬爲！」復遣喪之長安葬。吳王由此稍失藩臣之禮，稱病不朝。京師知其以子故稱病不朝，驗問實不病，諸吳使來，輒繫責治之。吳王恐，爲謀滋甚。及後使人爲秋請，^{〔四〕}上復責問吳使者，使者對曰：「王實不病，漢繫治使者數輩，以故遂稱病。且夫『察見淵中魚，不祥』。^{〔五〕}今王始詐病，及覺，見責急，愈益閉，恐上誅之，計乃無聊。唯上弃之而與更始。」於是天子乃赦吳使者歸之，而賜吳王几杖，老，不朝。吳得釋其罪，謀亦益解。然其居國以銅鹽故，百姓無賦。^{〔六〕}卒踐更，輒與平賈。^{〔七〕}歲時存問茂材，賞賜閭里。佗郡國吏欲來捕亡人者，訟共禁弗予。^{〔八〕}如此者四十餘年，^{〔九〕}以故能使其衆。

〔一〕索隱 姚氏案：楚漢春秋云「吳太子名賢，字德明」。

〔二〕索隱 提音啼，又音底，又音弟。

〔三〕正義 於問反，怨也。

〔四〕集解 應劭曰：「冬當斷獄，秋先請擇其輕重也。」孟康曰：「律，春曰朝，秋曰請，如古諸侯朝聘也。」如淳曰：「漢不得行，使人代已致請禮也。」索隱 音淨。孟說是也。應劭所云斷獄先請，不知何遷。如淳云代已致請，

亦是臆說。且文云「使人爲秋請」，謂使人爲此秋請之禮也。

〔五〕集解張晏曰：「喻人君不當見盡下之私。」索隱案：此語見韓子及文子。韋昭曰：「知臣下陰私，使憂患生

變，爲不祥。故當赦宥，使自新也。」

〔六〕索隱按：吳國有鑄錢煮鹽之利，故百姓不別徭賦也。

〔七〕集解漢書音義曰：「以當爲更卒，出錢三百文，謂之『過更』。自行爲卒，謂之『踐更』。吳王欲得民心，爲卒者願其庸，隨時月與平賈，如漢桓、靈時有所興作，以少府錢借民比也。」索隱案：漢律，卒更有三，踐更、居更、過

更也。此言踐更輒與平賈者，謂爲踐更合自出錢，今王欲得人心，乃與平賈，官讎之也。正義踐更，若今唱

更、行更者也，言民自著卒。更有三品：有卒更，有踐更，有過更。古者正卒無常人，皆當迭爲之，是爲卒更。貧

者欲願更錢者，次直者出錢願之，月二千，是爲踐更。天下人皆直，戍邊三月，亦各爲更，律所謂繇戍也。雖丞相

子亦在戍邊之調，不可人人自行三月戍，又行者出錢三百人官，官給戍者，是爲過更。此漢初因秦法而行之，後

改爲繇，乃戍邊一歲。

〔八〕集解徐廣曰：「訟音松。」駟按：如淳曰「訟，公也。」正義訟音容。言其相容禁止不與也。

〔九〕正義言四十餘年者，太史公盡言吳王一代行事也。漢書作「三十餘年」，而班固見其語在孝文之代，乃減十年，是班固不曉其理也。

鼂錯爲太子家令，得幸太子，數從容言吳過可削。數上書說孝文帝，文帝寬，不忍罰，以此吳日益橫。及孝景帝卽位，錯爲御史大夫，說上曰：「昔高帝初定天下，昆弟少，諸子

弱，大封同姓，故王孽子悼惠王王齊七十餘城，庶弟元王王楚四十餘城，兄子濞王吳五十餘城，封三庶孽，分天下半。今吳王前有太子之郤，詐稱病不朝，於古法當誅，文帝弗忍，因賜几杖。德至厚，當改過自新。乃益驕溢，卽山〔一〕鑄錢，煮海水爲鹽，誘天下亡人，謀作亂。今削之亦反，不削之亦反。削之，其反亟，禍小；不削，反遲，禍大。三年冬，楚王朝，鼂錯因言楚王戊往年爲薄太后服，私姦服舍，〔二〕請誅之。詔赦，罰削東海郡。因削吳之豫章郡、會稽郡。及前二年趙王有罪，削其河閒郡。〔三〕膠西王卬以賣爵有姦，削其六縣。

〔一〕索隱案：卽山，山名。又卽者，就也。

〔二〕集解服虔曰：「服舍，在喪次，而私姦官中也。」

〔三〕索隱案：漢書作「常山郡」也。

漢廷臣方議削吳。吳王濞恐削地無已，因以此發謀，欲舉事。念諸侯無足與計謀者，聞膠西王勇，好氣，喜兵，諸齊〔一〕皆憚畏，於是乃使中大夫應高詔〔二〕膠西王。無文書，口報曰：「吳王不肖，有宿夕之憂，不敢自外，使喻其驩心。」王曰：「何以教之？」高曰：「今者主上興於姦，飾於邪臣，好小善，聽讒賊，擅變更律令，侵奪諸侯之地，徵求滋多，誅罰良善，日以益甚。里語有之，『舐糠及米』。〔三〕吳與膠西，知名諸侯也，一時見察，恐不得安肆矣。」

吳王身有內病，不能朝請二十餘年，嘗患見疑，無以自白，今脅肩累足，猶懼不見釋。竊聞大王以爵事有適，〔四〕所聞諸侯削地，罪不至此，此恐不得削地而已。」王曰：「然，有之。子將奈何？」高曰：「同惡相助，同好相留，同情相成，同欲相趨，同利相死。今吳王自以爲與大王同憂，願因時循理，棄軀以除患害於天下，億亦可乎？」王瞿然駭曰：「〔五〕寡人何敢如是？今主上雖急，固有死耳，安得不戴？」高曰：「御史大夫鼂錯，熒惑天子，侵奪諸侯，蔽忠塞賢，朝廷疾怨，諸侯皆有倍畔之意，人事極矣。彗星出，蝗蟲數起，此萬世一時，而愁勞聖人之所以起也。」〔六〕故吳王欲內以鼂錯爲討，外隨大王後車，徜徉天下，所鄉者降，所指者下，天下莫敢不服。大王誠幸而許之一言，則吳王率楚王略函谷關，守滎陽敖倉之粟，距漢兵。治次舍，須大王。大王有幸而臨之，則天下可并，兩主分割，不亦可乎？」王曰：「善。」高歸報吳王，吳王猶恐其不與，乃身自爲使，使於膠西，面結之。

〔一〕集解 韋昭曰：「故爲齊分爲國者膠東、濟北之屬。」

〔二〕索隱 音徒鳥反。

〔三〕索隱 案：言舐糠盡則至米，謂削土盡則至滅國也。

〔四〕正義 張革反。

〔五〕索隱 劉氏瞿音九具反。又說文云「瞿，遠視貌」。音九縛反。

〔六〕索隱案：所謂「殷憂以啓明聖」也。

膠西羣臣或聞王謀，諫曰：「承一帝，至樂也。今大王與吳西鄉，弟令事成，兩主分爭，患乃始結。諸侯之地不足爲漢郡什二，而爲畔逆以憂太后，非長策也。」〔一〕王弗聽。遂發使約齊、菑川、膠東、濟南、濟北，皆許諾，而曰：「城陽景王有義，攻諸呂，勿與，事定分之耳。」〔二〕

〔一〕集解文穎曰：「王之太后也。」

〔二〕集解徐廣曰：「爾時城陽恭王喜，景王之子。」

諸侯既新削罰，振恐，多怨黷錯。及削吳會稽、豫章郡書至，則吳王先起兵，膠西正月丙午誅漢吏二千石以下，膠東、菑川、濟南、楚、趙亦然，遂發兵西。齊王後悔，飲藥自殺，畔約。濟北王城壞未完，其郎中令劫守其王，不得發兵。膠西爲渠率，膠東、菑川、濟南共攻圍臨菑。趙王遂亦反，陰使匈奴與連兵。

七國之發也，吳王悉其士卒，下令國中曰：「寡人年六十二，〔一〕身自將。少子年十四，亦爲士卒先。諸年上與寡人比，下與少子等者，皆發。」發二十餘萬人。南使閩越、東越，東越亦發兵從。

〔一〕集解徐廣曰：「吳王封吳四十二年矣。」

孝景帝三年正月甲子，初起兵於廣陵。^{〔一〕}西涉淮，因并楚兵。發使遺諸侯書曰：「吳王劉濞敬問膠西王、膠東王、菑川王、濟南王、趙王、楚王、淮南王、衡山王、廬江王、故長沙王子^{〔二〕}幸教寡人！以漢有賊臣，無功天下，侵奪諸侯地，使吏劾繫訊治，以僇辱之爲故，^{〔三〕}不以諸侯人君禮遇劉氏骨肉，絕先帝功臣，進任姦宄，誑亂天下，^{〔四〕}欲危社稷。陛下多病志失，不能省察。欲舉兵誅之，謹聞教。敝國雖狹，地方三千里，人雖少，精兵可具五十萬。寡人素事南越三十餘年，其王君皆不辭分其卒以隨寡人，又可得三十餘萬。寡人雖不肖，願以身從諸王。越直^{〔五〕}長沙者，^{〔六〕}因王子定長沙以北，^{〔七〕}西走蜀、漢中。^{〔八〕}告越^{〔九〕}楚王、淮南三王，與寡人西面；^{〔一〇〕}齊諸王與趙王定河閒、河內，或入臨晉關，^{〔一一〕}或與寡人會雒陽；燕王、趙王固與胡王有約，燕王北定代、雲中，搏胡衆；^{〔一二〕}人蕭關，^{〔一三〕}走長安，匡正天子，以安高廟。願王勉之。楚元王子、淮南三王或不沐洗十餘年，怨人骨髓，欲一有所出之久矣，寡人未得諸王之意，未敢聽。今諸王苟能存亡繼絕，振弱伐暴，以安劉氏，社稷之所願也。敝國雖貧，寡人節衣食之用，積金錢，脩兵革，聚穀食，夜以繼日，三十餘年矣。凡爲此，願諸王勉用之。能斬捕大將者，賜金五千斤，封萬戶；列將，三千斤，封五千戶；裨將，二千斤，封二千戶；二千石，千斤，封千戶；千石，五百斤，封五百戶；皆爲列侯。其以軍若城邑降者，卒萬人，邑萬戶，如得大將；人戶五千，如得列將；人戶三千，如得裨將；

人戶千，如得二千石；其小吏皆以差次受爵金。佗封賜皆倍軍法。^{〔四〕}其有故爵邑者，更益勿因。願諸王明以令士大夫，弗敢欺也。寡人金錢在天下者往往而有，非必取於吳，諸王日夜用之弗能盡。有當賜者告寡人，寡人且往遺之。敬以聞。」

〔一〕集解 徐廣曰：「荆王劉賈都吳，吳王移廣陵也。」

〔二〕集解 徐廣曰：「吳芮之玄孫靖王著，以文帝七年卒，無嗣，國除。」^{〔三〕}案：如淳曰：「吳芮後四世無子，國除。庶子二人爲列侯，不得嗣王，志將不滿，故誘與之反也。」

〔三〕集解 漢書音義曰：「故，事也。」^{〔四〕}正義 按：專以僇辱諸侯爲事。

〔四〕正義 註音挂。

〔五〕集解 音值。

〔六〕索隱 服虔云：「直音值。謂其境相接也。」

〔七〕集解 如淳曰：「南越直長沙者，因王子定也。」^{〔八〕}案：謂南越之地與長沙地相接。值者，因長沙王子以定長沙以北也。

〔八〕正義 走音奏，向也。王子，長沙王子也。南越之地對長沙之南者，其民因王子卒而鎮定長沙以北，西向蜀及漢中，咸委王子定矣。

〔九〕集解 如淳曰：「告東越使定之。」

〔一〇〕正義 越，東越也。又告東越、楚、淮南三王，與吳王共西面擊之。三王謂淮南、衡山、廬江也。

〔一一〕正義 今蒲津關。

〔二〕索隱 搏音專。專謂專統領胡兵也。

〔三〕正義 今名隴山關，在原州平涼縣界。

〔四〕集解 服虔曰：「封賜倍漢之常法。」

七國反書聞天子，天子乃遣太尉條侯周亞夫將三十六將軍，往擊吳楚，遣曲周侯酈寄擊趙，將軍欒布擊齊，大將軍竇嬰屯滎陽，監齊趙兵。

吳楚反書聞，兵未發，竇嬰未行，言故吳相袁盎。盎時家居，詔召入見。上方與鼂錯調兵竿軍食，上問袁盎曰：「君嘗爲吳相，知吳臣田祿伯爲人乎？今吳楚反，於公何如？」對曰：「不足憂也，今破矣。」上曰：「吳王卽山鑄錢，煮海水爲鹽，誘天下豪桀，白頭舉事。若此，其計不百全，豈發乎？何以言其無能爲也？」袁盎對曰：「吳有銅鹽利則有之，安得豪桀而誘之！誠令吳得豪桀，亦且輔王爲義，不反矣。吳所誘皆無賴子弟，亡命鑄錢姦人，故相率以反。」鼂錯曰：「袁盎策之善。」上問曰：「計安出？」盎對曰：「願屏左右。」上屏人，獨錯在。盎曰：「臣所言，人臣不得知也。」乃屏錯。錯趨避東廂，恨甚。上卒問盎，盎對曰：「吳楚相遺書，曰『高帝王子弟各有分地，今賊臣鼂錯擅適過諸侯，〔一〕削奪之地』。故以反爲名，西共誅鼂錯，復故地而罷。方今計獨斬鼂錯，發使赦吳楚七國，復其故削地，則兵

可無血刃而俱罷。」於是上嘿然良久，曰：「顧誠何如，吾不愛一人以謝天下。」盎曰：「臣愚計無出此，願上孰計之。」乃拜盎爲太常，三 吳王弟子德侯爲宗正。三 盎裝治行。後十餘日，上使中尉召錯，給載行東市。錯衣朝衣斬東市。則遣袁盎奉宗廟，宗正輔親戚，四 使告吳如盎策。至吳，吳楚兵已攻梁壁矣。宗正以親故，先入見，諭吳王使拜受詔。吳王聞袁盎來，亦知其欲說己，笑而應曰：「我已爲東帝，尚何誰拜？」不肯見盎而留之軍中，欲劫使將。盎不肯，使人圍守，且殺之，盎得夜出，步亡去，走梁軍，遂歸報。

〔一〕索隱 適音直革反，又音宅。

〔二〕正義 令盎爲太常，以示奉宗廟之指意。

〔三〕集解 徐廣曰：「名通，其父名廣。」駟案：漢書曰「吳王弟子德侯廣爲宗正」也。

〔四〕正義 以親戚之意輔漢訓諭。

條侯將乘六乘傳，一 會兵滎陽。至雒陽，見劇孟，喜曰：「七國反，吾乘傳至此，不自意全。」三 又以爲諸侯已得劇孟，劇孟今無動。吾據滎陽，以東無足憂者。」至淮陽，問父絳侯故客鄧都尉曰：「策安出？」客曰：「吳兵銳甚，難與爭鋒。楚兵輕，三 不能久。方今爲將軍計，莫若引兵東北壁昌邑，以梁委吳，吳必盡銳攻之。將軍深溝高壘，使輕兵絕淮泗口，

塞吳饒道。彼吳梁相敝而糧食竭，乃以全彊制其罷極，破吳必矣。」條侯曰：「善。」從其策，遂堅壁昌邑南，^{〔四〕}輕兵絕吳饒道。

〔一〕^{〔正義〕}上音乘，下竹戀反。

〔二〕^{〔正義〕}言不自意洛陽得全，及見劇孟。

〔三〕^{〔正義〕}遣正反。

〔四〕^{〔正義〕}在曹州城武縣東北四十二里也。

吳王之初發也，吳臣田祿伯爲大將軍。田祿伯曰：「兵屯聚而西，無佗奇道，難以就功。臣願得五萬人，別循江淮而上，收淮南、長沙，入武關，與大王會，此亦一奇也。」吳王太子諫曰：「王以反爲名，此兵難以藉人，藉人亦且反王，柰何？且擅兵而別，多佗利害，未可知也，^{〔一〕}徒自損耳。」吳王卽不許田祿伯。

〔一〕^{〔集解〕}蘇林曰：「祿伯儻將兵降漢，自爲利己，於吳爲生患也。」

吳少將桓將軍說王曰：「吳多步兵，步兵利險；漢多車騎，車騎利平地。願大王所過城邑不下，直棄去，疾西據雒陽武庫，食敖倉粟，阻山河之險，以令諸侯，雖毋入關，天下固已定矣。卽大王徐行，留下城邑，漢軍車騎至，馳入梁楚之郊，事敗矣。」吳王問諸老將，老將曰：「此少年推鋒之計可耳，安知大慮乎！」於是王不用桓將軍計。

吳王專并將其兵，未度淮，諸賓客皆得爲將、校尉、候、司馬，獨周丘不得用。周丘者，下邳人，亡命吳，酤酒無行，吳王薄之，弗任。周丘上謁，說王曰：「臣以無能，不得待罪行間。臣非敢求有所將，願得王一漢節，必有以報王。」王乃予之。周丘得節，夜馳入下邳。下邳時聞吳反，皆城守。至傳舍，召令。令人戶，使從者以罪斬令。遂召昆弟所善豪吏告曰：「吳反兵且至，至，屠下邳不過食頃。今先下，家室必完，能者封侯矣。」出乃相告，下邳皆下。周丘一夜得三萬人，使人報吳王，遂將其兵北略城邑。比至城陽，「二」兵十餘萬，破城陽中尉軍。聞吳王敗走，自度無與共成功，卽引兵歸下邳。未至，疽發背死。

「二」正義地理志云城陽國，故齊，漢文帝二年別爲國，屬兗州。

二月中，吳王兵既破，敗走，於是天子制詔將軍曰：「蓋聞爲善者，天報之以福；爲非者，天報之以殃。高皇帝親表功德，建立諸侯，幽王、悼惠王絕無後，孝文皇帝哀憐加惠，王幽王子遂、悼惠王子卬等，令奉其先王宗廟，爲漢藩國，德配天地，明並日月。吳王濞倍德反義，誘受天下亡命辜人，亂天下幣，「一」稱病不朝二十餘年，有司數請濞罪，孝文皇帝寬之，欲其改行爲善。今乃與楚王戊、趙王遂、膠西王卬、濟南王辟光、菑川王賢、膠東王雄渠約從反，爲逆無道，起兵以危宗廟，賊殺大臣及漢使者，迫劫萬民，天殺無罪，燒殘民家，掘

其丘冢，甚爲暴虐。今卬等又重逆無道，燒宗廟，鹵御物，^{〔二〕}朕甚痛之。朕素服避正殿，將軍其勸士大夫擊反虜。擊反虜者，深入多殺爲功，斬首捕虜比三百石以上者皆殺之，無有所置。^{〔三〕}敢有議詔及不如詔者，皆要斬。」

〔一〕集解如淳曰：「幣，錢也。以私錢淆亂天下錢也。」

〔二〕集解如淳曰：「鹵，抄掠也。宗廟在郡縣之物，皆爲御物。」正義顏師古曰：「御物，宗廟之服器也。」

〔三〕正義置，放釋也。

初，吳王之度淮，與楚王遂西敗棘壁，^{〔一〕}乘勝前，銳甚。梁孝王恐，遣六將軍擊吳，又敗梁兩將，士卒皆還走梁。梁數使使報條侯求救，條侯不許。又使使惡條侯於上，上使人告條侯救梁，復守便宜不行。梁使韓安國及楚死事相弟張羽爲將軍，^{〔二〕}乃得頗敗吳兵。吳兵欲西，梁城守堅，不敢西，卽走條侯軍，會下邑。^{〔三〕}欲戰，條侯壁，不肯戰。吳糧絕，卒飢，數挑戰，遂夜犇條侯壁，驚東南。條侯使備西北，果從西北入。吳大敗，士卒多飢死，乃畔散。於是吳王乃與其麾下壯士數千人夜亡去，度江走丹徒，保東越。^{〔四〕}東越兵可萬餘人，乃使人收聚亡卒。漢使人以利啗東越，^{〔五〕}東越卽給吳王，吳王出勞軍，卽使人鏖殺吳王，^{〔六〕}盛其頭，^{〔七〕}馳傳以聞。吳王子子華、子駒亡走閩越。吳王之弃其軍亡也，軍遂潰，往往稍降太尉、梁軍。楚王戍軍敗，自殺。

〔一〕正義 在宋州寧陵縣西南七十里。

〔二〕集解 徐廣曰：「楚相張尚諫王而死。」正義 按：羽，尚弟也。

〔三〕集解 徐廣曰：「屬梁國。」正義 宋州碭山縣，本漢下邑縣。

〔四〕正義 東越傳云：「獨東甌受漢之購，殺吳王。」丹徒，潤州也。東甌卽東越也。東越將兵從吳在丹徒也。

〔五〕集解 韋昭曰：「咱音徒覽反。」

〔六〕集解 孟康曰：「方言『戟謂之鏃』。」索隱 鏃音七江反。謂以戈刺殺之。鄒氏又音春。亦音「從容」之「從」，謂撞殺之也。

〔七〕集解 吳地記曰：「吳王濞葬武進縣南，地名相唐。」索隱 張勃云：「吳王濞葬丹徒縣南，其地名相唐。」今注本

云「武進縣」，恐錯也。

正義 括地志云：「漢吳王濞冢在潤州丹徒縣東練壁聚北，今入于江。」吳錄云丹徒有吳

王冢，在縣北，其處名爲相唐。」

三王之圍齊臨菑也，三月不能下。漢兵至，膠西、膠東、菑川王各引兵歸。膠西王乃袒跣，席橐，飲水，謝太后。王太子德曰：「漢兵遠，臣觀之已罷，可襲。」願收大王餘兵擊之，擊之不勝，乃逃入海，未晚也。」王曰：「吾士卒皆已壞，不可發用。」弗聽。漢將弓高侯積當〔一〕遺王書曰：「奉詔誅不義，降者赦其罪，復故；不降者滅之。王何處，須以從事。」王肉袒叩頭漢軍壁，謁曰：「臣叩奉法不謹，驚駭百姓，乃苦將軍遠道至于窮國，敢請菹醢之罪。」弓高侯執金鼓見之，曰：「王苦軍事，願聞王發兵狀。」王頓首膝行對曰：「今者，鼂錯

天子用事臣，變更高皇帝法令，侵奪諸侯地。卬等以爲不義，恐其敗亂天下，七國發兵，且以誅錯。今聞錯已誅，卬等謹以罷兵歸。」將軍曰：「王苟以錯不善，何不以聞？」（及）「乃」未有詔虎符，擅發兵擊義國。以此觀之，意非欲誅錯也。」乃出詔書爲王讀之。讀之訖，曰：「王其自圖。」王曰：「如卬等死有餘罪。」遂自殺。太后、太子皆死。膠東、菑川、濟南王皆死，「三」國除，納于漢。酈將軍圍趙十月而下之，趙王自殺。濟北王以劫故，得不誅，徙王菑川。

〔一〕〔集解〕徐廣曰：「姓韓。」

〔二〕〔集解〕徐廣曰：「一云『自殺』。」

初，吳王首反，并將楚兵，連齊趙。正月起兵，三月皆破，獨趙後下。復置元王少子平陸侯禮爲楚王，續元王後。徙汝南王非王吳故地，爲江都王。

太史公曰：吳王之王，由父省也。〔一〕能薄賦斂，使其衆，以擅山海利。逆亂之萌，自其子興。爭技發難，〔二〕卒亡其本，親越謀宗，竟以夷隕。鼂錯爲國遠慮，禍反近身。袁盎權說，初寵後辱。故古者諸侯地不過百里，山海不以封。「母親夷狄，以疏其屬」，蓋謂吳邪？「毋爲權首，反受其咎」，豈盎、錯邪？

〔一〕集解言濞之王吳，由父代王被省封郃陽侯。省音所幸反。索隱省音所景反。省者，減也。謂父仲從代王省封郃陽侯也。

〔三〕索隱謂與太子爭博爲爭技也。

【索隱述贊】吳楚輕悍，王濞倍德。富因採山，釁成提局。橘矜貳志，連結七國。嬰命始監，錯誅未塞。天之悔禍，卒取奔北。

史記卷一百七

魏其武安侯列傳第四十七

魏其侯竇嬰者，孝文后從兄子也。父世觀津人。^{〔一〕}喜賓客。孝文時，嬰爲吳相，病免。

孝景初卽位，爲詹事。^{〔三〕}

〔一〕索隱案：地理志觀津縣屬信都。以言其累葉在觀津，故云「父世」也。

〔正義〕觀津城在冀州武邑縣東南二

十五里。

〔三〕正義百官表云「詹事，秦官，掌皇后、太子家」也。

梁孝王者，孝景弟也，其母竇太后愛之。梁孝王朝，因昆弟燕飲。是時上未立太子，酒酣，從容言曰：「千秋之後傳梁王。」太后驩。竇嬰引卮酒進上，曰：「天下者，高祖天下，父子相傳，此漢之約也，上何以得擅傳梁王！」太后由此憎竇嬰。竇嬰亦薄其官，因病免。太后除竇嬰門籍，不得入朝請。^{〔二〕}

〔二〕集解律，諸侯春朝天子曰朝，秋曰請。

〔正義〕才性反。

孝景三年，吳楚反，上察宗室諸寶〔一〕毋如寶嬰賢，乃召嬰。嬰人見，固辭謝病不足任。太后亦慙。於是上曰：「天下方有急，王孫寧可以讓邪？」〔二〕乃拜嬰爲大將軍，賜金千斤。嬰乃言袁盎、欒布諸名將賢士在家者進之。所賜金，陳之廊廡下，軍吏過，輒令財取爲用，〔三〕金無人家者。寶嬰守滎陽，監齊趙兵。〔四〕七國兵已盡破，封嬰爲魏其侯。諸游士賓客爭歸魏其侯。孝景時每朝議大事，條侯、魏其侯，諸列侯莫敢與亢禮。

〔一〕索隱案：謂宗室之中及諸寶之宗室也。又姚氏案：酷吏傳「周陽由，其父趙兼，以淮南王舅侯周陽，故因改氏。由以宗室任爲郎」。則似是與國有親戚屬籍者，亦得呼爲宗室也。

〔二〕集解漢書曰：「寶嬰字王孫。」

〔三〕集解蘇林曰：「令自裁度取爲用也。」

〔四〕正義監音甲衫反。吳王濞傳云：「寶嬰屯滎陽，監齊趙兵」也。

孝景四年，立栗太子，〔一〕使魏其侯爲太子傅。孝景七年，栗太子廢，魏其數爭不能得。魏其謝病，屏居藍田南山之下數月，諸賓客辯士說之，莫能來。梁人高遂乃說魏其曰：「能富貴將軍者，上也；能親將軍者，太后也。今將軍傅太子，太子廢而不能爭，爭不能得，又弗能死。自引謝病，擁趙女，屏閒處，〔二〕而不朝。相提而論，〔三〕是自明揚主上之過。有如兩宮整將軍，〔四〕則妻子毋類矣。」〔五〕魏其侯然之，乃遂起，朝請如故。

〔一〕正義 栗姬之子，後廢之，故書母姓也。

〔二〕正義 上音閑，下昌汝反。

〔三〕集解 徐廣曰：「提音徒抵反。」索隱 提音弟，又音啼。相提猶相抵也。論音路頓反。

〔四〕集解 張晏曰：「兩宮，太后、景帝也。螫，怒也。毒蟲怒必螫人。又火各反。」索隱 螫音釋。謂怒也，毒蟲

怒必螫人。又音火各反。漢書作「爽」，爽即螫也。

正義 兩宮，太子、景帝也。

〔五〕索隱 謂見誅滅無遺類。

桃侯免相，〔一〕竇太后數言魏其侯。孝景帝曰：「太后豈以爲臣有愛，〔二〕不相魏其？魏其者，沾沾〔三〕自喜耳，多易。〔四〕難以爲相，持重。」遂不用，用建陵侯衛綰爲丞相。

〔一〕集解 服虔曰：「劉舍也。」

〔二〕索隱 愛猶惜也。

〔三〕集解 徐廣曰：「沾，一作『怙』。又昌兼反，又當牒反。」

〔四〕集解 張晏曰：「沾沾，言自整頓也。多易，多輕易之行也。或曰沾音檐也。」索隱 沾音檐，又音當牒反。小

顏音他兼反。檐音如字，又天牒反。檐音尺占反。

武安侯田蚡〔一〕者，孝景后同母弟也，生長陵。魏其已爲大將軍後，方盛，蚡爲諸郎，〔二〕未貴，往來侍酒魏其，跪起如子姓。及孝景晚節，〔三〕蚡益貴幸，爲太中大夫。蚡辯有口，學

槃孟諸書，〔四〕王太后賢之。〔五〕孝景崩，即日太子立，稱制，所鎮撫多有田蚡賓客計策。蚡弟田勝，皆以太后弟，孝景後三年，〔六〕封蚡爲武安侯，勝爲周陽侯。〔七〕

〔一〕索隱 扶粉反。如「蚡鼠」之「蚡」，音墳。

〔二〕集解 徐廣曰：「一云『諸卿』。時人相號長老者爲『諸公』，年少者爲『諸卿』，如今人相號爲『士大夫』也。」

〔三〕索隱 按：謂晚年也。

〔四〕集解 應劭曰：「黃帝史孔甲所作銘也。凡二十九篇，書槃孟中，所爲法戒。諸書，諸子文書也。」孟康曰：「孔甲

槃孟二十六篇，雜家書，兼儒、墨、名、法。」

〔五〕集解 徐廣曰：「卽蚡同母姊者。」

〔六〕集解 徐廣曰：「孝景後三年卽是孝武初嗣位之年也。」

〔七〕正義 絳州聞喜縣東二十里周陽故城也。

武安侯新欲用事爲相，卑下賓客，進名士家居者貴之，欲以傾魏其諸將相。建元元年，丞相綰病免，上議置丞相、太尉。籍福說武安侯曰：「魏其貴久矣，天下士素歸之。今將軍初興，未如魏其，卽上以將軍爲丞相，必讓魏其。魏其爲丞相，將軍必爲太尉。太尉、丞相尊等耳，又有讓賢名。」武安侯乃微言太后風上，於是乃以魏其侯爲丞相，武安侯爲太尉。籍福賀魏其侯，因弔曰：「君侯資性喜善疾惡，方今善人譽君侯，故至丞相；然君侯且疾惡，惡人衆，亦且毀君侯。君侯能兼容，則幸久；不能，今以毀去矣。」魏其不聽。

魏其、武安俱好儒術，推轂趙綰爲御史大夫，〔一〕王臧爲郎中令。迎魯申公，欲設明堂，令列侯就國，除關，〔二〕以禮爲服制，〔三〕以興太平。舉適諸竇〔四〕宗室毋節行者，除其屬籍。時諸外家爲列侯，列侯多尚公主，皆不欲就國，以故毀日至竇太后。太后好黃老之言，而魏其、武安、趙綰、王臧等務隆推儒術，貶道家言，是以竇太后滋不說魏其等。及建元二年，御史大夫趙綰請無奏事東宮。〔三〕竇太后大怒，乃罷逐趙綰、王臧等，而免丞相、太尉，以柏至侯許昌爲丞相，武彊侯莊青翟爲御史大夫。魏其、武安由此以侯家居。

〔一〕索隱案：推轂謂自卑下之，如爲之推車轂也。

〔二〕索隱謂除關門之稅也。

〔三〕索隱案：其時禮度踰侈，多不依禮，今令吉凶服制皆法於禮也。

〔四〕索隱適音直革反。

〔三〕集解韋昭曰：「欲奪其政也。」

武安侯雖不任職，以王太后故，親幸，數言事多效，天下吏士趨勢利者，皆去魏其歸武安。武安日益橫。建元六年，竇太后崩，丞相昌、御史大夫青翟坐喪事不辦，免。以武安侯蚡爲丞相，以大司農韓安國爲御史大夫。天下士郡諸侯愈益附武安。〔一〕

〔一〕索隱按：謂仕諸郡及仕諸侯王國者，猶言仕郡國也。

武安者，貌侵，「一」生貴甚。「三」又以爲諸侯王多長，「三」上初卽位，富於春秋，蚡以肺腑爲京師相，「四」非痛折節以禮詘之，天下不肅。「五」當是時，丞相入奏事，坐語移日，所言皆聽。薦人或起家至二千石，權移主上。上乃曰：「君除吏已盡未？吾亦欲除吏。」嘗請考工地益宅，「六」上怒曰：「君何不遂取武庫？」是後乃退。嘗召客飲，坐其兄蓋侯「七」南鄉，自坐東鄉，以爲漢相尊，不可以兄故私撓。武安由此滋驕，治宅甲諸第。「八」田園極膏腴，而市買郡縣器物相屬於道。前堂羅鍾鼓，立曲旃，「九」後房婦女以百數。諸侯奉金玉狗馬玩好，不可勝數。

「一」集解 韋昭曰：「侵音寢，短小也。又云醜惡也，刻确也。音核。」索隱 案：服虔云「侵，短小也」。韋昭云「刻确也」。按：确音刻。又孔文祥「侵，醜惡也。音寢」。

「二」索隱 按：小顏云「生貴謂自尊高示貴寵」，其說疏也。按：生謂蚡自生尊貴之勢特甚，故下云「又以諸侯王多長年，蚡以肺腑爲相，非痛折節以禮屈之，則天下不肅」者也。

「三」集解 張晏曰：「多長年。」

「四」索隱 腑音府。肺音廢。言如肝肺之相附。又云柿，木札；附，木皮也。詩云「如塗塗附」，以言如皮之附木也。

正義 顏師古曰：「舊解云肺附，如肝肺之相附著也。一說柿，斫木札也，喻其輕薄附著大材。」按：顏此說並是疏謬。又改「腑」爲「附」就其義，重謬矣。八十一難云：「寸口者，脈之大會，手太陰之動脈也。」呂廣云：「太陰者，肺之脈也。肺爲諸藏之主，通陰陽，故十二經脈皆會乎太陰，所以決吉凶者。十二經有病皆寸口，知其何經之動」

浮沈濇滑，春秋逆順，知其死生。」顧野王云：「肺腑，腹心也。」案：說田蚡爲相，若人之肺，知陰陽逆順，又爲帝之腹心親戚也。

〔五〕索隱案：痛，甚也。欲令士折節屈下於己；不然，天下不肅。或解以爲蚡欲折節下士，非也。案：下文不讓其兄蓋侯，知或說爲非也。

〔六〕集解漢書百官表曰：少府有考工室。如淳曰：「官名也。」

〔七〕集解徐廣曰：「王后兄王信也。泰山有蓋縣，樂安有益縣也。」

〔八〕集解徐廣曰：「爲諸第之上也。」

〔九〕集解如淳曰：「旌旗之名。通帛曰旂。曲旂，僭也。」蘇林曰：「禮，大夫建旂。曲旂，柄上曲也。」

曲旂，旌旂柄上曲，僭禮也。通帛曰旂。說文云：曲旂者，所以招士也。

〔索隱按：

魏其失竇太后，益疏不用，無勢，諸客稍稍自引而怠傲，唯灌將軍獨不失故。魏其日默，不得志，而獨厚遇灌將軍。

灌將軍夫者，潁陰人也。夫父張孟，嘗爲潁陰侯嬰舍人，得幸，因進之至二千石，故蒙灌氏姓爲灌孟。吳楚反時，潁陰侯灌何爲將軍，〔一〕屬太尉，請灌孟爲校尉。夫以千人與父俱。〔二〕灌孟年老，潁陰侯彊請之，鬱鬱不得意，故戰常陷堅，遂死吳軍中。軍法，父子俱從軍，有死事，得與喪歸。灌夫不肯隨喪歸，奮曰：「〔三〕願取吳王若將軍頭，以報父之仇。」於

是灌夫被甲持戟，募軍中壯士所善願從者數十人。及出壁門，莫敢前。獨二人及從奴十數騎馳入吳軍，至吳將麾下，^{〔四〕}所殺傷數十人。不得前，復馳還，走入漢壁，皆亡其奴，獨與一騎歸。夫身中大創十餘，適有萬金良藥，故得無死。夫創少瘳，又復請將軍曰：「吾益知吳壁中曲折，請復往。」將軍壯義之，恐亡夫，乃言太尉，太尉乃固止之。吳已破，灌夫以此名聞天下。

〔一〕^{〔索隱〕}案：何是嬰子，漢書作「嬰」，誤也。

〔二〕^{〔集解〕}漢書音義曰：「官主千人，如候司馬。」

〔三〕^{〔集解〕}張晏曰：「自奮勵也。」

〔四〕^{〔正義〕}謂大將之旗。

潁陰侯言之上，上以夫爲中郎將。數月，坐法去。後家居長安，長安中諸公莫弗稱之。孝景時，至代相。孝景崩，今上初卽位，以爲淮陽天下交，勁兵處，故徙夫爲淮陽太守。建元元年，人爲太僕。二年，夫與長樂衛尉竇甫飲，輕重不得，^{〔一〕}夫醉，搏甫。^{〔三〕}甫，竇太后昆弟也。上恐太后誅夫，徙爲燕相。數歲，坐法去官，家居長安。

〔一〕^{〔集解〕}晉灼曰：「飲酒輕重不得其平也。」

〔三〕^{〔索隱〕}搏音博，謂擊也。

灌夫爲人剛直使酒，不好面諛。貴戚諸有勢在己之右，不欲加禮，必陵之；諸士在己之左，愈貧賤，尤益敬，與鈞。稠人廣衆，薦寵下輩。士亦以此多之。

夫不喜文學，好任俠，已然諾。「一」諸所與交通，無非豪桀大猾。家累數千萬，食客日數十百人。陂池田園，宗族賓客爲權利，橫於潁川。潁川兒乃歌之曰：「潁水清，灌氏寧；潁水濁，灌氏族。」

〔一〕〔索隱〕已音以。謂已許諾，必使副其前言也。

灌夫家居雖富，然失勢，卿相待中賓客益衰。及魏其侯失勢，亦欲倚灌夫引繩批根生平慕之後弃之者。「一」灌夫亦倚魏其而通列侯宗室爲名高。兩人相爲引重，「二」其游如父子然。相得驩甚，無厭，恨相知晚也。

〔二〕〔集解〕蘇林曰：「二人相倚，引繩直之，意批根賓客也。弃之者，不與交通。」孟康曰：「根，根括。引繩以持彈。」

〔索隱〕案：劉氏云：「二人相倚，事如合繩共相依引也。」批音步結反。批者，排也。漢書作「排」。排根者，蘇林云：「賓客去之者不與通也。」孟康云：「音根格，謂引繩排彈其根格，平生慕嬰交而弃者令不得通也。小顏根音痕，格音下各反。駟謂引繩，排彈繩根括以退之者也。」持彈，案漢書本作「捍彈」，音普耕反。

〔三〕〔集解〕張晏曰：「相薦達爲聲勢。」

灌夫有服，過丞相。丞相從容曰：「吾欲與仲孺過魏其侯，」〔一〕會仲孺有服。〔二〕灌夫曰：「將軍乃肯幸臨況魏其侯，夫安敢以服爲解！請語魏其侯帳具，將軍旦日蚤臨。」武安許諾。灌夫具語魏其侯如所謂武安侯。魏其與其夫人益市牛酒，夜灑埽，早帳具至旦。平明，令門下候伺。至日中，丞相不來。魏其謂灌夫曰：「丞相豈忘之哉？」灌夫不懌，曰：「夫以服請，宜往。」〔三〕乃駕，自往迎丞相。丞相特前戲許灌夫，殊無意往。及夫至門，丞相尚卧。於是夫人見，曰：「將軍昨日幸許過魏其，魏其夫妻治具，自旦至今，未敢嘗食。」武安鄂。〔四〕謝曰：「吾昨日醉，忽忘與仲孺言。」乃駕往，又徐行，灌夫愈益怒。及飲酒酣，夫起舞屬丞相，〔五〕丞相不起，夫從坐上語侵之。魏其乃扶灌夫去，謝丞相。丞相卒飲至夜，極驩而去。

〔一〕集解 漢書曰：「灌夫字仲孺。」

〔二〕索隱 案：服謂耆功之服也。故應璩書曰「仲孺不辭同生之服」是也。

〔三〕集解 徐廣曰：「一云『以服請，不宜往』。」
〔索隱〕案：徐廣云「以服請，不宜往」，其說非也。正言夫請不以服

爲解，蚡不宜忘，故駕自往迎也。

〔四〕集解 徐廣曰：「一作『悟』。」

〔五〕索隱 屬音之欲反。屬猶委也，付也。小顏云「若今之舞訖相勸也」。

丞相嘗使籍福請魏其城南田。魏其大望曰：「老僕雖棄，將軍雖貴，寧可以勢奪乎！」不許。灌夫聞，怒，罵籍福。籍福惡兩人有郤，乃謾自好謝丞相曰：「魏其老且死，易忍，且待之。」已而武安聞魏其、灌夫實怒不予田，亦怒曰：「魏其子嘗殺人，蚡活之。蚡事魏其無所不可，何愛數頃田？且灌夫何與也？吾不敢復求田。」武安由此大怨灌夫、魏其。

元光四年春，〔一〕丞相言灌夫家在潁川，橫甚，民苦之。請案。上曰：「此丞相事，何請。」灌夫亦持丞相陰事，爲姦利，受淮南王金與語言。賓客居閒，遂止，俱解。

〔一〕集解徐廣曰：「疑此當是三年也。其說在後。」

夏，丞相取燕王女爲夫人，〔二〕有太后詔，召列侯宗室皆往賀。魏其侯過灌夫，欲與俱。夫謝曰：「夫數以酒失得過丞相，丞相今者又與夫有郤。」魏其曰：「事已解。」彊與俱。飲酒酣，武安起爲壽，〔三〕坐皆避席伏。已魏其侯爲壽，獨故人避席耳，餘半膝席。〔四〕灌夫不悅。起行酒，至武安，武安膝席曰：「不能滿觴。」夫怒，因嘻笑曰：「將軍貴人也，屬之！」〔五〕時武安不肯。行酒次至臨汝侯，〔六〕臨汝侯方與程不識耳語，又不避席。夫無所發怒，乃罵臨汝侯曰：「生平毀程不識不直一錢，今日長者爲壽，乃效女兒咕囁耳語！」〔七〕武安謂灌夫曰：「程李俱東西宮衛尉，〔八〕今衆辱程將軍，仲孺獨不爲李將軍地乎？」〔九〕灌夫曰：「今日斬頭陷匈，〔十〕何知程李乎！」坐乃起更衣，稍稍去。魏其侯去，麾灌夫出。武安遂怒曰：

「此吾驕灌夫罪。」乃令騎留灌夫。灌夫欲出不得。籍福起爲謝，案灌夫項令謝。夫愈怒，不肯謝。武安乃麾騎縛夫置傳舍，召長史曰：「今日召宗室，有詔。」劾灌夫罵坐不敬，繫居室。〔一〕遂按其前事，遣吏分曹逐捕諸灌氏支屬，皆得弃市罪。魏其侯大媿，爲資使賓客請，莫能解。〔二〕武安吏皆爲耳目，諸灌氏皆亡匿，夫繫，遂不得告言武安陰事。

〔一〕索隱案：蚡娶燕王劉澤子康王嘉之女也。

〔二〕集解如淳曰：「上酒爲稱壽，非大行酒。」

〔三〕集解蘇林曰：「下席而膝半在席上。」如淳曰：「以膝跪席上也。」

〔四〕集解徐廣曰：「屬，一作『畢』。」索隱案：漢書作「畢」。畢，盡也。

〔五〕集解徐廣曰：「灌嬰孫，名賢也。」索隱案：漢書云臨汝侯灌賢，則賢是嬰之孫，臨汝是改封也。

〔六〕集解韋昭曰：「咕囁，附耳小語聲。」索隱女兒猶云兒女也。漢書作「女曹兒」。曹，輩也，猶言兒女輩。咕，

鄒氏音蚩輒反。囁音女輒反。說文「附耳小語也」。

〔七〕集解漢書音義曰：「李廣爲東宮，程不識爲西宮。」

〔八〕集解如淳曰：「李將軍，李廣也。猶今人言爲除地也。」索隱案：小顏云「言今既毀程，令李何地自安處也」。

〔九〕索隱韋昭云：「言不避死亡也。」漢書作「穴匈」。

〔一〇〕集解如淳曰：「百官表居室爲保宮，今守宮也。」

〔一一〕集解如淳曰：「爲出資費，使人爲夫言。」

魏其銳身爲救灌夫。夫人諫魏其曰：「灌將軍得罪丞相，與太后家忤，寧可救邪？」魏其侯曰：「侯自我得之，自我捐之，無所恨。且終不令灌仲孺獨死，嬰獨生。」乃匿其家，竊出上書。立召人，具言灌夫醉飽事，不足誅。上然之，賜魏其食，曰：「東朝廷辯之。」

〔一〕集解 晉灼曰：「恐其夫人復諫止也。」

〔二〕集解 如淳曰：「東朝，太后朝。」

魏其之東朝，盛推灌夫之善，言其醉飽得過，乃丞相以他事誣罪之。武安又盛毀灌夫所爲橫恣，罪逆不道。魏其度不可柰何，因言丞相短。武安曰：「天下幸而安樂無事，蚡得爲肺腑，所好音樂狗馬田宅。蚡所愛倡優巧匠之屬，不如魏其、灌夫日夜招聚天下豪桀壯士與論議，腹誹而心謗，不仰視天而俯畫地。」辟倪兩宮閒，幸天下有變，而欲有大功。臣乃不知魏其等所爲。」於是上問朝臣：「兩人孰是？」御史大夫韓安國曰：「魏其言灌夫父死事，身荷戟馳人不測之吳軍，身被數十創，名冠三軍，此天下壯士，非有大惡，爭杯酒，不足引他過以誅也。魏其言是也。丞相亦言灌夫通姦猾，侵細民，家累巨萬，橫恣潁川，凌轢宗室，侵犯骨肉，此所謂『枝大於本，脰大於股，不折必披』。」丞相言亦是。唯明主裁之。」主爵都尉汲黯是魏其。內史鄭當時是魏其，後不敢堅對。餘皆莫敢對。上怒內史曰：「公平生數言魏其、武安長短，今日廷論，局趣效轅下駒，吾并斬若屬矣。」卽罷

起人，上食太后。太后亦已使人候伺，具以告太后。太后怒，不食，曰：「今我在也，而人皆藉吾弟，」〔六〕令我百歲後，皆魚肉之矣。且帝寧能爲石人邪！〔七〕此特帝在，卽錄錄，設百歲後，〔八〕是屬寧有可信者乎？」上謝曰：「俱宗室外家，」〔九〕故廷辯之。不然，此一獄吏所決耳。」是時郎中令石建爲上分別言兩人事。

〔一〕〔集解〕張晏曰：「視天，占三光也。畫地，知分野所在也。畫地論欲作反事。」

〔二〕〔集解〕徐廣曰：「辟音芳細反。倪音詣。」張晏曰：「占太后與帝吉凶之期。」〔索隱〕辟普係反。倪，五係反。〔埤

倉〕「睥睨，邪視也。」

〔三〕〔集解〕張晏曰：「幸爲反者，當得爲大將立功也。」瓚曰：「天下有變謂天子崩，因變難之際得立大功。」

〔四〕〔索隱〕案：包愷音疋彼反。〔正義〕鋪被反。披，分析也。

〔五〕〔集解〕張晏曰：「俛頭於車轅下，隨母而已。」瓚曰：「小馬在轅下。」〔正義〕應劭云：「駒馬加著轅。局趣，纖小

之貌。」按：應說爲長也。

〔六〕〔索隱〕案：晉灼云「藉，蹈也。以言蹂藉之」。

〔七〕〔索隱〕謂帝不如石人得長存也。〔正義〕顏師古云：「言徒有人形耳，不知好惡。」按：今俗云人不辦事，罵云

杌杌若木人也。

〔八〕〔索隱〕案：設者，脫也。

〔九〕〔正義〕嬰，景帝從舅。蚡，太后同母弟。

武安已罷朝，出止車門，召韓御史大夫載，怒曰：「與長孺共一老秃翁，何爲首鼠兩端？」^{〔一〕}韓御史良久謂丞相曰：「君何不自喜？」^{〔二〕}夫魏其毀君，君當免冠解印綬歸，曰「臣以肺腑幸得待罪，固非其任，魏其言皆是」。如此，上必多君有讓，不廢君。魏其必內愧，杜門齟舌自殺。」^{〔三〕}今人毀君，君亦毀人，譬如賈豎女子爭言，何其無大體也！武安謝罪曰：「爭時急，不知出此。」

〔一〕集解漢書音義曰：「秃老翁，言嬰無官位扳援也。首鼠，一前一卻也。」
〔二〕索隱案：謂共治一老秃翁，指竇嬰也。服虔云「首鼠，一前一卻也」。

〔三〕集解蘇林曰：「何不自解釋爲喜樂邪？」
〔四〕索隱案：小顏云「何不自謙遜爲可喜之事」。音許既反。

於是上使御史簿責魏其所言灌夫，頗不讎，^{〔一〕}欺謾。劾繫都司空。^{〔二〕}孝景時，魏其常受遺詔，曰「事有不便，以便宜論上」。及繫，灌夫罪至族，事日急，諸公莫敢復明言於上。魏其乃使昆弟子上書言之，幸得復召見。書奏上，而案尚書大行無遺詔。^{〔三〕}詔書獨藏魏其家，家丞封。^{〔四〕}乃劾魏其矯先帝詔，罪當弃市。五年十月，^{〔五〕}悉論灌夫及家屬。魏其良久乃聞，聞卽恚，病瘵，^{〔六〕}不食欲死。或聞上無意殺魏其，魏其復食，治病，議定不死矣。乃有蜚語爲惡言聞上，^{〔七〕}故以十二月晦^{〔八〕}論弃市渭城。^{〔九〕}

〔一〕正義 讎音市周反，對也。言簿責魏其所言灌夫實潁川事，故魏其不對爲欺謾者也。

〔二〕索隱 案：百官表云宗正屬官，主詔獄也。正義 如淳云：「律，司空主水及罪人。」

〔三〕集解 如淳曰：「大行，主諸侯官也。」索隱 案：尚書無此，景帝崩時大行遺詔，乃魏其家臣印封之。如淳說非

也。正義 天子崩曰大行也。按：尚書之中，景帝崩時無遺詔賜魏其也。百官表云諸受尚書事也。

〔四〕集解 漢書音義曰：「以家臣印封遺詔。」

〔五〕集解 徐廣曰：「疑非五年，亦非十月。」索隱 徐氏云疑非者，案武紀四年三月蚡薨，竇嬰死在前，今云五年，

故疑非也。正義 漢書云元光四年冬，魏其侯嬰有罪弃市。春三月乙卯，丞相蚡薨。按：五年者，誤也。

〔六〕索隱 非音肥，又音扶味反，風病也。

〔七〕集解 張晏曰：「蚡僞作飛揚誹謗之語。」

〔八〕集解 徐廣曰：「疑非十二月也。」駟案：張晏曰「月晦者，春垂至也」。索隱 著日月者，見春垂至，恐遇赦贖

也。

〔九〕正義 故咸陽也。

其春，武安侯病，〔一〕專呼服謝罪。〔二〕使巫視鬼者視之，見魏其、灌夫共守，欲殺之。竟死。子恬嗣。〔三〕元朔三年，武安侯坐衣赭綹〔四〕入宮，不敬。〔五〕

〔一〕正義 其春，卽四年春也。元光四年十月，灌夫弃市。十二月末，魏其弃市。至三月乙卯，田蚡薨。則三人死同在一一年明矣。漢以十月爲歲首故也。秦楚之際表云「十月」，十一月，十二月，端月，二月，三月，至九爲終。周建

子爲正月，十一月爲正月，十二月爲二月，正月爲三月，二月爲四月，至十月爲歲終。漢初至武帝太初以前，並依秦法，以後改用夏正月，至今不改。然夫子作春秋依夏正。

〔二〕集解 漢書音義曰：「言蚡號呼謝服罪也。」

〔三〕集解 徐廣曰：「蚡疾，見魏其、灌夫鬼殺之，則其（春）〔死〕共在一春內邪？武帝本紀：『四年三月乙卯，田蚡薨。』」
嬰死在蚡薨之前，何復云五年十二月邪？疑十二月當爲二月也。案侯表，蚡事武帝九年而卒，元光四年侯恬之元年，建元元年訖元光三年而九年。大臣表蚡以元光四年卒，亦云嬰四年弃市，未詳此正安在。然蚡薨在嬰死後分明。

〔四〕正義 爾雅云「衣蔽前謂之澹」。郭璞云「蔽膝也」。說文、字林並謂之短衣。

〔五〕集解 徐廣曰：「表云坐衣不敬，國除。」索隱 澹，尺占反。榆音踰。謂非正朝衣，若婦人服也。表云恬坐衣不敬，國除。

淮南王安謀反覺，治。王前朝，〔一〕武安侯爲太尉，時迎王至霸上，謂王曰：「上未有太子，大王最賢，高祖孫，卽宮車晏駕，非大王立當誰哉！」淮南王大喜，厚遺金財物。上自魏其時不直武安，特爲太后故耳。〔二〕及聞淮南王金事，上曰：「使武安侯在者，族矣。」

〔一〕集解 徐廣曰：「建元二年。」

〔二〕索隱 案：武帝以魏其、灌夫事爲枉，於武安侯爲不直，特爲太后故耳。

太史公曰：魏其、武安皆以外戚重，灌夫用一時決筭而名顯。魏其之舉以吳楚，武安之貴在日月之際。然魏其誠不知時變，灌夫無術而不遜，兩人相翼，乃成禍亂。武安負責而好權，杯酒責望，陷彼兩賢。嗚呼哀哉！遷怒及人，命亦不延。衆庶不載，竟被惡言。嗚呼哀哉！禍所從來矣！

【索隱述贊】竇嬰、田蚡，勢利相雄。咸倚外戚，或恃軍功。灌夫自喜，引重其中。意氣杯酒，睥睨兩宮。事竟不直，冤哉二公！

史記卷一百八

韓長孺列傳第四十八

御史大夫韓安國者，梁成安人也，〔一〕後徙睢陽。〔二〕嘗受韓子、雜家說於騶田生所。〔三〕事梁孝王爲中大夫。吳楚反時，孝王使安國及張羽爲將，扞〔四〕吳兵於東界。張羽力戰，安國持重，以故吳不能過梁。吳楚已破，安國、張羽名由此顯。

〔一〕集解 徐廣曰：「在汝潁之間也。」〔索隱〕按：徐廣云「在汝潁之間」。漢書地理志縣名，屬陳留。〔正義〕括地志云：「成安故城在汝州梁縣東二十三里。」地理志云成安屬潁川郡。陳留郡又有成安縣，亦屬梁，未知孰是也。

〔二〕正義 今宋州宋城。

〔三〕索隱 案：安國學韓子及雜家說於騶縣田生之所。

〔四〕索隱 上音醬，下音汗。

梁孝王，景帝母弟，竇太后愛之，令得自請置相、二千石，出入遊戲，僭於天子。天子聞

之，心弗善也。太后知帝不善，乃怒梁使者，弗見，案責王所爲。韓安國爲梁使，見大長公主，^{〔一〕}而泣曰：「何梁王爲人子之孝，爲人臣之忠，而太后曾弗省也？」^{〔二〕}夫前日吳、楚、齊、趙七國反時，自關以東皆合從西鄉，惟梁最親爲艱難。梁王念太后、帝在中，^{〔三〕}而諸侯擾亂，一言泣數行下，跪送臣等六人將兵擊卻吳、楚，吳、楚以故兵不敢西，而卒破亡，梁王之力也。今太后以小節苛禮，^{〔四〕}責望梁王。梁王父兄皆帝王，所見者大，故出稱蹕，入言警，車旗皆帝所賜也，卽欲以侔鄙縣，^{〔五〕}驅馳國中，以夸諸侯，令天下盡知太后、帝愛之也。今梁使來，輒案責之。梁王恐，日夜涕泣思慕，不知所爲。何梁王之爲子孝，爲臣忠，而太后弗恤也？」大長公主具以告太后，太后喜曰：「爲言之帝。」言之，帝心乃解，而免冠謝太后曰：「兄弟不能相教，乃爲太后遺憂。」悉見梁使，厚賜之。其後梁王益親驩。太后、長公主更賜安國可直千餘金。名由此顯，結於漢。

〔一〕集解 徐廣曰：「景帝姊。」

索隱 案：卽館陶公主。

正義 如淳云：「景帝妹也。」

〔二〕索隱 省音仙井反。省者，察也。

〔三〕正義 謂關中也。又云京師在天下之中。

〔四〕索隱 案：謂苛細小禮以責之。

〔五〕集解 徐廣曰：「侔，一作『紃』也。」駟案：侔音丑亞反，誇也。

索隱 侔音丑亞反，字如「姹」。侔者，誇也。

漢書作「嫪」，音火亞反。紆音寒孟反。

其後安國坐法抵罪，蒙〔一〕獄吏田甲辱安國。安國曰：「死灰獨不復然乎？」田甲曰：「然即溺之。」居無何，梁內史缺，漢使使者拜安國爲梁內史，起徒中爲二千石。田甲亡走。安國曰：「甲不就官，我滅而宗。」甲因肉袒謝。安國笑曰：「可溺矣！公等足與治乎？」〔二〕卒善遇之。

〔一〕集解 蒙，縣名。

索隱 抵音丁禮反。蒙，縣名，屬梁國也。

〔二〕索隱 案：謂不足與繩（持）〔治〕之。治音持也。

梁內史之缺也，孝王新得齊人公孫詭，說之，欲請以爲內史。竇太后聞，乃詔王以安國爲內史。

公孫詭、羊勝說孝王求爲帝太子及益地事，恐漢大臣不聽，乃陰使人刺漢用事謀臣。及殺故吳相袁盎，景帝遂聞詭、勝等計畫，乃遣使捕詭、勝，必得。漢使十輩至梁，相以下舉國大索，月餘不得。內史安國聞詭、勝匿孝王所，安國入見王而泣曰：「主辱臣死。」〔一〕大王無良臣，故事紛紛至此。今詭、勝不得，請辭賜死。」王曰：「何至此？」安國泣數行下，

曰：「大王自度於皇帝，孰與太上皇之與高皇帝及皇帝之與臨江王親？」孝王曰：「弗如也。」安國曰：「夫太上、臨江親父子之間，然而高帝曰『提三尺劍取天下者朕也』，故太上皇終不得制事，居于櫟陽。臨江王，適長太子也，以一言過，廢王臨江，^{〔二〕}用宮垣事，卒自殺中尉府。何者？治天下終不以私亂公。語曰：『雖有親父，安知其不爲虎？雖有親兄，安知其不爲狼？』今大王列在諸侯，悅一邪臣^{〔三〕}浮說，犯上禁，撓明法。天子以太后故，不忍致法於王。太后日夜涕泣，幸大王自改，而大王終不覺寤。有如太后宮車卽晏駕，大王尚誰攀乎？」語未卒，孝王泣數行下，謝安國曰：「吾今出詭、勝。」詭、勝自殺。漢使還報，梁事皆得釋，安國之力也。於是景帝、太后益重安國。孝王卒，共王卽位，安國坐法失官，居家。

〔一〕索隱 此語見國語。

〔二〕集解 如淳曰：「景帝嘗屬諸姬，太子母栗姬言不遜，由是廢太子，栗姬憂死。」

〔三〕索隱 悅，漢書作「詠」。說文云「詠，誘也」。

建元中，武安侯田蚡爲漢太尉，親貴用事，安國以五百金物遺蚡。蚡言安國太后，天子亦素聞其賢，卽召以爲北地都尉，遷爲大司農。閩越、東越相攻，安國及大行王恢將。未至越，越殺其王降，漢兵亦罷。建元六年，武安侯爲丞相，安國爲御史大夫。

匈奴來請和親，天子下議。大行王恢，燕人也，數爲邊吏，習知胡事。議曰：「漢與匈奴和親，率不過數歲卽復倍約。不如勿許，興兵擊之。」安國曰：「千里而戰，兵不獲利。今匈奴負戎馬之足，懷禽獸之心，遷徙鳥舉，難得而制也。得其地不足以爲廣，有其衆不足以爲彊，自上古不屬爲人。」〔一〕漢數千里爭利，則人馬罷，虜以全制其敝。且彊弩之極，矢不能穿魯縞；〔二〕衝風之末，力不能漂鴻毛。非初不勁，末力衰也。擊之不便，不如和親。」羣臣議者多附安國，於是上許和親。

〔一〕〔索隱〕案：晉灼云「不內屬於漢爲人」。

〔二〕〔集解〕許慎曰：「魯之縞尤薄。」

其明年，則元光元年，雁門馬邑豪聶翁壹〔一〕因大行王恢言上曰：「匈奴初和親，親信邊，可誘以利。」陰使聶翁壹爲閒，亡入匈奴，謂單于曰：「吾能斬馬邑令丞吏，以城降，財物可盡得。」單于愛信之，以爲然，許聶翁壹。聶翁壹乃還，詐斬死罪囚，縣其頭馬邑城，示單于使者爲信。曰：「馬邑長吏已死，可急來。」於是單于穿塞將十餘萬騎，入武州塞。〔二〕

〔一〕〔集解〕張晏曰：「豪猶帥也。」

〔索隱〕聶，姓也；翁壹，名也。漢書云「聶壹」。

〔二〕〔集解〕徐廣曰：「在雁門。」

〔索隱〕地理志縣名，屬鴈門。又崔浩云「今平城直西百里有武州城」是也。

當是時，漢伏兵車騎材官三十餘萬，匿馬邑旁谷中。衛尉李廣爲驍騎將軍，〔一〕太僕公孫賀爲輕車將軍，〔二〕大行王恢爲將屯將軍，〔三〕太中大夫李息爲材官將軍。〔四〕御史大夫韓安國爲護軍將軍，諸將皆屬護軍。約單于入馬邑而漢兵縱發。王恢、李息、李廣別從代主擊其輜重。〔五〕於是單于入漢長城武州塞。未至馬邑百餘里，行掠鹵，徒見畜牧於野，不見一人。單于怪之，攻烽燧，得武州尉史。欲刺問尉史。尉史曰：「漢兵數十萬伏馬邑下。」單于顧謂左右曰：「幾爲漢所賣！」〔六〕乃引兵還。出塞，曰：「吾得尉史，乃天也。」命尉史爲「天王」。塞下傳言單于已引去。漢兵追至塞，度弗及，卽罷。王恢等兵三萬，聞單于不與漢合，度往擊輜重，必與單于精兵戰，漢兵勢必敗，則以便宜罷兵，皆無功。

〔一〕集解 漢書曰：「北貉燕人來致驍騎。」應劭曰：「驍，健也。」張晏曰：「驍，勇也，若六博之梟矣。」

〔二〕正義 司馬續漢書云：「輕車，古之戰車。」

〔三〕正義 李奇云：「監主諸屯。」

〔四〕正義 臣瓚云：「材官，騎射之官。」

〔五〕正義 釋名云：「輜，廁也。所載衣服雜廁其中。」

〔六〕正義 幾音祈。

天子怒王恢不出擊單于輜重，擅引兵罷也。恢曰：「始約虜入馬邑城，兵與單于接，而

臣擊其輜重，可得利。今單于聞，不至而還，臣以三萬人衆不敵，提取辱耳。〔一〕臣固知還而斬，然得完陛下士三萬人。」於是下恢廷尉。廷尉當恢逗撓，當斬。〔三〕恢私行千金丞相蚡。蚡不敢言上，而言於太后曰：「王恢首造馬邑事，今不成而誅恢，是爲匈奴報仇也。」上朝太后，太后以丞相言告上。上曰：「首爲馬邑事者，恢也，故發天下兵數十萬，從其言，爲此。且縱單于不可得，恢所部擊其輜重，猶頗可得，以慰士大夫心。今不誅恢，無以謝天下。」於是恢聞之，乃自殺。

〔一〕〔集解〕徐廣曰：「提，一作『祗』也。」

〔三〕〔集解〕漢書音義曰：「逗，曲行避敵也；撓，顧望。軍法語也。」〔索隱〕案：劭云「逗，曲行而避敵，音豆」。又音住，住謂留止也。撓，屈服也，女孝反。一云撓，顧望也。

安國爲人大略，智足以當世取合，而出於忠厚焉。〔一〕貪嗜於財。所推舉皆廉士，賢於己者也。於梁舉壺遂、臧固、鄧他，〔二〕皆天下名士，士亦以此稱慕之，唯天子以爲國器。安國爲御史大夫四歲餘，丞相田蚡死，安國行丞相事，奉引墮車蹇。〔三〕天子議置相，欲用安國，使使視之，蹇甚，乃更以平棘侯薛澤爲丞相。安國病免數月，蹇愈，上復以安國爲中尉。歲餘，徙爲衛尉。

〔一〕索隱案：出者，去也。言安國爲人無忠厚之行。

〔二〕索隱上音質，下徒河反。謂二人姓名也，壺遂也，臧固也，郅他也。若漢書則云「至他」，言至於他處，亦舉名士也。

〔三〕集解如淳曰：「爲天子導引而墮車，跛足。」

車騎將軍衛青擊匈奴，〔一〕出上谷，破胡龍城。〔二〕將軍李廣爲匈奴所得，復失之，公孫敖大亡卒，皆當斬，贖爲庶人。明年，匈奴大人邊，殺遼西太守，及入鴈門，所殺略數千人。車騎將軍衛青擊之，出鴈門。衛尉安國爲材官將軍，屯於漁陽。〔三〕安國捕生虜，言匈奴遠去。卽上書言方田作時，請且罷軍屯。罷軍屯月餘，匈奴大人上谷、漁陽。安國壁乃有七百餘人，出與戰，不勝，復入壁。匈奴虜略千餘人及畜產而去。天子聞之，怒，使使責讓安國。徙安國益東，屯右北平。〔四〕是時匈奴虜言當入東方。

〔一〕集解徐廣曰：「元光六年也。」

〔二〕集解龍音龍。索隱音龍。

〔三〕正義幽州縣。

〔四〕正義幽州漁陽縣東南七十七里北平城，卽漢右北平也。

安國始爲御史大夫及護軍，後稍斥疏，下遷，而新幸壯將軍衛青等有功，益貴。安國

既疏遠，默默也；將屯又爲匈奴所欺，失亡多，甚自愧。幸得罷歸，乃益東徙屯，意忽忽不樂。數月，病歐血死。安國以元朔二年中卒。

太史公曰：余與壺遂定律曆，觀韓長孺之義，壺遂之深中隱厚。〔一〕世之言梁多長者，不虛哉！壺遂官至詹事，天子方倚以爲漢相，會遂卒。不然，壺遂之內廉行脩，斯鞠躬君子也。

〔一〕〔集解〕徐廣曰：「一云『廉正忠厚』。」

【索隱述贊】安國忠厚，初爲梁將。因事坐法，免徒起相。死灰更然，生虜失防。推賢見重，賄金貽謗。雪泣悟主，臣節可亮。

史記卷一百九

李將軍列傳第四十九

李將軍廣者，隴西成紀人也。^{〔一〕}其先曰李信，秦時爲將，逐得燕太子丹者也。故槐里，徙成紀。廣家世世受射。^{〔二〕}孝文帝十四年，匈奴大人蕭關，而廣以良家子^{〔三〕}從軍擊胡，用善騎射，殺首虜多，爲漢中郎。廣從弟李蔡亦爲郎，皆爲武騎常侍，^{〔四〕}秩八百石。嘗從行，有所衝陷折關及格猛獸，而文帝曰：「惜乎，子不遇時！如令子當高帝時，萬戶侯豈足道哉！」

〔一〕正義 成紀，秦州縣。

〔二〕索隱 案：小顏云「世受射法」。

〔三〕索隱 案：如淳云「非醫、巫、商賈、百工也」。

〔四〕索隱 案：謂爲郎而補武騎常侍。

及孝景初立，廣爲隴西都尉，徙爲騎郎將。^{〔一〕}吳楚軍時，廣爲驍騎都尉，從太尉亞夫擊

吳楚軍，取旗，顯功名昌邑下。以梁王授廣將軍印，還，賞不行。^{〔二〕}徙爲上谷太守，匈奴日以合戰。典屬國公孫昆邪^{〔三〕}爲上泣曰：「李廣才氣，天下無雙，自負其能，數與虜敵戰，恐亡之。」於是乃徙爲上郡太守。後廣轉爲邊郡太守，徙上郡。嘗爲隴西、北地、鴈門、代郡、雲中太守，皆以力戰爲名。

〔一〕集解 張晏曰：「爲武騎郎將。」

索隱 小顏云：「爲騎郎將謂主騎郎也。」

〔二〕集解 文穎曰：「廣爲漢將，私受梁印，故不以賞也。」

〔三〕集解 昆音魂。

索隱 案：典屬國，官名。公孫，姓也；昆邪，名。服虔云：「中國人。」包愷云：「昆音魂也。」

匈奴大人上郡，天子使中貴人從廣^{〔一〕}，勒習兵擊匈奴。中貴人將騎數十縱，^{〔二〕}見匈奴三人，與戰。三人還射，^{〔三〕}傷中貴人，殺其騎且盡。中貴人走廣。廣曰：「是必射雕者也。」^{〔四〕}廣乃遂從百騎往馳三人。三人亡馬步行，行數十里。廣令其騎張左右翼，而廣身自射彼三人者，殺其二人，生得一人，果匈奴射雕者也。已縛之上馬，望匈奴有數千騎，見廣，以爲誘騎，皆驚，上山陳。廣之百騎皆大恐，欲馳還走。廣曰：「吾去大軍數十里，今如此以百騎走，匈奴追射我立盡。今我留，匈奴必以我爲大軍^{〔之〕}誘^{〔之〕}，必不敢擊我。」廣令諸騎曰：「前！」前未到匈奴陳二里所，止，令曰：「皆下馬解鞍！」其騎曰：「虜多且近，卽有急，柰

何？廣曰：「彼虜以我爲走，今皆解鞍以示不走，用堅其意。」於是胡騎遂不敢擊。有白馬將^{〔五〕}出護其兵，李廣上馬與十餘騎犇射殺胡白馬將，而復還至其騎中，解鞍，令士皆縱馬卧。是時會暮，胡兵終怪之，不敢擊。夜半時，胡兵亦以爲漢有伏軍於旁欲夜取之，胡皆引兵而去。平旦，李廣乃歸其大軍。大軍不知廣所之，故弗從。

〔一〕集解 漢書音義曰：「內官之幸貴者。」

〔索隱〕案：董巴與服志云：「黃門丞至密近，使聽察天下，謂之中貴人使

者。」崔浩云：「在中而貴幸，非德望，故名不見也。」

〔二〕集解 徐廣曰：「放縱馳騁。」

〔三〕正義 射音石。還謂轉也。

〔四〕集解 文穎曰：「雕，鳥也，故使善射者射也。」

〔索隱〕案：服虔云「雕，鶚也」。說文云「似鵞，黑色，多子」。一名

鵞，以其毛作矢羽。韋昭云「鶚，一名鶚也」。

〔五〕正義 其將乘白馬，而出監護也。

居久之，孝景崩，武帝立，左右以爲廣名將也，於是廣以上郡太守爲未央衛尉，而程不識亦爲長樂衛尉。程不識故與李廣俱以邊太守將軍屯。及出擊胡，而廣行無部伍行陳，〔二〕就善水草屯，舍止，人人自便，〔三〕不擊刀斗以自衛，〔四〕莫府〔五〕省約文書籍事，然亦遠斥

候，〔五〕未嘗遇害。程不識正部曲行伍營陳，擊刀斗，士吏治軍簿至明，軍不得休息，然亦未嘗遇害。不識曰：「李廣軍極簡易，然虜卒犯之，無以禁也；而其士卒亦佚樂，咸樂爲之死。我軍雖煩擾，然虜亦不得犯我。」是時漢邊郡李廣、程不識皆爲名將，然匈奴畏李廣之略，士卒亦多樂從李廣而苦程不識。程不識孝景時以數直諫爲太中大夫。爲人廉，謹於文法。

〔一〕〔索隱〕案：百官志云「將軍領軍皆有部曲。大將軍營五部，部校尉一人，部下有曲，曲有軍候一人」也。

〔二〕〔索隱〕音去聲。

〔三〕〔集解〕孟康曰：「以銅作鑣器，受一斗，晝炊飯食，夜擊持行，名曰刀斗。」〔索隱〕刀音貂。案：荀悅云「刀斗，小

鈴，如宮中傳夜鈴也」。蘇林云「形如銅，以銅作之，無緣，受一斗，故云刀斗」。銅卽鈴也。埤倉云「鑣，溫器，有柄斗，似銚無緣。音焦」。

〔四〕〔索隱〕案：大顏云「凡將軍謂之莫府者，蓋兵行舍於帷帳，故稱〔莫〕〔幕〕府。古字通用，遂作『莫』耳」。小爾雅訓莫爲大，非也。

〔五〕〔索隱〕案：許慎注淮南子云「斥，度也。候，視也，望也」。

後漢以馬邑城誘單于，使大軍伏馬邑旁谷，而廣爲驍騎將軍，領屬護軍將軍。是時單于覺之，去，漢軍皆無功。其後四歲，廣以衛尉爲將軍，出鴈門擊匈奴。匈奴兵多，破敗廣軍，生得廣。單于素聞廣賢，令曰：「得李廣必生致之。」胡騎得廣，廣時傷病，置廣兩馬閒，絡

而盛卧廣。行十餘里，廣詳死，睨其旁有一胡兒騎善馬，廣暫騰而上胡兒馬，因推墮兒，取其弓，鞭馬南馳數十里，復得其餘軍，因引而入塞。匈奴捕者騎數百追之，廣行取胡兒弓，射殺追騎，以故得脫。於是至漢，漢下廣吏。吏當廣所失亡多，爲虜所生得，當斬，贖爲庶人。

〔一〕集解 徐廣曰：「一云『抱兒鞭馬南馳』也。」

頃之，家居數歲。廣家與故潁陰侯孫〔一〕屏野居藍田南山中射獵。嘗夜從一騎出，從人田閒飲。還至霸陵亭，霸陵尉〔二〕醉，呵止廣。廣騎曰：「故李將軍。」尉曰：「今將軍尚不得夜行，何乃故也！」止廣宿亭下。居無何，匈奴入殺遼西太守，敗韓將軍，〔三〕後韓將軍徙右北平。於是天子乃召拜廣爲右北平太守。廣即請霸陵尉與俱，至軍而斬之。

〔一〕集解（孫）灌嬰之孫，名強。

索隱案：灌嬰之孫，名強。

〔二〕索隱案：百官志云：尉，大縣二人，主盜賊。凡有賊發，則推索尋案之也。

〔三〕集解 蘇林曰：韓安國。

廣居右北平，匈奴聞之，號曰「漢之飛將軍」，避之數歲，不敢入右北平。

廣出獵，見草中石，以爲虎而射之，中石沒鏃，〔一〕視之石也。因復更射之，終不能復入

石矣。廣所居郡聞有虎，嘗自射之。及居右北平射虎，虎騰傷廣，廣亦竟射殺之。

〔一〕集解 徐廣曰：「一作『没羽』。」

廣廉，得賞賜輒分其麾下，飲食與士共之。終廣之身，爲二千石四十餘年，家無餘財，終不言家產事。廣爲人長，猿臂，〔一〕其善射亦天性也，雖其子孫他人學者，莫能及廣。廣訥口少言，與人居則畫地爲軍陳，射闊狹以飲。〔二〕專以射爲戲，竟死。〔三〕廣之將兵，乏絕之處，見水，士卒不盡飲，廣不近水，士卒不盡食，廣不嘗食。寬緩不苛，士以此愛樂爲用。其射，見敵急，非在數十步之內，度不中不發，發即應弦而倒。用此，其將兵數困辱，其射猛獸亦爲所傷云。

〔一〕集解 如淳曰：「臂如猿，通肩。」

〔二〕集解 如淳曰：「射戲求疏密，持酒以飲不勝者。」 〔正義〕飲音於禁反。

〔三〕索隱 謂終竟廣身至死，以爲恒也。

居頃之，石建卒，於是上召廣代建爲郎中令。元朔六年，廣復爲後將軍，從大將軍軍出定襄，擊匈奴。諸將多中首虜率，以功爲侯者，〔一〕而廣軍無功。後二歲，廣以郎中令將四千騎出右北平，博望侯張騫將萬騎與廣俱，異道。行可數百里，匈奴左賢王將四萬騎圍廣，

廣軍士皆恐，廣乃使其子敢往馳之。敢獨與數十騎馳，直貫胡騎，出其左右而還，告廣曰：「胡虜易與耳。」軍士乃安。廣爲圓陳外嚮，胡急擊之，矢下如雨。漢兵死者過半，漢矢且盡。廣乃令士持滿毋發，而廣身自以大黃〔二〕射其裨將，殺數人，胡虜益解。會日暮，吏士皆無人色，而廣意氣自如，益治軍。軍中自是服其勇也。明日，復力戰，而博望侯軍亦至，匈奴軍乃解去。漢軍罷，弗能追。是時廣軍幾沒，罷歸。漢法，博望侯留遲後期，當死，贖爲庶人。廣軍功自如，無賞。

〔一〕集解如淳曰：「中猶充也。充本法得首若干封侯。」

〔二〕集解徐廣曰：「南都賦曰『黃閒機張，善弩之名』。」駢案：鄭德曰「黃肩弩，淵中黃朱之」。孟康曰「太公六韜曰『陷堅敗強敵，用大黃連弩』」。韋昭曰「角弩色黃而體大也」。〔索隱案：大黃，黃閒，弩名也。故韋昭曰「角弩也，色黃體大」是也。〕

初，廣之從弟李蔡與廣俱事孝文帝。景帝時，蔡積功勞至二千石。孝武帝時，至代相。以元朔五年爲輕車將軍，從大將軍擊右賢王，有功中率，〔一〕封爲樂安侯。元狩二年中，代公孫弘爲丞相。蔡爲人在下中，〔二〕名聲出廣下甚遠，然廣不得爵邑，官不過九卿，而蔡爲列侯，位至三公。諸廣之軍吏及士卒或取封侯。廣嘗與望氣王朔燕語，曰：「自漢擊匈奴而

廣未嘗不在其中，而諸部校尉以下，才能不及中人，然以擊胡軍功取侯者數十人，而廣不爲後人，「三」然無尺寸之功以得封邑者，何也？豈吾相不當侯邪？且固命也？」朔曰：「將軍自念，豈嘗有所恨乎？」廣曰：「吾嘗爲隴西守，羌嘗反，吾誘而降，降者八百餘人，吾詐而同日殺之。至今大恨獨此耳。」朔曰：「禍莫大於殺已降，此乃將軍所以不得侯者也。」

〔一〕索隱 中音丁仲反。率音律，亦音雙筆反。小顏云：「率謂軍功封賞之科，著在法令，故云中率。」

〔二〕索隱 案：以九品而論，在下之中，當第八。

〔三〕索隱 案：謂不在人後。

後二歲，大將軍、驃騎將軍大出擊匈奴，廣數自請行。天子以爲老，弗許；良久乃許之，以爲前將軍。是歲，元狩四年也。

廣既從大將軍青擊匈奴，既出塞，青捕虜知單于所居，乃自以精兵走之，而令廣并於右將軍軍，「一」出東道。東道少回遠，而大軍行水草少，其勢不屯行。「二」廣自請曰：「臣部爲前將軍，今大將軍乃徙令臣出東道，且臣結髮而與匈奴戰，今乃一得當單于，「三」臣願居前，先死單于。」大將軍青亦陰受上誡，以爲李廣老，數奇，「四」毋令當單于，恐不得所欲。而是時公孫敖新失侯，爲中將軍從大將軍，大將軍亦欲使敖與俱當單于，故徙前將軍廣。廣時知

之，固自辭於大將軍。大將軍不聽，令長史封書與廣之莫府，曰：「急詣部，如書。」〔五〕廣不謝大將軍而起行，意甚愠怒而就部，引兵與右將軍食其〔六〕合軍出東道。軍亡導，或失道，〔七〕後大將軍。大將軍與單于接戰，單于遁走，弗能得而還。南絕幕，〔八〕遇前將軍、右將軍。廣已見大將軍，還入軍。大將軍使長史持糒醪遺廣，因問廣、食其失道狀，青欲上書報天子軍曲折。〔九〕廣未對，大將軍使長史急責廣之幕府對簿。廣曰：「諸校尉無罪，乃我自失道。吾今自上簿。」

〔一〕集解 徐廣曰：「主爵趙食其爲右將軍。」

〔二〕集解 張晏曰：「以水草少，不可羣輩。」

〔三〕索隱 今得當單于。案：廣言自少時結髮而與匈奴戰，唯今者得與單于相當遇也。

〔四〕集解 如淳曰：「數爲匈奴所敗，奇爲不偶也。」索隱 案：服虔云「作事數不偶也」。音朔。小顏音所具反。奇，蕭該音居宜反。

〔五〕正義 令廣如其文牒，急引兵徙東道也。

〔六〕索隱 音異基。案：趙將軍名也。或亦依字讀。

〔七〕索隱 謂無人導引，軍故失道也。

〔八〕正義 絕，度也。南歸度沙幕。

〔九〕正義 言委曲而行迴折，使軍後大將軍也。

至莫府，廣謂其麾下曰：「廣結髮與匈奴大小七十餘戰，今幸從大將軍出接單于兵，而大將軍又徙廣部行回遠，而又迷失道，豈非天哉！且廣年六十餘矣，終不能復對刀筆之吏。」遂引刀自剄。廣軍士大夫一軍皆哭。百姓聞之，知與不知，無老壯皆爲垂涕。而右將軍獨下吏，當死，贖爲庶人。

廣子三人，曰當戶、椒、敢，爲郎。天子與韓嫣〔一〕戲，嫣少不遜，當戶擊嫣，嫣走。於是天子以爲勇。當戶早死，拜椒爲代郡太守，皆先廣死。當戶有遺腹子名陵。廣死軍時，敢從驃騎將軍。廣死明年，李蔡以丞相坐侵孝景園墺地，〔二〕當下吏治，蔡亦自殺，不對獄，國除。李敢以校尉從驃騎將軍擊胡左賢王，力戰，奪左賢王鼓旗，斬首多，賜爵關內侯，食邑二百戶，代廣爲郎中令。頃之，怨大將軍青之恨其父，〔三〕乃擊傷大將軍，大將軍匿諱之。居無何，敢從上雍，〔四〕至甘泉宮獵。驃騎將軍去病與青有親，射殺敢。去病時方貴幸，上諱云鹿觸殺之。居歲餘，去病死。〔五〕而敢有女爲太子中人，愛幸，敢男禹有寵於太子，然好利，李氏陵遲衰微矣。

〔一〕索隱或音偃，又音許乾反。

〔二〕索隱墺音人絹反，又音乃段反，又音而宣反。案：墺地，神道之地也。黃圖云：「陽陵闕門西出，神道四通。」茂

陵神道廣四十三丈」也。

〔正義〕漢書云：「詔賜冢地陽陵，當得二十畝，蔡盜取三頃，頗賣得四十餘萬，又盜取

神道外墻地一畝，葬其中。當下獄，自殺。」

〔三〕〔索隱〕小顏云：「令其父恨而死。」

〔四〕〔索隱〕劉氏音尚。大顏云：「雍地形高，故云上。」

〔五〕〔集解〕徐廣曰：「元狩六年。」

李陵既壯，選爲建章監，監諸騎。善射，愛士卒。天子以爲李氏世將，而使將八百騎。嘗深入匈奴二千餘里，過居延〔一〕視地形，無所見虜而還。拜爲騎都尉，將丹陽楚人五千人，教射酒泉、張掖以屯衛胡。

〔一〕〔集解〕徐廣曰：「屬張掖。」

〔正義〕括地志云：「居延海在甘州張掖縣東北六十四里。」地理志云：「居延澤古文以

爲流沙。」甘州在京西北二千四百六十里。」

數歲，天漢二年秋，貳師將軍李廣利將三萬騎擊匈奴右賢王於祁連天山，〔二〕而使陵將其射士步兵五千人出居延北可千餘里，欲以分匈奴兵，毋令專走貳師也。陵既至期還，而單于以兵八萬圍擊陵軍。陵軍五千人，兵矢既盡，士死者過半，而所殺傷匈奴亦萬餘人。且引且戰，連鬪八日，還未到居延百餘里，匈奴遮狹絕道，陵食乏而救兵不

到，虜急擊招降陵。陵曰：「無面目報陛下。」遂降匈奴。其兵盡沒，餘亡散得歸漢者四百餘人。

〔一〕〔集解〕徐廣曰：「出燉煌至天山。」

〔索隱〕案：晉灼云「在西域，近蒲類海」。又西河舊事云「白山冬夏有雪，匈奴謂之天山也」。

〔正義〕括地志云：「祁連山在甘州張掖縣西南二百里。」

天山一名白山，今名初羅漫山，在伊吾

縣北百二十里。伊州在京西北四千四百一十六里。」

單于既得陵，素聞其家聲，及戰又壯，乃以其女妻陵而貴之。漢聞，族陵母妻子。自是之後，李氏名敗，而隴西之士居門下者皆用爲恥焉。

太史公曰：傳曰「其身正，不令而行；其身不正，雖令不從」。其李將軍之謂也？余睹李將軍悛悛〔一〕如鄙人，口不能道辭。及死之日，天下知與不知，皆爲盡哀。彼其忠實心誠信於士大夫也？諺曰「桃李不言，下自成蹊」〔二〕此言雖小，可以諭大也。

〔一〕〔索隱〕音七旬反。漢書作「恂恂」，音詢。

〔二〕〔索隱〕案：姚氏云「桃李本不能言，但以華實感物，故人期而往，其下自成蹊徑也。以喻廣雖不能出辭，能有所感，而忠心信物故也」。

〔索隱述贊〕援臂善射，實負其能。解鞍卻敵，圓陣摧鋒。邊郡屢守，大軍再從。失道見斥，數奇不封。惜哉名將，天下無雙！

史記卷一百十

匈奴列傳第五十

〔正義〕此卷或有本次平津侯後，第五十二。今第五十者，先生舊本如此，劉伯莊音亦然。若先諸傳而次四夷，則司馬、汲鄭不合在後也。

匈奴，其先祖夏后氏之苗裔也，曰淳維。^{〔一〕}唐虞以上有山戎，^{〔二〕}獫狁、葷粥，^{〔三〕}居于北蠻，隨畜牧而轉移。其畜之所多則馬、牛、羊，其奇畜則橐駝，^{〔四〕}驢、羸，^{〔五〕}騊駼，^{〔六〕}騊駼^{〔七〕}驪驤。^{〔八〕}逐水草遷徙，毋城郭常處耕田之業，然亦各有分地。^{〔九〕}毋文書，以言語爲約束。兒能騎羊，引弓射鳥鼠，少長^{〔一〇〕}則射狐兔，用爲食。士力能毋弓，^{〔一一〕}盡爲甲騎。其俗，寬則隨畜，因射獵禽獸爲生業，急則人習戰攻以侵伐，其天性也。其長兵則弓矢，短兵則刀鋌。^{〔一二〕}利則進，不利則退，不羞遁走。苟利所在，不知禮義。自君王以下，咸食畜肉，衣其皮革，被旃裘。壯者食肥美，老者食其餘。貴壯健，賤老弱。父死，妻其後母；兄弟死，皆取其妻妻之。其俗有名不諱，而無姓字。^{〔一三〕}

〔一〕**集解** **漢書音義**曰：「匈奴始祖名。」

索隱 **張晏**曰：「淳維以殷時奔北邊」。又樂產括地譜云：「夏桀無道，湯放之

鳴條，三年而死。其子獯粥妻桀之衆妾，避居北野，隨畜移徙，中國謂之匈奴」。其言夏后苗裔，或當然也。故應劭風俗通云：「殷時曰獯粥，改曰匈奴」。又服虔云：「堯時曰葷粥，周日獫狁，秦曰匈奴」。韋昭云：「漢曰匈奴，葷粥其別名」。則淳維是其始祖，蓋與獯粥是一也。

〔二〕**正義** **左傳**莊三十年：「齊人伐山戎」，**杜預**云：「山戎，北戎，無終三名也」。括地志云：「幽州漁陽縣，本北戎無終

子國」。

〔三〕**集解** **晉灼**云：「堯時曰葷粥，周日獫狁，秦曰匈奴。」

〔四〕**索隱** 橐他。韋昭曰：「背肉似橐，故云橐也」。包愷音託。他，或作「駝」。正義 畜，許又反。

〔五〕**索隱** 案：古今注云：「驢牡馬牝，生羸」。正義 羸音力戈反。

〔六〕**集解** **徐廣**曰：「北狄駿馬」。索隱 說文云：「駃騠，馬父羸子也」。廣異志音決蹄也。發蒙記：「剝其母腹而生」。

列女傳云：「生七日超其母」。

〔七〕**集解** **徐廣**曰：「似馬而青」。索隱 案：郭璞注爾雅云：「駒騊馬，青色，音淘塗」。又字林云：「野馬」。山海經云：

「北海有獸，其狀如馬，其名駒騊」也。

〔八〕**集解** **徐廣**曰：「音顛。巨虛之屬」。索隱 驪奚。韋昭驪音顛。說文：「野馬屬」。徐廣云：「巨虛之類」。一云青

驪白鱗，文如鼉魚。鄒誕生本「奚」字作「驪」。

〔九〕**索隱** 上音扶糞反。

〔十〕**索隱** 上音式紹反，下音陟兩反。少長謂年稍長。

〔二〕索隱 上音彎，如字亦通也。

〔三〕集解 韋昭曰：「鉦形似矛，鐵柄。音時年反。」索隱 音蟬。埤蒼云「鉦，小矛鐵矜」。古今字詁云「矜，通作矜」。

〔三〕集解 漢書曰：「單于姓攣鞮氏。」索隱 攣音六緣反。鞮音丁啼反。

夏道衰，而公劉失其稷官，〔一〕變于西戎，邑于豳。其後三百有餘歲，戎狄攻大王亶父，〔二〕亶父亡走岐下，而豳人悉從亶父而邑焉，作周。〔三〕其後百有餘歲，周西伯昌伐畎夷氏。〔四〕後十有餘年，武王伐紂而營維夷邑，復居于酆鄩，放逐戎夷涇、洛之北，〔五〕以時入貢，命曰「荒服」。其後二百有餘年，周道衰，〔六〕而穆王伐犬戎，得四白狼四白鹿以歸。自是之後，荒服不至。於是周遂作甫刑之辟。穆王之後二百有餘年，周幽王用寵姬褒姒之故，與申侯有卻。〔七〕申侯怒而與犬戎共攻殺周幽王于驪山之下，〔八〕遂取周之焦穫，〔九〕而居于涇渭之間，侵暴中國。秦襄公救周，於是周平王去酆鄩而東徙維夷邑。當是之時，秦襄公伐戎至岐，始列爲諸侯。〔一〇〕是後六十有五年，而山戎〔一一〕越燕而伐齊，齊釐公與戰于齊郊。其後四十四年，而山戎伐燕。燕告急于齊，齊桓公北伐山戎，山戎走。其後二十有餘年，而戎狄至洛邑，伐周襄王，襄王奔于鄭之汜邑。〔一二〕初，周襄王欲伐鄭，故娶戎狄女爲后，與戎狄兵共伐鄭。已而黜狄后，狄后怨，而襄王後母曰惠后，有子子帶，欲立之，於是惠后與狄后、子帶爲

內應，開戎狄，戎狄以故得人，破逐周襄王，而立子帶爲天子。於是戎狄或居于陸渾，^{〔一〕}東至於衛，侵盜暴虐中國。中國疾之，故詩人歌之曰「戎狄是應」，「薄伐獫狁，至於大原」，^{〔二〕}「出與彭彭，城彼朔方」。^{〔三〕}周襄王既居外四年，乃使使告急于晉。晉文公初立，欲修霸業，乃興師伐逐戎翟，誅子帶，迎內周襄王，居于維維邑。

〔一〕集解 徐廣曰：「后稷之曾孫。」

正義 周本紀云「不啻失其官」。此云公劉，未詳也。

〔二〕集解 徐廣曰：「公劉九世孫。」

〔三〕索隱 按：謂始作周國也。

〔四〕索隱 韋昭云：「春秋以爲犬戎。」按：吠音犬。大顏云：「卽昆夷也。」山海經云：「黃帝生苗龍，苗龍生融吾，融吾生弄明，弄明生白犬。白犬有牡，是爲犬戎。」說文云：「赤狄本犬種，字從犬。」又山海經云：「有人面獸身，名曰犬夷。」賈逵云：「犬夷，戎之別種也。」

〔五〕索隱 晉灼曰：「洛水在馮翊懷德縣，東南入渭。」又案：水經云出上郡雕陰秦昌山，過華陰入渭，卽漆沮水也。

〔六〕索隱 案：周紀云「懿王時，王室衰，詩人作怨刺之詩」，不能復雅也。

〔七〕正義 故申城在鄧州南陽縣北三十里，周宣王舅所封。

〔八〕集解 韋昭曰：「戎後來居此山，故號曰驪戎。」

〔九〕正義 括地志云：「焦穫亦名剗口，亦曰剗中，在雍州涇陽縣城北十數里。周有焦穫也。」

〔一〇〕正義 今岐州。高誘云：「秦襄公救周有功，受周故地鄠郿，列爲諸侯」也。

〔二〕索隱服虔云：「山戎蓋今鮮卑。」按：胡廣云「鮮卑，東胡別種」。又應奉云「秦築長城，徒役之士亡出塞外，依鮮卑山，因以爲號」。

〔三〕索隱蘇林汜音凡。今潁川襄城是。按：春秋地名云「汜邑，襄王所居，故云襄城」也。

〔三〕集解徐廣曰：「一爲陸邑。」索隱春秋左氏「秦晉遷陸渾之戎于伊川」。杜預以爲「允姓之戎居陸渾，在秦晉之間，二國誘而徙之伊川，遂從戎號，今陸渾縣是也」。

〔四〕集解毛詩傳曰：「言逐出之而已。」

〔五〕集解毛詩傳曰：「彭彭，四馬貌。朔方，北方。」正義獫狁既去，北方安靜，乃築城守之。

當是之時，秦晉爲疆國。晉文公攘戎翟，居于河西圖、洛之間，〔一〕號曰赤翟，〔二〕白翟。〔三〕秦穆公得由余，西戎八國服於秦，故自隴以西有縣諸，〔四〕緄戎，〔五〕翟，獯之戎，〔六〕岐、梁山、涇、漆之北有義渠，〔七〕大荔，〔八〕烏氏，〔九〕胸衍之戎。〔一〇〕而晉北有林胡，〔二〕樓煩之戎，〔三〕燕北有東胡、山戎。〔三〕各分散居谿谷，自有君長，往往而聚者百有餘戎，然莫能相一。

〔一〕集解徐廣曰：「圖在西河，音銀。洛在上郡，馮翊間。」索隱西河圖、洛。晉灼音囂。三蒼作「圖」。地理志云

「圖水出上郡白土縣西，東流入河。」韋昭云「圖當爲「圖」。續郡國志及太康地志並作「圖」字也。」正義括地志

云：「白土故城在鹽州白池東北三百九十里。」又云：「近延州、綏州、銀州，本春秋時白狄所居，七國屬魏，後入

秦，秦置三十六郡。」洛，漆沮也。

〔三〕索隱案：左氏傳云「晉師滅赤狄潞氏」。杜氏以「潞，赤狄之別種也，今上黨潞縣」。又春秋地名云「今日赤涉胡」。

〔三〕索隱左氏「晉師敗狄于箕，卻缺獲白狄子」。杜氏以爲「白狄之別種，故西河郡有白部胡」。又國語云「桓公西征，攘白狄之地，遂至于西河」也。正義括地志云：「潞州本赤狄地。延、銀、綏三州白翟地。」按：文言「圖、潞之閒號赤狄」，未詳。

〔四〕索隱地理志天水有縣諸道。正義括地志云：「縣諸城，秦州秦嶺縣北五十六里。漢縣諸道，屬天水郡。」

〔五〕正義上音昆。字當作「混」。顏師古云：「混夷也。」韋昭云：「春秋以爲犬戎。」

〔六〕集解徐廣曰：「在天水。獬音丸。」索隱地理志天水獬道。應劭以「獬戎邑。音桓」。正義括地志云：「獬道故城在渭州襄武縣東南三十七里。古之獬戎邑。漢獬道，屬天水郡。」

〔七〕索隱韋昭云：「義渠本西戎國，有王，秦滅之。今在北地郡。」正義括地志云：「寧州、慶州、西戎，卽劉拘邑城，時爲義渠戎國，秦爲北地郡也。」

〔八〕集解徐廣曰：「後更名臨晉，在馮翊。」索隱按：秦本紀厲共公伐大荔，取其王城，後更名臨晉。故地理志云臨晉故大荔國也。正義括地志云：「同州馮翊縣及朝邑縣，本漢臨晉縣地，古大荔戎國。今朝邑縣東三十步故王城，卽大荔王城。」荔，力計反。

〔九〕集解徐廣曰：「在安定。」正義氏音支。括地志云：「烏氏故城在涇州安定縣東三十里。周之故地，後人戎，秦惠王取之，置烏氏縣也。」

〔一〇〕集解徐廣曰：「在北地。胸音詡。」索隱案：地理志胸衍，縣名，在北地。徐廣音詡。鄭氏音吁。正義

括地志云：「鹽州，古戎狄居之，卽胸衍戎之地，秦北地郡也。」

〔二〕索隱如淳云：「林胡卽儋林，爲李牧所滅也。」正義括地志云：「朔州，春秋時北地也。如淳云卽澹林也，爲李牧滅。」

〔三〕索隱地理志樓煩，縣名，屬鴈門。應劭云：「故樓煩胡地。」正義括地志云：「嵐州，樓煩胡地也。風俗通云故樓煩胡地也。」

〔三〕集解漢書音義曰：「烏丸，或云鮮卑。」索隱服虔云：「東胡，烏丸之先，後爲鮮卑。在匈奴東，故曰東胡。」案：續漢書曰：「漢初，匈奴冒頓滅其國，餘類保烏桓山，以爲號。俗隨水草，居無常處。以父之名字爲姓。父子男女悉髡頭爲輕便也。」

自是之後百有餘年，晉悼公使魏絳和戎翟，戎翟朝晉。後百有餘年，趙襄子踰句注〔一〕而破并代以臨胡貉。〔二〕其後既與韓魏共滅智伯，分晉地而有之，則趙有代、句注之北，魏有河西、上郡，以與戎界邊。其後義渠之戎築城郭以自守，而秦稍蠶食，至於惠王，遂拔義渠二十五城。惠王擊魏，魏盡入西河及上郡于秦。秦昭王時，義渠戎王與宣太后〔三〕亂，有二子。宣太后詐而殺義渠戎王於甘泉，遂起兵伐殘義渠。於是秦有隴西、北地、上郡，築長城以拒胡。而趙武靈王亦變俗胡服，習騎射，北破林胡、樓煩。築長城，〔四〕自代並〔五〕陰山〔六〕下，至高闕爲塞。〔七〕而置雲中、鴈門、代郡。其後燕有賢將秦開，爲質於胡，胡甚信之。歸

而襲破走東胡，東胡卻千餘里。與荆軻刺秦王秦舞陽者，開之孫也。燕亦築長城，自造陽〔八〕至襄平。〔九〕置上谷、漁陽、右北平、遼西、遼東郡以拒胡。當是之時，冠帶戰國七，而三國邊於匈奴。〔一〇〕其後趙將李牧時，匈奴不敢入趙邊。後秦滅六國，而始皇帝使蒙恬將十萬之衆北擊胡，悉收河南地。因河爲塞，〔一一〕築四十四縣城臨河，徙適〔一二〕戍以充之。而通直道，〔一三〕自九原至雲陽，〔一四〕因邊山險塹谿谷可繕者治之，起臨洮至遼東萬餘里。〔一五〕又度河據陽山北假中。〔一六〕

〔一〕集解 音鉤，山名，在鴈門。

〔索隱〕服虔云：「句音拘。」韋昭云：「山名，在陰館。」

〔二〕索隱 案：貉卽濊也。音亡格反。

〔三〕集解 昭王母也。

〔索隱〕服虔云：「昭王之母」也。

〔四〕正義 括地志云：「趙武靈王長城在朔州善陽縣北。」

案水經云白道長城北山上有長垣，若積毀焉，沿谿互嶺，東

西無極，蓋趙武靈王所築也。」

〔五〕集解 音傍，白浪反。

〔六〕索隱 徐廣云：「五原西安陽縣北有陰山。陰山在河南，陽山〔在河〕北。」

〔正義〕括地志云：

「陰山在朔州北塞外突厥界。」

〔七〕集解 徐廣曰：「在朔方。」

〔正義〕地理志云朔方臨戎縣北有連山，險於長城，其山中斷，兩峯俱峻，土俗名爲高

闕也。

〔八〕集解 韋昭曰：「地名，在上谷。」正義 按：上谷郡今媯州。

〔九〕索隱 韋昭云：「今遼東所理也。」

〔一〇〕索隱 案：三國，燕、趙、秦也。

〔一一〕索隱 案：太康地記「秦塞自五原北九百里，謂之造陽。東行終利賁山南，漢陽西也」。漢，一作「漁」。

〔一二〕集解 音丁革反。索隱 丁革反。

〔一三〕索隱 蘇林云：「去長安八千里，正南北相直道也。」

〔一四〕索隱 韋昭云：「九原，縣名，屬五原也。」正義 括地志云：「勝州連谷縣，本秦九原郡，漢武帝更名五原。雲陽

雍縣，秦之林光宮，即漢之甘泉宮在焉。」又云：「秦故道在慶州華池縣西四十五里子午山上。自九原至雲陽，千八百里。」

〔一五〕索隱 韋昭云：「臨洮，隴西縣。」正義 括地志云：「秦隴西郡臨洮縣，即今岷州城。本秦長城首，起岷州西十

二里，延袤萬餘里，東入遼水。」

〔一六〕集解 北假，北方田官。主以田假與貧人，故云北假。索隱 應劭云：「北假在北地陽山北。」韋昭云：「北

假，地名。」又按：漢書元紀云「北假，田官」。蘇林以爲北方田官也。主以田假與貧人，故曰北假也。正義

括地志云：「漢五原郡河目縣故城在北假中。北假，地名也，在河北，今屬勝州銀城縣。」漢書王莽傳云「五原北

假，膏壤殖穀」也。」

當是之時，東胡彊而月氏盛。〔一〕匈奴單于〔二〕曰頭曼，〔三〕頭曼不勝秦，北徙。十餘年而蒙恬死，諸侯畔秦，中國擾亂，諸秦所徙適戍邊者皆復去，於是匈奴得寬，復稍度河南與

中國界於故塞。

〔一〕正義氏音支。括地志云：「涼、甘、肅、延、沙等州地，本月氏國。」

〔二〕集解漢書音義曰：「單于者，廣大之貌，言其象天單于然。」索隱案：漢書「單于姓攣鞬氏，其國稱之曰『攣

黎孤塗單于』。而匈奴謂天爲『攣黎』，謂子爲『孤塗』，單于者，廣大之貌也。言其象天，故曰攣黎孤塗單于」。又

玄晏春秋云：「士安讀漢書，不詳此言，有胡奴在側，言之曰：『此胡所謂天子。』與古書所說符會也」。

〔三〕集解韋昭曰：「音瞞。」索隱音莫官反。韋昭音瞞。

單于有太子名冒頓。〔一〕後有所愛閼氏，〔二〕生少子，而單于欲廢冒頓而立少子，乃使冒頓質於月氏。冒頓既質於月氏，而頭曼急擊月氏。月氏欲殺冒頓，冒頓盜其善馬，騎之亡歸。頭曼以爲壯，令將萬騎。冒頓乃作爲鳴鏑，〔三〕習勒其騎射，令曰：「鳴鏑所射而不悉射者，斬之。」行獵鳥獸，有不射鳴鏑所射者，輒斬之。已而冒頓以鳴鏑自射其善馬，左右或不敢射者，冒頓立斬不射善馬者。居頃之，復以鳴鏑自射其愛妻，左右或頗恐，不敢射，冒頓又復斬之。居頃之，冒頓出獵，以鳴鏑射單于善馬，左右皆射之。於是冒頓知其左右皆可用。從其父單于頭曼獵，以鳴鏑射頭曼，其左右亦皆隨鳴鏑而射殺單于頭曼，遂盡誅其後母與弟及大臣不聽從者。冒頓自立爲單于。

〔一〕索隱冒音墨，又如字。

〔二〕索隱舊音於連、於曷反二音。匈奴皇后號也。習鑿齒與燕王書曰：「山下有紅藍，足下先知不？北方人採取其花染緋黃，掇取其上英鮮者作烟肢，婦人將用爲顏色。吾少時再三過見烟肢，今日始視紅藍，後當爲足下致其種。匈奴名妻作『閼支』，言其可愛如烟肢也。閼音煙。想足下先亦不作此讀漢書也。」

〔三〕集解漢書音義曰：「鏑，箭也，如今鳴箭也。」韋昭曰：「矢鏑飛則鳴。」索隱應劭云：「曉箭也。」韋昭云：「矢鏑飛則鳴。」

冒頓既立，〔一〕是時東胡彊盛，聞冒頓殺父自立，乃使使謂冒頓，欲得頭曼時有千里馬。冒頓問羣臣，羣臣皆曰：「千里馬，匈奴寶馬也，勿與。」冒頓曰：「柰何與人鄰國而愛一馬乎？」遂與之千里馬。居頃之，東胡以爲冒頓畏之，乃使使謂冒頓，欲得單于一閼氏。冒頓復問左右，左右皆怒曰：「東胡無道，乃求閼氏！請擊之。」冒頓曰：「柰何與人鄰國愛一女乎？」遂取所愛閼氏予東胡。東胡王愈益驕，西侵。與匈奴閒，中有弃地，莫居，千餘里，各居其邊爲甌脫。〔二〕東胡使使謂冒頓曰：「匈奴所與我界甌脫外弃地，匈奴非能至也，吾欲有之。」冒頓問羣臣，羣臣或曰：「此弃地，予之亦可，勿予亦可。」於是冒頓大怒曰：「地者，國之本也，柰何予之！」諸言予之者，皆斬之。冒頓上馬，令國中有後者斬，遂東襲擊東胡。東胡初輕冒頓，不爲備。及冒頓以兵至，擊，大破滅東胡王，而虜其民人及畜產。既

歸，西擊走月氏，南并樓煩、白羊河南王。〔三〕（侵燕代）悉復收秦所使蒙恬所奪匈奴地者，與漢關故河南塞，至朝那、膚施，〔四〕遂侵燕、代。是時漢兵與項羽相距，中國罷於兵革，以故冒頓得自彊，控弦之士三十餘萬。

〔一〕集解 徐廣曰：「秦二世元年壬辰歲立。」

〔二〕集解 韋昭曰：「界上屯守處。」

索隱 服虔云：「作土室以伺漢人」。又纂文曰：「甌脫，土穴也」。又云是地名，故

下云「生得甌脫王」。韋昭云「界上屯守處也」。甌音一侯反。脫音徒活反。

〔正義〕按：境上斥候之室爲甌脫

也。

〔三〕索隱 如淳云：「白羊王居河南。」

〔四〕集解 徐廣曰：「在上郡。」

〔正義〕漢朝邯鄲故城在原州百泉縣西七十里，屬安定郡。膚施，縣，〔因〕秦（因）不改，

今延州膚施縣是。

自淳維以至頭曼千有餘歲，時大時小，別散分離，尚矣，其世傳不可得而次云。然至冒頓而匈奴最彊大，盡服從北夷，而南與中國爲敵國，其世傳國官號乃可得而記云。

置左右賢王，左右谷蠡王，〔一〕左右大將，左右大都尉，左右大當戶，左右骨都侯。〔二〕匈奴謂賢曰「屠耆」，〔三〕故常以太子爲左屠耆王。自如左右賢王以下至當戶，大者萬騎，小者數千，凡二十四長，立號曰「萬騎」。諸大臣皆世官。呼衍氏，蘭氏，〔四〕其後有須卜氏，〔五〕

此三姓其貴種也。諸左方王將居東方，直上谷〔六〕以往者，東接穢貉、朝鮮，右方王將居西方，直上郡〔七〕以西，接月氏、氏、羌〔八〕而單于之庭直代、雲中〔九〕各有分地，逐水草移徙。而左右賢王、左右谷蠡王最爲大〔國〕，左右骨都侯輔政。諸二十四長亦各自置千長、百長、什長〔一〇〕裨小王、相封〔一一〕都、尉當戶、且渠之屬〔一二〕

〔一〕〔集解〕服虔曰：「谷音鹿。蠡音離。」〔索隱〕服虔音鹿離。蠡，又音黎。

〔二〕〔集解〕骨都，異姓大臣。〔索隱〕按：後漢書云「骨都侯，異姓大臣」。

〔三〕〔集解〕徐廣曰：「屠，一作『諸』。」

〔四〕〔正義〕顏師古云：「呼衍，卽今鮮卑姓呼延者也。蘭姓今亦有之。」

〔五〕〔集解〕呼衍氏，須卜氏常與單于婚姻。須卜氏主獄訟。〔索隱〕按：後漢書云「呼衍氏，須卜氏常與單于婚姻」。

須卜氏主獄訟也。〔正義〕後漢書云：「呼衍氏，須卜氏常與單于婚姻。」

〔六〕〔索隱〕案：姚氏云「古字例以『直』爲『值』。值者，當也」。〔正義〕上谷郡，今媯州也。言匈奴東方南出，直當媯

州也。

〔七〕〔正義〕上郡故城在涇州上縣東南五十里。言匈奴西方南直當綏州也。

〔八〕〔索隱〕西接氏、羌。案：風俗通云「二氏，本西南夷種。地理志武都有白馬氏」。又魚豢魏略云「漢置武都郡，排

其種人，分竄山谷，或號青氏，或號白氏」。纂文云「氏亦羊稱」。說文云「羌，西方牧羊人」。續漢書云「羌，三苗

姜姓之別，舜徙于三危，今河關之西南羌是也」。

〔九〕索隱案：謂匈奴所都處爲「庭」。樂產云：「單于無城郭，不知何以國之。穹廬前地若庭，故云庭。」〔正義〕代郡城，北狄代國，秦漢代縣城也，在蔚州羌胡縣北百五十里。雲中故城，趙雲中城，秦雲中郡，在勝州榆林縣東北四十里。言匈奴之南直當代、雲中也。

〔一〇〕索隱案：續漢書（郡國）「百官」志云：「里有魁，人有什伍。里魁主一里百家，什主十家，伍長五家，以相檢察。」故賈誼過秦論以爲「俛起什百之中」是也。

〔一一〕集解徐廣曰：「一作『將』。」

〔一二〕正義且，子餘反。顏師古云：「今之沮渠姓，蓋本因此官。」

歲正月，諸長小會單于庭，祠。五月，大會龍城，〔一〕祭其先、天地、鬼神。秋，馬肥，大會蹕林，〔二〕課校人畜〔三〕計。其法，拔刃尺者死，坐盜者没人其家；有罪小者輒，〔四〕大者死。獄久者不過十日，一國之囚不過數人。而單于朝出營，拜日之始生，夕拜月。其坐，長左而北鄉。〔五〕日上戊己。其送死，有棺槨金銀衣裘，而無封樹喪服，〔六〕近幸臣妾從死者，多至數千百人。〔七〕舉事而候星月，月盛壯則攻戰，月虧則退兵。其攻戰，斬首虜賜一卮酒，而所得鹵獲因以予之，得人以爲奴婢。故其戰，人人自爲趣利，善爲誘兵以冒敵。故其見敵則逐利，如鳥之集；其困敗，則瓦解雲散矣。戰而扶輿死者，盡得死者家財。

〔一〕索隱漢書作「龍城」，亦作「龍」字。崔浩云：「西方胡皆事龍神，故名大會處爲龍城。」後漢書云：「匈奴俗，歲有三龍祠，祭天神。」

〔三〕集解 漢書音義曰：「匈奴秋社八月中皆會祭處。」索隱 服虔云：「音帶。」匈奴秋社八月中皆會祭

處。」鄭氏云：「地名也。」晉灼云：「李陵與蘇武書云：『相競趨躡林』，則服虔說是也。又韋昭音多藍反。姚氏案：

李牧傳「大破匈奴，滅禿檻」，此字與韋昭音頗同，然林檻聲相近，或以「林」爲「檻」也。」正義 顏師古云：「躡

者，遶林木而祭也。鮮卑之俗，自古相傳，秋祭無林木者，尚豎柳枝，衆騎馳遶三周乃止，此其遺法也。」

〔三〕正義 許又反。

〔四〕集解 漢書音義曰：「刃刻其面。」索隱 服虔云：「刀割面也，音烏八反。」鄧展云：「歷也。」如淳云：「搯，扶

也。」蒼云：「軋，輓也。」說文云：「輓，輓也。」正義 顏師古云：「軋者謂輓輓其骨節，若今之厭蹠者也。」

〔五〕正義 其座北向，長者在左，以左爲尊也。

〔六〕集解 張華曰：「匈奴名冢曰逗落。」

〔七〕正義 漢書作「數十百人」。顏師古云：「或數十人，或百人。」

後北服渾庾、屈射、〔一〕丁零、〔二〕鬲昆、薪犁之國。〔三〕於是匈奴貴人大臣皆服，以冒頓單于爲賢。

〔一〕索隱 國名。射音亦，又音石。

〔二〕索隱 按：《魏略》云：「丁零在康居北，去匈奴庭接習水七千里。」又云：「匈奴北有渾窳國」。

〔三〕正義 已上五國在匈奴北。

是時漢初定中國，徙韓王信於代，都馬邑。匈奴大攻圍馬邑，韓王信降匈奴。匈奴得信，因引兵南踰句注，攻太原，至晉陽下。高帝自將兵往擊之。會冬大寒雨雪，卒之墮指者十二三，於是冒頓詳敗走，誘漢兵。漢兵逐擊冒頓，冒頓匿其精兵，見其羸弱，於是漢悉兵，多步兵，三十二萬，北逐之。高帝先至平城，〔一〕步兵未盡到，冒頓縱精兵四十萬騎圍高帝於白登，〔二〕七日，漢兵中外不得相救餉。匈奴騎其西方盡白馬，東方盡青驪馬，〔三〕北方盡烏驪馬，〔四〕南方盡騂馬。〔五〕高帝乃使使閒厚遺閼氏，閼氏乃謂冒頓曰：「兩主不相困。今得漢地，而單于終非能居之也。且漢王亦有神，單于察之。」冒頓與韓王信之將王黃、趙利期，而黃、利兵又不來，疑其與漢有謀，亦取閼氏之言，乃解圍之一角。於是高帝令士皆持滿傅〔六〕矢外鄉，從解角直出，竟與大軍合，而冒頓遂引兵而去。漢亦引兵而罷，使劉敬結和親之約。

〔一〕集解 徐廣曰：「在鴈門。」

〔二〕正義 白登臺在白登山，朔州定襄縣東三十里。定襄縣，漢平城縣也。

〔三〕索隱 驪音武江反。案：青驪馬，色青。〔正義〕鄭玄云：「驪，不純也。」說文云：「驪，面頰皆白。」爾雅云黑

馬面白也。

〔四〕索隱 說文云：「驪，黑色。」

〔五〕索隱案：詩傳云「赤黃曰駢」。

〔六〕索隱音附。

是後韓王信爲匈奴將，及趙利、王黃等數倍約，侵盜代、雲中。居無幾何，陳豨反，又與韓信合謀擊代。漢使樊噲往擊之，復拔代、鴈門、雲中郡縣，不出塞。是時匈奴以漢將衆往降，故冒頓常往來侵盜代地。於是漢患之，高帝乃使劉敬奉宗室女公主爲單于閼氏，歲奉匈奴絮繒酒米食物各有數，約爲昆弟以和親，冒頓乃少止。後燕王盧綰反，率其黨數千人降匈奴，往來苦上谷以東。

高祖崩，孝惠、呂太后時，漢初定，故匈奴以驕。冒頓乃爲書遺高后，妄言。高后欲擊之，〔一〕諸將曰：「以高帝賢武，然尚困於平城。」於是高后乃止，〔二〕復與匈奴和親。

〔一〕索隱案：漢書云「高后時，冒頓侵驕，乃使使遺高后書曰：『孤憤之君，生於沮澤之中，長於平野牛馬之域，數至邊境，願遊中國。陛下獨立，孤憤獨居，兩主不樂，無以自娛，願以所有，易其所無。』高后怒，欲擊之」。

〔二〕索隱案：漢書，季布諫，高后乃止。

至孝文帝初立，復修和親之事。其三年五月，匈奴右賢王入居河南地，侵盜上郡葆塞蠻夷，殺略人民。於是孝文帝詔丞相灌嬰發車騎八萬五千，詣高奴，〔一〕擊右賢王。右賢王走出塞。文帝幸太原。是時濟北王反，文帝歸，罷丞相擊胡之兵。

〔一〕〔正義〕延州城本漢高奴縣舊都。

其明年，單于遺漢書曰：「天所立匈奴大單于敬問皇帝無恙。前時皇帝言和親事，稱書意，合歡。漢邊吏侵侮右賢王，右賢王不請，聽後義盧侯難氏〔一〕等計，與漢吏相距，絕二主之約，離兄弟之親。皇帝讓書再至，發使以書報，不來，漢使不至，漢以其故不和，鄰國不附。今以小吏之敗約故，罰右賢王，使之西求月氏擊之。以天之福，吏卒良，馬彊力，以夷滅月氏，盡斬殺降下之。定樓蘭〔二〕烏孫、呼揭〔三〕及其旁二十六國，皆以爲匈奴。〔四〕諸引弓之民，并爲一家。北州已定，願寢兵休士卒養馬，除前事，復故約，以安邊民，以應始古，使少者得成其長，老者安其處，世世平樂。未得皇帝之志也，故使郎中係雩淺奉書〔五〕請，獻橐他一匹，騎馬二匹，駕二駟。〔六〕皇帝卽不欲匈奴近塞，則且詔吏民遠舍。使者至，卽遣之。以六月中來至薪望之地。〔七〕書至，漢議擊與和親孰便。公卿皆曰：「單于新破月氏，乘勝，不可擊。且得匈奴地，澤鹵，〔八〕非可居也。和親甚便。」漢許之。

〔一〕〔集解〕徐廣曰：「音支。」〔索隱〕匈奴將名也。氏音支。

〔二〕〔集解〕徐廣曰：「一云『樓湟』。」〔正義〕漢書云鄯善國名樓蘭，去長安一千六百里也。

〔三〕〔集解〕音桀。〔索隱〕音桀，又音丘列反。〔正義〕揭音桀，又其例反。二國皆在瓜州西北。烏孫，戰國時居

瓜州。

〔四〕索隱案：謂皆人匈奴一國。

〔五〕集解零音火胡反。索隱係，胡計反。零，火胡反。

〔六〕正義顏師古云：「駕，可駕車也。二駟，八匹馬也。」

〔七〕集解漢書音義曰：「塞下地名。」索隱望薪之地。服虔云：「漢界上塞下地名，今匈奴使至於此也。」

〔八〕正義上音烏。

孝文皇帝前六年，漢遺匈奴書曰：「皇帝敬問匈奴大單于無恙。使郎中係零淺遺朕書曰：『右賢王不請，聽後義盧侯難氏等計，絕二主之約，離兄弟之親，漢以故不和，鄰國不附。今以小吏敗約，故罰右賢王使西擊月氏，盡定之。願寢兵休士卒養馬，除前事，復故約，以安邊民，使少者得成其長，老者安其處，世世平樂。』朕甚嘉之，此古聖主之意也。漢與匈奴約爲兄弟，所以遺單于甚厚。倍約離兄弟之親者，常在匈奴。然右賢王事已在赦前，單于勿深誅。單于若稱書意，明告諸吏，使無負約，有信，敬如單于書。使者言單于自將伐國有功，甚苦兵事。服繡袷綺衣，〔一〕繡袷長襦，〔二〕錦袷袍各一，比余一，〔三〕黃金飾具帶一，〔四〕黃金胥紕一，〔五〕繡十匹，錦三十匹，赤綈，〔六〕綠繒各四十匹，使中大夫意、謁者令肩遺單于。」

〔一〕索隱案：小顏云「服者，天子所服也，以繡爲表，綺爲裏」。以賜冒頓。字林云「袷衣無絮也。音公洽反」。

〔二〕集解徐廣曰：「一本無『衿』字。」

〔三〕集解徐廣曰：「或作『疏比』也。」索隱案：漢書作「比疎一」。比音鼻。小顏云：「辮髮之飾也，以金爲之。」

廣雅云「比，櫛也」。蒼頡篇云「靡者爲比，龕者爲梳」。按蘇林說，今亦謂之「梳比」，或亦帶飾者也。

〔四〕集解漢書音義曰：「要中大帶。」索隱按：謂要中大帶。

〔五〕集解徐廣曰：「或作『犀毗』，而無『一』字。」索隱漢書見作「犀毗」，或無下「一」字。此作「胥」者，犀聲相近，

或誤。張晏云：「鮮卑郭落帶，瑞獸名也，東胡好服之。」按：戰國策云「趙武靈王賜周紹具帶黃金師比」。延篤

云「胡革帶鉤也」。則此帶鉤亦名「師比」，則「胥」「犀」與「師」並相近，而說各異耳。班固與竇憲牋云「賜犀比金

頭帶」是也。

〔六〕正義音啼。索隱案：說文云「綈，厚繒也」。

後頃之，冒頓死，子稽粥立，〔一〕號曰老上單于。

〔一〕索隱稽音雞。粥音育。

老上稽粥單于初立，〔二〕孝文皇帝復遣宗室女公主爲單于閼氏，使宦者燕人中行說〔三〕傳公主。說不欲行，漢彊使之。說曰：「必我行也，爲漢患者。」中行說既至，因降單于，單于甚親幸之。

〔二〕集解徐廣曰：「一云『稽粥第二單于』，自後皆以弟別之。」

〔三〕正義 行音胡郎反。中行，姓；說，名也。

初，匈奴好漢繒絮食物，中行說曰：「匈奴人衆不能當漢之一郡，然所以彊者，以衣食異，無仰於漢也。今單于變俗好漢物，漢物不過什二，則匈奴盡歸於漢矣。」〔一〕其得漢繒絮，以馳草棘中，衣袴皆裂敝，以示不如旃裘之完善也。得漢食物皆去之，以示不如湡酪〔二〕之便美也。」於是說教單于左右疏記，以計課其人衆畜物。〔三〕

〔一〕集解 韋昭曰：「言漢物什中之二人匈奴，匈奴則動心歸漢矣。」

〔三〕集解 湡，乳汁也。音都奉反。

索隱 重酪。音潼酪二音。按：三蒼云「潼，乳汁也」。字林云「竹用反」。穆

天子傳云「牛馬之湡，臣菟人所具」。

〔三〕正義 上許又反。

漢遺單于書，牘以尺一寸，辭曰「皇帝敬問匈奴大單于無恙」，所遺物及言語云云。中行說令單于遺漢書以尺二寸牘，及印封皆令廣大長，倨傲其辭曰「天地所生日月所置匈奴大單于敬問漢皇帝無恙」，所以遺物言語亦云云。

漢使或言曰：「匈奴俗賤老。」中行說窮漢使曰：「而漢俗屯戍從軍當發者，其老親豈有不自脫溫厚肥美以齎送飲食行戍乎？」漢使曰：「然。」中行說曰：「匈奴明以戰攻爲事，其老弱不能鬪，故以其肥美飲食壯健者，蓋以自爲守衛，如此父子各得久相保，何以言匈奴輕老

也。漢使曰：「匈奴父子乃同穹廬而卧。」^{〔一〕}父死，妻其後母；兄弟死，盡取其妻妻之。無冠帶之飾，闕庭之禮。」中行說曰：「匈奴之俗，人食畜肉，飲其汁，衣其皮；畜食草飲水，隨時轉移。故其急則人習騎射，寬則人樂無事，其約束輕，易行也。君臣簡易，一國之政猶一身也。父子兄弟死，取其妻妻之，惡種姓之失也。故匈奴雖亂，必立宗種。今中國雖詳^{〔二〕}不取其父兄之妻，親屬益疏則相殺，至乃易姓，皆從此類。且禮義之敝，上下交怨望，而室屋之極，生力必屈。」^{〔三〕}夫力耕桑以求衣食，築城郭以自備，故其民急則不習戰功，緩則罷於作業。嗟土室之人，顧無多辭，令喋喋^{〔四〕}而佔佔，^{〔五〕}冠固何當？」^{〔六〕}

〔一〕集解 漢書音義曰：「穹廬，旃帳。」

〔二〕索隱 漢書作「陽」，此亦音羊。

〔三〕索隱 以言棟宇室屋之作，人盡極以營其生，至於氣力屈竭也。屈音其勿反。

〔四〕集解 音謀，利口也。

〔五〕集解 音昌占反，衣裳貌。

〔六〕集解 言雖復著冠，固何當所益。索隱 鄧展曰：「喋音牒。佔，囁耳語。」服虔曰：「口舌喋喋。」如淳曰：「言

汝漢人多居室中，固自宜著冠，且不足貴也。」小顏云：「喋喋，利口也。佔佔，衣裳貌。喋音昌涉反，佔音占。言當思念，無爲喋喋佔佔耳。雖自謂著冠，何所當益也。」

自是之後，漢使欲辯論者，中行說輒曰：「漢使無多言，顧漢所輸匈奴繒絮米穀，令其量中，必善美而已矣，何以爲言乎？且所給備善則已，不備，苦惡。」^{〔一〕}則候秋孰，以騎馳蹂而稼穡耳。^{〔二〕}日夜教單于候利害處。

〔一〕集解 韋昭曰：「苦，飢也。音若『靡鹽』之『鹽』。」

〔二〕集解 徐廣曰：「蹂音而九反。」

漢孝文皇帝十四年，匈奴單于十四萬騎入朝那、蕭關，殺北地都尉卬，^{〔一〕}虜人民畜產甚多，遂至彭陽。^{〔二〕}使奇兵入燒回中宮，^{〔三〕}候騎^{〔四〕}至雍甘泉。^{〔五〕}於是文帝以中尉周舍、郎中令張武爲將軍，發車千乘，騎十萬，軍長安旁以備胡寇。而拜昌侯盧卿^{〔六〕}爲上郡將軍，甯侯魏遼爲北地將軍，隆慮侯周竈爲隴西將軍，東陽侯張相如爲大將軍，成侯董赤^{〔七〕}爲前將軍，大發車騎往擊胡。^{〔八〕}單于留塞內月餘乃去，漢逐出塞卽還，不能有所殺。匈奴日已驕，歲入邊，殺略人民畜產甚多，雲中、遼東最甚，至代郡萬餘人。漢患之，乃使使遺匈奴書。單于亦使當戶報謝，復言和親事。

〔一〕集解 徐廣曰：「姓孫。其子單，封爲鉞侯。白丁反。」
〔索隱〕卬音五郎反。徐廣云：「姓孫，其後子單封爲瓶

侯。音白丁反。」

〔二〕集解 徐廣曰：「在安定。」

索隱出彭陽。韋昭云：「安定縣。」

〔正義〕「城」字誤也。括地志云：「彭城故城在

涇州臨城縣東二十里。」案彭城在媯州，與北地郡甚遠，明非彭城也。

〔三〕索隱 服虔云：「在北地，武帝作宮。」始皇本紀二十七年，「登雞頭山，過回中」。武帝元封四年，通回中道。

〔正義〕括地志云：「秦回中宮在岐州雍縣西四十里，即匈奴所燒者也。」

〔四〕索隱 崔浩云：「候，邏騎。」

〔五〕〔正義〕括地志云：「雲陽也。秦之林光宮，漢之甘泉，在雍州雲陽西北八十里。秦始皇作甘泉宮，去長安三百里，

望見長安。秦皇帝以來祭天圓丘處。」

〔六〕索隱案：表「盧」作「旅」，古今字耳。

〔七〕〔正義〕音赫。

〔八〕集解 徐廣曰：「內史欒布亦爲將軍。」

孝文帝後二年，使使遺匈奴書曰：「皇帝敬問匈奴大單于無恙。使當戶且居〔一〕雕渠難、〔二〕郎中韓遼遺朕馬二匹，已至，敬受。先帝制：長城以北，引弓之國，受命單于；長城以內，冠帶之室，朕亦制之。使萬民耕織射獵衣食，父子無離，臣主相安，俱無暴逆。今聞渫惡民貪降其進取之利，倍義絕約，忘萬民之命，離兩主之驩，然其事已在前矣。書曰：『二國已和親，兩主驩說，寢兵休卒養馬，世世昌樂，闔然更始。』」朕甚嘉之。聖人者日新，改作更始，使老者得息，幼者得長，各保其首領而終其天年。朕與單于俱由此道，順天恤民，

世世相傳，施之無窮，天下莫不咸便。漢與匈奴鄰國之敵，匈奴處北地，寒，殺氣早降，故詔吏遺單于秫櫟金帛絲絮佗物歲有數。今天下大安，萬民熙熙，朕與單于爲之父母。朕追念前事，薄物細故，謀臣計失，皆不足以離兄弟之驩。朕聞天不頗覆，地不偏載。朕與單于皆捐往細故，俱蹈大道，墮壞前惡，以圖長久，使兩國之民若一家子。元元萬民，下及魚鼈，上及飛鳥，跂行喙息〔四〕蠕動之類〔五〕，莫不就安利而辟危殆。故來者不止，天之道也。俱去前事：朕釋逃虜民，單于無言章尼等。〔六〕朕聞古之帝王，約分明而無食言。單于留志，天下大安，和親之後，漢過不先。單于其察之。」

〔一〕索隱漢書作「且渠」，匈奴官號。

〔二〕索隱按：樂彥云「當戶、且渠各自一官。」〔正義〕雕渠難者，其姓名也。且，子余反。

〔三〕集解徐廣曰：「閩音擒，安定意也。」

〔四〕索隱案：跂音岐，又音企。言蟲多之類，或企踵而行，或以喙而息，皆得其安也。

〔五〕索隱按：三蒼云「蠕蠕，動貌，音軟。」淮南子云「昆蟲蠕動」。

〔六〕索隱案：文帝云我今日並釋放彼國逃亡虜，遣之歸本國，汝單于無得更以言詞訴於章尼等，責其逃也。

單于既約和親，於是制詔御史曰：「匈奴大單于遺朕書，言和親已定，亡人不足以益衆廣地，匈奴無人塞，漢無出塞，犯令〔令〕「今」約者殺之，可以久親，後無咎，俱便。朕已許之。」

其布告天下，使明知之。」

後四歲，老上稽粥單于死，子軍臣立爲單于。既立，孝文皇帝復與匈奴和親。而中行說復事之。

〔一〕集解 徐廣曰：「後元三年立。」

軍臣單于立四歲，〔一〕匈奴復絕和親，大入上郡、雲中各三萬騎，所殺略甚衆而去。於是漢使三將軍軍屯北地，代屯句注，趙屯飛狐口，緣邊亦各堅守以備胡寇。又置三將軍，軍長安、西細柳、渭北棘門、霸上以備胡。胡騎入代、句注邊，烽火通於甘泉、長安。數月，漢兵至邊，匈奴亦去遠塞，漢兵亦罷。後歲餘，孝文帝崩，孝景帝立，而趙王遂乃陰使人於匈奴。吳楚反，欲與趙合謀入邊。漢圍破趙，匈奴亦止。自是之後，孝景帝復與匈奴和親，通關市，給遺匈奴，遣公主，如故約。終孝景時，時小人盜邊，無大寇。

〔一〕集解 徐廣曰：「孝文後元七年崩，而二年答單于書，其閒五年。而此云『後四年』，又『立四歲』，數不容爾也。」孝文後六年冬，匈奴入上郡、雲中也。」

今帝卽位，明和親約束，厚遇，通關市，饒給之。匈奴自單于以下皆親漢，往來長城下。

漢使馬邑下人聶翁壹〔一〕奸蘭〔二〕出物〔三〕與匈奴交，〔四〕詳爲賣馬邑城以誘單于。單于信之，而貪馬邑財物，乃以十萬騎入武州塞。〔五〕漢伏兵三十餘萬馬邑旁，御史大夫韓安國爲護軍，護四將軍以伏單于。單于既入漢塞，未至馬邑百餘里，見畜布野而無人牧者，怪之，乃攻亭。是時鴈門尉史〔六〕行徼，見寇，葆此亭，知漢兵謀，單于得，欲殺之，〔七〕尉史乃告單于漢兵所居。單于大驚曰：「吾固疑之。」乃引兵還。出曰：「吾得尉史，天也，天使若言。」以尉史爲「天王」。漢兵約單于入馬邑而縱，單于不至，以故漢兵無所得。漢將軍王恢部出代擊胡輜重，聞單于還，兵多，不敢出。漢以恢本造兵謀而不進，斬恢。〔八〕自是之後，匈奴絕和親，攻當路塞，〔九〕往往入盜於漢邊，不可勝數。然匈奴貪，尚樂關市，嗜漢財物，漢亦尚關市不絕以中之。〔一〇〕

〔一〕索隱 按：衛青傳唯稱「聶壹」。顧氏云「壹，名也。老，故稱翁」，義或然也。

〔二〕集解 奸音干。干蘭，犯禁私出物也。

〔三〕索隱 上音干。干蘭謂犯禁私出物也。

〔四〕集解 漢書音義曰：「私出塞與匈奴交市。」

〔五〕索隱 蘇林云在鴈門也。

〔六〕索隱 如淳云：「律，近塞郡皆置尉，百里一人，士史、尉史各二人也。」

〔七〕集解 徐廣曰：「一云『乃下，具告單于』。」

〔八〕集解 韓長孺傳曰：「恢自殺。」

〔九〕索隱 蘇林云：「直當道之塞。」

〔一〇〕正義 如淳云：「得具以利中傷之。」

自馬邑軍後五年之秋，漢使四將軍各萬騎擊胡關市下。將軍衛青出上谷，至龍城，得胡首虜七百人。公孫賀出雲中，無所得。公孫敖出代郡，爲胡所敗七千餘人。李廣出鴈門，爲胡所敗，而匈奴生得廣，廣後得亡歸。漢囚敖、廣，敖、廣贖爲庶人。其冬，匈奴數入盜邊，漁陽尤甚。漢使將軍韓安國屯漁陽備胡。其明年秋，匈奴二萬騎入漢，殺遼西太守，略二千餘人。胡又入敗漁陽太守軍千餘人，圍漢將軍安國，安國時千餘騎亦且盡，會燕救至，匈奴乃去。匈奴又入鴈門，殺略千餘人。於是漢使將軍衛青將三萬騎出鴈門，李息出代郡，擊胡。得首虜數千人。其明年，衛青復出雲中以西至隴西，擊胡之樓煩、白羊王於河南，得胡首虜數千，牛羊百餘萬。於是漢遂取河南地，築朔方，復繕故秦時蒙恬所爲塞，因河爲固。漢亦棄上谷之什辟縣造陽地以予胡。〔一〕是歲，漢之元朔二年也。

〔一〕集解 什音斗。漢書音義曰：「言縣斗辟，（西）〔曲〕近胡。」索隱 按：孟康云「縣斗辟，（西）〔曲〕近胡」也。什

音斗。辟音僻。造陽卽斗辟縣中地。

〔正義〕按：曲幽辟縣入匈奴界者造陽地棄與胡也。

其後冬，匈奴軍臣單于死。軍臣單于弟左谷蠡王伊稚斜〔一〕自立爲單于，攻破軍臣單于太子於單。〔二〕於單亡降漢，漢封於單爲涉安侯，數月而死。

〔一〕索隱 伊稚斜。釋音持利反。斜音士嗟反，鄒誕生音直牙反。蓋釋斜，胡人語，近得其實。

〔二〕索隱 音丹。

伊稚斜單于既立，其夏，匈奴數萬騎入殺代郡太守恭友，略千餘人。其秋，匈奴又入鴈門，殺略千餘人。其明年，匈奴又復入代郡、定襄、〔一〕上郡，各二萬騎，殺略數千人。匈奴右賢王怨漢奪之河南地而築朔方，數爲寇，盜邊，及入河南，侵擾朔方，殺略吏民甚衆。

〔一〕正義 括地志云：「定襄故城在朔州善陽縣北三百八十里。」地理志定襄郡，高帝置也。」

其明年春，漢以衛青爲大將軍，將六將軍，十餘萬人，出朔方、高闕擊胡。右賢王以爲漢兵不能至，飲酒醉，漢兵出塞六七百里，夜圍右賢王。右賢王大驚，脫身逃走，諸精騎往往隨後去。漢得右賢王衆男女萬五千人，裨小王十餘人。其秋，匈奴萬騎入殺代郡都尉朱英，略千餘人。

其明年春，漢復遣大將軍衛青將六將軍，兵十餘萬騎，乃再出定襄數百里擊匈奴，得首虜前後凡萬九千餘級，而漢亦亡兩將軍，軍三千餘騎。〔一〕右將軍建得以身脫，〔二〕而前將軍

翁侯趙信兵不利，降匈奴。趙信者，故胡小王，降漢，漢封爲翁侯，以前將軍與右將軍并軍分行，〔三〕獨遇單于兵，故盡沒。單于既得翁侯，以爲自次王，〔四〕用其姊妻之，與謀漢。信教單于益北絕幕，〔五〕以誘罷漢兵，徼極而取之，〔六〕無近塞。單于從其計。其明年，胡騎萬人入上谷，殺數百人。

〔一〕集解 徐廣曰：「合有三千耳。」

〔二〕正義 建，蘇武父也。

〔三〕正義 與大軍別行也。

〔四〕正義 自次者，尊重次於單于。

〔五〕集解 應劭曰：「幕，沙幕，匈奴之南界。」瓚曰：「沙土曰幕，直度曰絕。」

〔六〕索隱 按：徼，要也。謂要其疲極而取之。正義 徼音古堯反。徼，要也。要漢兵疲極則取之，無近塞居止。

其明年春，漢使驃騎將軍去病將萬騎出隴西，過焉支山，〔一〕千餘里，擊匈奴，得胡首虜〔騎〕萬八千餘級，破得休屠王祭天金人。〔二〕其夏，驃騎將軍復與合騎侯數萬騎出隴西、北地二千里，擊匈奴。過居延，〔三〕攻祁連山，〔四〕得胡首虜三萬餘人，裨小王以下七十餘人。是時匈奴亦來入代郡、鴈門，殺略數百人。漢使博望侯及李將軍廣出右北平，擊匈奴左賢王。左賢王圍李將軍，卒可四千人，且盡，殺虜亦過當。會博望侯軍救至，李將軍得脫。漢

死亡數千人，合騎侯後驃騎將軍期，及與博望侯皆當死，贖爲庶人。

〔一〕正義焉音烟。括地志云：「焉支山一名刪丹山，在甘州刪丹縣東南五十里。」西河故事云：「匈奴失祁連、焉支二山，乃歌曰：『亡我祁連山，使我六畜不蕃息；失我焉支山，使我婦女無顏色。』」其慙惜乃如此。」

〔三〕集解漢書音義曰：「匈奴祭天處本在雲陽甘泉山下，秦奪其地，後徙之休屠王右地，故休屠有祭天金人，象祭天人也。」索隱韋昭云：「作金人以爲祭天主。」崔浩云：「胡祭以金人爲主，今浮圖金人是也。」又漢書音義稱

「金人祭天，本在雲陽甘泉山下，秦奪其地，徙之於休屠王右地，故休屠有祭天金人，象祭天人也。」事恐不然。案：得休屠金人，後置之於甘泉也。

〔正義〕括地志云：「徑路神祠在雍州雲陽縣西北九十里甘泉山下，本匈奴祭天處，秦奪其地，後徙休屠右地。」按：金人卽今佛像，是其遺法，立以爲祭天主也。

〔三〕索隱韋昭曰：「張掖縣。」

〔四〕索隱按：西河舊事云「山在張掖、酒泉二界上，東西二百餘里，南北百里，有松柏五木，美水草，冬溫夏涼，宜畜牧。匈奴失二山，乃歌云：『亡我祁連山，使我六畜不蕃息；失我燕支山，使我嫁婦無顏色。』」祁連一名天山，亦曰白山也。

其秋，單于怒渾邪王、休屠王居西方爲漢所殺虜數萬人，欲召誅之。渾邪王與休屠王恐，謀降漢，〔一〕漢使驃騎將軍往迎之。渾邪王殺休屠王，并將其衆降漢。凡四萬餘人，號十萬。於是漢已得渾邪王，則隴西、北地、河西益少胡寇，徙關東貧民處所奪匈奴河南、新秦中〔二〕以實之，而減北地以西戍卒半。其明年，匈奴入右北平、定襄各數萬騎，殺略千餘

人而去。

〔一〕〔集解〕徐廣曰：「元狩二年也。」

〔三〕〔索隱〕如淳云：「在長安以北，朔方以南。」漢書食貨志云：「徙貧人充朔方以南新秦中」是也。〔正義〕服虔云：「地名，在北地，廣六七百里，長安北，朔方南。」史記以爲秦始皇遣蒙恬斥逐北胡，得肥饒之地七百里，徙內郡人民皆往充實之，號曰新秦中也。」

其明年春，漢謀曰：「翕侯信爲單于計，居幕北，以爲漢兵不能至」。乃粟馬，發十萬騎，（負）私（負）從〔一〕馬凡十四萬匹，糧重不與焉。令大將軍青、驃騎將軍去病中分軍，大將軍出定襄，驃騎將軍出代，咸約絕幕擊匈奴。單于聞之，遠其輜重，以精兵待於幕北。與漢大將軍接戰一日，會暮，大風起，漢兵縱左右翼圍單于。單于自度戰不能如漢兵，單于遂獨身與壯騎數百潰漢圍西北遁走。漢兵夜追不得。行斬捕匈奴首虜萬九千級，北至闐顏山趙信城〔二〕而還。

〔一〕〔正義〕謂負擔衣糧，私募從者，凡十四萬匹。

〔二〕〔集解〕如淳曰：「信前降匈奴，匈奴築城居之。」

單于之遁走，其兵往往與漢兵相亂而隨單于。單于久不與其大眾相得，其右谷蠡王以爲單于死，乃自立爲單于。真單于復得其衆，而右谷蠡王乃去其單于號，復爲右谷蠡王。

漢驃騎將軍之出代二千餘里，與左賢王接戰，漢兵得胡首虜凡七萬餘級，左賢王將皆遁走。驃騎封於狼居胥山，禪姑衍，臨翰海〔一〕而還。

〔一〕〔集解〕如淳曰：「翰海，北海名。」〔正義〕按：翰海自一大海名，羣鳥解羽伏乳於此，因名也。

是後匈奴遠遁，而幕南無王庭。漢度河自朔方以西至令居，〔二〕往往通渠置田，官吏卒五六萬人，稍蠶食，地接匈奴以北。〔三〕

〔一〕〔集解〕徐廣曰：「在金城。」〔索隱〕徐廣云在金城。地理志云張掖令居縣。姚氏令音連。小顏云音零。

〔二〕〔正義〕匈奴舊以幕爲王庭。今遠徙幕北，更蠶食之，漢境連接匈奴舊地以北也。

初，漢兩將軍大出圍單于，所殺虜八九萬，而漢士卒物故〔一〕亦數萬，漢馬死者十餘萬。匈奴雖病，遠去，而漢亦馬少，無以復往。匈奴用趙信之計，遣使於漢，好辭請和親。天子下其議，或言和親，或言遂臣之。丞相長史任敞曰：「匈奴新破，困，宜可使爲外臣，朝請於邊。」漢使任敞於單于。單于聞敞計，大怒，留之不遣。先是漢亦有所降匈奴使者，單于亦輒留漢使相當。漢方復收士馬，會驃騎將軍去病死，於是漢久不北擊胡。

〔一〕〔索隱〕漢士物故。案：釋名云「漢以來謂死爲『物故』，物就朽故也」。又魏臺訪議高堂崇對曰「聞之先師：物，無也，故，事也。言無復所能於事者也」。

數歲，伊稚斜單于立十三年死，子烏維立爲單于。是歲，漢元鼎三年也。烏維單于立，而漢天子始出巡郡縣。其後漢方南誅兩越，〔一〕不擊匈奴，匈奴亦不侵入邊。

〔一〕正義 南越、東越。

烏維單于立三年，漢已滅南越，遣故太僕賀將萬五千騎出九原二千餘里，至浮苴井〔二〕而還，不見匈奴一人。漢又遣故從驃侯趙破奴萬餘騎出令居數千里，至匈奴水〔三〕而還，亦不見匈奴一人。

〔一〕索隱 苴音子餘反。臣瓚云：「去九原二千里，見漢輿地圖。」

〔二〕索隱 臣瓚云：「水名，去令居千里。」

是時天子巡邊，至朔方，勒兵十八萬騎以見武節，而使郭吉風告單于。郭吉既至匈奴，匈奴主客〔一〕問所使，郭吉禮卑言好，曰：「吾見單于而口言。」單于見吉，吉曰：「南越王頭已懸於漢北闕。今單于〔能〕卽〔能〕前與漢戰，天子自將兵待邊；單于卽不能，卽南面而臣於漢。何徒遠走，亡匿於幕北寒苦無水草之地，毋爲也。」語卒而單于大怒，立斬主客見者，而留郭吉不歸，遷之北海上。〔二〕而單于終不肯爲寇於漢邊，休養息士馬，習射獵，數使使於漢，好辭甘言求請和親。

〔一〕集解 韋昭曰：「主使來客官也。」

〔二〕正義 官名，若鴻臚卿。

〔三〕正義 北海卽上海也，蘇武亦遷也。

漢使王烏等窺匈奴。匈奴法，漢使非去節而以墨黥其面者不得入穹廬。王烏，北地人，習胡俗，去其節，黥面，得入穹廬。單于愛之，詳許甘言，爲遣其太子入漢爲質，〔一〕以求和親。

〔一〕正義 音致。

漢使楊信於匈奴。是時漢東拔穢貉、朝鮮以爲郡，〔一〕而西置酒泉郡，〔二〕以隔絕胡與羌通之路。漢又西通月氏、大夏，〔三〕又以公主妻烏孫王，以分匈奴西方之援國。又北益廣田至胘雷爲塞，〔四〕而匈奴終不敢以爲言。是歲，翁侯信死，漢用事者以匈奴爲已弱，可臣從也。楊信爲人剛直屈彊，素非貴臣，單于不親。單于欲召人，不肯去節，單于乃坐穹廬外見楊信。楊信既見單于，說曰：「卽欲和親，以單于太子爲質於漢。」單于曰：「非故約。故約，漢常遣翁主，給繒絮食物有品，以和親，而匈奴亦不擾邊。今乃欲反古，令吾太子爲質，無幾矣。」〔五〕匈奴俗，見漢使非中貴人，其儒先，〔六〕以爲欲說，折其辯；其少年，以爲欲刺，折其氣。每漢使人匈奴，匈奴輒報償。漢留匈奴使，匈奴亦留漢使，必得當乃肯止。

〔一〕正義 卽玄菟、樂浪二郡。

〔二〕正義 今肅州。

〔三〕〔正義〕漢書西域傳云：「大月氏國去長安城萬一千六百里，本居燉煌、祁連間，冒頓單于破月氏，而老上單于殺月氏王，以頭爲飲器，月氏乃遠去，過大宛西，擊大夏而臣之，都媯水北，爲王庭也。」

〔四〕〔集解〕漢書音義曰：「肱，肱，地名，在烏孫北。」

〔五〕〔正義〕幾音記。言反古無所冀望也。

〔六〕〔集解〕先，先生也。漢書作「儒生」也。

楊信既歸，漢使王烏，而單于復調以甘言，欲多得漢財物，給謂王烏曰：「吾欲入漢見天子，面相約爲兄弟。」王烏歸報漢，漢爲單于築邸于長安。匈奴曰：「非得漢貴人使，吾不與誠語。」匈奴使其貴人至漢，病，漢予藥，欲愈之，不幸而死。而漢使路充國佩二千石印綬往使，因送其喪，厚葬直數千金，曰「此漢貴人也」。單于以爲漢殺吾貴使者，乃留路充國不歸。諸所言者，單于特空給王烏，殊無意入漢及遣太子來質。於是匈奴數使奇兵侵犯邊。漢乃拜郭昌爲拔胡將軍，及浞野侯〔一〕屯朔方以東，備胡。路充國留匈奴三歲，單于死。

〔一〕〔集解〕徐廣曰趙破奴。

烏維單于立十歲而死，子烏師廬立爲單于。〔二〕年少，號爲兒單于。是歲元封六年也。自此之後，單于益西北，左方兵直雲中，右方直酒泉、燉煌郡。〔三〕

〔一〕集解 徐廣曰：「鳥，一作『詹』。」

〔二〕正義 括地志云：「鐵勒國，匈奴冒頓之後，在突厥國北。樂勝州經秦長城、太羹長路正北，經沙磧，十三日行至其國。」

兒單于立，漢使兩使者，一弔單于，一弔右賢王，欲以乖其國。使者入匈奴，匈奴悉將致單于。單于怒而盡留漢使。漢使留匈奴者前後十餘輩，而匈奴使來，漢亦輒留相當。

是歲，漢使貳師將軍廣利西伐大宛，而令因杆〔一〕將軍敖築受降城。其冬，匈奴大雨雪，畜多飢寒死。兒單于年少，好殺伐，國人多不安。左大都尉欲殺單于，使人閒告漢曰：「我欲殺單于于降漢，漢遠，即兵來迎我，我即發。」初，漢聞此言，故築受降城，猶以爲遠。

〔一〕正義 音于。

其明年春，漢使浞野侯破奴將二萬餘騎出朔方西北二千餘里，期至浚稽山〔二〕而還。浞野侯既至期而還，左大都尉欲發而覺，單于誅之，發左方兵擊浞野。浞野侯行捕首虜得數千人。還，未至受降城四百里，匈奴兵八萬騎圍之。浞野侯夜自出求水，匈奴閒捕，生得浞野侯，因急擊其軍。軍中郭縱爲護，維王爲渠，〔三〕相與謀曰：「及諸校尉畏亡將軍而誅之，莫相勸歸。」軍遂沒於匈奴。匈奴兒單于大喜，遂遣奇兵攻受降城。不能下，乃寇人邊而去。其明年，單于欲自攻受降城，未至，病死。

〔一〕索隱應劭云：「在武威縣北。」

〔二〕正義爲渠帥也。

兒單于立三歲而死。子年少，匈奴乃立其季父烏維單于弟右賢王眭〔一〕犁湖爲單于。是歲太初三年也。

〔一〕集解音鉤，又音吁。

索隱音鉤，又音吁。

眭犁湖單于立，漢使光祿徐自爲出五原塞〔一〕數百里，遠者千餘里，築城鄯列亭〔二〕至廬胸〔三〕而使游擊將軍韓說、長平侯衛伉屯其旁，使彊弩都尉路博德築居延澤上。〔四〕

〔一〕正義卽五原郡榆林塞也。在勝州榆林縣四十里也。

〔二〕正義顧胤云：「鄯，山中小城。亭，候望所居也。」

〔三〕集解音衢，匈奴地名，又山名。索隱服虔云：「匈奴地名。」張晏云：「山名。」

正義地理志云五原郡稠陽

縣北出石門，鄯，得光祿城，又西北得支就城，又西北得頭曼城，又西北得庫河城，又西北得宿虜城。按：卽築城鄯列亭至廬胸也。服虔云：「廬胸，匈奴地名也。」張晏云：「山名也。」

〔四〕正義括地志云：「漢居延縣故城在甘州張掖縣東北一千五百三十里，有漢遮虜，彊弩都尉路博德之所築。李陵敗，與士衆期至遮虜，卽此也。長老傳云鄯北百八十里，直居延之西北，是李陵戰地也。」

其秋，匈奴大人定襄、雲中，殺略數千人，敗數二千石而去，行破壞光祿所築城列亭。

又使右賢王人酒泉、張掖，略數千人。會任文〔一〕擊救，盡復失所得而去。是歲，貳師將軍破大宛，斬其王而還。匈奴欲遮之，不能至。其冬，欲攻受降城，會單于病死。

〔一〕集解 漢書音義曰：「漢將也。」

匈奴立其弟左大都尉且鞮〔一〕侯爲單于。

〔一〕索隱 上音子餘反，下音低。

漢既誅大宛，威震外國。天子意欲遂困胡，乃下詔曰：「高皇帝遺朕平城之憂，高后時單于書絕悖逆。昔齊襄公復九世之讎，春秋大之。」〔一〕是歲太初四年也。

〔一〕集解 公羊傳曰：「九世猶可以復讎乎？曰雖百世可也。」

且鞮侯單于既立，盡歸漢使之不降者。路充國等得歸。單于初立，恐漢襲之，乃自謂「我兒子，安敢望漢天子！漢天子，我丈人行〔一〕也」。漢遣中郎將蘇武厚幣賂遺單于。單于益驕，禮甚倨，非漢所望也。其明年，浞野侯破奴得亡歸漢。

〔一〕正義 胡朗反。

其明年，漢使貳師將軍廣利以三萬騎出酒泉，擊右賢王於天山，〔一〕得胡首虜萬餘

級而還。匈奴大圍貳師將軍，幾不脫。漢兵物故什六七。漢復使因杆將軍敖出西河，與彊弩都尉會涿涂山，〔三〕毋所得。又使騎都尉李陵將步騎五千人，出居延北千餘里，與單于會，合戰，陵所殺傷萬餘人，兵及食盡，欲解歸，匈奴圍陵，陵降匈奴，其兵遂沒，得還者四百人。單于乃貴陵，以其女妻之。

〔一〕正義 在伊州。

〔二〕集解 徐廣曰：「涂音邪」。

〔索隱〕涿音卓。涂音以奢反。

〔正義〕匈奴中山也。

後二歲，復使貳師將軍將六萬騎，步兵十萬，出朔方。彊弩都尉路博德將萬餘人，與貳師會。游擊將軍說將步騎三萬人，出五原。因杆將軍敖將萬騎步兵三萬人，出鴈門。匈奴聞，悉遠其累重於余吾水北，〔一〕而單于以十萬騎待水南，與貳師將軍接戰。貳師乃解而引歸，與單于連戰十餘日。貳師聞其家以巫蠱族滅，因并衆降匈奴，〔二〕得來還千人一兩人耳。游擊說無所得。因杆敖與左賢王戰，不利，引歸。是歲〔三〕漢兵之出擊匈奴者不得言功多少，功不得御。〔四〕有詔捕太醫令隨但，言貳師將軍家室族滅，使廣利得降匈奴。〔五〕

〔一〕集解 徐廣曰：「余，一作『斜』，音邪。」

〔索隱〕徐廣云：「一作『斜』，音邪。」山海經云：「北鮮之山，鮮水出焉，北

流注余吾。」

〔正義〕累，力爲反。重，丈用反。

〔三〕**集解** 徐廣曰：「案史記將相年表及漢書，征和二年，巫蠱始起。三年，廣利與商丘成出擊胡軍，敗，乃降。」

〔三〕**集解** 徐廣曰：「天漢四年。」**正義** 自此以下，上至貳師聞其家，非天漢四年事，似錯誤，人所知。

〔四〕**正義** 御音語。其功不得相御當也。

〔五〕**索隱** 漢書云：「明年，且鞮死，長子狐鹿姑單于立。」張晏云：「自狐鹿姑單于已下，皆劉向、褚先生所錄，班彪又撰而次之，所以漢書匈奴傳有上下兩卷。」

太史公曰：孔氏著春秋，隱桓之間則章，至定哀之際則微，〔一〕爲其切當世之文而罔褒，忌諱之辭也。〔二〕世俗之言匈奴者，患其微一時之權，〔三〕而務調納其說，〔四〕以便偏指，不參〔五〕彼己；將率〔六〕席中國廣大，氣奮，人主因以決策，是以建功不深。堯雖賢，興事業不成，得禹而九州寧。〔七〕且欲興聖統，唯在擇任將相哉！唯在擇任將相哉！

〔一〕**索隱** 案：諱國惡，禮也。仲尼仕於定哀，故其著春秋，不切論當世而微其詞也。

〔二〕**索隱** 案：罔者，無也。謂其無實而褒之是也，忌諱當代故也。

〔三〕**集解** 徐廣曰：「微音皎。」**索隱** 按：徐音皎，劉伯莊音叫，皆非也。按其字宜音饒。微者，求也，言求一時權寵。

〔四〕**索隱** 音稅。

〔五〕**索隱** 案：謂說者謀匈奴，皆患其直微求一時權幸，但務諂進其說，以自便其偏指，不參詳終始利害也。

〔六〕集解詩云：「彼己之子。」索隱彼己者，猶詩人譏詞云「彼己之子」是也。將率則指樊噲、衛、霍等也。

〔七〕正義言堯雖賢聖，不能獨理，得禹而九州安寧。以刺武帝不能擇賢將相，而務諂納小人浮說，多伐匈奴，故壞齊民。故太史公引禹聖成其太平，以攻當代之罪。

【索隱述贊】獫狁、薰粥，居于北邊。既稱夏裔，式憬周篇。頗隨畜牧，屢擾塵煙。爰自冒頓，尤聚控弦。雖空帑藏，未盡中權。

史記卷一百一十一

衛將軍驃騎列傳第五十一

大將軍衛青者，平陽人也。^{〔一〕}其父鄭季，爲吏，給事平陽侯家，與侯妾衛媼通，^{〔二〕}生青。青同母兄衛長子，而姊衛子夫自平陽公主家得幸天子，^{〔三〕}故冒姓爲衛氏。字仲卿。長子更字長君。長君母號爲衛媼。媼長女衛孺，^{〔四〕}次女少兒，次女卽子夫。後子夫男弟步廣^{〔五〕}皆冒衛氏。

〔一〕正義漢書云：「其父鄭季，河東平陽人，以縣吏給事平陽侯之家」也。

〔二〕索隱衛，姓也。媼，婦人老少通稱。漢書曰與主家僮衛媼通。案：卽云家僮，故非老。或者媼是老稱，後追稱媼耳。又外戚傳云：「薄姬父與魏王宗女魏媼通」，則亦魏是媼姓。而小顏云「衛者，舉其夫姓也」。然案此云「侯妾衛媼」，似更無別夫也。下云「同母兄衛長子及姊子夫皆冒衛姓」，又似有夫。其所冒之姓爲父與母，皆未明也。

〔三〕集解徐廣曰：「曹參曾孫平陽夷侯，時尚武帝姊平陽公主，生子襄。」索隱案：如淳云「本陽信長公主，爲平陽侯所尚，故稱平陽公主」。按徐廣云「夷侯，曹參曾孫，名襄」。又按系家及功臣表「時」或作「嚳」，漢書作「壽」，

並文字殘缺，故不同也。

〔四〕〔索隱〕漢書云「君孺」。

〔五〕〔集解〕徐廣曰：「步，一作『少』。」

青爲侯家人，少時歸其父，其父使牧羊。先母之子〔一〕皆奴畜之，不以爲兄弟數。〔二〕青嘗從人至甘泉居室，〔三〕有一鉗徒〔四〕相青曰：「貴人也，官至封侯。」青笑曰：「人奴之生，得毋笞罵卽足矣，安得封侯事乎！」

〔一〕〔集解〕服虔曰：「先母，適妻也。」〔索隱〕漢書作「民母」。服虔云「母，適妻也。」青之適母。顧氏云

「鄭季本妻編於民戶之間，故曰民母」。今本亦或作「民母」也。

〔二〕〔索隱〕音去聲。

〔三〕〔正義〕按：居室，署名，武帝改曰保宮。灌夫繫居室是也。

〔四〕〔集解〕張晏曰：「甘泉中徒所居也。」

青壯，爲侯家騎，從平陽主。建元二年春，青姊子夫得入宮幸上。皇后，堂邑大長公主女也，〔一〕無子，妒。大長公主聞衛子夫幸，有身，妒之，乃使人捕青。青時給事建章，〔二〕未知名。大長公主執囚青，欲殺之。其友騎郎公孫敖與壯士往篡取之，〔三〕以故得不死。上聞，乃召青爲建章監，侍中，及同母昆弟貴，賞賜數日閒累千金。孺爲太僕公孫賀妻。少兒故與陳掌通，〔四〕上召貴掌。公孫敖由此益貴。子夫爲夫人。青爲大中大夫。

〔一〕集解徐廣曰：「堂邑安侯陳嬰之孫夷侯午，尚景帝姊長公主，子季須。」元鼎元年，季須坐姦自殺。」正義文穎云：「陳皇后，武帝姑女也。」

〔二〕索隱案：晉灼云「上林中宮名也」。

〔三〕索隱纂猶劫也，奪也。

〔四〕集解徐廣曰：「陳平曾孫，名掌也。」

元光五年，青爲車騎將軍，擊匈奴，出上谷，太僕公孫賀爲輕車將軍，出雲中；大中大夫公孫敖爲騎將軍，出代郡；衛尉李廣爲驍騎將軍，出雁門；軍各萬騎。青至龍城，斬首虜數百。騎將軍敖亡七千騎；衛尉李廣爲虜所得，得脫歸，皆當斬，贖爲庶人。賀亦無功。

元朔元年春，衛夫人有男，〔一〕立爲皇后。其秋，青爲車騎將軍，出雁門，三萬騎擊匈奴，斬首虜數千人。明年，匈奴入殺遼西太守，虜略漁陽二千餘人，敗韓將軍軍。漢令將軍李息擊之，出代；令車騎將軍青出雲中以西至高闕。〔二〕遂略河南地，至于隴西，捕首虜數千，畜數十萬，走白羊、樓煩王。遂以河南地爲朔方郡。〔三〕以三千八百戶封青爲長平侯。青校尉蘇建有功，以千一百戶封建爲平陵侯。使建築朔方城。〔四〕青校尉張次公有功，封爲岸頭侯。〔五〕天子曰：「匈奴逆天理，亂人倫，暴長虐老，以盜竊爲務，行詐諸蠻夷，造謀藉兵，數爲

邊害，〔六〕故興師遣將，以征厥罪。詩不云乎，『薄伐玁狁，〔七〕至于太原』，『出車彭彭，城彼朔方』。〔八〕今車騎將軍青度西河〔九〕至高闕，獲首虜二千三百級，車輜畜產畢收爲鹵，已封爲列侯，遂西定河南地，按榆谿舊塞，〔一〇〕絕梓領，梁北河，〔一一〕討蒲泥，破符離，〔一二〕斬輕銳之卒，捕伏聽者三千七十一級，〔一三〕執訊獲醜，〔一四〕驅馬牛羊百有餘萬，全甲兵而還，益封青三千戶。其明年，匈奴入殺代郡太守友，〔一五〕入略鴈門千餘人。其明年，匈奴大人代、定襄、上郡，殺略漢數千人。

〔一〕索隱 卽衛太子據也。

〔二〕索隱 按：山名也。小顏云：「曰塞名，在朔方之北。」

〔三〕索隱 按：謂北地郡之北，黃河之南。正義 今夏州也。

〔四〕正義 括地志云：「夏州朔方縣北什賁故城是。」按：蘇建築，什賁之號蓋出蕃語也。

〔五〕索隱 案：晉灼云：「河東皮氏縣之亭名也。」正義 服虔云：「鄉名也。」

〔六〕集解 張晏曰：「從蠻夷借兵鈔邊也。」

〔七〕索隱 薄伐玁狁。此小雅六月詩，美宣王北伐也。薄伐者，言逐出之也。

〔八〕索隱 小雅出車之詩也。

〔九〕正義 卽雲中郡之西河，今勝州東河也。

〔一〇〕集解 如淳曰：「案，行也。榆谿，舊塞名。」或曰按，尋也。

索隱 按榆谷舊塞。如淳云：「按，行也，尋也。榆

谷，舊塞名也。」案：水經云「上郡之北有諸次水，東經榆林塞爲榆谿」，是榆谷舊塞也。

〔二〕集解 如淳曰：「絕，度也。爲北河作橋梁。」〔正義〕括地志云：「梁北河在靈州界也。」

〔三〕集解 晉灼曰：「二王號。」〔索隱〕晉灼云：「二王號。」崔浩云：「漠北塞名。」

〔三〕集解 張晏曰：「伏於隱處，聽軍虛實。」

〔四〕正義 訊，問也。醜，衆。言執其生口問之，知虜處，獲得衆類也。

〔五〕集解 徐廣曰：「友者，太守名也。姓共也。」

其明年，元朔之五年春，漢令車騎將軍青將三萬騎，出高闕，衛尉蘇建爲游擊將軍，左內史李沮〔一〕爲彊弩將軍，太僕公孫賀爲騎將軍，代相李蔡爲輕車將軍，皆領屬車騎將軍，俱出朔方，大行李息、岸頭侯張次公爲將軍，出右北平。咸擊匈奴。匈奴右賢王當衛青等兵，以爲漢兵不能至此，飲醉。漢兵夜至，圍右賢王，右賢王驚，夜逃，獨與其愛妾一人壯騎數百馳，潰圍北去。漢輕騎校尉郭成等逐數百里，不及，得右賢裨王十餘人，〔二〕衆男女萬五千餘人，畜數千百萬，於是引兵而還。至塞，天子使使者持大將軍印，卽軍中拜車騎將軍青爲大將軍，諸將皆以兵屬大將軍，大將軍立號而歸。〔三〕天子曰：「大將軍青躬率戎士，師大捷，獲匈奴王十有餘人，益封青六千戶。」而封青子伉爲宜春侯，〔四〕青子不疑爲陰安侯，青子登爲發干侯。青固謝曰：「臣幸得待罪行閒，賴陛下神靈，軍大捷，皆諸校尉力戰之功也。」

陛下幸已益封臣青。臣青子在疆綽中，^{〔五〕}未有勤勞，上幸列地封爲三侯，非臣待罪行閒所以勸士力戰之意也。伉等三人何敢受封！天子曰：「我非忘諸校尉功也，今固且圖之。」乃詔御史曰：「護軍都尉公孫敖三從大將軍擊匈奴，常護軍，傳校獲王，^{〔六〕}以千五百戶封敖爲合騎侯。^{〔七〕}都尉韓說從大將軍出窳渾，^{〔八〕}至匈奴右賢王庭，爲麾下搏戰獲王，^{〔九〕}以千三百戶封說爲龍額侯。騎將軍公孫賀從大將軍獲王，以千三百戶封賀爲南窮侯。^{〔二〇〕}輕車將軍李蔡再從大將軍獲王，以千六百戶封蔡爲樂安侯。校尉李朔，校尉趙不虞，校尉公孫戎奴，各三從大將軍獲王，以千三百戶封朔爲涉軹侯，以千三百戶封不虞爲隨成侯，以千三百戶封戎奴爲從平侯。將軍李沮、李息及校尉豆如意有功，賜爵關內侯，食邑各三百戶。」其秋，匈奴入代，殺都尉朱英。

〔一〕集解 文穎曰：「音組。」

〔二〕索隱 裨王十人。賈逵云：「裨，益也。」小顏云：「裨王，小王也，若裨將然。音頻移反。」

〔三〕索隱 案：謂立大將軍之號令而歸。

〔四〕正義 伉音口浪反。

〔五〕正義 襁長尺二寸，闊八寸，以約小兒於背。襁，小兒被也。

〔六〕索隱 顧祕監云：「傳，領也。五百人謂之校。」小顏云：「傳音附。言敖總護諸軍，每附部校，以致克捷而獲王。」

也。」

〔七〕索隱案：非邑地，而以戰功爲號。謂以軍合驃騎，故云「合騎」，若「冠軍」、「從驃」然也。

〔八〕集解徐廣曰：「竊渾在朔方，音庚。」索隱音庚。服虔云「塞名」。徐廣云「在朔方」。漢書作「寘渾」，寘音田也。

〔九〕索隱搏音博。搏，擊也。小顏同。今史、漢本多作「傳」，傳猶轉也。

〔一〇〕集解徐廣曰：「竇宜作『奔』，音匹孝反。」索隱徐音匹教反。韋昭云縣名。或作「審」，音干校反。字林云「大」下「卯」與「穴」下「卯」並音匹孝反。

其明年春，大將軍青出定襄，合騎侯敖爲中將軍，太僕賀爲左將軍，翕侯趙信爲前將軍，衛尉蘇建爲右將軍，郎中令李廣爲後將軍，右內史李沮爲彊弩將軍，咸屬大將軍，斬首數千級而還。月餘，悉復出定襄擊匈奴，斬首虜萬餘人。右將軍建、前將軍信并軍三千餘騎，獨逢單于兵，與戰一日餘，漢兵且盡。前將軍故胡人，降爲翕侯，見急，匈奴誘之，遂將其餘騎可八百，犇降單于。右將軍蘇建盡亡其軍，獨以身得亡去，自歸大將軍。大將軍問其罪正閼，〔一〕長史安，〔二〕議郎周霸等，〔三〕建當云何？霸曰：「自大將軍出，未嘗斬裨將。今建弃軍，可斬以明將軍之威。」閼、安曰：「不然。兵法『小敵之堅，大敵之禽也』。今建以數千當單于數萬，力戰一日餘，士盡，不敢有二心，自歸。自歸而斬之，是示後無反意也。不當斬。」大將軍曰：「青幸得以肺腑待罪行間，不患無威，而霸說我以明威，甚失臣意。且

使臣職雖當斬將，以臣之尊寵而不敢自擅專誅於境外，而具歸天子，天子自裁之，於是以見爲人臣不敢專權，不亦可乎？軍吏皆曰「善」。遂囚建詣行在所。〔四〕人塞罷兵。

〔一〕〔集解〕張晏曰：「正，軍正也。閔，名也。」

〔二〕〔正義〕律，都軍官長史一人也。

〔三〕〔集解〕徐廣曰：「儒生。」〔索隱〕徐廣云儒生也。案：郊祀志議封禪有周霸，故知也。

〔四〕〔集解〕蔡邕曰：「天子自謂所居曰『行在所』，言今雖在京師，行所至耳。巡狩天下，所奏事處皆爲宮。在長安則曰奏長安宮，在泰山，則曰奉高宮，唯當時所在。」

是歲也，大將軍姊子霍去病〔一〕年十八，幸，爲天子侍中。善騎射，再從大將軍，受詔與壯士，爲剽姚〔二〕校尉，與輕勇騎八百直奔大軍數百里赴利，斬捕首虜過當。〔三〕於是天子曰：「剽姚校尉去病斬首虜二千二十八級，及相國、當戶，斬單于大父行。〔四〕籍若侯產，〔五〕生捕季父羅姑比，〔六〕再冠軍，以千六百戶封去病爲冠軍侯。上谷太守郝賢四從大將軍，捕斬首虜二千餘人，以千一百戶封賢爲衆利侯。」是歲，失兩將軍軍，亡翕侯，軍功不多，故大將軍不益封。右將軍建至，天子不誅，赦其罪，贖爲庶人。

〔一〕〔集解〕徐廣曰：「姊卽少兒也。」

〔二〕〔索隱〕上音匹遙反，下音遙。大顏案荀悅漢紀作「票鷁」。票鷁，勁疾之貌也。上音頻妙反，下音弋召反。

〔三〕〔索隱〕案：小顏云「計其所將之人數，則捕首虜爲多，過於所當也。一云漢軍亡失者少，而殺獲匈奴數多，故曰

過當也」。

〔四〕〔索隱〕行音胡浪反。謂籍若侯是匈奴祖之行也。漢書云「籍若侯產，產即大父之名」。

〔五〕〔集解〕張晏曰：「籍若，胡侯。」

〔六〕〔索隱〕案：顏氏云「羅姑比，單于季父名也」。小顏云「比，頻也」。案：下文既云「再冠軍」，無容更言頻也。

大將軍既還，賜千金。是時王夫人方幸於上，甯乘說大將軍曰：「將軍所以功未甚多，身食萬戶，三子皆爲侯者，徒以皇后故也。今王夫人幸而宗族未富貴，願將軍奉所賜千金爲王夫人親壽。」大將軍乃以五百金爲壽。天子聞之，問大將軍，大將軍以實言，上乃拜甯乘爲東海都尉。

張騫從大將軍，以嘗使大夏，〔一〕留匈奴中久，導軍，知善水草處，軍得以無飢渴，因前使絕國功，封騫博望侯。

〔一〕〔正義〕大夏國在大宛西。

冠軍侯去病既侯三歲，元狩二年春，以冠軍侯去病爲驃騎將軍，〔二〕將萬騎出隴西，有功。天子曰：「驃騎將軍率戎士踰烏盭，〔三〕討遼濮，〔四〕涉狐奴，〔五〕歷五王國，輜重人衆懾懼〔六〕者弗取，冀獲單于子。」〔六〕轉戰六日，過焉支山千有餘里，合短兵，殺折蘭王，斬盧胡

王，〔七〕誅全甲，〔八〕執渾邪王子及相國、都尉，首虜八千餘級，收休屠祭天金人，〔九〕益封去病二千戶。」

〔一〕集解 徐廣曰：「驃，一亦作『剽』。」

正義 漢書云霍去病征匈奴有絕幕之勳，始置驃騎將軍，位在三司，品秩

同大將軍。說文云：「驃，黃馬鬣白色。一曰白髦尾。」

〔二〕集解 漢書音義曰：「音戾，山名也。」

〔三〕索隱 音速卜二音。崔浩云：「匈奴部落名」。案：下有「遼濮王」，是國名也。

〔四〕集解 晉灼曰：「水名也。」

〔五〕集解 文穎曰：「恐懼也。」

索隱 案：說文云「聾，失氣也」。劉氏云「上式涉反，下之涉反」。

〔六〕集解 徐廣曰：「一作『與』。」

〔七〕集解 張晏曰：「折蘭，盧胡，國名也。殺者，殺之而已。斬者，獲其首。」

正義 顏師古云：「折蘭，匈奴中姓也。」

今鮮卑有是蘭姓者，卽其種。」

〔八〕集解 徐廣曰：「全，一作『金』。」

正義 全甲謂具足不失落也。

〔九〕集解 如淳曰：「祭天爲主。」

索隱 案：張嬰云「佛徒祠金人也」。如淳云「祭天以金人爲主也」。屠音儲。

其夏，驃騎將軍與合騎侯敖俱出北地，異道；博望侯張騫、郎中令李廣俱出右北平，異道；皆擊匈奴。郎中令將四千騎先至，博望侯將萬騎在後至。匈奴左賢王將數萬騎圍郎中令，郎中令與戰二日，死者過半，所殺亦過當。博望侯至，匈奴兵引去。博望侯坐行留，當

斬，贖爲庶人。而驃騎將軍出北地，已遂深入，與合騎侯失道，不相得，驃騎將軍踰居延至祁連山，捕首虜甚多。天子曰：「驃騎將軍踰居延，〔一〕遂過小月氏，〔二〕攻祁連山，〔三〕得酋涂王，〔四〕以衆降者二千五百人，斬首虜三萬二百級，獲五王，五王母，單于閼氏、王子五十九人，相國、將軍、當戶、都尉六十三人，師大率〔五〕減什三，〔六〕益封去病五千戶。賜校尉從至小月氏爵左庶長。鷹擊司馬破奴再從驃騎將軍斬遼濮〔七〕王，捕稽沮王，〔八〕千騎將得王、王母各一人，〔九〕王子以下四十一人，捕虜三千三百三十人，前行捕虜千四百人，以千五百戶封破奴爲從驃侯。〔一〇〕校尉句王高不識，〔一一〕從驃騎將軍捕呼于屠王〔一二〕王子以下十一人，捕虜千七百六十八人，以千一百戶封不識爲宜冠侯。〔一三〕校尉僕多〔一四〕有功，封爲煇渠侯。〔一五〕合騎侯敖坐行留不與驃騎會，當斬，贖爲庶人。諸宿將所將士馬兵亦不如驃騎，驃騎所將常選，〔一六〕然亦敢深入，常與壯騎先其大〔將〕軍，軍亦有天幸，未嘗困絕也。然而諸宿將常坐留落不遇。〔一七〕由此驃騎日以親貴，比大將軍。

〔一〕〔集解〕張晏曰：「水名也。」

〔二〕〔索隱〕韋昭云：「音支。」西域傳：「大月氏本居敦煌、祁連間，餘衆保南山，遂號小月氏。」

〔三〕〔索隱〕小顏云：「卽天山也。匈奴謂天〔爲〕祁連。」西河舊事謂白山，天山。祁連恐非卽天山也。

〔四〕〔集解〕張晏曰：「胡王也。」

〔索隱〕首音才由反。涂音徒。漢書云：「揚武乎鐐得，得單于單桓、酋涂王」，此文省

也。

〔五〕正義 率音律也。

〔六〕索隱 案：漢書云「減什七」，不同也。小顏云「破匈奴之師，十減其七。一云漢兵亡失之數，下皆類此」。案：後說爲是也。

〔七〕正義 速卜二音。

〔八〕索隱 沮音子余反。

〔九〕索隱 按：漢書云「右千騎將王」，然則此千騎將漢之將，屬趙破奴，得匈奴五王及王母也。或云右千騎將卽匈奴王之名。

〔一〇〕集解 張晏曰：「從驃騎將軍有功，因以爲號。」

〔二〕集解 徐廣曰：「句音鉤。匈奴以爲號。」索隱 案：二人並匈奴人也。

〔三〕索隱 案：三字共爲王號。

〔三〕正義 孔文祥云：「從冠軍將軍戰故。宜冠，從驃之類也。」

〔四〕索隱 案：漢百官表作「僕朋」，疑多是誤。

〔五〕索隱 輝音暉。

〔六〕索隱 音宣變反。謂驃騎常選擇取精兵。

〔七〕索隱 案：謂遲留零落，不偶合也。

其秋，單于怒渾邪王居西方數爲漢所破，亡數萬人，以驃騎之兵也。單于怒，欲召誅渾邪王。渾邪王與休屠王等謀欲降漢，使人先要邊。^{〔一〕}是時大行李息將城河上，得渾邪王使，卽馳傳以聞。天子聞之，於是恐其以詐降而襲邊，乃令驃騎將軍將兵往迎之。驃騎既渡河，與渾邪王衆相望。渾邪王裨將見漢軍而多欲不降者，頗遁去。驃騎乃馳入與渾邪王相見，斬其欲亡者八千人，遂獨遣渾邪王乘傳先詣行在所，盡將其衆渡河，降者數萬，號稱十萬。既至長安，天子所以賞賜者數十巨萬。封渾邪王萬戶，爲漯陰侯。^{〔二〕}封其裨王呼毒尼。^{〔三〕}爲下摩侯，鷹庇爲煇渠侯，^{〔四〕}禽黎。^{〔五〕}爲河綦侯，大當戶銅離。^{〔六〕}爲常樂侯。於是天子嘉驃騎之功曰：「驃騎將軍去病率師攻匈奴西域王渾邪，王及厥衆萌咸相犇，率以軍糧接食，并將控弦萬有餘人，誅獍驁，^{〔七〕}獲首虜八千餘級，降異國之王三十二人，戰士不離傷，十萬之衆咸懷集服，仍與之勞，爰及河塞，庶幾無患，^{〔八〕}幸既永綏矣。」以千七百戶益封驃騎將軍。減隴西、北地、上郡戍卒之半，以寬天下之繇。

〔一〕索隱案：謂先於邊境要候漢人，言其欲降。

〔二〕索隱漯音他合反。案地理志，縣名，在平原郡。

〔三〕集解文穎曰：「胡王名。」

〔四〕集解 徐廣曰：「一云『篇警』。」

索隱 漢書鷹作「雁」。庇音必二反，又音足履反。案：漢書功臣表云元狩二

年以燁渠封僕朋，至三年又封鷹庇。其地俱屬魯陽，未詳所以。

正義 燁渠，表作「順梁」。

〔五〕集解 徐廣曰：「禽，一作『鳥』。」

索隱 案：表作「鳥黎」。

〔六〕集解 徐廣曰：「一作『稠離』也。」

索隱 徐廣一作「稠離」，與漢書功臣表同。此文云「銅離」，文異也。

〔七〕集解 晉灼曰：「獠音欺譙反。」

索隱 上音丘昭反。說文作「趨」，行遮貌。遮，一作「疾」。驛音胡旦反。

〔八〕正義 言匈奴右地渾邪王降，而塞外並河諸郡之民無憂患也。

居頃之，乃分徙降者邊五郡故塞外，〔一〕而皆在河南，因其故俗，爲屬國。〔二〕其明年，匈奴入右北平、定襄，殺略漢千餘人。

〔一〕正義 五郡謂隴西、北地、上郡、朔方、雲中，並是故塞外，又在北海西南。

〔二〕正義 以降來之民徙置五郡，各依本國之俗而屬於漢，故言「屬國」也。

其明年，天子與諸將議曰：「翕侯趙信爲單于畫計，常以爲漢兵不能度幕輕留，〔一〕今大發士卒，其勢必得所欲。」是歲元狩四年也。

〔一〕索隱 案：幕卽沙漠，古字少耳。輕留者，謂匈奴以漢軍不能至，故輕易留而不去也。

元狩四年春，上令大將軍青、驃騎將軍去病將各五萬騎，步兵轉者踵軍數十萬，〔二〕而敢力戰深入之士皆屬驃騎。驃騎始爲出定襄，當單于。捕虜言單于東，乃更令驃騎出代

郡，令大將軍出定襄。郎中令爲前將軍，太僕爲左將軍，主爵趙食其爲右將軍，平陽侯襄爲後將軍，皆屬大將軍。兵卽度幕，人馬凡五萬騎，與驃騎等咸擊匈奴單于。趙信爲單于謀曰：「漢兵既度幕，人馬罷，匈奴可坐收虜耳。」乃悉遠北其輜重，皆以精兵待幕北。而適值大將軍軍出塞千餘里，見單于兵陳而待，於是大將軍令武剛車〔三〕自環爲營，而縱五千騎往當匈奴。匈奴亦縱可萬騎。會日且入，大風起，沙礫擊面，兩軍不相見，漢益縱左右翼繞單于。單于視漢兵多，而士馬尚彊，戰而匈奴不利，薄莫，單于遂乘六羸，壯騎可數百，直冒漢圍西北馳去。時已昏，漢匈奴相紛拏，〔三〕殺傷大當。〔四〕漢軍左校捕虜言單于未昏而去，漢軍因發輕騎夜追之，大將軍軍因隨其後。匈奴兵亦散走。遲明，〔三〕行二百餘里，不得單于，頗捕斬首虜萬餘級，遂至寶顏山趙信城，〔六〕得匈奴積粟食軍。軍留一日而還，悉燒其城餘粟以歸。

〔一〕正義 言轉運之士及步兵接後又數十萬人。

〔二〕集解 孫吳兵法曰：「有巾有蓋，謂之武剛車也。」

〔三〕正義 三蒼解詁云：「紛拏，相牽也。」

〔四〕索隱 以言所殺傷大略相當。

〔五〕集解 徐廣曰：「遲，一作『黎』。」 索隱 上音值，待也。待天欲明，謂平明也。諸本多作「黎明」。鄒氏云「黎」，

遲也」。然黎，黑也，候天將明猶黑也。

〔正義〕遲音值。

〔六〕〔集解〕徐廣曰：「寘音田。」

大將軍之與單于會也，而前將軍廣、右將軍食其軍別從東道，或失道，後擊單于。大將軍引還過幕南，乃得前將軍、右將軍。大將軍欲使使歸報，令長史簿責前將軍廣，廣自殺。右將軍至，下吏贖爲庶人。大將軍軍人塞，凡斬捕首虜萬九千級。

是時匈奴衆失單于十餘日，右谷蠡〔一〕王聞之，自立爲單于。單于後得其衆，右王乃去單于之號。

〔一〕〔索隱〕上音祿，下音黎，又音離。

驃騎將軍亦將五萬騎，車重與大將軍軍等，而無裨將。悉以李敢等爲大校，當裨將，出代、右北平千餘里，直左方兵，所斬捕功已多大將軍。軍既還，天子曰：「驃騎將軍去病率師，躬將所獲葷粥之士，〔一〕約輕齎，絕大幕，涉獲章渠，〔二〕以誅比車者，〔三〕轉擊左大將，〔四〕斬獲旗鼓，歷涉離侯。〔五〕濟弓間，〔六〕獲屯頭王，〔七〕韓王等二人，〔八〕將軍、相國、當戶、都尉八十三人，封狼居胥山，禪於姑衍，〔九〕登臨翰海。〔一〇〕執鹵獲醜七萬有四百四十三級，師率減什三，取食於敵，連〔二〕行殊遠而糧不絕，以五千八百戶益封驃騎將軍。」右北平太守路博德屬驃騎將軍，會與城，〔三〕不失期，從至橐余〔三〕山，斬首捕虜二千七百級，以千

六百戶封博德爲符離侯。北地都尉邢山〔二〕從驃騎將軍獲王，以千二百戶封山爲義陽侯。故歸義因淳王復陸支、〔三〕樓專王〔四〕伊卽軒〔五〕皆從驃騎將軍有功，以千三百戶封復陸支爲壯侯，以千八百戶封伊卽軒爲衆利侯。從驃侯破奴、昌武侯安稽〔六〕從驃騎有功，益封各三百戶。校尉敢〔九〕得旗鼓，爲關內侯，食邑二百戶。校尉自爲〔三〕爵大庶長。軍吏卒爲官，賞賜甚多。而大將軍不得益封，軍吏卒皆無封侯者。

〔一〕集解 徐廣曰：「粥，一作『允』。」駟案：應劭曰「所降土有材力者」。

〔二〕集解 徐廣曰：「獲，一作『護』。」索隱 小顏云：「涉謂涉水也。章渠，單于之近臣，謂涉水而破獲之。」漢書云

「涉獲單于章渠」也。

〔三〕集解 晉灼曰：「王號也。」索隱 比，必耳反。

〔四〕索隱 案：漢書名雙。

〔五〕索隱 漢書作「度難侯」。小顏云「山名」。歷，度也。

〔六〕集解 晉灼曰：「水名也。」索隱 弓，包愷音穹，亦如字讀。

〔七〕集解 漢書音義曰：「胡王號也。」

〔八〕集解 徐廣曰：「王，一作『藉』。」索隱 按：漢書云「屯頭韓王等三人」。李奇曰「皆匈奴王號」。

〔九〕正義 積土爲壇於山上，封以祭天也。祭地曰禪。

〔一〇〕集解 張晏曰：「登海邊山以望海也。」索隱 按：崔浩云「北海名，羣鳥之所解羽，故云翰海」。廣異志云「在

沙漠北」。

〔二〕索隱音與「卓」同。卓，遠也。

〔三〕正義與音余。

〔三〕索隱音桃徒二音。

〔四〕集解徐廣曰：「一作『衛山』。」

〔五〕索隱復，劉氏音伏，小顏音福。

〔六〕索隱漢書作「朝」，並音專。小顏音之克反也。

〔七〕索隱九言反。

〔八〕集解徐廣曰：「姓趙，故匈奴王。」索隱故匈奴王，姓趙也。

〔九〕索隱李廣子也。

〔一〇〕索隱案：徐自馬也。

兩軍之出塞，塞閱官及私馬凡十四萬匹，而復入塞者不滿三萬匹。乃益置大司馬位，大將軍、驃騎將軍皆爲大司馬。〔一〕定令，令驃騎將軍秩祿與大將軍等。自是之後，大將軍青日退，而驃騎日益貴。舉大將軍故人門下多去事驃騎，輒得官爵，唯任安不肯。

〔一〕集解如淳曰：「大將軍、驃騎將軍皆有大司馬之號也。」索隱案：如淳云「本無大司馬，今新置耳」。案：前

謂太尉，其官又省，今武帝始置此位，衛將軍、霍驃騎皆加此官。

驃騎將軍爲人少言不泄，「一」有氣敢任。「二」天子嘗欲教之孫吳兵法，對曰：「顧方略何如耳，不至學古兵法。」天子爲治第，令驃騎視之，對曰：「匈奴未滅，無以家爲也。」由此上益重愛之。然少而侍中，貴，不省士。其從軍，天子爲遣太官齎數十乘，既還，重車餘棄梁肉，而士有飢者。其在塞外，卒乏糧，或不能自振，而驃騎尚穿域蹋鞠。「三」事多此類。大將軍爲人仁善退讓，以和柔自媚於上，然天下未有稱也。

〔一〕索隱案：孔文祥云「謂質重少言，膽氣在中也。」周仁「陰重不泄」，其行亦同也。

〔二〕索隱謂果敢任氣也。漢書作「往」，亦作「任」也。

〔三〕集解徐廣曰：「穿地爲營域。」索隱穿域蹙鞠。徐氏云「穿地爲營域」。蹙鞠書有域說篇，又以杖打，亦有限

域也。今之鞠戲，以皮爲之，中實以毛，蹙蹋爲戲。劉向別錄云「蹙鞠，兵勢，所以陳武事，知有材力也」。漢書作

「蹙鞠」。三倉云「鞠毛可蹙以爲戲」。鞠音巨六反。正義按：蹙鞠書有域說篇，即今之打毬也。黃帝所作，

起戰國時。程武士，知其材力也，若講武。

驃騎將軍自四年軍後三年，元狩六年而卒。天子悼之，發屬國玄甲「一」軍，陳自長安至茂陵，爲冢象祁連山。「二」謚之，并武與廣地曰景桓侯。「三」子嬪「四」代侯。嬪少，字子侯，上愛之，幸其壯而將之。居六歲，元封元年，嬪卒，謚哀侯。無子，絕國除。

〔一〕〔正義〕屬國卽上分置邊五郡者也。玄甲，鐵甲也。

〔二〕〔索隱〕案：崔浩云：「去病破昆邪於此山，故令爲冢象之以旌功也。」姚氏案：冢在茂陵東北，與衛青冢並。西者是青，東者是去病冢。上有豎石，前有石馬相對，又有石人也。

〔三〕〔集解〕蘇林曰：「景，武謚也；桓，廣地謚也。」張晏曰：「謚法『布義行剛曰景，闢土服遠曰桓。』」〔索隱〕案：景，桓，兩謚也。〔謚法〕「布義行剛曰景」，是武謚也；又曰「辟土服遠曰桓」，是廣地之謚也。以去病平生有武藝及廣邊地之功，故云「謚之并武與廣地曰景桓侯」。

〔四〕〔索隱〕音市戰反。

自驃騎將軍死後，大將軍長子宜春侯伉坐法失侯。後五歲，伉弟二人，陰安侯不疑及發干侯登皆坐酎金失侯。失侯後二歲，冠軍侯國除。其後四年，大將軍青卒，〔一〕謚爲烈侯。子伉代爲長平侯。

〔一〕〔集解〕徐廣曰：「元封五年。」

自大將軍圍單于之後，十四年而卒。竟不復擊匈奴者，以漢馬少，而方南誅兩越，東伐朝鮮，擊羌、西南夷，以故久不伐胡。

大將軍以其得尚平陽長公主〔二〕故，長平侯伉代侯。六歲，坐法失侯。

〔二〕〔正義〕漢書云：「平陽侯曹壽有惡疾，就國，乃詔青尚平陽公主。」如淳云：「本陽信長公主，爲平陽侯所尚，故稱平

陽公主云。」

左方兩大將軍及諸裨將名：

最〔一〕大將軍青，凡七出擊匈奴，斬捕首虜五萬餘級。一與單于戰，收河南地，遂置朔方郡，再益封，凡萬一千八百戶。封三子爲侯，侯千三百戶。并之，萬五千七百戶。其校尉裨將以從大將軍侯者九人。其裨將及校尉已爲將者十四人。〔二〕爲裨將者曰李廣，自有傳。無傳者曰：

〔一〕〔案隱〕謂凡計也。

〔二〕〔案隱〕案：漢書云「爲特將者十五人」，蓋通李廣也。此李廣一人自有傳，若漢書則七人自有傳，八人附見。七人謂李廣、張騫、公孫賀、李蔡、曹襄、韓說、蘇建也。

將軍公孫賀。賀，義渠人，〔一〕其先胡種。賀父渾邪，景帝時爲平曲侯，〔二〕坐法失侯。賀，武帝爲太子時舍人。武帝立八歲，以太僕爲輕車將軍，軍馬邑。後四歲，以輕車將軍出雲中。後五歲，以騎將軍從大將軍有功，封爲南窳侯。後一歲，以左將軍再從大將軍出定襄，無功。後四歲，以坐酎金失侯。後八歲，〔三〕以浮沮〔四〕將軍出五原二千餘里，無功。後八歲，〔五〕以太僕爲丞相，封葛繹侯。賀七爲將軍，出擊匈奴無大

功，而再侯，爲丞相。坐子敬聲與陽石公主姦，〔六〕爲巫蠱，族滅，無後。

〔一〕正義今慶州，本義渠戎國也。地理志云北義渠道也。

〔二〕集解徐廣曰：「爲隴西太守。」

〔三〕集解徐廣曰：「元鼎六年。」

〔四〕索隱沮音子餘反。

〔五〕集解徐廣曰：「太初二年。」

〔六〕集解徐廣曰：「陽石，一云『德邑』。」

將軍李息，郁郅人。〔一〕事景帝。至武帝立八歲，爲材官將軍，軍馬邑；後六歲，爲將軍，出代；後三歲，爲將軍，從大將軍出朔方，皆無功。凡三爲將軍，其後常爲大行。

〔一〕集解服虔曰：「郅音室。」索隱服虔音室，小顏音質。案：北地縣名也。〔正義〕之栗反。今慶州弘化縣是。

將軍公孫敖，義渠人。以郎事武帝。武帝立十二歲，爲（驃）騎將軍，出代，亡卒七千人，當斬，贖爲庶人。後五歲，以校尉從大將軍有功，封爲合騎侯。後一歲，以中將軍從大將軍，再出定襄，無功。後二歲，以將軍出北地，後驃騎期，當斬，贖爲庶人。後二歲，以校尉從大將軍，無功。後十四歲，以因杆〔一〕將軍築受降城。七歲，復以因杆將軍再出擊匈奴，至余吾，〔二〕亡士卒多，下吏當斬，詐死，亡居民閒五六歲。後發覺，復

繫。坐妻爲巫蠱，族。凡四爲將軍，出擊匈奴，一侯。

〔一〕索隱 音于。

〔三〕索隱 余音餘，又音徐。案：水名，在朔方。

將軍李沮，〔一〕雲中人。〔三〕事景帝。武帝立十七歲，以左內史爲彊弩將軍。後一歲，復爲彊弩將軍。

〔一〕索隱 音「俎豆」之「俎」。

〔三〕正義 今嵐、勝州也。

將軍李蔡，成紀人也。〔一〕事孝文帝、景帝、武帝。以輕車將軍從大將軍有功，封爲樂安侯。已爲丞相，坐法死。

〔一〕正義 秦州縣也。

將軍張次公，河車人。以校尉從衛將軍青有功，封爲岸頭侯。其後太后崩，爲將軍，軍北軍。後一歲，爲將軍，從大將軍，再爲將軍，坐法失侯。次公父隆，輕車武射也。以善射，景帝幸近之也。

將軍蘇建，杜陵人。以校尉從衛將軍青，有功，爲平陵侯，以將軍築朔方。後四歲，爲游擊將軍，從大將軍出朔方。後一歲，以右將軍再從大將軍出定襄，亡翕侯，失

軍，當斬，贖爲庶人。其後爲代郡太守，卒，冢在大猶鄉。

將軍趙信，以匈奴相國降，爲翕侯。武帝立十七歲，爲前將軍，與單于戰，敗，降匈奴。

將軍張騫，以使通大夏，還，爲校尉。從大將軍有功，封爲博望侯。後三歲，爲將軍，出右北平，失期，當斬，贖爲庶人。其後使通烏孫，爲大行而卒，冢在漢中。

將軍趙食其，殺裯人也。^{〔一〕}武帝立二十二歲，以主爵爲右將軍，從大將軍出定襄，迷失道，當斬，贖爲庶人。

〔一〕索隱縣名，在馮翊。役音都活反，又音丁外反。裯音詡。

〔正義〕上都誨反。雍州同官縣，本漢役裯縣也。

將軍曹襄，以平陽侯爲後將軍，從大將軍出定襄。襄，曹參孫也。

將軍韓說，弓高侯庶孫也。以校尉從大將軍有功，爲龍額侯，坐酎金失侯。元鼎六年，以待詔爲橫海將軍，擊東越有功，爲按道侯。以太初三年爲游擊將軍，屯於五原外列城。爲光祿勳，掘壘太子宮，衛太子殺之。

將軍郭昌，雲中人也。以校尉從大將軍。元封四年，以太中大夫爲拔胡將軍，屯朔方。還擊昆明，毋功，奪印。

將軍荀彘，太原廣武人。以御見，^{〔一〕}侍中，爲校尉，數從大將軍。以元封三年爲

左將軍擊朝鮮，毋功。以捕樓船將軍坐法死。

〔一〕正義以善御求見也。

最驃騎將軍去病，凡六出擊匈奴，其四出以將軍，〔一〕斬捕首虜十一萬餘級。及渾邪王以衆降數萬，遂開河西酒泉之地，〔二〕西方益少胡寇。四益封，凡萬五千一百戶。其校吏有功爲侯者凡六人，而後爲將軍二人。

〔一〕集解徐廣曰：「再出以剽姚校尉也。」

〔二〕正義河謂隴右蘭州之西河也。〔酒泉〕謂涼、肅等州。漢書西域傳云驃騎將軍擊破匈奴右地，置酒泉郡，後分

置武威、張掖、燉煌等郡。

將軍路博德，平州人。〔一〕以右北平太守從驃騎將軍有功，爲符離侯。驃騎死後，博德以衛尉爲伏波將軍，伐破南越，益封。其後坐法失侯。爲彊弩都尉，屯居延，卒。

〔一〕正義漢書云西河平州。按：西河郡今汾州。

將軍趙破奴，故九原人。〔一〕嘗亡入匈奴，已而歸漢，爲驃騎將軍司馬。出北地時有功，封爲從驃侯。坐酎金失侯。後一歲，爲匈奴將軍，攻胡至匈奴水，無功。後二歲，〔二〕擊虜樓蘭王，復封爲浞野侯。後六歲，〔三〕爲浚稽將軍，將二萬騎擊匈奴左賢

王，左賢王與戰，兵八萬騎圍破奴，破奴生爲虜所得，遂沒其軍。居匈奴中十歲，復與其太子安國亡入漢。^{〔四〕}後坐巫蠱，族。

〔一〕正義 今勝州。

〔二〕集解 徐廣曰：「元封二年。」

〔三〕集解 徐廣曰：「太初二年。」

〔四〕集解 徐廣曰：「以太初二年入匈奴，天漢元年亡歸，涉四年。」

自衛氏興，大將軍青首封，其後枝屬爲五侯。凡二十四歲而五侯盡奪，衛氏無爲侯者。

太史公曰：蘇建語余曰：「吾嘗責大將軍至尊重，而天下之賢大夫毋稱焉，^{〔一〕}願將軍觀古名將所招選擇賢者，勉之哉。大將軍謝曰：『自魏其、武安之厚賓客，天子常切齒。彼親附士大夫，招賢絀不肖者，人主之柄也。人臣奉法遵職而已，何與^{〔二〕}招士！』驃騎亦放此意，其爲將如此。」

〔一〕索隱 謂不爲賢士大夫所稱譽。

〔三〕索隱音預。

【索隱述贊】君子豹變，貴賤何常。青本奴虜，忽升戎行。姊配皇極，身尚平陽。寵榮斯僭，取亂彝章。標姚繼踵，再靜邊方。

史記卷一百一十二

平津侯主父列傳第五十二

丞相公孫弘者，齊菑川國薛縣人也，〔一〕字季。少時爲薛獄吏，有臯，免。家貧，牧豕海上。年四十餘，乃學春秋雜說。養後母孝謹。

〔一〕〔索隱〕案：薛縣屬魯國，漢置菑川國，後割入齊也。

〔正義〕表云菑川國，文帝分齊置，都劇。括地志云：「故劇

城在青州壽光縣南三十一里。故薛城在徐州滕縣界。地理志云薛縣屬魯國。」按：薛與劇隔兗州及太山，未詳。

公孫弘墓又在青州北魯縣西二十里也。

建元元年，天子初卽位，招賢良文學之士。是時弘年六十，徵以賢良爲博士。使匈奴，還報，不合上意，上怒，以爲不能，弘迺病免歸。

元光五年，有詔徵文學，菑川國復推上公孫弘。弘讓謝國人曰：「臣已嘗西應命，以不能罷歸，願更推選。」國人固推弘，弘至太常。太常令所徵儒士各對策，百餘人，弘第居下。策奏，天子擢弘對爲第一。召入見，狀貌甚麗，拜爲博士。是時通西南夷道，置郡，巴蜀民

苦之，詔使弘視之。還奏事，盛毀西南夷無所用，上不聽。

弘爲人恢奇多聞，常稱以爲人主病不廣大，人臣病不儉節。弘爲布被，食不重肉。後母死，服喪三年。每朝會議，開陳其端，令人主自擇，不肯面折庭爭。於是天子察其行敦厚，辯論有餘，習文法吏事，而又緣飾以儒術，〔一〕上大說之。二歲中，〔二〕至左內史。弘奏事，有不可，不庭辯之。嘗與主爵都尉汲黯請閒，汲黯先發之，弘推其後，天子常說，所言皆聽，以此日益親貴。嘗與公卿約議，至上前，皆倍其約以順上旨。汲黯庭詰弘曰：「齊人多詐而無情實，始與臣等建此議，今皆倍之，不忠。」上問弘。弘謝曰：「夫知臣者以臣爲忠，不知臣者以臣爲不忠。」上然弘言。左右幸臣每毀弘，上益厚遇之。

〔一〕〔索隱〕謂以儒術飾文法，如衣服之有領緣以爲飾也。

〔二〕〔集解〕徐廣曰：「一云一歲。」

元朔三年，張敖免，以弘爲御史大夫。是時通西南夷，東置滄海，北築朔方之郡。弘數諫，以爲罷敝中國以奉無用之地，願罷之。於是天子乃使朱買臣等難弘置朔方之便。發十策，弘不得一。〔一〕弘迺謝曰：「山東鄙人，不知其便若是，願罷西南夷、滄海而專奉朔方。」上乃許之。

〔一〕〔集解〕韋昭曰：「以弘之才，非不能得一也，以爲不可，不敢逆上耳。」

〔索隱〕按：韋昭以弘之才非不能得一，以

爲不可，不敢逆上故耳。

〔正義〕顏師古曰：「言其利害十條，弘無以應。」

汲黯曰：「弘位在三公，奉祿甚多，然爲布被，此詐也。」上問弘。弘謝曰：「有之。夫九卿與臣善者無過黯，然今日庭詰弘，誠中弘之病。夫以三公爲布被，誠飾詐欲以釣名。且臣聞管仲相齊，有三歸，侈擬於君，桓公以霸，亦上僭於君。晏嬰相景公，食不重肉，妾不衣絲，齊國亦治，此下比於民。」〔一〕今臣弘位爲御史大夫，而爲布被，自九卿以下至於小吏，無差，誠如汲黯言。且無汲黯忠，陛下安得聞此言。」天子以爲謙讓，愈益厚之。卒以弘爲丞相，封平津侯。〔二〕

〔一〕〔索隱〕比音鼻。比者，近也。小顏音「比方」之「比」。

〔二〕〔集解〕徐廣曰：「大臣表曰元朔五年十一月乙丑，公孫弘爲丞相。功臣表曰元朔〔三〕〔五〕年十一月乙丑，封平津侯。」駟案漢書，高成之平津鄉也。〔索隱〕案漢書曰：「漢興，皆以列侯爲丞相，弘本無爵，乃詔封弘高成之平津鄉六百五十戶爲平津侯。丞相封侯，自弘始也。」

弘爲人意忌，外寬內深。〔一〕諸嘗與弘有卻者，雖詳與善，陰報其禍。殺主父偃，徙董仲舒於膠西，皆弘之力也。食一肉脫粟之飯。〔二〕故人所善賓客，仰衣食，弘奉祿皆以給之，家無所餘。士亦以此賢之。

〔一〕索隱謂弘外寬內深，意多有忌害也。

〔三〕索隱案：一肉，言不兼味也。脫粟，纔脫穀而已，言不精鑿也。

淮南、衡山謀反，治黨與方急。弘病甚，自以爲無功而封，位至丞相，宜佐明主填撫國家，使人由臣子之道。今諸侯有畔逆之計，此皆宰相奉職不稱，恐竊病死，〔一〕無以塞責。乃上書曰：「臣聞天下之通道五，所以行之者三。〔二〕曰君臣，父子，兄弟，夫婦，長幼之序，此五者天下之通道也。智，仁，勇，此三者天下之通德，所以行之者也。故曰『力行近乎仁，好問近乎智，知恥近乎勇』。知此三者，則知所以自治，知所以自治，然後知所以治人。天下未有不能自治而能治人者也，此百世不易之道也。今陛下躬行大孝，鑒三王，建周道，兼文武，厲賢予祿，〔三〕量能授官。今臣弘罷駑之質，無汗馬之勞，陛下過意擢臣弘卒伍之中，封爲列侯，致位三公。臣弘行能不足以稱，素有負薪之病，恐先狗馬填溝壑，終無以報德塞責。願歸侯印，乞骸骨，避賢者路。」天子報曰：「古者賞有功，褒有德，守成尚文，遭遇右武，〔四〕未有易此者也。朕宿昔庶幾獲承尊位，懼不能寧，惟所與共爲治者，君宜知之。蓋君子善善惡惡，〔五〕君若謹行，常在朕躬。君不幸罹霜露之病，何恙不已，〔六〕迺上書歸侯，乞骸骨，是章朕之不德也。今事少閒，君其省思慮，一精神，輔以醫藥。」因賜告牛酒雜帛。居數月，病有瘳，視事。

〔一〕索隱案：人臣委質於君，死生由君。今若一朝病死，是竊死也。

〔二〕索隱案：此語出子思子，今見禮記中庸篇。

〔三〕集解徐廣曰：「厲，一作『廣』也。」

〔四〕索隱小顏云：「右亦上也。言遭遇亂時則上武也。」

〔五〕集解漢書音義曰：「何恙，喻小疾不以時愈。」索隱恙，憂也。言羅霜露寒涼之疾，輕，何憂於病不止。禮曰「疾止復初」也。

元狩二年，弘病，竟以丞相終。〔一〕子度嗣爲平津侯。度爲山陽太守十餘歲，坐法失侯。〔二〕

〔一〕集解漢書曰：「年八十。」

索隱漢書云凡爲御史、丞相六歲，年八十終。

〔二〕索隱漢書云坐不遣鉅野令史成詣公車，論爲城旦。元始中詔復弘後爲關內侯也。

主父偃者，齊臨菑人也。學長短縱橫之術，晚乃學易、春秋、百家言。游齊諸生間，莫能厚遇也。齊諸儒生相與排擯，不容於齊。家貧，假貸無所得，迺北游燕、趙、中山，皆莫能厚遇，爲客甚困。孝武元光元年中，以爲諸侯莫足游者，乃西入關見衛將軍。衛將軍數言上，上不召。資用乏，留久，諸公賓客多厭之，乃上書闕下。朝奏，暮召入見。所言九事，其

八事爲律令，一事諫伐匈奴。其辭曰：

臣聞明主不惡切諫以博觀，忠臣不敢避重誅以直諫，是故事無遺策而功流萬世。今臣不敢隱忠避死以效愚計，願陛下幸赦而少察之。

司馬法曰：「國雖大，好戰必亡；天下雖平，忘戰必危。」天下既平，天子大凱，〔一〕春蒐秋獮，諸侯春振旅，秋治兵，所以不忘戰也。〔二〕且夫怒者逆德也，兵者凶器也，爭者末節也。古之人君一怒必伏尸流血，故聖王重行之。夫務戰勝窮武事者，未有不悔者也。昔秦皇帝任戰勝之威，蠶食天下，并吞戰國，海內爲一，功齊三代。務勝不休，欲攻匈奴，李斯諫曰：「不可。夫匈奴無城郭之居，委積之守，遷徙鳥舉，難得而制也。輕兵深入，糧食必絕；踵糧以行，重不及事。得其地不足以爲利也，遇其民不可役而守也。勝必殺之，非民父母也。靡弊〔三〕中國，快心匈奴，非長策也。」秦皇帝不聽，遂使蒙恬將兵攻胡，辟地千里，以河爲境。地固澤〔鹹〕鹵，〔四〕不生五穀。然後發天下丁男以守北河。暴兵露師十有餘年，死者不可勝數，終不能踰河而北。是豈人衆不足，兵革不備哉？其勢不可也。又使天下蜚芻輓粟，〔五〕起於黃、腫、〔六〕琅邪負海之郡，轉輸北河，率三十鍾而致一石。男子疾耕不足於糧饌，女子紡績不足於帷幕。百姓靡敝，孤寡老弱不能相養，道路死者相望，蓋天下始畔秦也。

〔一〕集解應劭曰：「大凱，周禮還師振旅之樂。」

〔二〕集解宋均曰：「春秋少陽少陰，氣弱未全，須人功而後用，士庶法之，教而後成，宗仁本義。天子諸侯必春秋講武，簡閱車徒，以順時氣，不忘戰也。」索隱按：宋均云「宗本仁義，助少陰少陽之氣，因而教以簡閱車徒。」

〔三〕索隱靡音糜。弊猶凋敝也。

〔四〕集解徐廣曰：「澤，一作『斥』。」瓚曰：「其地多水澤，又有鹵。」

〔五〕集解文穎曰：「轉芻穀就戰是也。」

〔六〕集解徐廣曰：「睡在東萊，音縋。」索隱縣名，在東萊，音逐瑞反，注音縋。

及至高皇帝定天下，略地於邊，聞匈奴聚於代谷之外而欲擊之。御史成進諫曰：「不可。夫匈奴之性，獸聚而鳥散，從之知搏影。今以陛下盛德攻匈奴，臣竊危之。」高帝不聽，遂北至於代谷，果有平城之圍。高皇帝蓋悔之甚，乃使劉敬往結和親之約，然後天下忘干戈之事。故兵法曰「興師十萬，日費千金」。夫秦常積衆暴兵數十萬人，雖有覆軍殺將係虜單于之功，亦適足以結怨深讎，不足以償天下之費。夫上虛府庫，下敝百姓，甘心於外國，非完事也。夫匈奴難得而制，非一世也。行盜侵驅，所以爲業也，天性固然。上及虞夏殷周，固弗程督，禽獸畜之，不屬爲人。夫上不觀虞夏殷周之統，而下（脩）〔循〕近世之失，此臣之所大憂，百姓之所疾苦也。且夫兵久則變生，事苦則慮易。乃使邊境之民弊靡愁苦而有離心，將吏相疑而外市，〔一〕故尉佗、章邯得以成

其私也。夫秦政之所以不行者，權分乎二子，此得失之效也。故周書曰「安危在出令，存亡在所用」。願陛下詳察之，少加意而熟慮焉。

〔一〕集解張晏曰：「與外國交求利己，若章邯之比。」

是時趙人徐樂、〔一〕齊人嚴安〔二〕俱上書言世務，各一事。徐樂曰：

〔一〕索隱樂音岳。

〔二〕索隱按：本姓莊，避明帝諱，後並改「嚴」也。安及徐樂並拜郎中。樂後爲中大夫。

臣聞天下之患在於土崩，不在於瓦解，古今一也。何謂土崩？秦之末世是也。陳涉無千乘之尊，尺土之地，身非王公大人名族之後，無鄉曲之譽，非有孔墨、曾子之賢，陶朱、猗頓之富也，然起窮巷，奮棘矜，〔一〕偏袒大呼而天下從風，此其故何也？由民困而主不恤，下怨而上不知（也），俗已亂而政不脩，此三者陳涉之所以爲資也。是之謂土崩。故曰天下之患在於土崩。何謂瓦解？吳、楚、齊、趙之兵是也。七國謀爲大逆，號皆稱萬乘之君，帶甲數十萬，威足以嚴其境內，財足以勸其士民，然不能西攘尺寸之地而身爲禽於中原者，此其故何也？非權輕於匹夫而兵弱於陳涉也，當是之時，先帝之德澤未衰而安土樂俗之民衆，故諸侯無境外之助。此之謂瓦解，故曰天下之患不在瓦解。由是觀之，天下誠有土崩之勢，雖布衣窮處之士或首惡而危海內，陳

涉是也。況三晉之君或存乎！天下雖未有大治也，誠能無土崩之勢，雖有彊國勁兵不得旋踵而身爲禽矣，吳、楚、齊、趙是也。況羣臣百姓能爲亂乎哉！此二體者，安危之明要也，賢主所留意而深察也。

〔一〕集解 矜音勤。

索隱 下音勤。矜，今戟柄。棘，戟也。

閒者關東五穀不登，年歲未復，民多窮困，重之以邊境之事，推數循理而觀之，則民且有不安其處者矣。不安故易動。易動者，土崩之勢也。故賢主獨觀萬化之原，明於安危之機，脩之廟堂之上，而銷未形之患。其要，期使天下無土崩之勢而已矣。故雖有彊國勁兵，陛下逐走獸，射蜚鳥，弘游燕之囿，淫縱恣之觀，極馳騁之樂，自若也。金石絲竹之聲不絕於耳，帷帳之私俳優侏儒之笑不乏於前，而天下無宿憂。名何必湯武，俗何必成康！雖然，臣竊以爲陛下天然之聖，寬仁之資，而誠以天下爲務，則湯武之名不難侔，而成康之俗可復興也。此二體者立，然後處尊安之實，揚名廣譽於當世，親天下而服四夷，餘恩遺德爲數世隆，南面負宸攝袂而揖王公，此陛下之所服也。臣聞圖王不成，其敝足以安。安則陛下何求而不得，何爲而不成，何征而不服乎哉！
嚴安上書曰：

臣聞周有天下，其治三百餘歲，成康其隆也，刑錯四十餘年而不用。及其衰也，亦

三百餘歲，故五伯更起。五伯者，常佐天子興利除害，誅暴禁邪，匡正海內，以尊天子。五伯既沒，賢聖莫續，天子孤弱，號令不行。諸侯恣行，疆陵弱，衆暴寡，田常篡齊，六卿分晉，並爲戰國，此民之始苦也。於是疆國務攻，弱國備守，合從連橫，馳車擊轂，介胄生蟣蝨，民無所告愬。

及至秦王，蠶食天下，并吞戰國，稱號曰皇帝，主海內之政，壞諸侯之城，銷其兵，鑄以爲鍾虡，「一」示不復用。元元黎民得免於戰國，逢明天子，人人自以爲更生。嚮使秦緩其刑罰，薄賦斂，省繇役，貴仁義，賤權利，上篤厚，「二」下智巧，「三」變風易俗，化於海內，則世世必安矣。秦不行是風而「脩」「循」其故俗，爲智巧權利者進，篤厚忠信者退，法嚴政峻，諂諛者衆，日聞其美，意廣心軼。欲肆威海外，乃使蒙恬將兵以北攻胡，辟地進境，戍於北河，蜚芻輓粟以隨其後。又使尉「佗」屠睢「四」將樓船之士南攻百越，使監祿「五」鑿渠運糧，深入越，越人遁逃。曠日持久，糧食絕乏，越人擊之，秦兵大敗。秦乃使尉佗將卒以戍越。當是時，秦禍北構於胡，南挂於越，宿兵無用之地，進而不得退。行十餘年，丁男被甲，丁女轉輸，苦不聊生，自經於道樹，死者相望。及秦皇帝崩，天下大叛。陳勝、吳廣舉陳，「六」武臣、張耳舉趙，項梁舉吳，田儋舉齊，景駒舉郢，周市舉魏，韓廣舉燕，窮山通谷豪士並起，不可勝載也。然皆非公侯之後，非長官

之吏也。無尺寸之勢，起閭巷，杖棘矜，應時而皆動，不謀而俱起，不約而同會，壤長地進，〔七〕至于霸王，時教使然也。秦貴爲天子，富有天下，滅世絕祀者，窮兵之禍也。故周失之弱，秦失之彊，不變之患也。

〔一〕索隱 下音巨。鄒氏本作「錄」，音同。

〔二〕索隱 上猶尚也，貴也。

〔三〕索隱 謂智巧爲下也。

〔四〕索隱 案：尉，官也。他，趙他也，音徒何反。屠睢，人姓名。睢音雖。

〔五〕集解 韋昭曰：「監御史名祿也。」

〔六〕索隱 謂勝、廣舉兵於陳。舉音如字。或音據，恐疎也。下同。

〔七〕集解 張晏曰：「長，進益也。」

今欲招南夷，朝夜郎，降羌僰，〔一〕略濊州，〔二〕建城邑，深入匈奴，燔其龍城，〔三〕議者美之。此人臣之利也，非天下之長策也。今中國無狗吠之驚，而外累於遠方之備，靡敝國家，非所以子民也。行無窮之欲，甘心快意，結怨於匈奴，非所以安邊也。禍結而不解，兵休而復起，近者愁苦，遠者驚駭，非所以持久也。今天下鍛甲砥劍，橋箭累弦，轉輸運糧，未見休時，此天下之所共憂也。夫兵久而變起，事煩而慮生。今外郡之

地或幾千里，列城數十，形束壤制，〔四〕旁脅諸侯，非公室之利也。上觀齊晉之所以亡者，公室卑削，六卿大盛也；下觀秦之所以滅者，嚴法刻深，欲大無窮也。今郡守之權，非特六卿之重也；地幾千里，非特閭巷之資也；甲兵器械，非特棘矜之用也；以遭萬世之變，則不可稱諱也。

〔一〕〔索隱〕熨，白北反，又皮逼反。

〔三〕〔集解〕如淳曰：「東夷也。」〔索隱〕濊州，地名，卽古濊貊國也。音紆廢反。

〔三〕〔索隱〕匈奴城名，音龍。燔音煩。燔，燒也。

〔四〕〔集解〕服虔曰：「言所束在郡守，土壤足以專民制。」蘇林曰：「言其土地形勢足以束制其民也。」〔索隱〕案：謂地形及土壤皆束制在諸侯也。

書奏天子，天子召見三人，謂曰：「公等皆安在？何相見之晚也！」〔一〕於是上乃拜主父偃、徐樂、嚴安爲郎中。〔偃〕數見，上疏言事，詔拜偃爲謁者，遷〔樂〕爲中大夫。一歲中四遷偃。

〔一〕〔集解〕徐廣曰：「它史記本皆不見嚴安，此旁所纂者，皆取漢書耳。然漢書不宜乃容大異，或寫史記相承闕脫也。」〔索隱〕纂音撰。

偃說上曰：「古者諸侯不過百里，疆弱之形易制。今諸侯或連城數十，地方千里，緩則驕奢易爲淫亂，急則阻其疆而合從以逆京師。今以法割削之，則逆節萌起，前日鼂錯是也。今諸侯子弟或十數，而適嗣代立，餘雖骨肉，無尺寸地封，則仁孝之道不宣。願陛下令諸侯得推恩分子弟，以地侯之。彼人人喜得所願，上以德施，實分其國，不削而稍弱矣。」於是上從其計。「一」又說上曰：「茂陵初立，天下豪桀并兼之家，亂衆之民，皆可徙茂陵，內實京師，外銷姦猾，此所謂不誅而害除。」上又從其計。

〔一〕〔集解〕徐廣曰：「元朔二年，始令諸侯王分封子弟也。」

尊立衛皇后，及發燕王定國陰事，蓋偃有功焉。大臣皆畏其口，賂遺累千金。人或說偃曰：「太橫矣。」主父曰：「臣結髮游學四十餘年，身不得遂，親不以爲子，昆弟不收，賓客弃我，我阨日久矣。且丈夫生不五鼎食，死卽五鼎烹耳。吾日暮途遠，故倒行暴施之。」〔二〕

〔一〕〔索隱〕按：偃言吾日暮途遠，恐赴前途不跌，故須倒行而逆施，乃可及耳。今此本作「暴」。暴者，言已困久得申，須急暴行事以快意也。暴者，卒也，急也。

偃盛言朔方地肥饒，外阻河，蒙恬城之以逐匈奴，內省轉輸戍漕，廣中國，滅胡之本也。上覽其說，下公卿議，皆言不便。公孫弘曰：「秦時常發三十萬衆築北河，終不可就，已而弃

之。」主父偃盛言其便，上竟用主父計，立朔方郡。

元朔二年，主父言齊王內淫佚行僻，上拜主父爲齊相。至齊，遍召昆弟賓客，散五百金予之，數之曰：「始吾貧時，昆弟不我衣食，賓客不我內門；今吾相齊，諸君迎我或千里。吾與諸君絕矣，毋復入偃之門！」乃使人以王與姊姦事動王，王以爲終不得脫罪，恐效燕王論死，乃自殺。有司以聞。

主父始爲布衣時，嘗游燕、趙，及其貴，發燕事。趙王恐其爲國患，欲上書言其陰事，爲偃居中，不敢發。及爲齊相，出關，卽使人上書，告言主父偃受諸侯金，以故諸侯子弟多以得封者。及齊王自殺，上聞大怒，以爲主父劫其王令自殺，乃徵下吏治。主父服受諸侯金，實不劫王令自殺。上欲勿誅，是時公孫弘爲御史大夫，乃言曰：「齊王自殺無後，國除爲郡，入漢，主父偃本首惡，陛下不誅主父偃，無以謝天下。」乃遂族主父偃。

主父方貴幸時，賓客以千數，及其族死，無一人收者，唯獨涑孔車「」收葬之。天子後聞之，以爲孔車長者也。

〔一〕集解徐廣曰：「孔車，涑人也。沛有涑縣。」
〔索隱〕涑，戶交反。按：縣名，在沛。車，尺奢反。

太史公曰：公孫弘行義雖脩，然亦遇時。漢興八十餘年矣，「一」上方鄉文學，招俊乂，以廣儒墨，弘爲舉首。主父偃當路，諸公皆譽之，及名敗身誅，士爭言其惡。悲夫！

「一」〔集解〕徐廣曰：「漢初至元朔二年八十年也。」

太皇太后詔大司徒大司空：「一」蓋聞治國之道，富民爲始；富民之要，在於節儉。孝經曰『安上治民，莫善於禮』。禮，與奢也寧儉。昔者管仲相齊桓，霸諸侯，有九合一匡之功，而仲尼謂之不知禮，以其奢泰侈擬於君故也。夏禹卑宮室，惡衣服，後聖不循。由此言之，治之盛也，德優矣，莫高於儉。儉化俗民，則尊卑之序得，而骨肉之恩親，爭訟之原息。斯乃家給人足，刑錯之本也歟？可不務哉！夫三公者，百寮之率，萬民之表也。未有樹直表而得曲影者也。孔子不云乎，『子率而正，孰敢不正』。『舉善而教不能則勸』。維漢興以來，股肱宰臣身行儉約，輕財重義，較然著明，「二」未有若故丞相平津侯公孫弘者也。位在丞相而爲布被，脫粟之飯，不過一肉。故人所善賓客皆分奉祿以給之，無有所餘。誠內自克約而外從制。汲黯詰之，乃聞于朝，此可謂減於制度「三」而可施行者也。德優則行，否則止，與內奢泰而外爲詭服以釣虛譽者殊科。

以病乞骸骨，孝武皇帝卽制曰『賞有功，褒有德，善善惡惡，君宜知之。其省思慮，存精神，輔以醫藥』。賜告治病，牛酒雜帛。居數月，有瘳，視事。至元狩二年，竟以善終于相位。夫知臣莫若君，此其效也。弘子度嗣爵，後爲山陽太守，坐法失侯。夫表德章義，所以率俗厲化，聖王之制，不易之道也。其賜弘後子孫之次當爲後者爵關內侯，食邑三百戶，徵詣公車，上名尚書，朕親臨拜焉。」

〔一〕集解 徐廣曰：「此詔是平帝元始中王元后詔，後人寫此及班固所稱，以續卷後。」

〔索隱〕按：徐廣云「此是平

帝元始中詔，以續卷後」，則又非褚先生所錄也。

〔二〕索隱 較音角。較，明也。

〔三〕集解 應劭曰：「禮，貴有常尊，衣服有常品。」

班固稱曰：公孫弘、卜式、兒寬皆以鴻漸之翼困於燕雀，〔一〕遠迹羊豕之間，〔二〕非遇其時，焉能致此位乎？是時漢興六十餘載，海內乂安，〔三〕府庫充實，而四夷未賓，制度多闕，上方欲用文武，求之如弗及。始以蒲輪迎枚生，〔四〕見主父而歎息。〔五〕羣臣慕嚮，異人並出。卜式試於芻牧，弘羊擢於賈豎，衛青奮於奴僕，日磧出於降虜，斯亦曩時版築飯牛之朋矣。漢之得人，於茲爲盛。儒雅則公孫弘、董仲舒、兒寬，篤行則石建、

石慶，質直則汲黯、卜式，推賢則韓安國、鄭當時，定令則趙禹、張湯，文章則司馬遷、相如，滑稽則東方朔、枚皋，應對則嚴助、朱買臣，曆數則唐都、落下閎，協律則李延年，運籌則桑弘羊，奉使則張騫、蘇武，將帥則衛青、霍去病，受遺則霍光、金日磾。其餘不可勝紀。是以興造功業，制度遺文，後世莫及。孝宣承統，纂脩洪業，亦講論六藝，招選茂異，而蕭望之、梁丘賀、夏侯勝、韋玄成、嚴彭祖、尹更始以儒術進，劉向、王褒以文章顯。將相則張安世、趙充國、魏相、邴吉、于定國、杜延年，治民則黃霸、王成、龔遂、鄭弘、邵信臣、韓延壽、尹翁歸、趙廣漢之屬，皆有功迹見述於後。累其名臣，亦其次也。

〔一〕集解 李奇曰：「漸，進也。鴻一舉而進千里者，羽翼之材也。弘等皆以大材，初爲俗所薄，若燕雀不知鴻鵠之志也。」索隱 按：謂公孫弘等未遇，爲時所輕，若飛鴻之未漸，受困於燕雀也。是燕雀安知鴻鵠之志也？

〔二〕集解 韋昭曰：「遠迹謂耕牧在於遠方。」索隱 案：公孫弘牧豕，卜式牧羊也。

〔三〕索隱 又，理也。

〔四〕索隱 案：謂枚乘也。漢始迎申公，亦以蒲輪。謂以蒲裹車輪，恐傷草木也。且蒲是草之美者，故禮有「蒲璧」，蓋畫蒲於輪以爲榮飾也。

〔五〕索隱 案：上文嚴安等上書，上曰「公等安在，何相見之晚」是也。

【索隱述贊】平津巨儒，晚年始遇。外示寬儉，內懷嫉妒。寵備榮爵，身受肺腑。主父推恩，觀時設度。生食五鼎，死非時蠹。

史記卷一百一十三

南越列傳第五十三

南越王〔一〕尉佗者，〔二〕真定人也，〔三〕姓趙氏。秦時已并天下，略定楊越，〔四〕置桂林、〔五〕南海、象郡，〔六〕以謫〔七〕徙民，與越雜處十三歲。〔八〕佗，秦時用爲南海龍川令。〔九〕至二世時，南海尉〔一〇〕任囂〔一一〕病且死，召龍川令趙佗語曰：「聞陳勝等作亂，秦爲無道，天下苦之，項羽、劉季、陳勝、吳廣等州郡各共興軍聚衆，虎爭天下，中國擾亂，未知所安，豪傑畔秦相立。南海僻遠，吾恐盜兵侵地至此，吾欲興兵絕新道，〔一二〕自備，待諸侯變，會病甚。且番禺負山險，阻南海，東西數千里，頗有中國人相輔，此亦一州之主也，可以立國。郡中長吏無足與言者，故召公告之。」卽被佗書，〔一三〕行南海尉事。〔一四〕囂死，佗卽移檄告橫浦、〔一五〕陽山、〔一六〕湟谿〔一七〕關曰：「盜兵且至，急絕道聚兵自守！」因稍以法誅秦所置長吏，以其黨爲假守。〔一八〕秦已破滅，佗卽擊并桂林、象郡，自立爲南越武王。〔一九〕高帝已定天下，爲中國勞苦，故釋佗弗誅。漢十一年，遣陸賈因立佗爲南越王，與剖符通使，和集百越，毋爲南邊患。

害，與長沙接境。

〔一〕正義 都廣州南海縣。

〔二〕索隱 尉他。尉，官也；他，名也；姓趙。他音徒河反。又十三州記云「大郡曰守，小郡曰尉」。

〔三〕索隱 韋昭曰：「故郡名，後更爲縣，在常山。」

〔四〕集解 張晏曰：「楊州之南越也。」索隱 案：戰國策云吳起爲楚收楊越。正義 夏禹九州本屬楊州，故云

楊越。

〔五〕索隱 按：地理志武帝更名鬱林。

〔六〕索隱 案：本紀始皇二十三年略陸梁地，以爲南海、桂林、象郡。地理志云「武帝更名曰南」。

〔七〕索隱 音直革反。

〔八〕集解 徐廣曰：「秦并天下，至二世元年十三年。并天下八歲，乃平越地，至二世元年六年耳。」

〔九〕索隱 地理志縣名，屬南海也。正義 顏師古云：「龍川南海縣也，卽今之循州也。」裴氏廣州記云：「本博羅縣

之東鄉，有龍穿地而出，卽穴流泉，因以爲號也。」

〔一〇〕集解 徐廣曰：「爾時未言都尉也。」

〔一一〕索隱 五刀反。

〔一二〕索隱 案：蘇林云「秦所通越道」。

〔一三〕集解 韋昭曰：「被之以書。音『光被』之『被』。」索隱 韋昭云「被之以書」，音皮義反。

〔一四〕索隱 服虔云：「囂詐作詔書，使爲南海尉。」

〔一五〕索隱案：南康記云「南野縣大庾嶺三十里至橫浦，有秦時關，其下謂爲『塞上』」。

〔一六〕索隱姚氏案：地理志云揭陽有陽山縣。今此縣上流百餘里有騎田嶺，當是陽山關。

〔一七〕集解徐廣曰：「在桂陽，通四會也。」索隱涅谿。鄒氏、劉氏本並作「涅」，音年結反。漢書作「涅谿」，音皇。

又（衛青傳）「南粵傳」云「出桂陽，下湟水」是也。而姚察云史記作「涅」，今本作「湟」，涅及湟不同，良由隨聞則輒改故也。水經云含匯縣南有匯浦關，未知孰是。然鄒誕作「涅」，漢書作「湟」，蓋近於古。

〔一八〕索隱案：謂他立其所親黨爲郡縣之職或假守。

〔一九〕集解韋昭曰：「生以『武』爲號，不稽於古也。」

高后時，有司請禁南越關市鐵器。佗曰：「高帝立我，通使物，今高后聽讒臣，別異蠻夷，隔絕器物，此必長沙王計也，欲倚中國，擊滅南越而并王之，自爲功也。」於是佗乃自尊號爲南越武帝，發兵攻長沙邊邑，敗數縣而去焉。高后遣將軍隆慮侯竈〔一〕往擊之。會暑溼，士卒大疫，兵不能踰嶺。〔二〕歲餘，高后崩，卽罷兵。佗因此以兵威邊，財物賂遺閩越、西甌、駱，役屬焉。〔三〕東西萬餘里。迺乘黃屋左纛，稱制，與中國侔。

〔一〕索隱韋昭云：「姓周。隆慮，縣名，屬河內。音林閭二音。」

〔二〕索隱案：此嶺卽陽山嶺。

〔三〕集解漢書音義曰：「駱越也。」索隱鄒氏云「又有駱越」。姚氏案：廣州記云「交趾有駱田，仰潮水上下，人

食其田，名爲『駱人』。有駱王、駱侯。諸縣自名爲『駱將』，銅印青綬，卽今之令長也。後蜀王子將兵討駱侯，自

稱爲安陽王，治封溪縣。後南越王尉他攻破安陽王，令二使典主交趾、九真二郡人」。尋此駱卽甌駱也。

及孝文帝元年，初鎮撫天下，使告諸侯四夷從代來卽位意，喻盛德焉。乃爲佗親冢在真定，置守邑，歲時奉祀。召其從昆弟，尊官厚賜寵之。詔丞相陳平等舉可使南越者，平言好時陸賈，先帝時習使南越。迺召賈以爲太中大夫，往使。因讓佗自立爲帝，曾無一介之使報者。陸賈至南越，王甚恐，爲書謝，稱曰：「蠻夷大長老夫臣佗，前日高后隔異南越，竊疑長沙王讒臣，又遙聞高后盡誅佗宗族，掘燒先人冢，以故自弃，犯長沙邊境。且南方卑溼，蠻夷中間，其東閩越千人衆號稱王，其西甌駱裸國〔一〕亦稱王。老臣妄竊帝號，聊以自娛，豈敢以聞天王哉！」乃頓首謝，願長爲藩臣，奉貢職。於是乃下令國中曰：「吾聞兩雄不俱立，兩賢不並世。皇帝，賢天子也。自今以後，去帝制黃屋左纛。」陸賈還報，孝文帝大說。遂至孝景時，稱臣，使人朝請。然南越其居國竊如故號名，其使天子，稱王朝命如諸侯。至建元四年卒。

〔一〕索隱 裸國。音和寡反。裸，露形也。

佗孫胡爲南越王。〔二〕此時閩越王郢興兵擊南越邊邑，胡使人上書曰：「兩越俱爲藩臣，毋得擅興兵相攻擊。今閩越興兵侵臣，臣不敢興兵，唯天子詔之。」於是天子多南越義，守

職約，爲興師，遣兩將軍〔二〕往討閩越。兵未踰嶺，閩越王弟餘善殺郢以降，於是罷兵。

〔一〕集解 徐廣曰：「皇甫謐曰：越王趙佗以建元四年卒，爾時漢興七十年，佗蓋百歲矣。」

〔二〕索隱 王恢、韓安國。

天子使莊助往諭意南越王，胡頓首曰：「天子乃爲臣興兵討閩越，死無以報德！」遣太子嬰齊入宿衛。謂助曰：「國新被寇，使者行矣。」胡方日夜裝入見天子。」助去後，其大臣諫胡曰：「漢興兵誅郢，亦行以驚動南越。且先王昔言，事天子期無失禮，要之不可以說好語入見。」人見則不得復歸，亡國之勢也。」於是胡稱病，竟不入見。後十餘歲，胡實病甚，太子嬰齊請歸。胡薨，謚爲文王。

〔一〕索隱 悅好語入見。悅，漢書作「怵」。韋昭云：「誘怵好語」。

嬰齊代立，卽藏其先武帝璽。〔一〕嬰齊其人宿衛在長安時，取邯鄲繆氏女，〔二〕生子興。〔三〕及卽位，上書請立繆氏女爲后，興爲嗣。漢數使使者風諭嬰齊，嬰齊尚樂擅殺生自恣，懼人見要用漢法，比內諸侯，固稱病，遂不入見。遣子次公入宿衛。嬰齊薨，謚爲明王。

〔一〕索隱 李奇云「去其僭號」。

〔二〕索隱 繆氏女。繆，紀虬反。繆姓出邯鄲。

〔三〕〔集解〕徐廣曰：「一作『典』。」

太子興代立，其母爲太后。太后自未爲嬰齊姬時，嘗與霸陵人安國少季〔一〕通。及嬰齊薨後，元鼎四年，漢使安國少季往諭王，王太后以入朝，比內諸侯；令辯士諫大夫終軍等宣其辭，勇士魏臣等輔其缺，〔二〕衛尉路博德將兵屯桂陽，待使者。王年少，太后中國人也，嘗與安國少季通，其使復私焉。國人頗知之，多不附太后。太后恐亂起，亦欲倚漢威，數勸王及羣臣求內屬。卽因使者上書，請比內諸侯，三歲一朝，除邊關。於是天子許之，賜其丞相呂嘉銀印，及內史、中尉、大傅印，餘得自置。除其故黥劓刑，用漢法，比內諸侯。使者皆留填撫之。王、王太后飭治行裝重齋，爲入朝具。

〔一〕〔索隱〕安國，姓也；少季名也。

〔二〕〔集解〕徐廣曰：「一作『決』。」

其相呂嘉年長矣，相三王，宗族官仕爲長吏者七十餘人，男盡尚王女，女盡嫁王子兄弟宗室，及蒼梧秦王有連。〔一〕其居國中甚重，越人信之，多爲耳目者，得衆心愈於王。王之上書，數諫止王，王弗聽。有畔心，數稱病不見漢使者。使者皆注意嘉，勢未能誅。王、王太后亦恐嘉等先事發，乃置酒，介漢使者權，〔二〕謀誅嘉等。使者皆東鄉，太后南鄉，王北鄉，

相嘉、大臣皆西鄉，侍坐飲。嘉弟爲將，將卒居宮外。酒行，太后謂嘉曰：「南越內屬，國之利也，而相君苦不便者，何也？」以激怒使者。使者狐疑相杖，遂莫敢發。嘉見耳目非是，卽起而出。太后怒，欲鏃嘉^{〔三〕}以矛，王止太后。嘉遂出，分其弟兵就舍，^{〔四〕}稱病，不肯見王及使者。乃陰與大臣作亂。王素無意誅嘉，嘉知之，以故數月不發。太后有淫行，國人不附，欲獨誅嘉等，力又不能。

〔一〕^{〔集解〕}漢書音義曰：「蒼梧越中王自名爲秦王，連親婚也。」^{〔索隱〕}案：蒼梧越中王自名爲秦王，卽下趙光是也，故云「有連」。連者，連姻也。趙與秦同姓，故稱秦王。

〔三〕^{〔集解〕}韋昭曰：「恃使者爲介胄也。」^{〔索隱〕}韋昭曰「恃使者爲介胄」，志林云「介者因也，欲因使者權誅呂嘉」，然二家之說皆通。韋昭以介爲恃。介者閒也，以言閒恃漢使者之權，意卽得；云恃爲介胄，則非也。虞喜以介爲因，亦有所由。案：介者，賓主所由也。

〔三〕^{〔集解〕}韋昭曰：「鏃，撞也。」^{〔索隱〕}韋昭云：「鏃，撞也。」案：字林七凶反。又吳王濞傳「鏃殺吳王」，與此同。

〔四〕^{〔索隱〕}分弟兵就舍。案：謂分取其兵也。^{〔漢書作〕}「介」。介，被也，恃也。

天子聞嘉不聽王、王、王太后弱孤不能制，使者怯無決。又以爲王、王太后已附漢，獨呂嘉爲亂，不足以興兵，欲使莊參以二千人往使。參曰：「以好往，數人足矣；以武往，二千人無足以爲也。」辭不可，天子罷參也。邾^{〔一〕}壯士故濟北相韓千秋奮曰：「以區區之越，又

有王、太后應，獨相呂嘉爲害，願得勇士二百人，必斬嘉以報。」於是天子遣千秋〔三〕與王太后弟繆樂將二千人往，人越境。呂嘉等乃遂反，下令國中曰：「王年少。太后，中國人也，又與使者亂，專欲內屬，盡持先王寶器入獻天子以自媚，多從人，行至長安，虜賣以爲僮僕。取自脫一時之利，無顧趙氏社稷，爲萬世慮計之意。」乃與其弟將卒攻殺王、太后及漢使者。遣人告蒼梧秦王及其諸郡縣，立明王長男越妻子術陽侯〔三〕建德爲王。而韓千秋兵入，破數小邑。其後越直開道給食，未至番禺四十里，越以兵擊千秋等，遂滅之。使人函封漢使者節置塞上，〔四〕好爲謾辭謝罪，發兵守要害處。於是天子曰：「韓千秋雖無成功，亦軍鋒之冠。」封其子延年爲成安侯。〔五〕繆樂，其姊爲王太后，首願屬漢，封其子廣德爲龍亢侯。〔六〕乃下赦曰：「天子微，諸侯力政，譏臣不討賊。今呂嘉、建德等反，自立晏如，令罪人及江淮以南〔七〕樓船十萬師〔八〕往討之。」

〔一〕集解 徐廣曰：「縣屬潁川，音古洽反。」

〔索隱〕如淳云：「邾，縣名，在潁川。」

〔正義〕今汝州邾城縣。

〔二〕集解 徐廣曰：「爲校尉。」

〔三〕集解 徐廣曰：「元鼎四年，以南越王兄越封高昌侯。」

〔索隱〕韋昭云漢所封。案功臣表，術陽屬下邳。

〔四〕索隱 函封漢使節置塞上。案南康記以爲大庾名「塞上」也。

〔五〕索隱 案功臣表，成安屬邾。

〔六〕索隱案：龍亢屬譙國。漢書作「繫侯」，服虔音叩，晉灼云古「龍」字。

〔七〕集解徐廣曰：「淮，一作『匯』也。」

〔八〕集解應劭曰：「時欲擊越，非水不至，故作大船。船上施樓，故號曰『樓船』也。」

元鼎五年秋，衛尉路博德爲伏波將軍，出桂陽，下匯水；〔一〕主爵都尉楊僕爲樓船將軍，出豫章，下橫浦，故歸義越侯二人〔二〕爲戈船、下厲將軍，〔三〕出零陵，或下離水，〔四〕或抵蒼梧，使馳義侯〔五〕因巴蜀罪人，發夜郎兵，〔六〕下牂柯江；〔七〕咸會番禺。

〔一〕集解徐廣曰：「一作『湟』。」駟案：地理志曰桂陽有匯水，通四會。或作「淮」字。

〔索隱〕劉氏云「匯當作

『湟』」。漢書云「下湟水」。或本作「湟」。

〔二〕集解張晏曰：「故越人，降爲侯。」

〔三〕集解徐廣曰：「厲，一作『瀨』。」駟案：張晏曰「越人於水中負人船，又有蛟龍之害，故置戈於船下，因以爲名也」。應劭曰「瀨，水流涉上也」。瓚曰「伍子胥書有戈船，以載干戈，因謂之『戈船』也」。

〔四〕集解徐廣曰：「在零陵，通廣信。」正義地理志云零陵縣有離水，東至廣信入鬱林，九百八十里。

〔五〕集解徐廣曰：「越人也，名遺。」

〔六〕正義曲州、協州以南是夜郎國。

〔七〕正義江出南徼外，東通四會，至番禺入海也。

元鼎六年冬，樓船將軍將精卒先陷尋陝，〔一〕破石門，〔二〕得越船粟，因推而前，挫越鋒，

以數萬人待伏波。伏波將軍將罪人，道遠，會期後，與樓船會乃有千餘人，遂俱進。樓船居前，至番禺。建德、嘉皆城守。樓船自擇便處，居東南面；伏波居西北面。會暮，樓船攻敗越人，縱火燒城。越素聞伏波名，日暮，不知其兵多少。伏波乃爲營，遣使者招降者，賜印，復縱令相招。樓船力攻燒敵，反驅而入伏波營中。犁旦，〔三〕城中皆降伏波。呂嘉、建德已夜與其屬數百人亡入海，以船西去。伏波又因問所得降者貴人，以知呂嘉所之，遣人追之。以其故校尉司馬蘇弘得建德，封爲海常侯；〔四〕越郎〔五〕都稽〔六〕得嘉，封爲臨蔡侯。〔七〕

〔一〕索隱 姚氏云：「尋陝在始興西三百里，近連口也。」

〔二〕索隱 按：廣州記「在番禺縣北三十里。昔呂嘉拒漢，積石鎮江，名曰石門。又俗云石門水名曰『貪泉』，飲之則令人變。故吳隱之至石門，酌水飲，乃爲之歌云也。」

〔三〕集解 徐廣曰：「呂靜云犁，結也，音力奚反。結，猶連及、逮至也。」漢書「犁旦」爲「遲旦」，謂待明也。

〔索隱〕

鄒氏云「犁，一作『比』，比音必至反」。然犁卽比義。又解犁，黑也，天未明尚黑時也。漢書亦作「遲明」。遲音稚。遲，待也，亦犁之義也。

〔四〕集解 徐廣曰：「在東萊。」

〔五〕集解 徐廣曰：「南越之郎官。」

〔六〕集解 徐廣曰：「表曰孫都。」

〔七〕索隱案：表屬河內。

蒼梧王趙光者，越王同姓，聞漢兵至，及越揭陽令定〔一〕自定屬漢，越桂林監居翁〔二〕諭甌駱屬漢〔三〕皆得爲侯。〔四〕戈船、下厲將軍兵及馳義侯所發夜郎兵未下，南越已平矣。遂爲九郡。〔五〕伏波將軍益封。樓船將軍兵以陷堅爲將梁侯。

〔一〕集解韋昭曰：「揭音其逝反。」

〔索隱〕地理志揭陽縣屬南海。揭音桀。韋昭音其逝反，劉氏音求例反。定者，

令之名也。案：漢功臣表云「定揭陽令」，意又別也。

〔二〕集解漢書音義曰：「桂林郡中監，姓居名翁也。」

〔三〕索隱案：漢書，甌駱三十餘萬口降漢。

〔四〕索隱案：漢書云「光聞漢兵至，降，封爲隨桃侯。揭陽令史定爲安道侯，越將畢取爲牂侯，桂林監居翁爲湘城侯」。韋昭云「湘城屬堵陽。隨桃、安道、牂三縣皆屬南陽。牂音遼也」。

〔五〕集解徐廣曰：「儋耳，珠崖，南海，蒼梧，九真，鬱林，日南，合浦，交趾。」

〔索隱〕徐廣皆據漢書爲說。

自尉佗初王後，五世九十三歲而國亡焉。

太史公曰：尉佗之王，本由任囂。遭漢初定，列爲諸侯。隆慮離溼疫，佗得以益驕。甌駱相攻，南越動搖。漢兵臨境，嬰齊入朝。其後亡國，徵自繆女；呂嘉小忠，令佗無後。樓

船從欲，怠傲失惑；伏波困窮，智慮愈殖，因禍爲福。成敗之轉，譬若糾墨。

【索隱述贊】中原鹿走，羣雄莫制。漢事西驅，越權南裔。陸賈騁說，尉他去帝。嫪后內朝，呂嘉狼戾。君臣不協，卒從剿弃。

史記卷一百一十四

東越列傳第五十四

閩越〔一〕王無諸及越東海王搖者，其先皆越王句踐之後也，姓騶氏。〔二〕秦已并天下，皆廢爲君長，以其地爲閩中郡。〔三〕及諸侯畔秦，無諸、搖率越歸鄱陽令吳芮，所謂鄱君者也，從諸侯滅秦。當是之時，項籍主命，弗王，〔四〕以故不附楚。漢擊項籍，無諸、搖率越人佐漢。漢五年，復立無諸爲閩越王，王閩中故地，都東冶。孝惠三年，舉高帝時越功，曰閩君搖功多，其民使附，乃立搖爲東海王，〔五〕都東甌，〔六〕世俗號爲東甌王。

〔一〕集解 韋昭曰：「閩音武巾反。東越之別名。」 索隱 案：說文云「閩，東越蛇種也」，故字從「虫」。閩音旻。

〔二〕集解 徐廣曰：「騶，一作『駟』。」 索隱 徐廣云一作「駟」，是上云「歐駟」，不姓騶。

〔三〕集解 徐廣曰：「今建安侯官是。」 索隱 徐廣云「本建安侯官是」。案：爲閩州。案：下文「都東冶」，韋昭以

爲在侯官。 正義 今閩州又改爲福也。

〔四〕集解 漢書音義曰：「主號令諸侯，不王無諸、搖等。」

〔五〕集解應劭曰：「在吳郡東南濱海云。」

〔六〕集解徐廣曰：「今之永寧也。」索隱韋昭曰：「今永寧。」姚氏云：「甌，水名。」永嘉記：「水出永寧山，行三十餘里，去郡城五里入江。昔有東甌王都城，有亭，積石爲道，今猶在也。」

後數世，至孝景三年，吳王濞反，欲從閩越，閩越未肯行，獨東甌從吳。及吳破，東甌受漢購，殺吳王丹徒，以故皆得不誅，歸國。

吳王子駒亡走閩越，怨東甌殺其父，常勸閩越擊東甌。至建元三年，閩越發兵圍東甌。東甌食盡，困，且降，乃使人告急天子。天子問太尉田蚡，蚡對曰：「越人相攻擊，固其常，又數反覆，不足以煩中國往救也。自秦時棄弗屬。」於是中大夫莊助詰蚡曰：「特患力弗能救，德弗能覆，誠能，何故棄之？且秦舉咸陽而棄之，何乃越也！今小國以窮困來告急天子，天子弗振，彼當安所告愬？又何以子萬國乎？」上曰：「太尉未足與計。吾初卽位，不欲出虎符發兵郡國。」乃遣莊助以節發兵會稽。會稽太守欲距不爲發兵，助乃斬一司馬，諭意指，遂發兵浮海救東甌。未至，閩越引兵而去。東甌請舉國徙中國，乃悉舉衆來，處江淮之間。〔一〕

〔一〕集解徐廣曰：「年表云東甌王廣武侯望，率其衆四萬餘人來降，家廬江郡。」

索隱徐廣據年表而爲說。

至建元六年，閩越擊南越。南越守天子約，不敢擅發兵擊而以聞。上遣大行王恢出豫章，大農韓安國出會稽，皆爲將軍。兵未踰嶺，閩越王郢發兵距險。其弟餘善乃與相、宗族謀曰：「王以擅發兵擊南越，不請，故天子兵來誅。今漢兵衆彊，今卽幸勝之，後來益多，終滅國而止。今殺王以謝天子。天子聽，罷兵，固一國完，不聽，乃力戰，不勝，卽亡入海。」皆曰「善」。卽鑕「一」殺王，使使奉其頭致大行。大行曰：「所爲來者誅王。今王頭至，謝罪，不戰而耘，「二」利莫大焉。」乃以便宜案兵告大農軍，而使使奉王頭馳報天子。詔罷兩將兵，曰：「郢等首惡，獨無諸孫繇君丑「三」不與謀焉。」乃使郎中將立丑爲越繇王，奉閩越先祭祀。

〔一〕〔索隱〕劉氏又音窗。縱，撞也。

〔二〕〔集解〕徐廣曰：「漢書作『殞』。耘義當取『耘除』。或言耘音于粉反，此楚人聲重耳。隕耘當同音，但字有假借，聲有輕重。」〔索隱〕耘音云。耘，除也。漢書作「隕」，音于粉反。

〔三〕〔索隱〕繇音搖，邑號也。丑，名。

餘善已殺郢，威行於國，國民多屬，竊自立爲王。繇王不能矯其衆持正。天子聞之，爲餘善不足復興師，曰：「餘善數與郢謀亂，而後首誅郢，師得不勞。」因立餘善爲東越王，與繇

王並處。

至元鼎五年，南越反，東越王餘善上書，請以卒八千人從樓船將軍擊呂嘉等。兵至揭揚，以海風波爲解，不行，持兩端，陰使南越。及漢破番禺，不至。是時樓船將軍楊僕使使上書，願便引兵擊東越。上曰：士卒勞倦，不許，罷兵，令諸校屯豫章梅領待命。」

〔一〕集解 徐廣曰：「在會稽界。」

索隱 案：徐廣云「在會稽」，非也。今案：豫章三十里有梅嶺，在洪崖山足，當

古驛道。此文云「豫章梅嶺」，知非會稽也。

正義 括地志云：「梅嶺在虔化縣東北百二十八里。」虔州漢亦屬

豫章郡，二所未詳。

元鼎六年秋，餘善聞樓船請誅之，漢兵臨境，且往，乃遂反，發兵距漢道。號將軍騶力等爲「吞漢將軍」，入白沙、武林、〔一〕梅嶺，殺漢三校尉。是時漢使大農張成、故山州侯齒〔二〕將屯，弗敢擊，卻就便處，皆坐畏懦誅。

〔一〕集解 徐廣曰：「在豫章界。」

索隱 徐廣云在豫章界。案：今豫章北二百里，接鄱陽界，地名白沙，有小水入

湖，名曰白沙阬。東南八十里有武陽亭，亭東南三十里地名武林。此白沙、武林，今當閩越入京道。

〔二〕集解 徐廣曰：「成陽共王子。」

餘善刻「武帝」璽自立，詐其民，爲妄言。天子遣橫海將軍韓說出句章，〔一〕浮海從東方

往；樓船將軍楊僕出武林；中尉王溫舒出梅嶺；越侯爲戈船、下瀨將軍，出若邪、白沙。元封元年冬，咸入東越。東越素發兵距險，使徇北將軍守武林，敗樓船軍數校尉，殺長吏。樓船將軍率錢唐轅終古、斬徇北將軍，爲禦兒侯。自兵未往。

〔一〕索隱 鄭氏音勾，會稽縣也。

〔正義〕句章故城在越州鄞縣西一百里，漢縣。

〔二〕索隱 案：姚氏云「地名，今闕」。

〔三〕〔正義〕越州有若耶山、若耶溪。「若」如「一」。預州有白沙山。蓋從如此邪。白沙東故閩州。

〔四〕〔正義〕錢唐，杭州縣。轅，姓；終古，名。

〔五〕〔集解〕漢書音義曰：「今吳南亭是也。」〔正義〕「禦」字今作「語」。語兒鄉在蘇州嘉興縣南七十里，臨官道也。

故越衍侯吳陽前在漢，漢使歸諭餘善，餘善弗聽。及橫海將軍先至，越衍侯吳陽以其邑七百人反，攻越軍於漢陽。從建成侯敖，與其率，從繇王居股謀曰：「餘善首惡，劫守吾屬。今漢兵至，衆彊，計殺餘善，自歸諸將，儻幸得脫。」乃遂俱殺餘善，以其衆降橫海將軍，故封繇王居股爲東成侯，萬戶；封建成侯敖爲開陵侯；封越衍侯吳陽爲北石侯；封橫海將軍說爲案道侯；封橫海校尉福爲繚婆侯。福者，成陽共王子，故爲海常侯，坐法失侯。舊從軍無功，以宗室故侯。諸將皆無成功，莫封。東越將多軍，漢兵至，棄其軍降，封爲無錫侯。

〔一〕集解 徐廣曰：「亦東越臣。」

〔二〕索隱 韋昭曰：「在九江。」

〔三〕索隱 徐廣云：「敖，東越臣。」韋昭云：「開陵屬臨淮。」

〔四〕集解 漢書音義曰：「音遼繁。」索隱 服虔云：「嬰音榮，縣名。」劉伯莊云：「繚音遼，下音紆營反。」成陽王子也。」

〔五〕集解 漢書音義曰：「多軍，名也。」索隱 李奇云：「多軍，名。」韋昭云：「多，姓；軍，名也。」

於是天子曰東越狹多阻，閩越悍，數反覆，詔軍吏皆將其民徙處江淮閒。東越地遂虛。

太史公曰：越雖蠻夷，其先豈嘗有大功德於民哉，何其久也！歷數代常爲君王，句踐一稱伯。然餘善至大逆，滅國遷衆，其先苗裔繇王居股等猶尚封爲萬戶侯，由此知越世世爲公侯矣。蓋禹之餘烈也。

【索隱述贊】句踐之裔，是曰無諸。既席漢寵，實因秦餘。騶駼爲姓，閩中是居。王瑤之立，爰處東隅。後嗣不道，自相誅鋤。

史記卷一百一十五

朝鮮列傳第五十五

〔集解〕張晏曰：「朝鮮有濕水、洌水、汕水，三水合爲洌水，疑樂浪、朝鮮取名於此也。」

〔索隱〕案：朝音潮，直驕

反。鮮首仙。以有汕水，故名也。汕一音訕。

朝鮮〔一〕王滿者，故燕人也。〔三〕自始全燕時〔三〕嘗略屬真番〔四〕朝鮮〔五〕爲置吏，築鄣塞。秦滅燕，屬遼東外徼。漢興，爲其遠難守，復修遼東故塞，至洌水爲界，〔六〕屬燕。王盧綰反，入匈奴，滿亡命，〔七〕聚黨千餘人，魑結蠻夷服而東走出塞，渡洌水，居秦故空地上下鄣，〔八〕稍役屬真番、朝鮮蠻夷及故燕、齊亡命者王之，都王險。〔九〕

〔一〕正義 潮仙二音。括地志云：「高驪都平壤城，本漢樂浪郡王險城，又古云朝鮮地也。」

〔二〕索隱 案漢書，滿，燕人，姓衛，擊破朝鮮而自王之。

〔三〕索隱 始全燕時，謂六國燕方全盛之時。

〔四〕集解 徐廣曰：「一作『莫』。遼東有番汗縣。番音普寒反。」〔索隱〕徐氏據地理志而知也。番音潘，又音盤。

汗音寒。

〔五〕索隱如淳云：「燕嘗略二國以屬己也。」應劭云：「玄菟本真番國。」

〔六〕集解漢書音義曰：「涓音傍沛反。」索隱涓音旁沛反。正義地理志云涓水出遼東塞外，西南至樂浪縣

西入海。涓普大反。

〔七〕正義命謂教令。

〔八〕索隱案：地理志樂浪有雲都。

〔九〕集解徐廣曰：「昌黎有險瀆縣也。」索隱韋昭云：「古邑名。」徐廣曰：「昌黎有險瀆縣。」應劭注「地理志遼東

險瀆縣，朝鮮王舊都」。臣瓚云：「王險城在樂浪郡涓水之東」也。

會孝惠、高后時天下初定，遼東太守卽約滿爲外臣，保塞外蠻夷，無使盜邊；諸蠻夷君長欲入見天子，勿得禁止。以聞，上許之，以故滿得兵威財物侵降其旁小邑，真番、臨屯〔一〕皆來服屬，方數千里。〔二〕

〔一〕索隱東夷小國，後以爲郡。

〔二〕正義括地志云：「朝鮮、高驪、貊、東沃沮五國之地，國東西千三百里，南北二千里，在京師東，東至大海四百里，北至營州界九百二十里，南至新羅國六百里，北至靺鞨國千四百里。」

傳子至孫右渠，〔一〕所誘漢亡人滋多，又未嘗入見，真番旁衆國欲上書見天子，又擁閼不通。元封二年，漢使涉何譙諭〔二〕右渠，終不肯奉詔。何去至界上，臨涓水，使御刺殺送何者〔三〕朝鮮裨王長，〔四〕卽渡，馳入塞，〔五〕遂歸報天子曰「殺朝鮮將」。上爲其名美，〔六〕卽

不詰，拜何爲遼東東部都尉。〔七〕朝鮮怨何，發兵襲攻殺何。

〔一〕正義 其孫名也。

〔二〕索隱 說文云：「譙，讓也。」諭，曉也。譙音才笑反。

〔三〕索隱 卽送何之御也。

〔四〕正義 顏師古云：「長者，裨王名也。送何至涓水，何因刺殺也。」按：裨王及將士長，恐顏非也。

〔五〕正義 人平州榆林關也。

〔六〕索隱 有殺將之美名。

〔七〕正義 地理志云遼東郡武次縣，東部都尉所理也。

天子募罪人擊朝鮮。其秋，遣樓船將軍楊僕從齊浮渤海，兵五萬人，左將軍荀彘出遼東討右渠。右渠發兵距險。左將軍卒正多率遼東兵先縱，敗散，多還走，坐法斬。樓船將軍將齊兵七千人先至王險。右渠城守，窺知樓船軍少，卽出城擊樓船，樓船軍敗散走。將軍楊僕失其衆，遁山中十餘日，稍求收散卒，復聚。左將軍擊朝鮮涓水西軍，未能破自前。

天子爲兩將未有利，乃使衛山因兵威往諭右渠。右渠見使者頓首謝：「願降，恐兩將詐殺臣，今見信節，請服降。」遣太子入謝，獻馬五千匹，及饋軍糧。人衆萬餘，持兵，方渡涓水，使者及左將軍疑其爲變，謂太子已服降，宜命人毋持兵。太子亦疑使者左將軍詐殺之，

遂不渡涇水，復引歸。山還報天子，天子誅山。

左將軍破涇水上軍，乃前，至城下，圍其西北。樓船亦往會，居城南。右渠遂堅守城，數月未能下。

左將軍素侍中，幸，將燕代卒，悍，乘勝，軍多驕。樓船將齊卒，入海，固已多敗亡；其先與右渠戰，困辱亡卒，卒皆恐，將心慙，其圍右渠，常持和節。左將軍急擊之，朝鮮大臣乃陰閒使人私約降樓船，往來言，尚未肯決。左將軍數與樓船期戰，樓船欲急就其約，不會；左將軍亦使人求閒卻降下朝鮮，朝鮮不肯，心附樓船。以故兩將不相能。左將軍心意樓船前有失軍罪，今與朝鮮私善而又不降，疑其有反計，未敢發。天子曰：將率不能，前（及）乃使衛山諭降右渠，右渠遣太子，山使不能剗決，與左將軍計相誤，卒沮約。今兩將圍城，又乖異，以故久不決。使濟南太守公孫遂往（征）（正）之，有便宜得以從事。遂至，左將軍曰：「朝鮮當下久矣，不下者有狀。」言樓船數朝不會，具以素所意告遂，曰：「今如此不取，恐爲大害，非獨樓船，又且與朝鮮共滅吾軍。」遂亦以爲然，而以節召樓船將軍入左將軍營計事，即命左將軍麾下執捕樓船將軍，并其軍，以報天子。天子誅遂。

左將軍已并兩軍，即急擊朝鮮。朝鮮相路人、相韓陰、尼谿相參、將軍王暎（一）相與謀

曰：「始欲降樓船，樓船今執，獨左將軍并將，戰益急，恐不能與，（戰）王又不肯降。」陰、映、路人皆亡降漢。路人道死。元封三年夏，尼谿相參乃使人殺朝鮮王右渠來降。王險城未下，故右渠之大臣成已又反，復攻吏。左將軍使右渠子長降、（三）相路人之子最、（三）告諭其民，誅成已，以故遂定朝鮮，爲四郡。（四）封參爲濶清侯，（五）陰爲狄苴侯，（六）映爲平州侯，（七）長降爲幾侯。（八）最以父死頗有功，爲溫陽侯。（九）

〔一〕集解 漢書音義曰：「凡五人也。戎狄不知官紀，故皆稱相。映音頰。」索隱 應劭云：「凡五人。戎狄不知官紀，故皆稱相也。路人，漁陽縣人。」如淳云：「相，其國宰相。路人，名也。映音頰，一音協。」

〔二〕集解 徐廣曰：「表云『長路』。漢書表云『長路』，音各。」索隱 案：漢書表云「長路」，音各。

〔三〕索隱 路人子也，名最。

〔四〕集解 真番、臨屯、樂浪、玄菟也。

〔五〕集解 韋昭曰：「屬齊。」索隱 參，濶清侯。韋昭云：「縣名，屬齊。」顧氏濶音獲。

〔六〕集解 韋昭曰：「屬勃海。」索隱 陰，狄苴侯。晉灼云：「屬勃海。」荻音狄，苴音子餘反。

〔七〕集解 韋昭曰：「屬梁父。」索隱 映，平州侯。韋昭云：「屬梁父。」

〔八〕集解 韋昭曰：「屬河東。」索隱 長，幾侯。韋昭云：「縣名，屬河東。」

〔九〕集解 韋昭曰：「屬齊。」索隱 最，溫陽侯。韋昭云：「屬齊」也。

左將軍徵至，坐爭功相嫉，乖計，弃市。樓船將軍亦坐兵至洌口，（一）當待左將軍，擅先

縱，失亡多，當誅，贖爲庶人。

〔一〕〔索隱〕蘇林曰：「縣名。度海先得之。」

太史公曰：右渠負固，國以絕祀。涉何誣功，爲兵發首。樓船將狹，〔一〕及難離咎。悔失番禺，乃反見疑。荀彘爭勞，與遂皆誅。兩軍俱辱，將率莫侯矣。

〔一〕〔集解〕徐廣曰：「言其所將卒狹少。」

〔索隱述贊〕衛滿燕人，朝鮮是王。王險置都，路人作相。右渠首差，涉何調上。兆禍自斯，狐疑二將。山、遂伏法，紛紜無狀。

史記卷一百一十六

西南夷列傳第五十六

西南夷君長〔一〕以什數，〔二〕夜郎最大，〔三〕其西靡莫〔四〕之屬〔五〕以什數，滇最大，〔六〕自滇以北君長以什數，邛都最大。此皆魑結，〔七〕耕田，有邑聚。其外西自同師以東，〔八〕北至牂榆，〔九〕名爲嶺，昆明，〔十〕皆編髮，隨畜遷徙，〔二〕毋常處，毋君長，地方可數千里。自嶺以東北，君長以什數，徙，笮都〔三〕最大，自笮以東北，君長以什數，毋騶最大。〔三〕其俗或士箸，或移徙，在蜀之西。自毋騶以東北，君長以什數，白馬最大，〔四〕皆氐類也。此皆巴蜀西南外蠻夷也。

〔一〕正義 在蜀之南。

〔二〕索隱 劉氏音所具反。鄒氏音所主反。

〔三〕索隱 荀悅云：「犍爲屬國也。」韋昭云：「漢爲縣，屬牂柯。」按：後漢書云：「夜郎東接交趾，其地在胡南，其君長

本出於竹，以竹爲姓也。」正義 今瀘州南大江南岸協州、曲州，本夜郎國。

〔四〕索隱 夷邑名，滇與同姓。

〔五〕正義 在蜀南以下及西也。靡非在姚州北，去京西南四千九百三十五里，卽靡莫之夷。

〔六〕集解 如淳曰：「滇音顛。顛馬出其國也。」索隱 崔浩云：「後爲縣，越嶲太守所理也。」正義 昆州、郎州等

本滇國，去京西五千三百七十里也。

〔七〕索隱 𪔐，漢書作「椎」，音直追反。結音計。

〔八〕集解 韋昭曰：「邑名也。」索隱 韋昭云邑名。漢書作「桐師」。

〔九〕集解 韋昭曰：「在益州。楛音葉。」索隱 韋昭曰：「益州縣。楛音葉。」正義 上音葉。楛澤在靡北百餘

里。漢楛榆縣在澤西益都。靡非，本葉榆王屬國也。

〔一〇〕集解 徐廣曰：「永昌有嶠唐縣。」索隱 崔浩云：「二國名。」韋昭云：「嶠，益州縣。」正義 嶠音髓。今嶠州

也。昆明，嶠州縣，蓋南接昆明之地，因名也。

〔一一〕正義 編，步典反。畜，許又反。皆嶠、昆明之俗也。

〔一二〕集解 徐廣曰：「徙在漢嘉。笮音昨，在越嶲。」索隱 服虔云：「二國名。」韋昭云：「徙縣屬蜀。笮縣在越嶲。」

徐廣云：「笮音昨。」正義 徙音斯。括地志云：「笮州本西蜀徼外，曰貓羌嶠。地理志云徙縣也。華陽國志雅

州邛邛山本名邛笮山，故邛人、笮人界。」

〔一三〕索隱 案：應劭云：「汶江郡本冉駹。音亡江反。」正義 括地志云：「蜀西徼外羌，茂州、冉州本冉駹國地也。

後漢書云冉駹其山有六夷、七羌、九氐，各有部落也。」

〔一四〕索隱 案：夷邑名，卽白馬氏。正義 括地志云：「隴右成州、武州皆白馬氏，其豪族楊氏居成州仇池山上。」

始楚威王時，使將軍莊躡〔一〕將兵循江上，略巴、〔蜀〕黔中以西。莊躡者，故楚莊王苗裔也。躡至滇池，〔地〕方三百里，〔二〕旁平地，肥饒數千里，以兵威定屬楚。欲歸報，會秦擊奪楚巴、黔中郡，道塞不通，因還，以其衆王滇，變服，從其俗，以長之。秦時常頌〔三〕略通五尺道，〔四〕諸此國頗置吏焉。十餘歲，秦滅。及漢興，皆弃此國而開蜀故徼。巴、蜀民或竊出商賈，取其筰馬、犍僮，〔五〕髦牛，以此巴、蜀殷富。

〔一〕〔索隱〕音炬灼反。楚莊王弟，爲盜者。〔正義〕其略反。郎州、昆州卽莊躡所王。

〔二〕〔索隱〕滇池方三百里。地理志益州滇池縣，澤在西北。後漢書云：「其池水源深廣，而〔末〕更淺狹，有似倒流，故謂滇池。」〔正義〕括地志云：「滇池澤在昆州晉寧縣西南三十里。其水源深廣而〔末〕更淺狹，有似倒流，故謂滇池。」

〔三〕〔集解〕音案。

〔四〕〔索隱〕謂棧道廣五尺。〔正義〕括地志云：「五尺道在郎州。」顏師古云其處險阨，故道纔廣五尺。如淳云道廣五尺。」

〔五〕〔索隱〕韋昭云：「犍屬犍爲，音蒲北反。」服虔云：「舊京師有犍婢。」〔正義〕今益州南、戎州北臨大江，古犍國。

建元六年，大行王恢擊東越，東越殺王郢以報。恢因兵威使番陽令〔一〕唐蒙風指曉南

越。南越食蒙蜀枸醬，〔二〕蒙問所從來，曰：「道西北牂柯，牂柯江〔三〕廣數里，出番禺城下。」蒙歸至長安，問蜀賈人，賈人曰：「獨蜀出枸醬，多持竊出市夜郎。夜郎者，臨牂柯江，江廣百餘步，足以行船。南越以財物役屬夜郎，西至同師，然亦不能臣使也。」蒙乃上書說上曰：「南越王黃屋左纛，地東西萬餘里，名爲外臣，實一州主也。今以長沙、豫章往，水道多絕，難行。竊聞夜郎所有精兵，可得十餘萬，浮船牂柯江，出其不意，此制越一奇也。誠以漢之彊，巴蜀之饒，通夜郎道，爲置吏，易甚。」上許之。乃拜蒙爲郎中將，將千人，食重萬餘人，〔四〕從巴蜀笮關入，遂見夜郎侯多同。蒙厚賜，喻以威德，約爲置吏，使其子爲令。夜郎旁小邑皆貪漢繒帛，以爲漢道險，終不能有也，乃且聽蒙約。還報，乃以爲犍爲郡。發巴蜀卒治道，自犍道指牂柯江。〔五〕蜀人司馬相如亦言西夷邛、笮可置郡。使相如以郎中將往，喻，皆如南夷，爲置一都尉，十餘縣，屬蜀。

〔一〕正義 番音婆。

〔三〕集解 徐廣曰：「枸，一作『蒟』，音寔。」駢案：漢書音義曰「枸木似穀樹，其葉如桑葉。用其葉作醬酢，美，蜀人以爲珍味」。

〔索隱〕蒟。案：晉灼音矩。劉德云「蒟樹如桑，其椹長二三寸，味酢；取其實以爲醬，美」。又云「蒟緣樹而生，非木也。今蜀土家出蒟，實似桑椹，味辛似薑，不酢」。又云「取葉」。此注又云葉似桑葉，非也。

廣志云「色黑，味辛，下氣消穀」。寔，求羽反。

〔三〕〔正義〕崔浩云：「牂柯，繫船杙也。」常氏華陽國志云：「楚頃襄王時，遣莊躋伐夜郎，軍至且蘭，楸船於岸而步戰。既滅夜郎，以且蘭有楸船柯處，乃改其名爲牂柯。」

〔四〕〔索隱〕案：食貨輜重車也。音持用反。

〔五〕〔索隱〕道牂柯江。崔浩云：「牂柯，繫船杙也，以爲地名。」道猶從也。地理志夜郎又有豚水，東至南海四會入海，此牂柯江。

當是時，巴蜀四郡〔一〕通西南夷道，戍轉相饟。數歲，道不通，士罷餓離溼，死者甚衆；西南夷又數反，發兵興擊，耗費無功。上患之，使公孫弘往視問焉。還對，言其不便。及弘爲御史大夫，是時方築朔方以據河逐胡，弘因數言西南夷害，可且罷，專力事匈奴。上罷西夷，獨置南夷夜郎兩縣一都尉，〔二〕稍令犍爲自葆就。〔三〕

〔一〕〔集解〕徐廣曰：「漢中，巴郡，廣漢，蜀郡。」

〔二〕〔集解〕徐廣曰：「元光六年，南夷始置郵亭。」

〔三〕〔正義〕令犍爲自葆守，而漸修成其郡縣也。

及元狩元年，博望侯張騫使大夏來，言居大夏時見蜀布、邛竹杖，〔一〕使問所從來，曰：「從東南身毒國，〔二〕可數千里，得蜀賈人市。」或聞邛西可二千里有身毒國。騫因盛言大夏在漢西南，慕中國，患匈奴隔其道，誠通蜀，身毒國道便近，有利無害。於是天子乃令王

然于、柏始昌、呂越人等，使閒出西夷西，指求身毒國。至滇，滇王嘗羌〔三〕乃留，爲求道西十餘輩。歲餘，皆閉昆明，〔四〕莫能通身毒國。

〔一〕集解 韋昭曰：「邛縣之竹，屬蜀。」瓚曰：「邛，山名。此竹節高實中，可作杖。」

〔三〕集解 徐廣曰：「字或作『竺』。」漢書直云『身毒』，史記一本作『乾毒』。駢案：漢書音義曰「一名『天竺』」，則浮屠胡是也。〔索隱〕身音捐，毒音篤。一本作「乾毒」。漢書音義一名「天竺」也。

〔三〕集解 徐廣曰：「嘗，一作『賞』。」

〔四〕集解 如淳曰：「爲昆明所閉道。」正義 昆明在今嵩州南，昆縣是也。

滇王與漢使者言曰：「漢孰與我大？」及夜郎侯亦然。以道不通故，各自以爲一州主，不知漢廣大。使者還，因盛言滇大國，足事親附。天子注意焉。

及至南越反，上使馳義侯因犍爲發南夷兵。且蘭〔一〕君恐遠行，旁國虜其老弱，乃與其衆反，殺使者及犍爲太守。漢乃發巴蜀罪人嘗擊南越者八校尉擊破之。會越已破，漢八校尉不下，卽引兵還，行誅頭蘭。〔三〕頭蘭，常隔滇道者也。已平頭蘭，遂平南夷爲牂柯郡。夜郎侯始倚南越，南越已滅，會還誅反者，夜郎遂入朝。上以爲夜郎王。

〔一〕索隱 上音子餘反。小國名也。後縣，屬牂柯。

〔三〕索隱 卽且蘭也。

南越破後，及漢誅且蘭、邛君，並殺笮侯，毋騶皆振恐，諸臣置吏。乃以邛都爲越巂郡，笮都爲沈犁郡，毋騶爲汶山郡，〔二〕廣漢、西白馬爲武都郡。

〔二〕集解 應劭曰：「今蜀郡 岷江。」

上使王然于以越破及誅南夷兵威風喻滇王入朝。滇王者，其衆數萬人，其旁東北有勞漫、靡莫，〔一〕皆同姓相扶，未肯聽。勞漫、靡莫數侵犯使者吏卒。元封二年，天子發巴蜀兵擊滅勞漫、靡莫，以兵臨滇。滇王始首善，以故弗誅。滇王離難西南夷，舉國降，諸置吏入朝。於是以爲益州郡，賜滇王王印，復長其民。

〔一〕索隱 勞漫、靡莫。二國與滇王同姓。

西南夷君長以百數，獨夜郎、滇受王印。滇小邑，最寵焉。

太史公曰：楚之先豈有天祿哉？在周爲文王師，封楚。及周之衰，地稱五千里。秦滅諸侯，唯楚、苗裔尚有滇王。漢誅西南夷，國多滅矣，唯滇復爲寵王。然南夷之端，見枸醬番

禺，大夏杖邛竹。西夷後揃，〔一〕剽分二方，〔二〕卒爲七郡。〔三〕

〔一〕集解漢書音義曰：「音翦。」索隱音剪。揃謂被分割也。

〔二〕索隱剽音匹妙反。言西夷後被揃迫逐，遂剽居西南二方，各屬郡縣。剽亦分義。

〔三〕集解徐廣曰：「犍爲、牂柯、越嶲、益州、武都、沈犁、汶山地也。」

【索隱述贊】西南外徼，莊蹻首通。漢因大夏，乃命唐蒙。勞漫、靡莫，異俗殊風。夜郎最大，邛、笮稱雄。及置郡縣，萬代推功。

史記卷一百一十七

司馬相如列傳第五十七

司馬相如者，蜀郡成都人也，字長卿。少時好讀書，學擊劍，^{〔一〕}故其親名之曰犬子。^{〔二〕}相如既學，^{〔三〕}慕藺相如之爲人，更名相如。以貲爲郎，事孝景帝，爲武騎常侍，^{〔四〕}非其好也。會景帝不好辭賦，是時梁孝王來朝，從游說之士齊人鄒陽、淮陰枚乘、吳莊忌夫子，^{〔五〕}之徒，相如見而說之，因病免，客游梁。梁孝王令與諸生同舍，相如得與諸生游，士居數歲，乃著子虛之賦。

〔一〕索隱：呂氏春秋劍伎云「持短人長，倏忽縱橫之術也」。魏文典論云「余好擊劍，善以短乘長」是也。

〔二〕索隱：孟康云「愛而字之也」。

〔三〕索隱：案：秦密云「文翁遣相如受七經」。

〔四〕索隱：張揖曰「秩六百石，常侍從格猛獸」。

〔五〕集解：徐廣曰「名忌，字夫子」。索隱：徐廣、郭璞皆云名忌字夫子。案：鄒陽傳云枚先生、嚴夫子，此則夫子。

是美稱，時人以爲號。漢書作「嚴忌」者，案忌本姓莊，避明帝諱改姓嚴也。

會梁孝王卒，相如歸，而家貧，無以自業。素與臨邛令王吉相善，吉曰：「長卿久宦遊不遂，而來過我。」於是相如往，舍都亭。^{〔一〕}臨邛令繆爲恭敬，日往朝相如。相如初尚見之，後稱病，使從者謝吉，吉愈益謹肅。臨邛中多富人，而卓王孫家僮八百人，程鄭亦數百人，二人乃相謂曰：「令有貴客，爲具召之。」並召令。令既至，卓氏客以百數。至日中，謁司馬長卿，長卿謝病不能往，臨邛令不敢嘗食，自往迎相如。相如不得已，彊往，一坐盡傾。酒酣，臨邛令前奏琴曰：「竊聞長卿好之，願以自娛。」相如辭謝，爲鼓一再行。^{〔二〕}是時卓王孫有女文君新寡，好音，故相如繆與令相重，而以琴心挑之。^{〔三〕}相如之臨邛，從車騎，雍容閒雅甚都；^{〔四〕}及飲卓氏，弄琴，文君竊從戶窺之，心悅而好之，恐不得當也。既罷，相如乃使人重賜文君侍者通殷勤。文君夜亡奔相如，^{〔五〕}相如乃與馳歸成都。家居徒四壁立。^{〔六〕}卓王孫大怒曰：「女至不材，我不忍殺，不分一錢也。」人或謂王孫，王孫終不聽。文君久之不樂，曰：「長卿第俱如臨邛，^{〔七〕}從昆弟假貸猶足爲生，何至自苦如此！」相如與俱之臨邛，盡賣其車騎，買一酒舍酤酒，而令文君當鑪。^{〔八〕}相如身自著犢鼻褌，^{〔九〕}與保庸雜作，^{〔一〇〕}滌器於市中。^{〔一一〕}卓王孫聞而恥之，爲杜門不出。昆弟諸公^{〔一二〕}更謂王孫曰：「有一男兩女，所不足者非財也。今文君已失身於司馬長卿，長卿故倦游，^{〔一三〕}雖貧，其人材足依也，且又令客，獨

奈何相辱如此！卓王孫不得已，分子文君僮百人，錢百萬，及其嫁時衣被財物。文君乃與相如歸成都，買田宅，爲富人。

〔一〕**索隱**案：臨邛郭下之亭也。

〔二〕**索隱**案：樂府長歌行、短歌行，行者曲也。此言「鼓一再行」，謂一兩曲。

〔三〕**集解**郭璞曰：「以琴中音挑動之。」

索隱張揖云：「挑，嬈也。以琴中嬈之。」挑音徒了反。嬈音奴了反。其

詩曰「鳳兮鳳兮歸故鄉，遊遨四海求其皇，有一豔女在此堂，室邇人遐毒我腸，何由交接爲鴛鴦」也。又曰「鳳兮鳳兮從皇栖，得託子尾永爲妃。交情通體必和諧，中夜相從別有誰」。

〔四〕**集解**韋昭曰：「閒，讀曰『閑』，甚得都邑之容也。」郭璞曰：「都猶姣也。」詩曰「恂美且都」。

〔五〕**索隱**郭璞云：「婚不以禮爲亡也。」

〔六〕**集解**郭璞曰：「言貧窮也。」**索隱**案：孔文祥云「徒，空也。家空無資儲，但有四壁而已，云就此中以安立也」。

〔七〕**索隱**弟如臨邛。文穎云：「弟，且也。」郭璞云：「弟，語辭。如，往也。」

〔八〕**集解**韋昭曰：「鑪，酒肆也。以土爲墮，邊高似鑪。」

〔九〕**集解**韋昭曰：「今三尺布作形如犢鼻矣。稱此者，言其無恥也。今銅印言犢紐，此其類矣。」

〔一〇〕**集解**方言曰：「保庸謂之甬，奴婢賤稱也。」

〔一一〕**集解**韋昭曰：「瓦器也。每食必滌溉者。」

〔一二〕**集解**郭璞曰：「諸公，父行也。」

〔三〕集解 郭璞曰：「厭游宦也。」

居久之，蜀人楊得意爲狗監，〔一〕侍上。上讀子虛賦而善之，曰：「朕獨不得與此人同時哉！」得意曰：「臣邑人司馬相如自言爲此賦。」上驚，乃召問相如。相如曰：「有是。然此乃諸侯之事，未足觀也。請爲天子游獵賦，賦成奏之。」上許，令尚書給筆札。相如以「子虛」，虛言也，爲楚稱；〔二〕「烏有先生」者，〔三〕「烏有此事也」，爲齊難；〔四〕「無是公」者，無是人也，明天子之義。〔五〕故空藉〔六〕此三人爲辭，以推天子諸侯之苑囿。其卒章歸之於節儉，因以風諫。奏之天子，天子大說。其辭曰：

〔一〕集解 郭璞曰：「主獵犬也。」

〔二〕集解 郭璞曰：「稱說楚之美。」

〔三〕集解 徐廣曰：「烏，一作惡。」

〔四〕集解 郭璞曰：「詰難楚事也。」

〔五〕集解 郭璞曰：「以爲折中之談也。」

〔六〕索隱 音假借，與積同音。

楚使子虛使於齊，齊王悉發境內之士，備車騎之衆，與使者出田。田罷，子虛過詫〔一〕「烏有先生，而無是公在焉。坐定，烏有先生問曰：『今日田樂乎？』子虛曰：『樂。』」

「獲多乎？」曰：「少。」然則何樂？」曰：「僕樂齊王之欲夸僕以車騎之衆，而僕對以雲夢之事也。」曰：「可得聞乎？」

〔一〕集解 郭璞曰：「詭，誇也。音託夏反。」索隱 上音戈，下音勑亞反。誇詭是也。

子虛曰：「可。王駕車千乘，選徒萬騎，田於海濱。列卒滿澤，罾罔彌山，〔一〕揜兔麟鹿，射麋脚麟。〔二〕驚於鹽浦，割鮮染輪。〔三〕射中獲多，矜而自功。顧謂僕曰：『楚亦有平原廣澤游獵之地，饒樂若此者乎？』楚王之獵何與寡人？」〔四〕僕下車對曰：「臣，楚國之鄙人也，幸得宿衛十有餘年，時從出游，游於後園，覽於有無，然猶未能徧覩也，又惡足以言其外澤者乎！」齊王曰：「雖然，略以子之所聞見而言之。」

〔一〕集解 郭璞曰：「罾，置也。音浮。」正義 說文云：「罾，免罟也。」今幡車罟也。彌，竟也。

〔二〕集解 徐廣曰：「麟音吝。」駢案：郭璞曰「脚，揜足。麟，車轢。」索隱 脚麟，韋昭云：「謂持其一脚也。」司馬

彪曰「脚，揜也」。說文云「揜，偏引一脚也」。

〔三〕集解 郭璞曰：「鹽浦，海邊地多鹽鹵。鮮，生肉也。染，濡也。音而沿反，又音而悅反。濡之於輪，鹽而食之。

驚，馳也。音務。」索隱 李奇云：「鮮，生肉也。染，濡也。切生肉濡鹽而食之。」染或爲「淬」，與下文「脲割輪

淬」意同也。

〔四〕集解 郭璞曰：「與猶如也。」

「僕對曰：『唯唯。』臣聞楚有七澤，嘗見其一，未覩其餘也。臣之所見，蓋特其小小

者耳，〔一〕名曰雲夢。〔二〕雲夢者，方九百里，其中有山焉。其山則盤紆峩鬱，隆崇崱
 峩，岑巖參差，日月蔽虧，〔三〕交錯糾紛，上干青雲，罷池陂陀，下屬江河。其土則丹
 青赭堊，〔四〕雌黃〔五〕白垺，〔六〕錫碧〔七〕金銀，衆色炫耀，照爛龍鱗。〔八〕其石則赤玉玫
 瑰，〔九〕琳璫琨瑀，〔一〇〕城功玄厲，〔一一〕瑱石武夫。〔一二〕其東則有蕙圃〔一三〕衡蘭，芷若〔一四〕射
 干，〔一五〕穹窮〔一六〕昌蒲，江離麋蕪，諸蔗獐且。〔一七〕其南則有平原廣澤，登降陁靡，〔一八〕案衍
 壇曼，〔一九〕緣以大江，限以巫山。〔二〇〕其高燥則生葳蕤苞荔，〔二一〕薛莎青蘋。〔二二〕其卑溼〔二三〕
 則生藏蓂蒹葭，東薺〔二四〕雕胡，〔二五〕蓮藕菰蘆，〔二六〕菴藺軒芋，〔二七〕衆物居之，不可勝
 圖。〔二八〕其西則有湧泉清池，激水推移，外發芙蓉菱華，內隱鉅石白沙。其中則有神龜
 蛟鼉，〔二九〕瑇瑁〔三〇〕鼈鼉。其北則有陰林〔三一〕巨樹，梗枏豫章，〔三二〕桂椒〔三三〕木蘭，〔三四〕蘂
 離朱楊，〔三五〕檀栲栲栗，〔三六〕橘柚芬芳。〔三七〕其上則有赤猿蠨蛸，〔三八〕鵙鵙孔鸞，騰遠射
 干。〔三九〕其下則有白虎玄豹，蝮蛇羆豸，〔四〇〕兕象野犀，〔四一〕窮奇獫狁。

〔一〕〔索隱〕郭璞云：「特，獨也。」

〔二〕〔索隱〕褚詮音亡棟反，又音莫風反。裴駰云：「孫叔敖激沮水作此澤」。張揖云：「楚藪也，在南郡華容縣」。郭璞曰

「江夏安陸有雲夢城，南郡枝江亦有雲夢城。華容縣又有巴丘湖，俗云卽古雲夢澤也」。則張揖云在華容者，指

巴湖也。今安陸東見有雲夢城，雲夢縣，而枝江亦有者，蓋縣名遠取此澤，故有城也。

〔三〕集解 漢書音義曰：「高山壅蔽，日月虧缺半見。」
索隱 案：漢書注此卷多不題注者姓名，解者云是張揖，亦兼有餘人也。

〔四〕集解 徐廣曰：「一作『瑕』。」
索隱 張揖云：「赭，赤土，出少室山。璽，白璽，本草云一名白璿也。」

〔五〕正義 藥對曰：「雌黃出武都山谷，與雄黃同山。」

〔六〕集解 徐廣曰：「音符。」
駢案：漢書音義曰「白璢，白石英也。」
索隱 張揖曰：「白石英也，出魯陽山。」
蘇林

音附，郭璞音符也。

〔七〕正義 顏云：「錫，青金也。碧謂玉之青白色者也。」

〔八〕集解 郭璞曰：「如龍之鱗采。」

〔九〕集解 郭璞曰：「赤玉，赤瑾也。見楚辭。玫瑰，石珠也。」

〔一〇〕集解 漢書音義曰：「琳，球也。珉，石次玉者，珉瑀，山名也，出善金，尸子曰『昆吾之金』者。」
索隱 琨瑀，

司馬彪云「石之次玉者」。按：河圖云「流州多積石，名昆吾石，鍊之成鐵，以作劍，光明昭如水精」。案：字或作

「昆吾」。

〔二〕集解 徐廣曰：「城音古咸反，功音勒，皆次玉者。」
駢案：漢書音義曰「玄厲，黑石可用磨者」。

〔三〕集解 徐廣曰：「石似玉。」
駢案：漢書音義曰「瑱石出鴈門，武夫出長沙也」。

〔三〕索隱 司馬彪云：「蕙，香草也。」
本草云：「薰草一名蕙。」
廣志云：「蕙草綠葉紫莖，魏武帝以此燒香，今東下田有此草，莖葉似麻，其華正紫也。」

〔四〕集解 漢書音義曰：「衡，杜衡也。其狀若葵，其臭如麝蕪。芷，白芷。若，杜若。」
索隱 張揖云「衡，杜衡，生

下田山」。案：山海經云「天帝之山有草，葉如葵，臭如麝蕪，可以走馬」。博物志云「一名土杏，其根一似細辛，葉似葵」。故藥對亦爲似細辛是也。蘭，張揖云「秋蘭」。芷若，張揖云「若，杜若；芷，白芷也」。本草云「一名菹」。埤蒼云「齊曰菹，晉曰藟」。字林曰「菹音昌亥反，又音昌里反。藟音火嬌反」。本草又曰「杜若，一名杜衡」。今杜若葉似薑而有文理，莖葉皆有長毛。古今名號不同，故其所呼別也。

〔一五〕索隱 廣雅云「烏蓬，射干」。本草名烏扇。

〔一六〕索隱 芎藭。司馬彪云「芎藭似藁本」。郭璞云「今歷陽呼爲江離」。淮南子云「夫亂人者，若芎藭之與藁本」。

〔一七〕集解 徐廣曰「搏音匹沃反」。駢案：漢書音義曰「江離，香草。麝蕪，蘼芷也，似蛇床而香。諸蔗，甘柘也。

搏且，蘼荷屬也」。索隱 吳錄曰「臨海縣海水中生江離，正青似亂髮，卽離騷所云者是也」。廣志云「赤葉紅華」，

則與張勃所說又別。案：今芎藭苗曰江離，綠葉白華，又不同。孟康云「麝蕪，蘼芷也，似蛇床而香」。樊光曰

「藁本一名麝蕪，根名蘼芷」。又藥對以爲麝蕪一名江離，芎藭苗也。則芎藭、藁本、江離、麝蕪並相似，非是一物

也。諸柘，張揖云「諸柘，甘柘也」。搏且，上音並卜反，下音子余反。漢書作「巴且」，文穎云「巴蕉也」。郭璞云

「搏且，蘼荷屬」。未知孰是也。

〔一八〕集解 音移糜。

〔一九〕索隱 司馬彪云「案衍，窳下；壇曼，平博也」。衍音弋戰反。

〔二〇〕集解 郭璞曰「巫山今在建平巫縣也」。

〔三一〕集解 徐廣曰「葢音針，馬藍也。蘼，或曰草，生水中，華可食。荔音力詣反。草，似蒲」。駢案：漢書音義曰

「苞，蘼也」。索隱 葢析。音針斯二音。孟康曰「葢，酸漿，江東名烏葢」。析，漢書作

「斯」，孟康云「斯，禾，似燕麥」。埤蒼又云「生水中，華可食」。廣志云「涼州地生析草，皆如中國燕麥」是也。

〔三〕集解 徐廣曰：「薛音先結反。」駟案：漢書音義曰「薛，賴蒿也。莎，鎬侯也。青蘋，似莎而大也。音煩」。

〔三〕索隱 其庫溼。庫音婢。庫，下也。

〔三四〕集解 徐廣曰：「烏桓國有薺，似蓬草，實如葵子，十月熟。」駟案：漢書音義曰「藏，似亂而葉大。葭，葭尾草也。薺，薺也。葭，蘆也」。

索隱 藏葭，郭璞云「狼尾，似茅」。薺葭音兼加。孟康云「薺葭似蘆也」。郭璞云「薺，蔽也。似薺而細小，高數尺，江東人呼爲薺蒿」。又云「葭，蘆也。似葦而細小，江東人呼爲烏蘆」。亂音五患反。蔽音敵。東薺，案續漢書云「東薺似蓬草，實如葵子，十一月熟」。廣志云「子色青黑，河西語云『貸我東薺，償我白梁』也」。

〔三五〕索隱 彫胡。案謂菰米。

〔三六〕集解 徐廣曰：「生水中。」索隱 郭璞云：「菰，蔣也。蘆，葦也。」

〔三七〕集解 漢書音義曰：「奄，閭，蒿也。軒芋，薺草也。」索隱 郭璞云：「菴閭，蒿，子可療病也。軒芋生水中，今楊州有也。」

〔三八〕集解 郭璞曰：「圖，畫也。」

〔三九〕正義 郭注山海經云：「蛟，似蛇而四脚，小頭細頸，有白嬰，大者數十圍，卵生，子如一二斛瓮，吞人。鼉，似蜥蜴而大，身有甲，皮可以冒鼓。」

〔四〇〕正義 似蜃鱗，甲有文，出南海，可以飾器物也。

〔四一〕集解 郭璞曰：「林在江北陰地。」

〔三〕**集解** 郭璞曰：「梗，杞也，似梓。枅，葉似桑。豫章，大木也，生七年乃可知也。」**正義** 案：（溫）活人云：「豫，今

之枕木也。章，今之樟木也。二木生至七年，枕樟乃可分別」。

〔三〕**正義** 郭璞云：「桂，似枇杷葉而大，白花，花而不著子，藂生巖嶺間，無雜木，冬夏常青。」案：今諸寺有桂樹，葉若枇杷而小，光靜，冬夏常青，其皮不中食，蓋二色桂樹。

〔四〕**集解** 駟案：郭璞曰「木蘭，樹，皮辛香可食」。**正義** 廣雅云：「似桂，皮辛可食，葉冬夏榮，常以冬華，其實如

小（甘）柿，辛美，南人以爲梅也。」

〔五〕**集解** 徐廣曰：「藥音扶戾反。」漢書音義曰：「離，山梨。朱楊，赤楊也。」**索隱** 朱楊，郭璞云「赤莖柳，生水

邊」，爾雅云「檉河柳是也」。

〔六〕**集解** 徐廣曰：「枿音郢。」駟案：漢書音義曰「枿，枿棗也」。

〔七〕**正義** 小曰橘，大曰柚。樹有刺，冬不凋，葉青，花白，子黃赤。二樹相似，非橙也。

〔八〕**集解** 徐廣曰：「音劬柔。」**正義** 蟬音劬，蝻音柔，皆猿猴類。

〔九〕**集解** 郭璞曰：「鵠雛，鳳屬也。孔，孔雀；鸞，鸞鳥也。」漢書音義曰：「騰遠，鳥名。射干，似狐，能緣木。」

索隱 孟康云「騰遠，鳥名」，非也。司馬彪云：「騰遠，蛇也。」郭璞云：「騰蛇，龍屬，能興雲霧。」張揖云：「射干，似狐，能緣木。」

〔一〇〕**集解** 郭璞曰：「蝮蛇，大獸，長百尋。蝮，似狸而大。」漢書音義曰：「豺，胡地野犬，似狐而小也。」**索隱** 郭璞

云：「蝮蛇，大獸，長百尋。」張揖云：「蝮，似狸而大。豺，胡地野犬，似狐而小，黑喙。」應劭音顏，韋昭一音岸。鄒誕生音苦姦反，協音，是。

〔四〕正義 兕，狀如水牛。象，大獸，長鼻，牙長一丈，俗呼爲江獫。犀，頭似獫，一角在額。漢書無此一句。

「於是乃使專諸之倫，手格此獸。」楚王乃駕馴駁之駟，〔一〕乘雕玉之輿，靡魚須之橈旂，〔二〕曳明月之珠旗，〔三〕建干將之雄戟，〔四〕左烏嗥之雕弓，〔五〕右夏服之勁箭，〔六〕陽子驂乘，織阿爲御，〔七〕案節未舒，〔八〕卽陵狡獸，麟邛邛，蹙距虛，〔九〕軼野馬而轉駒駘，〔一〇〕乘遺風而射游騏，〔一一〕儵眴淒淒，〔一二〕奮動慄至，星流霆擊，弓不虛發，中必決眚，〔一三〕洞胸達腋，絕乎心繫，獲若雨獸，揜草蔽地。於是楚王乃弭節裴回，〔一四〕翱翔容與，〔一五〕覽乎陰林，觀壯士之暴怒，與猛獸之恐懼，徼飢受詘，〔一六〕殫睹衆物之變態。

〔一〕集解 漢書音義曰：「馴，擾也。駁，如馬，白身，黑尾，一角，鋸牙，食虎豹。擾而駕之，以當駟馬也。」

〔二〕集解 郭璞曰：「以海魚須爲旛旌，言橈弱也。通帛爲旂也。」

〔三〕集解 漢書音義曰：「以明月珠綴飾旗。」

〔四〕集解 漢書音義曰：「干將，韓王劍師。雄戟，胡中有鉅，干將所造也。」〔索隱〕應劭曰：「干將，吳善冶者姓。」

如淳曰：「干將，鐵所出。」晉灼曰：「闔閭鑄干將劍。」應劭說是。方言云：「戟中小子刺者，所謂雄戟也。」周處風土記云：「戟爲五兵雄也。」鉅音巨。案：周禮「冶氏爲戈，胡三之」。注云「胡其子」也。又禮圖謂「戟支曲下爲胡」也。

〔五〕索隱 烏號之雕弓。黃帝上仙，羣臣舉弓抱之而號，見封禪書及郊祀志文。〔韓詩外傳〕云「弓工之妻曰：『此弓大山南烏號之柘。』」案：淮南子云「烏號，柘桑，其材堅勁，烏棲其上，將飛，枝勁復起，號呼其上。伐取其材爲弓，因

曰『烏號』。古史考、風俗通皆同此說也。

〔六〕集解 徐廣曰：「韋昭云夏，夏羿也。矢室名曰服。」呂靜曰：「步又謂之服也。」索隱 案：夏羿，善射者。又服，箭室之名，故云「夏服」。又夏后氏有良弓名「繁弱」，其矢亦良，即「繁弱箭服」是也。

〔七〕集解 漢書音義曰：「陽子，僭人陵陽子。織阿，月御也。」韋昭曰：「陽子，古賢也。」索隱 服虔云：「陽子，仙人陵陽子也。」張揖云：「陽子，伯樂也。孫陽字伯樂，秦繆公臣，善御者也。」服虔云：「織阿爲月御。或曰美女姣好貌。」又樂產曰：「織阿，山名，有女子處其巖，月歷巖度，躍入月中，因名月御也。」

〔八〕索隱 郭璞曰：「言頓轡也。」司馬彪云：「案轡徐行得節，故曰案節，馬足未展，故曰未舒之也」，亦（曰未）〔爲〕得也。

〔九〕集解 郭璞曰：「邛邛，似馬而色青。距虛即邛邛，變文互言之。」穆天子傳曰「邛邛距虛，日走五百里」也。」

〔一〇〕集解 徐廣曰：「轉音銳。」駉案：郭璞曰「野馬，如馬而小。駒駼，似馬。轉，車軸頭」。 索隱 轡駒駼。上音衛。轡，車軸頭也。謂車軸衝殺之。駒駼，野馬。

〔二〕集解 漢書音義曰：「遺風，千里馬。」爾雅曰：「騊，如馬，一角。不角者，騊也。」 索隱 呂氏春秋云：「遺風之乘。」古今注云：「秦始皇馬名。」韋昭云：「騊如馬，一角。」爾雅云：「騊無角曰騊。」非麒麟之騊。騊音攜。

〔三〕集解 徐廣曰：「淒音七見反。淒音力詣反。」駉案：漢書音義曰「皆疾貌」。

〔三〕集解 韋昭曰：「在目所指，中必決於眼眚也。」

〔四〕集解 郭璞曰：「或云節，今之所杖信節也。」 索隱 司馬彪云：「弭猶低也。或云節，今之所言杖（節）信（節）也。」

〔一五〕**索隱** 郭璞曰：「言自得。」

〔一六〕**集解** 徐廣曰：「飢音劇。」**駢案** 郭璞曰：「飢，疲極也。訕，盡也。言獸有倦游者，則微而取之。」**索隱** 微飢

受訕。司馬彪云：「微，遮也。飢，倦也。謂遮其倦者。」飢音劇。訕音屈。說文云：「飢，勞也。燕人謂勞爲飢。」微音古堯反。

「於是鄭女曼姬，〔一〕被阿錫，〔二〕揄紵縞，〔三〕裸纖羅，垂霧縠，〔四〕襞積褰縗，紆徐委曲，鬱橈谿谷，〔五〕紛紛袞袞，〔六〕揚施卹削，〔七〕蜚纖垂髻，〔八〕扶與猗靡，〔九〕噲呶萃蔡，〔一〇〕下摩蘭蕙，上拂羽蓋，錯翡翠之威蕤，〔一一〕繆繞玉綬，〔一二〕縹乎忽忽，若神仙之仿佛。」〔一三〕

〔一〕**集解** 郭璞曰：「曼姬謂鄧曼。姬，婦人之總稱。」**正義** 文穎云：「鄧國出好女。曼者，其色理曼澤也。」如淳

云：「鄭女，夏姬也。曼姬，楚武王夫人鄧曼。」

〔二〕**集解** 漢書音義曰：「阿，細繒也。錫，布也。」**正義** 按：東阿出繒也。

〔三〕**集解** 徐廣曰：「揄音史。」**正義** 揄，曳也。韋昭云：「紵之色若縞也。」顏云：「紵，織紵也。縞，鮮支也。」

〔四〕**集解** 郭璞曰：「言細如霧，垂以覆頭。」

〔五〕**集解** 漢書音義曰：「襞積，簡錯也。褰，縮也。縗，裁也。其縗中文理，弗鬱迟曲，有似於谿谷也。」**索隱** 小

顏云：「襞積，今之裙襴，古謂之素積。」蘇林曰：「褰縗，縮蹙之」是也。縗音側救反。錯音又革反。裁音在代反。鬱橈谿谷，孟康曰：「其縗中文理，弗鬱迟曲，有似于谿谷也。」迟，字林音丘亦反。

〔六〕索隱郭璞云：「衣長貌。」正義上芳云反，下方非反。

〔七〕集解徐廣曰：「施音迤，衣袖也。」駢案：漢書音義曰：「卬削，裁制貌也。」

〔索隱揚施戍削。張晏曰：「揚，舉

也。施，衣袖也。戍削，裁制貌也。」

〔八〕集解徐廣曰：「織音芟。」駢案：郭璞云：「織，袿衣飾；髻，髻髻也。」

〔九〕集解郭璞曰：「淮南所謂『曾折摩地，扶與猗委』也。」

〔正義興音餘。猗，於綺反。謂鄭女曼姬侍從王者，扶

其車輿而猗靡。

〔一〇〕集解漢書音義曰：「噲呬，衣裳張起也。萃蔡，衣聲也。」

〔索隱孟康曰：「噲呬，衣起張也。」韋昭云：「呬音呼

甲反。」萃蔡，孟康云：「萃蔡，衣聲也。」郭璞曰：「萃蔡猶璀璨也。」

〔正義呬，火甲反。萃音翠。蔡，千賄反。

〔一一〕集解徐廣曰：「錯音措。或作『錯粉翠蕤』。」

〔一二〕集解郭璞曰：「綏，所執以登車。」

〔正義顏云：「下摩蘭蕙，謂垂髻也。上拂羽蓋，謂飛襪也。玉綏，以玉飾綏

也。」言飛襪垂髻，錯襪翡翠之旌幡，或繞玉綏也。張揖云：「翡翠大小一如雀，雄赤曰翡，雌青曰翠。」博物志

云：「翡身通黑，唯胸前背上翼後有赤毛。翠身通青黃，唯六翮上毛長寸餘青。其飛則羽鳴翠，翡翠翡翠然，因以爲

名也。」

〔一三〕正義仿佛，言似神仙也。戰國策云：「鄭之美女粉白黛黑而立於衢，不知者謂之神仙。」

「於是乃相與獠於蕙圃，〔一〕嬰珊勃窳，〔二〕上金隄，揜翡翠，射鵝鵝，〔三〕微矰出，織繳施，〔四〕弋白鵠，連駕鵠，〔五〕雙鵠下，玄鵠加。〔六〕怠而後發，游於清池，浮文

鷁，〔七〕揚桂枻，〔八〕張翠帷，建羽蓋，罔璫瑁，鈞紫貝，〔九〕撝金鼓，吹鳴籥，〔二〇〕榜人歌，〔二一〕聲流喝，〔二二〕水蟲駭，波鴻沸，涌泉起，奔揚會，礪石相擊，礪礪礪礪，若雷霆之聲，聞乎數百里之外。

〔一〕〔集解〕郭璞曰：「獠，獵也。音遼。」〔索隱〕爾雅云：「宵獵曰獠。」郭璞曰：「獠，獵也。又音遼也。」

〔二〕〔索隱〕盤翺勃猝。韋昭曰：「盤翺，匍匐上下也。」猝音素忽反。

〔三〕〔集解〕漢書音義曰：「鷁鷁，鳥，似鳳也。」〔索隱〕司馬彪云：「鷁鷁，山雞也。」許慎云：「鷁鳥也。」郭璞曰：「似鳳，有光彩。音浚宜。」李彤云：「鷁鷁，神鳥，飛光竟天也。」

〔四〕〔集解〕徐廣曰：「繳音斫。」

〔五〕〔集解〕郭璞曰：「野鵝也。駕音加。」〔索隱〕駕鵝。爾雅云：「舒鴈，鵝也。」郭璞曰：「野鵝也。」〔正義〕鷁，水

鳥也。駕鵝連謂兼護也。抱朴子云：「千歲之鵝純白，能登於木。」

〔六〕〔集解〕郭璞曰：「詩云：『弋言加之』是也。」〔正義〕司馬彪云：「鷁似鴈而黑，亦呼爲鷁括。」韓詩外傳云：「胎生也。」

相鶴經云：「鶴壽二百六十歲則色純黑。」案：弋雙鷁既下，又加玄鶴之上也。

〔七〕〔集解〕漢書音義曰：「鷁，水鳥也。畫其象於船首。淮南子曰：『龍舟鷁首，天子之乘也。』」

〔八〕〔集解〕徐廣曰：「音曳。」駟案：韋昭曰「枻，櫂也」。

〔九〕〔集解〕郭璞曰：「紫質黑文也。」〔正義〕毛詩蟲魚疏云：「貝，水之介蟲。大者蚌，音下郎反。小者爲貝，其白質

如玉，紫點爲文，皆成行列。當大者徑一尺，小者七八寸。今九真、交趾以爲杯盤寶物也。」貨殖傳云：「貝寶龜」

是也。

〔一〇〕集解 漢書音義曰：「縱，撞也。籟，簫也。」

〔一一〕集解 郭璞曰：「唱，擢歌也。榜，船也，音滂。」

〔一二〕集解 徐廣曰：「烏邁反。」

「將息獠者，擊靈鼓，〔一〕起烽燧，車案行，騎就隊，纚乎淫淫，班乎裔裔。〔二〕於是楚王乃登陽雲之臺，〔三〕泊乎無爲，澹乎自持，勺藥之和具而後御之。〔四〕不若大王終日馳騁而不下輿，將割輪淬，自以爲娛。〔五〕臣竊觀之，齊殆不如。」於是王默然無以應僕也。」

〔一〕集解 郭璞曰：「靈鼓，六面也。」

〔二〕集解 郭璞曰：「皆羣行貌也。」

〔三〕集解 徐廣曰：「宋玉云楚王游於陽雲之臺。」駢案：郭璞曰「在雲夢之中」。

〔四〕集解 郭璞曰：「勺藥，五味也。」

〔五〕集解 徐廣曰：「淬，千內反。」駢案：郭璞曰「將，膊；淬，染也。將音爵也」。

烏有先生曰：「是何言之過也！足下不遠千里，來況齊國，〔一〕王悉發境內之士，而備車騎之衆，以出田，乃欲勦力致獲，以娛左右也，何名爲夸哉！問楚地之有無者，願聞大國之風烈，先生之餘論也。今足下不稱楚王之德厚，而盛推雲夢以爲高，奢言淫

樂而顯侈靡，竊爲足下不取也。必若所言，固非楚國之美也。有而言之，是章君之惡；無而言之，是害足下之信。章君之惡而傷私義，二者無一可，而先生行之，必且輕於齊而累於楚矣。且齊東渚巨海，〔二〕南有琅邪，〔三〕觀乎成山，〔四〕射乎之罘，〔五〕浮勃解，〔六〕游孟諸，〔七〕邪與肅慎爲鄰，〔八〕右以湯谷爲界，〔九〕秋田乎青丘，〔一〇〕傍徨乎海外，吞若雲夢者八九，其於胸中曾不蒂芥。〔二〕若乃俶儻瑰偉，異方殊類，珍怪鳥獸，萬端鱗萃，充仞其中者，不可勝記，禹不能名，契不能計。〔三〕然在諸侯之位，不敢言游戲之樂，苑囿之大；先生〔三〕又見客，〔四〕是以王辭而不復，〔五〕何爲無用應哉！

〔一〕〔集解〕郭璞曰：「言有惠況也。」

〔二〕〔索隱〕渚，蘇林音渚。小洲曰渚。謂東有大海之渚也。

〔三〕〔集解〕郭璞曰：「山名，在琅邪縣界。」〔正義〕山名，在密州東南百三十里。琅邪臺在山上。

〔四〕〔集解〕徐廣曰：「在東萊不夜縣。」〔索隱〕張揖云：「觀，闕也。於山上築宮闕。」郭璞云：「言在山下游觀，音館也。」

〔正義〕封禪書云：「成山斗入海，言上山觀也。」括地志云：「成山在萊州文登縣東北百八十里也。」

〔五〕〔集解〕漢書音義曰：「之罘山在牟平縣。」〔正義〕括地志云：「罘山在萊州文登縣西北百九十里。」

言射獵其上也。罘音浮。

〔六〕〔集解〕漢書音義曰：「海別枝名也。」〔索隱〕案：齊都賦云：「海傍曰勃，斷水曰解」也。

〔七〕〔集解〕郭璞曰：「宋之藪澤名。」〔正義〕周禮職方氏：「青州藪曰望諸」，鄭玄云：「望諸，孟諸也。」

〔八〕正義 邪謂東北接之。括地志云：「靺鞨國，古肅慎也，亦曰挹婁，在京東北八千四百里，南去扶餘千五百里，東及北各抵大海也。」

〔九〕正義 言右者，北向天子也。海外經云：「湯谷在黑齒北，上有扶桑木，水中十日所浴。」張揖云：「日所出也。」許慎云：「熱如湯。」

〔一〇〕集解 郭璞曰：「青丘，山名。亦有田，出九尾狐，在海外矣。」索隱 郭璞云：「山名。出九尾狐也。」正義 服虔云：「青丘國在海東三百里。」郭璞云：「青丘，山名。上有田，亦有國，出九尾狐，在海外。」

〔一一〕索隱 張揖曰：「刺鯁也。」郭璞云：「言不覺有也。」

〔一二〕正義 禹爲堯司空，辨九州土地山川草木禽獸。契爲司徒，敷五教，主四方會計。言二人猶不能名計其數。

〔一三〕索隱 指子虛也。

〔一四〕索隱 如淳曰：「見賓客禮待故也。」李善曰：「言見先生是（賓）客（之）也。」

〔一五〕索隱 郭璞曰：「復，答也。」

無是公听然而笑〔一〕曰：「楚則失矣，齊亦未爲得也。夫使諸侯納貢者，非爲財幣，所以述職也；〔二〕封疆畫界者，非爲守禦，所以禁淫也。〔三〕今齊列爲東藩，而外私肅慎，捐國踰限，越海而田，其於義故未可也。且二君之論，不務明君臣之義而正諸侯之禮，徒事爭游獵之樂，苑囿之大，欲以奢侈相勝，荒淫相越，此不可以揚名發譽，而適足以貶君自損也。且夫齊楚之事又焉足道邪！君未睹夫巨麗也，獨不聞天子之上林乎？」

〔一〕〔集解〕郭璞曰：「听，笑貌也。」〔索隱〕說文云：「听，笑兒。」

〔二〕〔集解〕郭璞曰：「諸侯朝於天子曰述職，言述所職。見孟子。」

〔三〕〔集解〕郭璞曰：「禁絕淫放也。」

「左蒼梧，右西極，〔一〕丹水更其南，〔二〕紫淵徑其北，〔三〕終始霸漣，出入涇渭，〔四〕酆鄩〔五〕潦瀹〔六〕，紆餘委蛇，經營乎其內。蕩蕩兮八川分流，相背而異態。〔七〕東西南北，馳騫往來，出乎椒丘之闕，行乎洲淤之浦，〔八〕徑乎桂林之中，〔九〕過乎泱莽之野。〔一〇〕汨乎渾流，順阿而下，〔一一〕赴隘陝之口。觸穹石，激堆埼，〔一二〕沸乎暴怒，洶涌滂潰，〔一三〕渾沔湍汨，〔一四〕溘測泌瀨，〔一五〕橫流逆折，轉騰激洌，〔一六〕澎湃沆漭，〔一七〕穹隆雲撓，〔一八〕蜿瀺膠戾，〔一九〕踰波趨洄，〔二〇〕莅莅下瀨，〔二一〕批礫衝壅，〔二二〕犇揚滯沛，〔二三〕臨坻注壑，〔二四〕澹澹〔三五〕實墜，〔二六〕湛湛〔二七〕隱隱，砰磅訇磕，〔二八〕潏潏沍沍，〔二九〕馳波跳沫，〔三〇〕汨湜漂疾，〔三一〕悠遠長懷，〔三二〕寂寥無聲，肆乎永歸。然後灝漭潢漾，〔三三〕安翔徐徊，翯乎滈滈，〔三四〕東注大湖，〔三五〕衍溢陂池。於是乎蛟龍赤螭，〔三六〕鯁鱗蜥離，〔三七〕鰐鱣鰐魪，〔三八〕禺禺蠺魴，〔三九〕捷鱗〔四〇〕擢尾，振鱗奮翼，潛處於深巖；魚鼈謹聲，萬物衆夥，明月珠子，玃璫江靡，〔四一〕蜀石黃磬，〔四二〕水玉磊砢，〔四三〕磷磷爛爛，采色滈盭，叢積乎其中。鴻鵠鵠鵠，𪚩𪚩鵠鵠，〔四四〕蛟鰐〔四五〕鰐目，〔四六〕煩鵠鵠鰐，〔四七〕鵠鵠鵠鵠，〔四八〕羣浮乎其

上。汎淫泛濫，〔四九〕隨風澹淡，與波搖蕩，掩薄草渚，〔五〇〕唼喋〔五一〕菁藻，〔五二〕咀嚼菱藕。

〔一〕〔集解〕郭璞曰：「西極，邠國也。見爾雅。」

〔正義〕文穎云：「蒼梧郡屬交州，在長安東南，故言左。爾雅云西至

於邠國爲極。在長安西，故言右。」

〔二〕〔集解〕漢書音義曰：「丹水出上洛冢領山。」

〔三〕〔集解〕郭璞曰：「紫淵所未詳。」

〔正義〕山海經云：「紫淵水出根耆之山，西流注河。」文穎云：「西河穀羅縣有紫

澤，（其水紫色注亦紫）在縣北，於長安爲北。」

〔四〕〔索隱〕張揖云：「灞出藍田西北而入渭。漣亦出藍田谷，北至霸陵入灞。灞漣二水盡於苑中不出，故云終始也。

涇渭二水從苑外來，又出苑去也。涇水出安定涇陽縣并頭山，東至陽陵入渭。渭水出隴西首陽縣鳥鼠同穴山，

東北至華陰入河。」

〔五〕〔索隱〕豐鎬。張揖云：「豐水出鄠縣南山豐谷，北入渭。鎬在昆明池北。」郭璞云：「鎬水，豐水下流也。」

〔六〕〔集解〕郭璞曰：「皆水流貌，音決。」

〔索隱〕應劭云：「潦，流也。漣，涌出聲也。」張揖云：「又有漣水，出南山。」

姚氏云：「潦，或作『漣』也。漣水出鄠縣，北注渭。漣水出杜陵，今名沕水，自南山皇子陂西北流注昆明池入渭。」

案：此下文「八川分流」，則從涇、渭、灞、漣、豐、鎬、潦、漣爲八。晉灼曰：「從丹水下則有九，從灞以下則七。」案：

今漣既是水名，除丹紫二川，自涇渭以下適足八川，是經營乎其內也。又潘岳關中記曰「涇、渭、灞、鎬、豐、鎬、

漣、漣，上林賦所謂『八川分流』」。

〔七〕〔集解〕郭璞曰：「八川名在上。」

〔八〕〔集解〕郭璞曰：「椒丘，丘名，言有巖闕也，見楚辭。淤亦洲名，蜀人云，見方言。」

〔索隱〕服虔云：「丘名，楚詞曰

『馳椒丘且焉止息』也。案：兩山俱起，象雙闕。如淳云：『丘多椒也。』

〔九〕集解 郭璞曰：『桂林，林名也，見南海經也。』

〔一〇〕集解 漢書音義曰：『山海經所謂大荒之野。』

〔一一〕集解 郭璞曰：『阿，大陵。』

〔一二〕集解 郭璞曰：『穹隆，大石貌。堆，沙堆。埼，曲岸頭，音祁。』索隱 郭璞曰：『堆，沙堆；埼，曲岸頭也。』

〔一三〕集解 洵音許勇反。涌音勇。滂音浦橫反。潰音浦拜反。索隱 洵湧澎湃。司馬彪云：『洵湧，跳起貌。澎湃，相戾也。』湧，或作「容」。澎，或作「滂」。

〔一四〕集解 司馬彪云：『澤沸，盛貌。密汨，去疾也。』正義 畢渤密三音。汨，于筆反。

〔一五〕集解 郭璞曰：『逼側筆櫛四音。』索隱 司馬彪云：『逼測，相迫也。泌瀋，相楔也。』郭璞云：『逼側筆櫛四音。』

〔一六〕集解 蘇林曰：『流輕疾也。』

〔一七〕集解 司馬彪云：『滂，水聲也。沆，徐流。』郭璞云：『鼓怒鬱鯁之兒也。』

〔一八〕集解 滂，音彭反。漚，音秘反。沆，胡朗反。漑，胡代反。

〔一九〕集解 穹崇雲橈。服虔云：『水旋還作泉也。』郭璞云：『水隴起回竄也。』

〔二〇〕集解 司馬彪云：『蜿，展轉也。膠戾，邪屈也。』音婉善交戾四音也。正義 蜿音婉。蟬音善。

〔二一〕集解 徐廣曰：『鳥狹反。』索隱 喻波趨洎。司馬彪云：『喻波，後陵前也。趨洎，輪于深泉也。』洎音焉浹反。

〔二二〕集解 司馬彪云：『莅莅，水聲也。』音利。

〔二三〕集解 司馬彪云：『莅莅，水聲也。』音利。

〔二四〕集解 司馬彪云：『莅莅，水聲也。』音利。

〔三〕〔正義〕批，白結反。壩，巖。司馬彪云：「批，反擊也。壩，曲隈也。」

〔三〕〔索隱〕滯沛，郭璞云「水洒散兒」。滯音丑制反。

〔四〕〔正義〕坻音遲。坻，水中沙微起出水者也。爾雅云「小汚曰坻」。壑，墟也。

〔五〕〔索隱〕上音士湛反，下音士卓反。說文云「水小聲也」。

〔六〕〔正義〕霽音隕。隕，直類反。

〔七〕〔集解〕徐廣曰：「湛音沈。」

〔八〕〔正義〕磳，披萌反。磳，蒲黃反。訇，呼宏反。礧，苦蓋反。皆水流鼓怒之聲也。

〔九〕〔集解〕郭璞曰：「潄音勅立反。潄音緝。」〔索隱〕潄潄潄潄。郭璞云，皆水微轉細涌貌。潄潄音決骨。潄音勅

力反。潄音緝。廣雅云「涘涘，決流也」。周成襍字云「潄潄，水沸之兒也」。

〔十〕〔集解〕徐廣曰：「一云『吸呷』。」

〔三〕〔索隱〕潄，晉灼曰「華給反」，郭璞云「許立反」。汨潄，急轉兒也。

〔三〕〔正義〕放散貌也。

〔三〕〔正義〕晃養二音。郭云「皆水無涯際也」。

〔四〕〔索隱〕潄音鶴。潄音鑄。詩曰「白鳥潄潄」。郭璞云「水白光兒」。潄音鼎，潄音昊也。

〔五〕〔正義〕太湖在蘇州西南。

〔六〕〔索隱〕文穎曰：「龍子曰螭。」張揖云：「雌龍也。」〔正義〕螭，丑知反。文穎云「龍子爲螭」，張揖曰「雌龍也」，二

說皆非。廣雅云：「有角曰虬，無角曰螭。」案：虬螭皆龍類而非龍。

【三】集解 徐廣曰：「蜥音漸。」駢案：郭璞曰「鯁鱠，鱠也。」音互。蜥，離未聞。正義 鯁，古鄧反。鱠，末鄧反。

李奇云：「周洛曰：鮪，蜀曰鯁。鮪，出鞏山穴中，三月遡河上，能度龍門之限，則爲龍矣。」

【六】集解 徐廣曰：「鰕音娛，匈反。皮有文，出樂浪。鰕音虔。紙音託，哆口魚。」駢案：郭璞曰「鰕似鯁而黑」。漢書音義曰「鰕似鯁而大」也。

【五】集解 徐廣曰：「禺禺，魚牛也。鰕，一作『鮪』，音榻。鮪音納，一作『鰕』。」駢案：漢書音義曰「鮪，比目魚也。」

鮪，鯁魚。

【四〇】正義 捷音乾。鰕音祁。捷，舉也。鰕者，魚背上蠶也。

【四一】集解 郭璞曰：「靡，崖也。」索隱 的皤江靡。應劭曰：「靡，邊也。明月珠子生於江中，其光耀乃照于江邊。」

張揖曰：「靡，涯也。」郭璞曰：「的皤，照也。」

【四二】集解 郭璞曰：「硬石黃色也。」

【四三】集解 郭璞曰：「水玉，水精也。」

【四四】集解 郭璞曰：「鵠，鵠霜。鵠，似鴨而大，長頸赤目，紫紺色也。」索隱 鵠音保。郭璞云：「鵠似鴈，無後指。」毛詩鳥獸疏云：「鵠似鴈而虎文也。」正義 鵠，鵠，燭玉二音。郭云：「似鴨而大，長頸赤目，紫紺色。辟水毒，生子在深谷澗中。若時有雨，鳴。雌者生子，善鬪。江東呼爲燭玉。」

【四五】正義 郭云：「鵠，似鴈而脚高，有毛冠，辟火災。」

【四六】集解 徐廣曰：「鵠音環。」索隱 鵠目。郭璞云未詳。小顏云：「荆郢間有水鳥，大如鷺而短尾，其色紅白，深目，目旁毛長而旋，此其旋目乎？」鵠音旋。

〔四七〕集解 徐廣曰：「煩驚，一作『番驚』。鵠音容。」駢案：漢書音義曰「煩驚，鳧也。鵠鵠似驚，灰色而雞足」。

〔索隱〕煩驚鵠渠。郭璞云：「煩驚，鴨屬。鵠渠，一名章渠也。」

〔四八〕集解 徐廣曰：「鷖音斟。水鳥也。鷖音斯。鷖音火交反。」駢案：漢書音義曰「鷖鷖，蒼黑色」。郭璞曰「鷖，魚

鷖也，脚近尾。鷖，鷖鷖也」。〔索隱〕鷖鷖。張揖云「鷖鷖似魚虎而蒼黑」。鄒誕本作「鷖鷖」也。

〔四九〕索隱 郭璞云：「皆鳥任風波自縱漂兒。」汎音馮。汎音芳劍反。廣雅云：「汎汎，汜汜，浮也。」

〔五〇〕索隱 張揖云：「掩，覆也。草叢生曰薄也。」〔正義〕掩，覆也。薄，依也。言或依草渚而遊戲也。

〔五一〕正義 唆，疏甲反。喋，丈甲反。鳥食之聲也。

〔五二〕集解 郭璞曰：「菁，水草。」呂氏春秋曰「太湖之菁」也。〔索隱〕郭璞云：「菁，水草；藻，聚也。」呂氏春秋曰「太

湖之菁」。左傳云「蘋蘩蘊藻」。蘊卽聚。」

於是乎崇山巖崑，崔巍嵯峨，〔一〕深林鉅木，嶄巖參嵯，〔二〕九峩、巖巖、南山峨峨，〔三〕巖陁，〔四〕巖錡，摧委崛崎，〔五〕振谿通谷，〔六〕蹇產溝瀆，〔七〕谿呀谿間，〔八〕自陵別島，〔九〕歲硯崑崙，〔一〇〕丘虛崛嶇，〔一一〕隱鱗鬱嶇，〔一二〕登降施靡，〔一三〕陂池獬豸，〔一四〕沈溶淫鬻，〔一五〕散渙夷陸，〔一六〕亭皋千里，靡不被築。〔一七〕掩以綠蕙，〔一八〕被以江離，糅以蘼蕪，〔一九〕雜以流夷。〔二〇〕專結縷，〔二一〕欝戾莎，〔二二〕揭車衡蘭，稟本射干，〔二三〕茝蘘，〔二四〕蘘荷，〔二五〕葳橙若蓀，〔二六〕鮮枝黃礫，〔二七〕蔣茅青蘋，〔二八〕布濩閎澤，延曼太原，麗靡廣衍，應風披靡，吐芳揚烈，〔二九〕郁郁斐斐，衆香發越，肸蠁布寫，曖曖苾勃。〔三〇〕

〔一〕正義 龍，力孔反。從，子孔反。崔，在回反。巍，五回反。郭云：「皆峻貌。」

〔二〕正義 嶄音咸，又仕銜反。參音楚林反。嶄楚宜反。顏云：「嶄巖，尖銳貌。參，不齊也。」

〔三〕集解 漢書音義曰：「九畹山在左馮翊谷口縣西。嶄，薛山在池陽縣北。」正義 畹，子公反。嶄，才切反。薛，

五結反。

〔四〕集解 音遲。

〔五〕集解 郭璞曰：「陟，崖際。覲音魚晚反。嶄音蟻。摧音作罪反。」索隱 摧參嶄崎，郭璞云：「皆崇屈竄折兒。」

摧音作罪反。參音委。嶄音掘。崎音倚。」

〔六〕索隱 張揖云：「振，拔也。水注川曰溪，注溪曰谷。」郭璞曰：「振猶灑也。」

〔七〕集解 漢書音義曰：「蹇，屈折也。」

〔八〕集解 郭璞曰：「皆澗谷之形容也。豁音呼含反。呀音呼加反。聞音呼下反。」索隱 豁呀豁聞。司馬彪云

「豁呀，大兒。豁聞，空虛也。」

〔九〕正義 高平曰陸，大陸曰阜，大阜曰陵，水中山曰島。

〔一〇〕正義 崑，於鬼反。磈，魚鬼反。崑，烏罪反。瘳，胡罪反。皆高峻貌。

〔一一〕正義 虛音墟。崑，口忽反，又口罪反。崑，力罪反。皆堆壘不平貌。

〔一二〕正義 嶄音律。郭云：「皆其形勢也。」

〔一三〕正義 郭云：「施靡猶連延。」

〔一四〕集解 郭璞曰：「裊音衣被。豸音蟲豸也。」索隱 郭璞曰：「陂池，旁積兒。陂音皮。裊音『衣被』之『被』。」

〔一五〕**索隱** 郭璞云：「游激淖衍兒。」**正義** 溶音容。嚮音育。張云：「水流谿谷之間。」

〔一六〕**索隱** 司馬彪曰：「平地。」

〔一七〕**集解** 郭璞曰：「言爲亭候於皋隰，皆築地令平，賈山所謂『隱以金椎』也。」

〔一八〕**正義** 張云：「綠，王芻也。蕙，薰草也。」顏云：「綠蕙，言蕙草色綠耳，非王芻也。」爾雅云：「葍一名王芻。」

〔一九〕**正義** 糅，女又反。

〔二〇〕**集解** 漢書音義曰：「流夷，新夷也。」

〔二一〕**集解** 徐廣曰：「專，古『布』字，一作『布』。」駟案：漢書音義曰「結縷似白茅，蔓聯而生，布種之者」。

〔二二〕**集解** 徐廣曰：「草，可染紫。」

〔二三〕**集解** 徐廣曰：「揭音桀。」駟案：郭璞曰「揭車，一名乞輿。稟本，稟芟；射干，十月生，皆香草」。

索隱 稟

本，案桐君藥錄云「苗似穹窮也」。

〔二四〕**索隱** 張揖云：「子薑也。」案：四人月令云「生薑謂之茈薑，音紫」。

〔二五〕**正義** 蘘，人羊反。柯根旁生筍，若芙蓉，可以爲蒞，又治蠱毒也。

〔二六〕**集解** 郭璞曰：「葍，未詳。橙，柚。若蓀，香草也。」**索隱** 張揖云：「葍，持闕。」郭璞云：「橙，柚也。」姚氏以爲

此前後皆草，非橙也。小顏云：「葍，寒漿也。持當爲『符』，符，鬼目也。」案：今讀者亦呼爲登，謂金登草也。張揖云：「蓀，香草。」姚氏云：「蓀草似昌蒲而無脊也，生溪澗中。蓀音孫。」

〔二七〕**集解** 郭璞曰：「皆未詳。」**索隱** 鮮支黃礫。張揖云：「皆草也，未詳。」司馬彪云：「鮮支，支子。或云鮮支亦

香草也。」小顏云「黃礫，黃屑木」，恐非也。

〔三六〕集解 徐廣曰：「茅音佇。」駟案：漢書音義曰「蔣，菰也。茅，三稜」。〔索隱〕蔣，菰也。郭璞茅音佇。又云三稜茅。積音煩。

〔三九〕集解 郭璞曰：「香酷烈也。」

〔三〇〕正義 晻曖，奄愛二音。皆芳香之盛也。詩云「苾苾芬芬」，氣也。

「於是乎周覽泛觀，瞋盼軋沕，〔一〕芒芒恍忽，視之無端，察之無崖。日出東沼，入於西陂。〔二〕其南則隆冬生長，踊水躍波，獸則犗旄獬犛，〔三〕沈牛麋麋，〔四〕赤首圓題，〔五〕窮奇象犀。〔六〕其北則盛夏含凍裂地，涉冰揭河；〔七〕獸則麒麟〔八〕角端，〔九〕騊駼橐駝，蛩蛩驪驤，馱馱驢騾。〔一〇〕」

〔一〕集解 徐廣曰：「瞋音丑人反。盼，一作『繒』。」駟案：郭璞曰「皆不可分貌」。

〔二〕索隱 張揖云：「日朝出苑之東池，暮入于苑西陂中也。」

〔三〕集解 徐廣曰：「犗音容，獸類也。犛音狸，一音茅。」駟案：郭璞曰「旄，旄牛。獬似熊，庫脚銳頭。犛牛，黑色，出西南徼外也」。

〔索隱〕郭璞云：「犗，犗牛，領有肉堆，音容。」案：今之犛牛也。張揖云「旄，旄牛，狀如牛而四節生毛。獬，白豹也，似熊，庫脚銳頭，骨無髓，食銅鐵。音陌。犛音狸，又音茅，或以爲貓牛。犛牛黑色，出西南徼外，毛可爲拂是也」。

〔四〕集解 漢書音義曰：「沈牛，水牛也。」

〔正義〕麋似鹿而大。案：麋似水牛。

〔五〕集解 郭璞曰：「題，額也，所未詳。」

〔六〕〔集解〕漢書音義曰：「窮奇狀如牛而蝟毛，其音如嗥狗，食人也。」〔索隱〕張揖云：「窮奇狀如牛而蝟毛，其音如

嗥狗，食人。」郭璞云：「象，大獸，長鼻，牙長一丈。犀，頭似豬，庫脚，一角在頭也。」

〔七〕〔集解〕郭璞曰：「言水漫凍不解，地坼裂也。揭，褰衣。」

〔八〕〔索隱〕張揖曰：「雄曰麒麟，雌曰麟。其狀麋身，牛尾，狼蹄，一角。」郭璞云：「麒麟似麟而無角。」〔毛詩疏〕云：「麟黃色，角端有肉。」京房傳云：「有五采，腹下黃色也。」

〔九〕〔集解〕郭璞曰：「角端，音端，似豬，角在鼻上，堪作弓。」李陵嘗以此弓十張遺蘇武也。」〔索隱〕張揖云：「音端。

角端似牛。」郭璞云：「似豬，角在鼻上。」〔毛詩疏〕云可以爲弓。」李陵曾以此弓遺蘇武。」

〔一〇〕〔正義〕駒駼，桃徒二音。橐音託。駝，徒河反。蚤音其恭反。驪驥，顛奚二音。駃騠音決啼。

「於是乎離宮別館，彌山跨谷，〔一〕高廊四注，重坐曲閣，〔二〕華榱壁璫，〔三〕輦道纚屬，步櫺周流，長途中宿。〔四〕夷廌築堂，累臺增成，巖突洞房，〔五〕俛杳眇而無見，仰攀椳而捫天，奔星更於閨闥，宛虹拖於楹軒。〔六〕青虬蚺蟠於東箱，〔七〕象輿婉蟬於西清，〔八〕靈囿〔九〕燕於閒觀，偃佺〔一〇〕之倫暴於南榮，〔二〕醴泉涌於清室，通川過乎中庭。檠石振崖，〔三〕嶽巖倚傾，嵯峨磈礧，〔四〕刻削崢嶸，〔五〕玫瑰碧琳，珊瑚叢生，〔六〕璚玉旁唐，〔七〕璚編文鱗，〔八〕赤瑕駁犖，〔九〕雜沓其間，〔一〇〕垂綏琬琰，和氏出焉。〔一一〕」

〔一〕〔正義〕彌，滿也。跨猶騎也。言宮館滿山，又跨谿谷也。

〔二〕〔集解〕郭璞曰：「重坐，重軒也。曲閣，閣道曲也。」

〔三〕**索隱** 韋昭曰：「裁玉爲璧，以當櫟頭。」司馬彪曰：「以璧爲瓦當。」

〔四〕**集解** 郭璞曰：「途，樓閣閒陞道。中宿言長遠也。」

〔五〕**集解** 郭璞曰：「窰，山名。平之以安堂其上。成亦重也。」周禮曰：「爲壇三成」。在巖穴底爲室，潛通臺上者。

索隱 服虔云：「平此山以爲堂。」如淳云：「窰，山名也。」張揖云：「重累而成之，故曰增成。」禮曰：「爲壇三成」也。郭璞曰：「言在巖穴底爲室，潛通臺上。」突音一弔反，釋名以爲突，幽也。楚辭云：「冬有突厦夏屋寒」，王逸以爲複室也。

〔六〕**集解** 徐廣曰：「楯音食尹反。」**正義** 拖音徒我反。顏云：「宛虹，屈曲之虹。拖謂中加於上也。楯，軒之闌板也。言室宇之高，故星虹得經加之。」

〔七〕**正義** 蚺，一紕反。蟪，力紕反。

〔八〕**集解** 漢書音義曰：「山出象輿，瑞應車也。」郭璞曰：「西清，西箱清淨地也。」**正義** 婉蟬，宛善二音。顏云：

「蚺蟪婉蟬，皆行動之貌也。」

〔九〕**集解** 郭璞曰：「靈圜，淳圜，仙人名也。」**索隱** 張揖云：「衆仙號。」淮南子云：「騎飛龍，從淳圜」，許慎曰：「淳

圜，仙人也。」

〔一〇〕**集解** 漢書音義曰：「偃佺，仙人名也。」**索隱** 韋昭曰：「古仙人，姓偃。」列仙傳云：「槐里採藥父也，食松，形

體生毛數寸，方眼，能行追走馬也。」

〔一一〕**索隱** 應劭云：「屋檐兩頭如翼也。」故鄭玄云：「榮，屋翼也。」七誘云：「飛榮似鳥舒翼」是也。暴，偃卧日中也。

〔一二〕**集解** 徐廣曰：「振音振。」**索隱** 盤石振厓。如淳曰：「振音振，盛多也。」李奇曰：「振，整也，整頓池外之厓，

音之忍反也。」

〔三〕集解 徐廣曰：「莪，一作『池』。磳音雜。磳音五合反。」

〔索隱〕磳磳，埤蒼云「高兒也」。上土劫反，下魚揖反。

又字林音磳，才市反。磳，五市反。

〔四〕正義 郭云：「言自然若彫刻也。」

〔五〕正義 郭云：「珊瑚生水底石邊，大者樹高三尺餘，枝格交錯，無有葉。」

〔六〕索隱 郭璞云：「旁唐言盤薄。」

〔七〕集解 徐廣曰：「璵音彬。編音班。」

〔八〕索隱 赤瑕駁犖。說文云：「瑕，玉之小赤色。」張揖曰：「赤玉也。」司馬彪曰：「駁犖，采點也。犖音洛角反。」

〔九〕集解 徐廣曰：「雜，一云『插』。畝，一云『逯』。」

〔一〇〕集解 徐廣曰：「垂綴，一作『朝采』。」駟案：郭璞曰「汲冢竹書曰『桀伐岷山，得女二人，曰琬曰瑛。桀愛二女，

斷其名于苕華之玉』。苕是琬，華是瑛也」。

「於是乎盧橘夏孰，〔一〕黃甘橙棣，〔二〕枇杷樛柿，〔三〕檮柰厚朴，〔四〕栲棗〔五〕楊梅，〔六〕櫻桃〔七〕蒲陶，〔八〕隱夫鬱棗，〔九〕羅乎後宮，列乎北園。鮑丘陵，〔一〇〕下平原，揚翠葉，机紫莖，〔一一〕發紅華，秀朱榮，煌煌扈扈，照曜鉅野。沙棠櫟櫨，〔一二〕華汜櫨櫨，〔一三〕留落胥餘，仁頻并閭，〔一四〕欒檀木蘭，豫章女貞，〔一五〕長千仞，大連抱，夸條直暢，實葉蔭茂，攢立叢倚，連卷累佹，崔錯發散，〔一六〕阮衡聞珂，〔一七〕垂條扶於，落英幡

纚，〔一〕紛容蕭蔘，旖旎從風，〔二〕瀏莅崑吸，〔三〕蓋象金石之聲，〔四〕管籥之音。〔五〕柴池
芘虎，〔六〕旋環後宮，雜還累輯，〔七〕被山緣谷，循阪下隰，視之無端，究之無窮。

〔一〕集解 郭璞曰：「今蜀中有給客橙，似橘而非，若柚而芬香，冬夏華實相繼，或如彈丸，或如拳，通歲食之，卽盧橘也。」

〔索隱〕應劭曰：「伊尹書『果之美者，箕山之東，青鳥之所，有盧橘，夏孰。』」晉灼曰：「此雖賦上林，博引異方珍奇，不係於一也。」案：廣州記云：「盧橘皮厚，大小如甘，酢多，九月結實，正赤，明年二月更青黑，夏孰。」吳錄云：「建安有橘，冬月樹上覆裹，明年夏色變青黑，其味甚甘美。」盧卽黑是也。

〔二〕集解 徐廣曰：「音湊，橘屬。」

〔三〕集解 徐廣曰：「燃音而善反，果也。」

〔索隱〕張揖曰：「燃，燃支，香草也。」韋昭曰：「燃音汝蕭反。」郭璞云：

「燃支，木也。燃音烟。」徐廣曰：「燃，棗也，而善反。」說文曰：「燃，酸小棗也。」淮南子云：「伐燃棗以爲矜。」音勤也。

〔四〕集解 徐廣曰：「棹音亭，山梨。」

〔索隱〕張揖云：「棹奈，山梨也。」司馬彪曰：「上黨謂之棹奈。」齊都賦云：「棹

奈棕熟」也。厚朴，藥名。

〔五〕集解 徐廣曰：「棹音弋井反。棹棗似柿。」

〔索隱〕上音弋井反。棹棗似柿也。

〔六〕索隱 張揖云：「其大小似穀子而有核，其味酢。出江南。」荆楊異物志：「其實外肉著核，熟時正赤，味甘酸。」

〔七〕索隱 張揖曰：「一名含桃。」呂氏春秋：「爲鷩鳥所含，故曰含桃。」爾雅云：「爲荆桃也。」

〔八〕集解 郭璞曰：「蒲陶似燕薹，可作酒也。」

〔九〕集解 徐廣曰：「鬱，一作『薹』。薹音苔。」駢案：郭璞曰：「鬱，車下李也。棣，實似櫻桃。檇，似李。棣音逮。」

標音沓。隱夫未聞。

〔索隱〕 荅逯離支。

郭璞云：「荅逯似李，出蜀。」晉灼曰：「離支大如雞子，皮麤，剥去皮，

肌如雞子中黃，其味甘多酢少。」廣異志云：「樹高五六丈，如桂樹，綠葉，冬夏青茂，有華朱色。」離字或作「荔」，

音力致反。

〔一〇〕〔集解〕 郭璞曰：「貽猶延也，音施。」

〔索隱〕 貽丘陵。郭璞曰：「貽，延也。」

〔一一〕〔集解〕 郭璞曰：「机，搖也。」

〔一二〕〔集解〕 漢書音義曰：「沙棠似棠，黃華赤實，其味如李。」

呂氏春秋曰：「果之美者沙棠之實。」櫟，果名。櫟似枰，葉

冬不落也。」

〔一三〕〔集解〕 徐廣曰：「汜，一作『楓』。」駟案：漢書音義曰「華，木，皮可以爲索也」。

〔索隱〕 華楓櫟。張揖曰：「華皮

可以爲索。」古今字林云：「櫟，合樺之木。楓，木，厚葉弱支，善搖。」郭璞云：「似白楊，葉圓而岐，有脂而香。榧

爲舍人曰：「楓爲樹厚葉弱莖，大風則鳴，故曰楓。」爾雅云一名楸。榧枰卽平仲木也。櫟，今黃櫟木也。一云玉

精，食其子得仙也。

〔一四〕〔集解〕 徐廣曰：「頻，一作『賓』。」駟案：郭璞曰「落，櫟也。胥餘似并閭。并閭，櫟也，皮可作索。餘未詳」。

〔索隱〕 留落胥邪。晉灼云：「留落，未詳。」郭璞曰：「落，櫟也，中作器索。胥邪似并閭。」司馬彪云：「胥邪，樹

高十尋，葉在其末。」異物志：「實大如瓠，繫在顛，若挂物。實外有皮，中有核，如胡桃。核裏有膚，厚半寸，如豬

膏。裏有汁斗餘，清如水，味美於蜜。」孟康曰：「仁頻，櫟也。」張揖云：「并閭皮可爲索。」姚氏云：「櫟，一名櫟，

卽仁頻也。」林邑記云：「樹葉似甘蕉。」頻音賓。

〔一五〕〔集解〕 漢書音義曰：「櫟，檀，檀別名也。女貞，木，葉冬不落。」

〔索隱〕 櫟音讒，檀別名也。皇覽云：「孔子墓後有

槐檀樹」也。荊州記云：「宜都有喬木，叢生，名爲女貞，葉冬不落。」

〔一六〕集解古「委」字。

〔一七〕集解徐廣曰：「發音拔。」駟案：郭璞曰「訖音委。聞音惡可反。訖音魯可反。」索隱崔錯發訖，郭璞云「婦

戾相摻」。楚詞云林木。發音跋。訖音委。阮衡聞訖，郭璞云「揭擊傾欹兒」。

〔一八〕集解郭璞曰：「扶於猶扶疏也。幡纒，偏幡也，音灑。」索隱張晏云：「飛揚兒。」纒音所綺反。

〔一九〕索隱張揖云：「旖旎，阿那也。」

〔二〇〕集解徐廣曰：「莅音栗。」索隱劉莅崱歛。郭璞云：「皆林木鼓動之聲。瀏音留。莅如字，又音栗也。」

〔二一〕正義金，鐘。石，磬。

〔二二〕正義廣雅云：「象簫，長一尺，圍一寸，有六孔，無底。簫謂之笛，有七孔。」說文云：「簫，三孔簫也。」

〔二三〕集解徐廣曰：「柴音差。虬音豸。」索隱張揖曰：「柴池，參差也。此虬，不齊也。柴音差。虬音惻氏反。」

〔二四〕集解徐廣曰：「雜，一作『插』。」

「於是玄猿素雌，雌獾飛鷗，〔一〕蛭蜩蠓蝶，〔二〕蜥胡黽蛇，〔三〕棲息乎其間；長嘯哀鳴，翩幡互經，〔四〕天矯枝格，偃蹇杪顛。〔五〕於是乎隄絕梁，〔六〕騰殊榛，〔七〕捷垂條，〔八〕蹕稀閒，〔九〕牢落陸離，爛曼遠遷。〔一〇〕」

〔一〕集解徐廣曰：「雌音于季反。」駟案：漢書音義曰「雌似獼猴，仰鼻而長尾。獼似獼猴而大。飛鷗，飛鼠也。其狀如兔而鼠首，以其額飛也。」索隱張揖曰：「雌似獼猴，仰鼻而長尾。獼似獼猴而大。飛鷗，飛鼠也。其狀

如兔而鼠首，以其額飛。」郭璞曰：「蠋，飛鼠也。毛紫赤色。飛且生，一名飛生。雌音遺。蠋音誅。玄獼，獼之雄者色也。素雌，獼之雌者色也。」獼音獼。雌似猴，尾端爲兩歧，天雨便以尾窒鼻兩孔。郭璞云：「獼色蒼黑，能攫搏人，故云獼也。」

〔三〕〔集解〕徐廣曰：「蛭音質。」駢案：漢書音義曰「山海經曰『不咸之山有飛蛭，四翼』」。郭璞曰「蠲蟪似獼猴而黃。蛭未聞」。〔索隱〕蛭，蠲蟪。司馬彪云：「山海經云『不咸之山有飛蛭，四翼』」。蛭，蟪也。蠲蟪，獼猴也。郭

璞云：「蛭，蠲蟪未聞。」如淳曰：「蛭音質。」顧氏云：「獼音塗卓反。山海經曰『皋塗山下有獸，似鹿，馬足人首，四角，名爲獼』。獼，獼即此也。字作『獼』。郭璞云獼，非也。上已有雌獼，此不應重見。又神異經云『西方深山有獸，毛色如猴，能緣高木，其名曰蛭』。字林：蠲音狄，蛭音質，蛭，蠲二獸名。」

〔三〕〔集解〕徐廣曰：「獼音在廉反，似獼，黑身。穀音呼谷反。蛭音詭。」駢案：漢書音義曰「穀，白狐子也」。〔索隱〕

獼胡穀蛭。張揖曰：「獼胡似獼猴，頭上有髦，腰以後黑。」郭璞曰：「穀似貍而大，腰以後黃，一名黃腰，食獼猴。穀，白狐子也。蛭未聞。」姚氏案：山海經「卽山有獸，狀如龜，白身赤首，其名曰蛭」。又說文云「獼胡黑身，白腰若帶，手有長白毛，似握板也」。

〔四〕〔正義〕郭云：「互經，互相經過。」

〔五〕〔正義〕天音妖。蟪音矯。杪音弭沼反。郭云：「皆獼猴在樹共戲恣態也。天蟪，頻申也。」

〔六〕〔正義〕張云：「絕梁，斷橋也。」郭云：「梁，厚石絕水也。」

〔七〕〔正義〕榛，仕斤反。（爾）〔廣〕雅云「木叢生爲榛」也。殊，異也。

〔八〕〔正義〕捷音才業反。張云：「捷持懸垂之條。」

〔九〕集解 郭璞曰：「蹕，縣蹕也，託釣反。」

〔索隱〕蹕，懸蹕也。

〔一〇〕正義 郭云：「奔走崩騰狀也。」顏云：「言其聚散不常，雜亂移徙。」

「若此輩者，數千百處。嬉游往來，宮宿館舍，庖廚不徙，後宮不移，〔一〕百官備具。」

〔一〕正義 說文云：「庖，廚屋。」鄭玄注周禮云：「庖之言苞也。苞，裹肉曰苞苴也。」後宮，內人也。言官館各自有。

「於是乎背秋涉冬，天子校獵。乘鏤象，六玉虬，〔一〕拖蜺旌，〔二〕靡雲旗，〔三〕前皮軒，後道游，〔四〕孫叔奉轡，衛公驂乘，〔五〕扈從橫行，出乎四校之中。〔六〕鼓嚴簿，縱獠者，〔七〕江河爲隄，泰山爲櫓，〔八〕車騎蠶起，隱天動地，先後陸離，離散別追，淫淫裔裔，緣陵流澤，雲布雨施。」

〔一〕集解 徐廣曰：「以玉爲飾。」駟案：郭璞曰「鏤象山所出與，言有雕鏤。虬，龍屬也。」韓子曰：「黃帝駕象車六交。」

龍是也。」

〔二〕正義 拖音徒可反。張云：「析毛羽，染以五采，綴以鏤爲旌，有似虹蜺氣。」

〔三〕正義 張云：「畫熊虎於旌似雲氣也。」

〔四〕集解 郭璞曰：「皮軒，革車也。或曰即曲禮『前有士師，則載虎皮』者也。道，道車；游，游車；皆見周禮也。」

〔五〕集解 漢書音義曰：「孫叔者，太僕公孫賀也。衛公者，衛青也。太僕御，大將軍驂乘也。」

〔索隱〕孫叔，鄭氏云

太僕公孫賀。衛公，大將軍衛青也。案：大駕出，太僕御，大將軍驂乘也。

〔六〕集解 郭璞曰：「言跋扈縱恣，不安鹵簿矣。」

〔索隱〕晉灼曰：「扈，大也。」張揖曰：「跋扈縱橫，不案鹵簿也。」

文穎曰：「凡五校，今言四者，一校隨天子乘輿也。」

〔七〕集解 漢書音義曰：「鼓嚴，嚴鼓也。簿，鹵簿也。」駟謂鼓嚴於林薄之中，然後縱獠也。

〔索隱〕張揖曰：「鼓，

嚴鼓也。簿，鹵簿也。謂擊嚴鼓於鹵簿中也。」

〔八〕集解 郭璞曰：「櫓，望樓也。因山谷遮禽獸爲陸，音去車反。」

〔索隱〕郭璞曰：「因山谷遮禽獸爲陸。櫓，望樓

也。」

「生貔豹，〔一〕搏豺狼，〔二〕手熊羆，〔三〕足野羊，〔四〕蒙鶡蘇，〔五〕誇白虎，〔六〕被幽文，〔七〕跨野馬。〔八〕陵三峩之危，〔九〕下磧歷之坻，〔一〇〕徑陵赴險，越壑厲水。推蜚廉，〔一二〕弄解豸，〔一三〕格瑕蛤，鋌猛氏，〔一四〕冒騶裒，射封豕。〔一五〕箭不苟害，解脰陷腦，〔一六〕弓不虛發，應聲而倒。於是乎乘輿彌節裴回，翺翔往來，睨部曲之進退，覽將率之變態。然後浸潭促節，〔一七〕儵復遠去，〔一八〕流離輕禽，蹴履狡獸，轉白鹿，捷狡兔，〔一九〕軼赤電，遺光耀，〔二〇〕追怪物，出宇宙，〔二一〕彎繁弱，〔二二〕滿白羽，〔二三〕射游梟，櫟蜚虞，〔二四〕擇肉後發，先中命處，弦矢分，藝殪仆。〔二五〕

〔一〕集解 郭璞曰：「貔，執夷，虎屬也，音毗。」

〔二〕正義 搏，擊也。杜林云：「豺似狐，白色。」說文云：「狼爪。」

〔三〕正義 張云：「熊，犬身人足，黑色。羆大於熊，黃白色。皆能攀沿上高樹。冬至入穴而蟄，始春而出也。」

〔四〕集解 郭璞曰：「野羊如羊，千斤。手足，謂拍踰殺之。」

〔五〕集解徐廣曰：「蘇，尾也。」索隱孟康曰：「鷓尾也。蘇，析羽也。」張揖曰：「鷓似雉，鬬死不卻。」案：蒙謂覆

而取之。鷓以蘇爲奇，故特言之以成文耳。鷓音曷。決疑注云：「鳥尾爲蘇」也。

〔六〕集解徐廣曰：「綉音袴。」駢案郭璞曰：「綉謂絆絡之。」索隱張揖曰：「著白虎文綉。」郭璞曰：「綉謂絆絡

也。」

〔七〕集解郭璞曰：「著斑衣。」索隱被斑文。文穎曰：「著斑文之衣。」輿服志云：「虎賁騎被虎文單衣」，單衣卽此

斑文也。」

〔八〕索隱跨蹙馬。案：蹙音野。跨，乘之也。

〔九〕集解漢書音義曰：「三峩，三成之山。」

〔一〇〕集解郭璞曰：「磧歷，阪名也。」正義坻音遲。磧歷，淺水中沙石也。坻，水中高處。言獵人下此也。

〔一一〕集解郭璞曰：「飛廉，龍雀也，鳥身鹿頭者。」索隱椎蜚廉。郭璞曰：「飛廉，龍雀也，鳥身鹿頭，象在平樂觀。」

椎音直追反。

〔一二〕集解漢書音義曰：「解豸似鹿而一角。人君刑罰得中則生於朝廷，主觸不直者。可得而弄也。」索隱張揖

曰：「解豸似鹿而一角。人君刑罰中則生於朝，主觸不直者。言今可得而弄也。」解音蟹。豸音丈妳反，又音丈

介反。

〔一三〕集解漢書音義曰：「蝦蛤、猛氏皆獸名。」索隱格蝦蛤，鉦猛氏。孟康曰：「蝦蛤、猛氏皆獸名。」晉灼曰：「蝦

蛤闕。」郭璞曰：「今蜀中有獸，狀如熊而小，毛淺有光澤，名猛氏。」說文云：「鉦，小矛也」，音蟬。

〔一四〕集解郭璞曰：「騶裊，神馬，日行萬里。兩音竊嫻。封豕，大豬。」

〔五〕索隱張揖云：「脰，頸也。」陷音苦念反，亦依字讀也。

〔六〕索隱浸潭猶漸苴也。漢書作「浸淫」。或作「乘輿案節」也。潭音尋。

〔七〕集解郭璞曰：「復音詡盛反。」

〔八〕集解徐廣曰：「轄音銳。一作『惠』也。」

〔正義〕轄音衛。抱朴子云：「白鹿壽千歲，滿五百歲色純白也。」晉徵

祥記云：「白鹿色若霜，不與他鹿爲羣。」

〔九〕集解徐廣曰：「超陵亦電，電光不及，言去速也。」

〔一〇〕正義怪物，謂游臯飛虞也。張揖云：「天地四方曰宇，往古來今曰宙。」許慎云：「宙，舟輿所極也。」案：許說

宙是也。

〔一一〕正義上烏繁反。文穎云：「彎，牽也。繁弱，夏后氏良弓名。左傳云：『分魯公以夏后之璜，封父之繁弱。』」

〔一二〕正義文穎云：「引弓盡箭鏑爲滿。以白羽羽箭，故云白羽也。」

〔一三〕集解郭璞曰：「臯，臯羊也。似人，長脣，反踵，被髮，食人。蜚虞，鹿頭龍身，神獸。櫟，梢也。」

〔一四〕集解徐廣曰：「射準的曰藝。仆音赴。」

「然後揚節而上浮，陵驚風，歷駭魑，〔一〕乘虛無，與神俱，〔二〕麟玄鶴，〔三〕亂昆雞，

道孔鸞，促駿鷁，拂鷺鳥，捎鳳皇，〔四〕捷駕雛，掩焦明。〔五〕

〔一〕正義魑音必遙反。爾雅云扶搖暴風，從下上升，故曰魑。

〔二〕正義張揖云：「虛無寥廓，與天通靈，言其所乘氣之高，故能出飛鳥之上而與神俱也。」

〔三〕集解徐廣曰：「麟音瞞。」〔正義〕麟音吝。鶴二百六十歲則淺黑色也。

〔四〕集解漢書音義曰：「遁，秦由反。鷺，鳥雞反。」張云：「山海經云九疑之山有五采之鳥，名曰鷺鳥也。」〔正義〕

捎，山交反。京房易傳云：「鳳皇，鴈前麟後，雞喙燕頤，蛇頸龜背，魚尾駢翼，高丈二尺。」東山經云：「其狀如鶴，五采，而首文曰經，翼文曰順，背文曰義，膺文曰仁，股文曰信。是鳥自歌自舞，雄曰鳳，雌曰皇。」

〔五〕集解焦明似鳳。索隱張揖曰：「焦明似鳳，西方鳥。」樂叶圖徵曰：「焦明狀似鳳皇。」宋衷曰水鳥。

〔正義〕案：長喙，疏翼，員尾，非幽閑不集，非珍物不食。

「道盡塗殫，迴車而還。招搖乎襄羊，〔一〕降集乎北紘，〔二〕率乎直指，闔乎反鄉。歷石〔闕〕〔關〕，歷封巒，過雉鵠，望露寒，〔三〕下棠梨，〔四〕息宜春，〔五〕西馳宣曲，濯鵠牛首，〔六〕登龍臺，〔七〕掩細柳，〔八〕觀士大夫之勤略，鈞獠者之所得獲。〔九〕徒車之所轢，〔一〇〕乘騎之所蹂若，〔一一〕人民之所蹈躡，與其窮極倦飢，〔一二〕驚憚懼伏，不被創刃而死者，佗佗籍籍，填阬滿谷，揜平彌澤。」

〔一〕索隱消搖乎襄羊。郭璞曰：「襄羊猶仿佯。」

〔二〕集解郭璞曰：「紘，維也。北方之紘曰委羽。」

〔三〕集解徐廣曰：「雉音支。」駟案：漢書音義曰「皆甘泉宮左右觀名也。」

〔四〕集解漢書音義曰：「宮名也，在雲陽縣東南二十里。」

〔五〕正義括地志云：「宜春宮在雍州萬年縣西南三十里。」

〔六〕集解漢書音義曰：「宣曲，宮名，在昆明池西。牛首，池名，在上林苑西頭。」

〔七〕集解 漢書音義曰：「觀名，在豐水西北近渭。」

〔八〕正義 郭云：「觀名，在昆明南柳市。」

〔九〕集解 徐廣曰：「鈞，一作『診』也。」

〔一〇〕正義 麟，踐也。轆，輾也。

〔一一〕集解 徐廣曰：「蹂音人久反。」

〔一二〕集解 徐廣曰：「音劇。」

「於是乎游戲懈怠，置酒乎昊天臺，〔一〕張樂乎轆轤之宇，〔二〕撞千石之鐘，立萬石之鉦，建翠華之旗，樹靈鼉之鼓。〔三〕奏陶唐氏之舞，聽葛天氏之歌，〔四〕千人唱，萬人和，山陵爲之震動，〔五〕川谷爲之蕩波。巴俞宋蔡，淮南于遮，〔六〕文成顛歌，〔七〕族舉遞奏，〔八〕金鼓迭起，鏗鎗鎗磬，洞心駭耳。〔九〕荆吳鄭衛之聲，韶濩武象之樂，陰淫案衍之音，鄢郢繽紛，激楚結風，〔一〇〕俳優侏儒，狄鞮之倡，〔一一〕所以娛耳目而樂心意者，麗靡爛漫於前，〔一二〕靡曼美色於後。〔一三〕」

〔一〕索隱 張揖云：「臺高上千皓天也。」

〔二〕集解 徐廣曰：「轆音葛。」 索隱 郭璞云：「言曠遠深貌也。」

〔三〕集解 郭璞曰：「木貫鼓中，加羽葆其上，所謂樹鼓。」

〔四〕集解 漢書音義曰：「葛天氏，古帝王號也。」 呂氏春秋曰：「葛天氏之樂，三人操牛尾，投足以歌。」

索隱 張揖

曰：「葛天氏，三皇時君號也。呂氏春秋云：『其樂三人持牛尾，投足以歌。八闋：一曰載人，二曰玄鳥，三曰遂草，四曰奮五穀，五曰敬天常，六曰建帝功，七曰依地德，八曰總禽獸之極。』」

〔五〕集解 徐廣曰：「一作『勳』。」

〔六〕集解 郭璞曰：「巴西閬中有俞水，獠人居其上，皆剛勇好舞，漢高募取以平三秦。後使樂府習之，因名巴俞舞也。」漢書音義曰：「于遮，歌曲名。」索隱 郭璞曰：「巴西閬中有俞水，獠人居其上，好舞。初，高祖募取以平

三秦，後使樂人習之，因名巴俞舞也。」張揖曰：「禮樂記曰『宋音宴女溺志』。蔡人謳，員三人。楚詞云『吳謠蔡謳』。淮南鼓，員四人，于遮曲是其意也。」

〔七〕集解 郭璞曰：「未聞也。」索隱 郭璞云：「未聞。」文穎曰：「文成，遼西縣名，其縣人善歌。顓，益州顓縣，其

人能作西南夷歌。顓卽滇也。」

〔八〕集解 徐廣曰：「舉，一作『居』。」

〔九〕集解 郭璞曰：「鎗，鼓音。」

〔一〇〕集解 郭璞曰：「激楚，歌曲也。列女傳曰『聽激楚之遺風』也。」索隱 文穎曰：「激，衝激，急風也。結風，回

風，回亦急風也。楚地風氣既自漂疾，然歌樂者猶復依激結之急風以爲節，其樂促迅哀切也。」

〔一一〕集解 徐廣曰：「韋昭云狄鞮，地名，在河內，出善倡者。」

〔一二〕索隱 郭璞云：「言恣其觀也。」列女傳曰『桀造爛漫之樂』。」

〔一三〕索隱 張揖曰：「靡，細；曼，澤也。」韓子『曼服皓齒』也。」

「若夫青琴宓妃之徒，〔一〕絕殊離俗，〔二〕姣冶嫺都，〔三〕靚莊刻飭，便嬛綽約，〔四〕柔

機嬛嬛，〔五〕斌媚妘嫋，〔六〕世獨繭之褕施，〔七〕眇閭易以戍削，〔八〕嫵婉微睂，〔九〕與世殊服，芳香溫鬱，酷烈淑郁，皓齒粲爛，宜笑的皪，〔一〇〕長眉連娟，微睎繇藐，〔一一〕色授魂與，心愉於側。〔一二〕

〔一〕集解 漢書音義曰：「皆古神女名。」

索隱 伏儼曰：「青琴，古神女也。」如淳曰：「宓妃，伏羲女，溺死洛水，遂

爲洛水之神。」宓音伏。

〔二〕索隱 郭璞云：「俗無雙。」

〔三〕索隱 姣冶閑都。郭璞云：「姣，好也。都，雅也。」詩云：「姣人僚兮。」方言云：「自關而東，河濟之間，凡好或謂之姣。」音絞。說文曰：「嫵，雅也。」或作「閑」。小雅曰都，盛也。

〔四〕集解 郭璞曰：「靚莊，粉白黛黑也。」

〔五〕集解 徐廣曰：「音娟。」索隱 郭璞曰：「柔機嬛嬛，皆骨體柔弱長豔兒也。」廣雅云：「嬛嬛，容也。」張揖曰：「嬛嬛猶婉婉也。」

〔六〕集解 徐廣曰：「妘音乃母反。嫋音弱。」

索隱 嫵媚纖弱。埤蒼云：「嫵媚，悅也。」通俗文云：「頰輔謂之嫵

媚。」郭璞云：「纖弱，弱兒。」埤蒼曰：「纖弱，謂容體纖細柔弱也。」

〔七〕集解 徐廣曰：「世音曳。褕褕。」

索隱 褕褕。張揖云：「褕，褕褕也。褕，袖也。」郭璞曰：「獨繭，一繭絲也。」

埤蒼云：「褕，衣長兒也。」

〔八〕集解 徐廣曰：「閭易，衣長貌。戍削，言如刻畫作之。」

索隱 眇閭易以恤削。郭璞曰：「閭易，衣長兒。恤削，

言如刻畫作也。」

〔九〕集解 郭璞曰：「衣服婆娑貌。」〔正義〕嫵，白眠反。姚音先。徹音白結反。循音屑。

〔一〇〕索隱 郭璞曰：「鮮明兒也。」楚詞曰：「美人皓齒嫵以姱。」文曰：「娥眉笑以眇眇。」眇音礫也。

〔一一〕索隱 郭璞曰：「連娟，眉曲細也。」縣藐，遠視兒也。」娟音一全反。睇，大計反。藐音藐。

〔一二〕索隱 張揖曰：「彼色來授我，我魂往與接也。」愉音踰，往也。愉，悅也。二義並通也。

「於是酒中樂酣，天子芒然而思，似若有亡。」曰：「嗟乎，此泰奢侈！朕以覽聽餘聞，無事弃日，順天道以殺伐，時休息於此，恐後世靡麗，遂往而不反，非所以爲繼嗣創業垂統也。」於是乃解酒罷獵，而命有司曰：「地可以墾辟，悉爲農郊，以贍萌隸；隲牆填塹，使山澤之民得至焉。實陂池而勿禁，〔一〕虛宮觀而勿仞。〔二〕發倉廩以振貧窮，補不足，恤鰥寡，存孤獨。出德號，省刑罰，改制度，易服色，更正朔，與天下爲始。」

〔一〕正義 實，滿也。言人滿陂池，任采捕所取也。

〔二〕正義 仞音刃，亦滿也。言離宮別館勿令人居止，並廢罷也。

「於是歷吉日以齊戒，襲朝衣，乘法駕，建華旗，鳴玉鸞，游乎六藝之囿，〔一〕騫乎仁義之塗，覽觀春秋之林，〔二〕射狸首，兼騶虞，〔三〕弋玄鶴，建干戚，載雲罕，〔四〕揜羣雅，〔五〕悲伐檀，〔六〕樂樂胥，〔七〕修容乎禮園，〔八〕翱翔乎書圃，〔九〕述易道，〔一〇〕放怪獸，〔一一〕登明堂，坐清廟，〔一二〕恣羣臣，奏得失，四海之內，靡不受獲。〔一三〕於斯之時，天下

大說，嚮風而聽，隨流而化，喟然〔四〕興道而遷義，刑錯而不用，德隆乎三皇，功羨於五帝。〔五〕若此，故獵乃可喜也。

〔一〕〔正義〕六藝，云言田獵訖，則遍遊六藝，而疾驅於仁義之道也。

〔二〕〔集解〕郭璞曰：「春秋所以觀成敗，明善惡者。」

〔三〕〔集解〕禮射義曰：「天子以騶虞爲節，諸侯以貍首爲節。騶虞者，樂官備也。貍首者，樂會時也。」

〔四〕〔索隱〕張揖云：「罕，畢也。」文穎曰：「卽天畢，星名。前有九旒雲罕之車。」案：說者以雲罕爲旌旗，非也。且

案中朝鹵簿圖云「雲罕駕駟」，不兼言九旒，罕車與九旒車別。

〔五〕〔集解〕漢書音義曰：「大雅、小雅也。」〔索隱〕揜，捕也。張揖曰：「詩小雅之材七十四人，大雅之材三十一人，

故曰羣雅也。言雲罕載之於車，以捕羣雅之士。」

〔六〕〔索隱〕張揖曰：「其詩刺賢者不遇明主也。」

〔七〕〔索隱〕毛詩云「君子樂胥，受天之祜」。言王者樂得賢材之人，使之在位，故天與之福祿也。胥音先呂反。

〔八〕〔正義〕禮所以自修飾整威儀也。

〔九〕〔正義〕尚書所以明帝王君臣之道也。

〔一〇〕〔正義〕易所以繫靜微妙，上辨二儀陰陽，中知人事，下明地理也。言田獵乃射訖，又歷涉六經之要也。

〔一一〕〔正義〕張揖云：「苑中奇怪之獸，不復獵也。」

〔一二〕〔正義〕明堂有五帝廟，故言「清廟」，王者朝諸侯之處。

〔一三〕〔正義〕言天下之人無不受恩惠。

〔一四〕索隱：喟，漢書作「崑」，音許貴反。

〔一五〕索隱：司馬彪云：「羨，溢也。」音怡戰反。

「若夫終日暴露馳騁，勞神苦形，罷車馬之用，抗士卒之精，〔一〕費府庫之財，而無德厚之恩，務在獨樂，不顧衆庶，忘國家之政，而貪雉兔之獲，則仁者不由也。從此觀之，齊楚之事，豈不哀哉！地方不過千里，而囿居九百，是草木不得墾辟，而民無所食也。夫以諸侯之細，而樂萬乘之所侈，僕恐百姓之被其尤也。」

〔二〕索隱：抗音五官反。

於是二子愀然〔二〕改容，超若自失，逡巡避席曰：「鄙人固陋，不知忌諱，乃今日見教，謹聞命矣。」

〔一〕索隱：郭璞云：「變色兒。」音作酉反。

賦奏，天子以爲郎。無是公言天子上林廣大，山谷水泉萬物，及子虛言楚雲夢所有甚衆，侈靡過其實，且非義理所尚，故刪取其要，歸正道而論之。〔三〕

〔一〕索隱：大顏云：「不取其夸奢靡麗之論，唯取終篇歸於正道耳。」小顏云：「刪要，非謂削除其詞，而說者謂此賦已經史家刊剝，失之也。」

相如爲郎數歲，會唐蒙使略通〔一〕夜郎西僂中，〔二〕發巴蜀〔三〕吏卒千人，郡又多爲發轉漕萬餘人，用興法〔四〕誅其渠帥，巴蜀民大驚恐。上聞之，乃使相如責唐蒙，因喻告巴蜀民以非上意。檄曰：

〔一〕索隱張揖曰：「蒙，故鄱陽令，今爲郎中，使行略取之。」

〔二〕集解徐廣曰：「羌之別種也。音扶逼反。」索隱夜郎、僂中，文穎曰皆西〔南〕夷。後以爲夜郎屬牂柯，僂屬

犍爲。音步北反。

〔三〕索隱案：巴、蜀，二郡名。

〔四〕集解漢書曰「用軍興法」也。

告巴蜀太守：蠻夷自擅不討之日久矣，時侵犯邊境，勞士大夫。陛下卽位，存撫天下，輯安中國。然後興師出兵，北征匈奴，單于怖駭，交臂受事，詘膝請和。康居西域，重譯請朝，稽首來享。移師東指，閩越相誅。右弔番禺，太子入朝。〔一〕南夷之君，西僂之長，常效貢職，不敢怠墮，延頸舉踵，喁喁然〔二〕皆爭歸義，欲爲臣妾，道里遼遠，山川阻深，不能自致。夫不順者已誅，而爲善者未賞，故遣中郎將往賓之，〔三〕發巴蜀士民各五百人，以奉幣帛，衛使者不然，靡有兵革之事，戰鬪之患。今聞其乃發軍興制，〔四〕

驚懼子弟，憂患長老，郡又擅爲轉粟運輸，皆非陛下之意也。當行者或亡逃自賊殺，亦非人臣之節也。

〔一〕〔索隱〕文穎曰：「番禺，南海郡理也。弔，至也。東伐閩越，後至番禺，故言右至也。」案：姚氏弔讀如字。小顏

云：「兩國相伐，漢發兵救之，令弔番禺，故遣太子入朝，弔非至也。」

〔二〕〔正義〕喁，五恭反，口向上也。

〔三〕〔索隱〕賈逵云：「賓，伏也。」

〔四〕〔索隱〕張揖曰：「發三軍之衆也。興制，謂起軍法制也。」案：唐蒙爲使，而用軍興法制也。

夫邊郡之士，聞烽舉燧燔，〔一〕皆擣弓〔二〕而馳，荷兵而走，流汗相屬，唯恐居後，觸白刃，冒流矢，義不反顧，計不旋踵，人懷怒心，如報私讎。彼豈樂死惡生，非編列之民，而與巴蜀異主哉？計深慮遠，急國家之難，而樂盡人臣之道也。故有剖符之封，析珪〔三〕而爵，位爲通侯，居列東第，〔四〕終則遺顯號於後世，傳土地於子孫，行事甚忠敬，居位甚安佚，名聲施於無窮，功烈著而不滅。是以賢人君子，肝腦塗中原，膏液潤野草而不辭也。今奉幣役至南夷，卽自賊殺，或亡逃抵誅，身死無名，謚爲至愚，恥及父母，爲天下笑。人之度量相越，豈不遠哉！然此非獨行者之罪也，父兄之教不先，子弟之率不謹也；寡廉鮮恥，而俗不長厚也。其被刑戮，不亦宜乎！

〔一〕集解 漢書音義曰：「烽如覆米奠，縣著桔槔頭，有寇則舉之。燧，積薪，有寇則燔然之。」索隱 燧燧。韋昭

曰：「燧，束草置之長木之端，如挈臯，見敵則燒舉之。燧者，積薪，有難則焚之。燧主晝，燧主夜。」字林云：「奠，漚米奠也，音一六反。」又纂要云：「奠，浙箕也。」此注是孟康說。

〔二〕索隱 上音奴頰反。

〔三〕索隱 如淳曰：「析，中分也。白藏天子，青在諸侯也。」

〔四〕索隱 列甲第在帝城東，故云東第也。

陛下患使者有司之若彼，悼不肖愚民之如此，故遣信使曉喻百姓以發卒之事，因數之以不忠死亡之罪，讓三老孝弟以不教誨之過。方今田時，重煩百姓，〔一〕已親見近縣，恐遠所谿谷山澤之民不徧聞，檄到，亟下縣道，〔二〕使咸知陛下之意，唯毋忽也。

〔一〕索隱 重猶難也。

〔二〕集解 漢書百官表曰：「縣有蠻夷曰道。」索隱 亟音紀力反。亟，急也。

相如還報。唐蒙已略通夜郎，因通西南夷道，發巴、蜀、廣漢卒，作者數萬人。治道二歲，道不成，士卒多物故，費以巨萬計。〔一〕蜀民及漢用事者〔二〕多言其不便。是時邛笮之君長〔三〕聞南夷與漢通，得賞賜多，多欲願爲內臣妾，請吏，比南夷。〔四〕天子問相如，相如曰：「邛、笮、冉、駹者近蜀，道亦易通，秦時嘗通爲郡縣，至漢興而罷。今誠復通，爲置郡縣，愈於南夷。」〔五〕天子以爲然，乃拜相如爲中郎將，〔六〕建節往使。副使王然于、壺充國〔七〕

呂越人馳四乘之傳，因巴蜀吏幣物以賂西夷。至蜀，蜀太守以下郊迎，縣令負弩矢先驅，〔八〕蜀人以爲寵。〔九〕於是卓王孫、臨邛諸公皆因門下獻牛酒以交驩。卓王孫喟然而歎，自以得使女尚司馬長卿晚，〔一〇〕而厚分與其女財，與男等同。司馬長卿便略定西夷，邛、笮、犍、駝、斯榆〔一一〕之君皆請爲內臣。除邊關，關益斥，〔一二〕西至沫、若水，〔一三〕南至牂柯爲徼，〔一四〕通零關道，〔一五〕橋孫水〔一六〕以通邛都。〔一七〕還報天子，天子大說。

〔一〕案隱案：巨萬猶萬萬也。案：數有大小二法。張揖曰：「算法萬萬爲億」，是大數也。鬻子曰：「十萬爲億」，是小數也。

〔二〕案隱案：謂公孫弘也。

〔三〕案隱邛笮之君長。文穎曰：「邛者，今爲邛都縣；笮者，今爲定笮縣，皆屬越嶲郡。」

〔四〕案隱謂請置漢吏，與南夷爲比例也。

〔五〕案隱張揖曰：「愈，差也。」又云：「愈猶勝也。」晉灼曰：「南夷謂犍爲、牂柯也。」西夷謂越嶲、益州。」

〔六〕案隱張揖曰：「秩四百石，五歲遷補大縣令。」

〔七〕案隱案：漢書公卿表太初元年爲鴻臚卿也。

〔八〕案隱案：亭吏二人，弩矢合是亭長負之；今縣令自負矢，則亭長當負弩也。且負弩亦守宰無定，或隨輕重耳。案：霍去病出擊匈奴，河東太守郊迎負弩。又魏公子救趙擊秦，秦軍解去，平原君負欄矢迎公子於界上。

〔九〕案隱蜀以爲寵。華陽國志云：「蜀大城北十里有升仙橋，有送客觀也。相如初入長安，題其門云『不乘赤車駟』」

馬，不過汝下』也。」

〔一〇〕索隱 小顏云：「尚猶配也。」本或作「當」也。

〔一一〕索隱 斯，鄭氏音曳。張揖云：「斯俞國也。」案：今斯讀如字，益部耆舊傳謂之「斯臾」。華陽國志 邛都縣有四部，斯臾一也。

〔一二〕索隱 張揖曰：「斥，廣也。」

〔一三〕索隱 張揖曰：「沫水出蜀廣平徼外，與青衣水合也。若水出旄牛徼外，至犍道入江。」華陽國志 漢嘉縣有沫水。音妹，又音末。

〔一四〕索隱 張揖曰：「徼，塞也。以木柵水爲蠻夷界。」

〔一五〕集解 徐廣曰：「越嶲有零關縣。」

〔一六〕集解 韋昭曰：「爲孫水作橋。」

〔一七〕索隱 橋孫水通笮。韋昭曰：「爲孫水作橋也。」案：《華陽國志》云：「相如卒開犍道通南夷，置越嶲郡。」韓說開益州，唐蒙開牂柯，斬笮王首，置牂柯郡」也。

相如使時，蜀長老多言通西南夷不爲用，唯大臣亦以爲然。相如欲諫，業已建之，「不敢，乃著書，籍以蜀父老爲辭，而已詰難之，以風天子，且因宣其使指，令百姓知天子之意。其辭曰：

〔一〕索隱 案：業者，本也。謂本由相如立此事也。

漢興七十有八載，〔一〕德茂存乎六世，〔二〕威武紛紜，湛恩〔三〕汪濊，羣生澍濡，洋溢乎方外。於是乃命使西征，隨流而攘，〔四〕風之所被，罔不披靡。因朝旦從驪，定筭存邛，略斯榆，舉苞滿，〔五〕結軼〔六〕還轅，東鄉將報，至于蜀都。

〔一〕集解徐廣曰：「元光六年也。」

〔二〕正義高祖、惠帝、高后、孝文、孝景、孝武。

〔三〕索隱韋昭云：「上音沈。」

〔四〕索隱攘，卻也，汝羊反。

〔五〕索隱服虔云：「夷種也。」滿字或作「蒲」也。

〔六〕索隱下音轍。漢書作「軌」。張揖云：「結，屈也。」

耆老大夫薦紳先生之徒二十有七人，儼然造焉。辭畢，因進曰：「蓋聞天子之於夷狄也，其義羈縻，〔一〕勿絕而已。今罷三郡之士，通夜郎之塗，三年於茲，而功不竟，士卒勞倦，萬民不贍，今又接以西夷，百姓力屈，恐不能卒業，此亦使者之累也，竊爲左右患之。且夫邛、笮、西僰之與中國並也，歷年茲多，不可記已。仁者不以德來，彊者不以力并，意者其殆不可乎！今割齊民以附夷狄，弊所恃以事無用，鄙人固陋，不識所謂。」

〔一〕**索隱**案：羈，馬絡頭也。磨，牛輻也。漢官儀：「馬云羈，牛云磨。」言制四夷如牛馬之受羈磨也。

使者曰：「烏謂此邪？必若所云，則是蜀不變服而巴不化俗也。余尚惡聞若說。」〔二〕然斯事體大，固非觀者之所觀也。余之行急，其詳不可得聞已，請爲大夫粗陳其略。

〔一〕**索隱**張揖曰：「惡聞若曹之言也。」包愷音一故反。又音烏。烏者，安也。

「蓋世必有非常之人，然後有非常之事；有非常之事，然後有非常之功。非常者，固常〔人〕之所異也。」〔一〕故曰非常之原，黎民懼焉；〔二〕及臻厥成，天下晏如也。

〔一〕**索隱**案：常人見之以爲異。

〔三〕**索隱**張揖曰：「非常之事，其本難知，衆人懼也。」

「昔者鴻水浮出，汜濫衍溢，民人登降移徙，踣隤而不安。夏后氏戚之，乃堙鴻水，決江疏河，漉沈澹菑，〔一〕東歸之於海，而天下永寧。當斯之勤，豈唯民哉。〔二〕心煩於慮而身親其勞，躬胝無腠，膚不生毛。〔三〕故休烈顯乎無窮，聲稱浹乎于茲。」

〔一〕**集解**徐廣曰：「漉，一作『灑』。」**索隱**漉沈澹菑。漉音鹿。菑音災。漢書作「澌沈澹災」，解者云「澌作『灑』」，

灑，分也，音所綺反。澹，安；沈，深也。澹音徒暫反。

〔三〕**索隱**案：謂非獨人勤，禹亦親其勞也。

〔三〕**集解**徐廣曰：「胝音竹移反。腠，踵也。一作『腠』，音湊。膚，理也。胝音魑。」

索隱躬奏胝無腠。張揖曰：「奏，作『戚』。躬，體也。戚，腠理也。」韋昭曰：「腠，其中小毛也。」胝音丁私反。莊子云「禹腠無腠，脛不生

毛」。李頤云「腴，白肉也，音蒲末反」。

「且夫賢君之踐位也。豈特委瑣握臚，〔一〕拘文牽俗，循誦習傳，當世取說云爾哉！必將崇論閎議，創業垂統，爲萬世規。故馳騫乎兼容并包，而勤思乎參天貳地。〔二〕且詩不云乎：『普天之下，莫非王土；率土之濱，莫非王臣。』〔三〕是以六合之內，八方之外，浸潤〔四〕衍溢，懷生之物有不浸潤於澤者，賢君恥之。今封疆之內，冠帶之倫，咸獲嘉祉，靡有闕遺矣。而夷狄殊俗之國，遼絕異黨之地，舟輿不通，人迹罕至，政教未加，流風猶微。內之則犯義侵禮於邊境，外之則邪行橫作，放弑其上。君臣易位，尊卑失序，父兄不辜，幼孤爲奴，係纍號泣，內嚮而怨，曰『蓋聞中國有至仁焉，德洋而恩普，物靡不得其所，今獨曷爲遺己』。舉踵思慕，若枯旱之望雨。盍夫爲之垂涕，〔五〕況乎上聖，又惡能已？故北出師以討彊胡，南馳使以誚勁越。四面風德，二方之君〔六〕鱗集仰流，願得受號者以億計。故乃關涿〔七〕若，〔八〕徼牂柯，鏤零山，梁孫原。創道德之塗，垂仁義之統。將博恩廣施，遠撫長駕，使疏迷不閉，〔九〕阻深闇昧，〔一〇〕得耀乎光明，以偃甲兵於此，而息誅伐於彼。遐邇一體，中外提福，〔一一〕不亦康乎？夫拯民於沈溺，奉至尊之休德，反衰世之陵遲，繼周氏之絕業，斯乃天子之急務也。百姓雖勞，又惡可以已哉？」

〔一〕索隱孔文祥云：「委瑣，細碎。握臚，局促也。」

〔二〕索隱案：天子比德於地，是貳地也。與己并天爲三，是參天也。故禮曰「天子與天地參」是也。

〔三〕集解毛詩傳曰：「濱，涯也。」

〔四〕索隱浸淫。案：浸淫猶漸浸。

〔五〕集解徐廣曰：「鑿音戾。」索隱張揖曰：「很戾之夫也。」字或作「戾」。鑿，古「戾」字。

〔六〕索隱謂西夷邛、僰，南夷牂柯、夜郎也。

〔七〕集解漢書音義曰：「以沫，若水爲關。」

〔八〕索隱逖，遠。言其疏遠者不被閉絕也。

〔九〕索隱習爽闇昧。三蒼云：「習爽，早朝也。習音昧。」案：字林又音忽。

〔一〇〕集解徐廣曰：「提，一作『提』，音支。」索隱提福。說文云：「提，安也。」市支反。

「且夫王事固未有不始於憂勤，而終於佚樂者也。然則受命之符，合在於此矣。」
「方將增泰山之封，加梁父之事，鳴和鸞，揚樂頌，上咸五，下登三。」
「觀者未睹指，聽者未聞音，猶鷦明已翔乎寥廓，而羅者猶視乎藪澤。悲夫！」

〔一〕索隱張揖云：「在於憂勤佚樂之中也。」

〔二〕集解徐廣曰：「咸，一作『函』。」駟案韋昭曰「咸同於五帝，登三王之上」。

索隱上減五，下登三。李奇曰：

「五帝之德，漢比爲減；三王之德，漢出其上，故云『減五登三』也。」虞憲志林云：「相如欲減五帝之一，以漢盈之。然以漢爲五帝之數，自然是登於三王之上也。」今本「減」或作「咸」，是韋昭之說也。

於是諸大夫芒然喪其所懷來而失厥所以進，喟然並稱曰：「允哉漢德，此鄙人之所願聞也。百姓雖怠，請以身先之。」敞罔靡徙，^{〔一〕}因遷延而辭避。

^{〔一〕}索隱案：敞罔，失容也。靡徙，失正也。

其後人有上書言相如使時受金，失官。居歲餘，復召爲郎。

相如口吃而善著書。常有消渴疾。與卓氏婚，饒於財。其進仕宦，未嘗肯與公卿國家之事，稱病閒居，不慕官爵。常從上至長楊獵，^{〔一〕}是時天子方好自擊熊羆，馳逐野獸，相如上疏諫之。其辭曰：

^{〔一〕}正義括地志云：「秦長楊宮在雍州盤屋縣東南三里。上起以宮，內有長楊樹，以爲名。」

臣聞物有同類而殊能者，故力稱烏獲，^{〔一〕}捷言慶忌，^{〔二〕}勇期賁、育。^{〔三〕}臣之愚，竊以爲人誠有之，獸亦宜然。今陛下好陵阻險，射猛獸，卒然^{〔四〕}遇軼材之獸，駭不存之地，^{〔五〕}犯屬車之清塵，^{〔六〕}輿不及還轅，人不暇施巧，雖有烏獲、逢蒙之伎，力不得用，^{〔七〕}枯木朽株盡爲害矣。是胡越起於轂下，而羌夷接軫也，豈不殆哉！雖萬全無患，然本非天子之所宜近也。

^{〔一〕}索隱張揖曰：「秦武王力士，舉龍文鼎者也。」

〔二〕索隱張揖曰：「吳王僚之子。」

〔三〕正義賁音奔。孟賁，古之勇士，水行不避蛟龍，陸行不避豺狼，發怒吐氣，聲音動天。夏育，亦古之猛士也。

〔四〕索隱猝然。廣雅云：「猝，暴也，音倉兀反。」

〔五〕索隱謂所不慮而猛獸駭發也。

〔六〕集解蔡邕曰：「古者諸侯貳車九乘，秦滅九國，兼其車服，故大駕屬車八十一乘。」

〔七〕集解吳越春秋曰：「羿傳射於逢蒙。」索隱孟子云：「逢蒙學射於羿，盡羿之道」也。

且夫清道而後行，中路而後馳，猶時有銜橛之變，〔一〕而況涉乎蓬蒿，馳乎丘墳，前有利獸之樂而內無存變之意，其爲禍也不亦難矣！夫輕萬乘之重不以爲安而樂，出於萬有一危之塗以爲娛，臣竊爲陛下不取也。

〔一〕集解徐廣曰：「橛音巨月反。鈎逆者謂之橛矣。」索隱銜，馬勒銜也。橛，駢馬口長

銜也。周遷輿服志云：「鈎逆上者爲橛。橛在銜中，以鐵爲之，大如雞子。」鹽鐵論云：「無銜橛而禦捍馬。」橛音

巨月反。

蓋明者遠見於未萌而智者避危於無形，禍固多藏於隱微而發於人之所忽者也。故鄙諺曰「家累千金，坐不垂堂」。〔二〕此言雖小，可以喻大。臣願陛下之留意幸察。

〔二〕索隱張揖云：「畏簷瓦墮中人。」樂產云：「垂，邊也。恐墮墜（之）也。」

上善之。還過宜春宮，〔三〕相如奏賦以哀二世行失也。其辭曰：

〔一〕〔正義〕括地志云：「秦宜春宮在雍州萬年縣西南三十里。宜春苑在宮之東，杜之南。始皇本紀云葬二世杜南宜春苑中。」案：今宜春宮見二世陵，故作賦以哀也。

登陂陲〔一〕之長阪兮，坐人〔二〕曾宮之嵯峨。臨曲江之隄州兮，〔三〕望南山之參差。巖巖深山之篴篴兮，〔四〕通谷儲兮谿澗。〔五〕汨滅噏〔六〕習以永逝兮，注平皋之廣衍。觀衆樹之塢薺兮，〔七〕覽竹林之榛榛。東馳土山兮，北揭石瀨。〔八〕彌節容與兮，〔九〕歷弔二世。持身不謹兮，亡國失執。信讒不寤兮，宗廟滅絕。嗚呼哀哉！操行之不得兮，墳墓蕪穢而不脩兮，魂無歸而不食。復邈絕而不齊兮，彌久遠而愈休。精罔閔而飛揚兮，拾九天而永逝。〔一〇〕嗚呼哀哉！

〔一〕〔索隱〕登陂陲。陂音普何反。陲音徒何反。

〔二〕〔集解〕漢書音義曰：「坐，並也。」〔索隱〕上音步寸反。

〔三〕〔集解〕漢書音義曰：「隄，長也。苑中有曲江之象，泉中有長洲也。」〔索隱〕案：隄音祈。隄卽碕，謂曲岸頭也。

張揖曰：「隄，長也。苑中有曲江之象，中有長州，又有宮閣路，謂之曲江，在杜陵西北五里。」又三輔舊事云：「樂游原在北」是也。

〔四〕〔集解〕徐廣曰：「篴音力工反。」〔索隱〕篴音苦江反。晉灼曰：「音籠，古『籛』字。」蕭該云：「篴，或作『籛』，長大兒也。」

〔五〕〔索隱〕呼含呼加二反。

〔六〕索隱 上音于筆反。減音域，疾兒也。喻音許及反。漢書作「輟」，輟，輕舉意也。

〔七〕索隱 菱音菱，謂隱也。

〔八〕索隱 說文云：「瀨，水流沙上也。」

〔九〕索隱 容與，游戲貌也。

〔一〇〕正義 太玄經云：「九天謂一爲中天，二爲羨天，三爲從天，四爲更天，五爲睟天，六爲廓天，七爲減天，八爲沈天，九爲成天。」

相如拜爲孝文園令。〔一〕天子既美子虛之事，相如見上好僊道，因曰：「上林之事未足美也，尚有靡者。臣嘗爲大人賦，未就，請具而奏之。」相如以爲列僊之傳居山澤閒，〔二〕形容甚臞，〔三〕此非帝王之僊意也，乃遂就大人賦。其辭曰：

〔一〕索隱 百官志云：「陵園令，六百石，掌案行掃除」也。

〔二〕索隱 列仙之傳居山澤。案：傳者，謂相傳以列仙居山澤閒，音持全反。小顏及劉氏並作「儒」。儒，柔也，術士之稱，非。

〔三〕集解 徐廣曰：「臞，瘦也。」索隱 韋昭曰：「臞，瘠也。」舍人云：「臞，瘦也。」文子云：「堯癯瘦。」音巨俱反。

世有大人〔一〕兮，在于中州。宅彌萬里兮，曾不足以少留。悲世俗之迫隘兮，〔二〕竭輕舉而遠遊。垂絳幡之素蜺兮，載雲氣而上浮。建格澤之長竿兮，總光耀之采旄。〔三〕垂旬始以爲慘兮，世彗星而爲髣。〔四〕掉指橋以偃蹇兮，〔五〕又旖旎以招搖。攬欂櫨以

爲旌兮，〔六〕靡屈虹而爲綢。〔七〕紅香渺以眩滑兮，〔八〕森風涌而雲浮。駕應龍象輿之
螭略透麗兮，驂赤螭青虬之螭繆蜿蜒。低仰天矯据以驕驚兮，〔九〕詘折隆窮繆以連
卷。〔一〇〕沛艾赳螭仡以佻儼兮，〔一一〕放散畔岸驤以孱顏。〔一二〕踉蹌輶轄容以委麗兮，綢繆
偃蹇怵隼以梁倚。〔一三〕糾蓼叫晷蹶以艘路兮，〔一四〕蔑蒙踊躍騰而狂赳。〔一五〕莅颯卉翕燦至
電過兮，煥然霧除，霍然雲消。

〔一〕**索隱**張揖云：「喻天子。」向秀云：「聖人在位，謂之大人。」張華云：「相如作遠遊之體，以大人賦之也。」

〔二〕**索隱**如淳曰：「武帝云『誠得如黃帝，去妻子如脫屣』，是悲世俗迫隘也。」

〔三〕**集解**漢書音義曰：「格澤之氣如炎火狀，黃白色，起地上至天，以此氣爲竿。旄，葆也。總，係也。係光耀之氣
於長竿，以爲葆者。」

〔四〕**集解**漢書音義曰：「旬始氣如雄雞，縣於葆下以爲旒也。翳，燕尾也。批，彗星，綴著旒以爲燕尾。」

〔五〕**集解**漢書音義曰：「指橋，隨風指靡。」**索隱**棹音徒弔反。指音居桀反。橋音矯。張揖曰：「指矯，隨風指
靡。偃蹇，高兒。」應劭云：「旌旗屈撓之兒。」

〔六〕**正義**天官書云：「天棧長四丈，末銳。天槍長數丈，兩頭銳，其形類彗也。」

〔七〕**集解**漢書音義曰：「綢，輶也。以斷虹爲旌杠之輶。」**索隱**綢音籌，或音輶。屈虹，斷虹也。

〔八〕**集解**漢書音義曰：「旬始，屈虹，氣色。紅香渺，眩滑，闇冥無光也。」**索隱**紅香渺以眩滑。蘇林曰：「眩音炫。
滑音麴。」晉灼曰：「紅，赤色兒。杳眇，深遠，眩滑，混合也。」紅，或作「虹」也。

〔九〕索隱張揖曰：「据，直項也。驕驚，縱恣也。」据音據。驕音居召反。驚音五到反。

〔一〇〕索隱躍以連卷。韋昭曰：「龍之形兒也。」躍音起碧反。連卷音輦卷也。

〔一一〕集解漢書音義曰：「起螻，申頸低仰也。佞，不前也。」索隱孟康曰：「起螻，申頸低頭。」張揖曰：「起螻，

牙跳也。」起音居幼反。螻音許救反。張揖曰：「佞，舉頭也。佞，不前也。」佞音勑吏反。佞音魚吏反也。

〔一二〕索隱服虔曰：「馬仰頭，其口開，正孱顏也。」韋昭曰：「顏音吾板反。」詩云「兩服上驤」，注云「驤，馬是也」。

〔一三〕集解徐廣曰：「踳蹠，乍前乍卻也。蹠音丑栗反。蹠音勑略反。蹠，烏葛反。蹠音曷。蹠，一作『雕』。蹠音他

略反。」駢案漢書音義曰：「休，走也。梁倚，相著也。」索隱蹠蹠蹠蹠。張揖曰：「蹠蹠，疾行兒。蹠蹠，

前卻也。」蹠音褚栗反。蹠音褚略反。蹠音烏葛反。蹠音曷。蹠蹠蹠蹠。蹠音徒弔反。蹠音勑弔反。張揖曰：

「蹠蹠，卻距也。」廣雅曰：「蹠蹠，天矯之兒。」張揖曰：「休，奔走。梁倚，相著。」韋昭曰：「蹠音答略反。相如

傳云「休，蹠遠去」，蹠，視也。」

〔一四〕集解徐廣曰：「艘音介，至也。」索隱夢音了。昇音五到反。小顏云：「叫昇，高舉兒。」踏音徒答反。艘音

屈。三倉云：「踏，著地。」孫炎云：「艘，古『界』字也。」

〔一五〕集解漢書音義曰：「蔑蒙，飛揚也。越，走。」索隱蔑蒙。張揖曰：「蔑蒙，飛揚也。越，走兒。」

邪絕少陽而登太陰兮，與真人乎相求。〔一〕互折窈窕以右轉兮，橫厲飛泉以正

東。〔二〕悉徵靈圉而選之兮，部乘衆神於瑤光。〔三〕使五帝先導兮，〔四〕反太一而後陵

陽。〔五〕左玄冥而右含靈兮，〔六〕前陸離而後滈滈。〔七〕斯征伯僑〔八〕而役羨門兮，〔九〕屬

岐伯使尚方。〔一〇〕祝融驚而蹕御兮，〔二〕清雰氣而後行。屯余車其萬乘兮，絳雲蓋而樹華旗。〔三〕使句芒其將行兮，〔三〕吾欲往乎南嬉。

〔一〕集解 漢書音義曰：「少陽，東極；太陰，北極。邪度，東極而升北極者也。」

〔二〕正義 厲，渡也。張云：「飛泉，谷也，在崑崙山西南。」

〔三〕集解 漢書音義曰：「搖光，北斗杓頭第一星。」

〔四〕正義 遵，導。應云：「五帝，五時，帝太皞之屬也。」

〔五〕集解 漢書音義曰：「仙人陵陽子明也。」正義 天官書云：「中官天極星，其一明者，太一常居也。」列仙傳云：

「子明於沛銍縣旋溪釣得白龍，放之，後白龍來迎子明去，止陵陽山上百餘年，遂得仙也。」

〔六〕集解 漢書音義曰：「含靈，黔羸也，天上造化神名也。或曰水神。」

〔七〕集解 漢書音義曰：「皆神名。」

〔八〕集解 徐廣曰：「燕人也，形解而仙也。」索隱 應劭曰：「厮，役也。」張揖曰：「王子喬也。」漢書郊祀志作「正

伯喬」，此當別人，恐非王子喬也。

〔九〕正義 張云：「羨門，碣石山上仙人羨門高也。」

〔一〇〕集解 徐廣曰：「岐伯，黃帝臣。」駟案 漢書音義曰「尚，主也。岐伯，黃帝太醫，屬使主方藥。」

〔二〕正義 張云：「祝融，南方炎帝之佐也。獸身人面，乘兩龍，應火正也。火正祝融警蹕清氛氣也。」

〔三〕索隱 絳音祖內反。如淳曰：「絳，合也。合五綵雲爲蓋也。」

〔三〕正義 張云：「句芒，東方青帝之佐也。鳥身人面，乘兩龍。」顏云：「將行，領從者也。」

歷唐堯於崇山兮，過虞舜於九疑。^{〔一〕}紛湛湛^{〔二〕}其差錯兮，雜遝膠葛^{〔三〕}以方馳。騷擾衝菰^{〔四〕}其相紛挐兮，滂漚決軋灑以林離。鑽羅列聚叢以龍茸兮，衍曼流爛壇以陸離。^{〔五〕}徑入蠶室之砢磷鬱律兮，洞出鬼谷之崑崙嵬礧。^{〔六〕}徧覽八紘而觀四荒兮，揭渡九江而越五河。^{〔七〕}經營炎火而浮弱水兮，^{〔八〕}杭絕浮渚而涉流沙。^{〔九〕}奄息總極汜濫水嬉兮，^{〔一〇〕}使靈媧鼓瑟而舞馮夷。^{〔一一〕}時若薨薨將混濁兮，召屏翳^{〔一二〕}誅風伯^{〔一三〕}而刑雨師。^{〔一四〕}西望崑崙^{〔一五〕}之軋沕沕忽兮，直徑馳乎三危。^{〔一六〕}排闥闔而入帝宮兮，^{〔一七〕}載玉女而與之歸。^{〔一八〕}舒閭風而搖集兮，^{〔一九〕}亢烏騰而一止。^{〔二〇〕}低回陰山翔以紆曲兮，^{〔二一〕}吾乃今目睹西王母曜然白首。^{〔二二〕}載勝而穴處兮，^{〔二三〕}亦幸有三足鳥爲之使。^{〔二四〕}必長生若此而不死兮，雖濟萬世不足以喜。

〔一〕正義張云：「崇山，狄山也。海外經云『狄山，帝堯葬其陽』。九疑山，零陵營道縣，舜所葬處。」

〔二〕索隱音徒感反。

〔三〕索隱膠輻。廣雅云：「膠輻，驅馳也。」

〔四〕索隱上昌勇反，下息亢反。

〔五〕集解徐廣曰：「壇音坦。」

〔六〕集解漢書音義曰：「鬼谷在北辰下，衆鬼之所聚也。楚辭曰『贅鬼谷于北辰』也。」正義崑，口骨反。疊音力

罪反。嵬音烏迴反。礧音回。張云：「崑崙嵬礧，不平也。」

〔七〕正義 顏云：「五色之河也。」仙經云紫、碧、綠、青、黃之河也。」

〔八〕正義 姚丞云：「大荒西經云崑崙之丘，其外有炎火之山，投物輒然。」括地志云：「弱水有二原，俱出女國北阿僊達山，南流會于國北，又南歷國北，東去一里，深丈餘，闊六十步，非乘舟不可濟，流入海。阿僊達山一名崑崙山，其山爲天柱，在雍州西南一萬五千三百七十里。」又云：「弱水在甘州張掖縣南山下也。」

〔九〕集解 漢書音義曰：「杭，船也。絕，渡也。浮渚，流沙中渚也。」

〔一〇〕集解 漢書音義曰：「總極，蔥嶺山也，在西域中也。」

〔一一〕集解 徐廣曰：「媧，一作『貽』。」駟案：漢書音義曰「靈媧，女媧也。馮夷，河伯字也。淮南子曰『馮夷得道，以潛大川』。」正義 姓馮名夷，以庚日溺死。河常以庚日好溺死人。

〔一二〕正義 應云：「屏翳，天神使也。」韋云：「雷師也。」

〔一三〕正義 張云：「風伯字飛廉。」

〔一四〕正義 沙州有兩師祠。

〔一五〕正義 張云：「海內經云崑崙去中國五萬里，天帝之下都也。其山廣袤百里，高八萬仞，增城九重，面九井，以玉爲檻，旁有五門，開明獸守之。」括地志云：「崑崙在肅州酒泉縣南八十里。十六國春秋後魏昭成帝建國十年，涼張駿酒泉太守馬岌上言：『酒泉南山即崑崙之體，周穆王見西王母，樂而忘歸，即謂此山。有石室，王母堂，珠璣鏤飾，煥若神宮。』又刪丹西河名云弱水，禹貢崑崙在臨羌之西，即此明矣。」括地志云：「又阿僊達山亦名建末達山，亦名崑崙山。恒河出其南吐師子口，經天竺入達山。媧水今名爲訶海，出於崑崙西北隅吐馬口，經安息、大夏國人西海。黃河出東北隅吐牛口，東北流經濫澤，潛出大積石山，至華山北，東入海。其三河去山人海各

三萬里。此謂大崑崙，肅州謂小崑崙也。禹本紀云：『河出崑崙二千五百餘里，日月所相隱避爲光明也。』

〔二六〕集解 三危，山名也。〔正義〕括地志云：『三危山在沙州東南三十里。』

〔二七〕正義 韋昭云：『閼闔，天門也。淮南子曰：『西方曰西極之山，閼闔之門。』』

〔二八〕正義 張云：『玉女，青要、乘弋等也。』

〔二九〕正義 張云：『閼風在崑崙閼闔之中。楚辭云：『登閼風而縹馬』也。』

〔三〇〕集解 漢書音義曰：『亢然高飛，如鳥之騰也。』

〔三一〕正義 張云：『陰山在大崑崙西二千七百里。』

〔三二〕集解 徐廣曰：『曜音下沃反。』索隱 曜音鶴也。〔正義〕張云：『西王母，其狀如人，豹尾，虎齒，蓬鬢，曜然

白首。石城金穴，居其中。』

〔三三〕集解 郭璞曰：『勝，玉勝也。』〔正義〕顏云：『勝（代），婦人首飾也，漢代謂之華勝也。』

〔三四〕正義 張云：『三足鳥，青鳥也。主爲西王母取食，在昆墟之北。』

回車揭來兮，絕道不周，〔一〕會食幽都。呼吸沆瀣〔二〕兮，餐朝霞〔三〕，噍咀芝英兮，嘒瓊華。〔四〕媿侵淪〔五〕而高縱兮，紛鴻涌而上厲。貫列缺之倒景兮，〔六〕涉豐隆之滂沛。〔七〕馳游道而脩降兮，〔八〕驚遺霧而遠逝。迫區中之隘陝兮，舒節出乎北垠。遺屯騎於玄關兮，軼先驅於寒門。〔九〕下崢嶸而無地兮，上寥廓而無天。視眩眠而無見兮，聽惝恍而無聞。乘虛無而上假兮，超無友而獨存。〔一〇〕

〔一〕集解 漢書音義曰：「不周山在崑崙東南。」

〔二〕集解 徐廣曰：「噦音祈，小食也。」駟案：韋昭曰「瓊華，玉英」。

〔三〕集解 徐廣曰：「儉音蟻。」索隱 漢書：「儉」作「襟」。襟，仰也，音襟。儉音魚錦反。

〔四〕集解 漢書音義曰：「列缺，天閃也。倒景，日在下。」

〔五〕正義 張云：「豐崇，雲師也。」淮南子云：「季春三月，豐崇乃出以將雨。」案：豐崇將雲雨，故云「滂沛」。

〔六〕正義 游，游車也。道，道車也。脩，長也。降，下也。

〔七〕集解 漢書音義曰：「玄闕，北極之山。寒門，天北門。」

〔八〕集解 徐廣曰：「假音古下反，至也。」

相如既奏大人之頌，天子大說，飄飄有凌雲之氣，似游天地之間意。

相如既病免，家居茂陵。天子曰：「司馬相如病甚，可往後悉取其書；若不然，後失之矣。」使所忠〔一〕往，而相如已死，家無書。問其妻，對曰：「長卿固未嘗有書也。時時著書，人又取去，即空居。長卿未死時，爲一卷書，曰有使者來求書，奏之。無他書。」其遺札書言封禪事，奏所忠。忠奏其書，天子異之。其書曰：

〔一〕索隱 張揖曰：「使者姓名，見食貨志。」正義 姓所，名忠也。風俗通 姓氏云：「漢書有諫大夫所忠氏。」

伊上古之初肇，自昊穹兮生民，歷撰〔一〕列辟，以迄于秦。率邇者踵武，〔三〕逖聽者

風聲。〔三〕紛綸葳蕤，〔四〕堙滅而不稱者，不可勝數也。續昭夏，崇號謚，略可道者七十有二君。〔五〕罔若淑而不昌，疇逆失而能存？〔六〕

〔一〕集解 徐廣曰：「撰，一作『選』。」索隱 歷選。文穎曰：「選，數之也。」

〔二〕集解 徐廣曰：「率，循也。邇，近也。武，迹也。循省近世之遺迹。」索隱 案：率，循也。邇，近也。言循覽

近代之事，則繼跡可知也。

〔三〕集解 徐廣曰：「述，遠也。聽察遠古之風聲。」索隱 風聲，風雅之聲。以言聽遠古之事，則著在風雅之聲

也。

〔四〕索隱 紛綸威蕤。胡廣曰：「紛，亂也。綸，沒也。威蕤，委頓也。」張揖云：「亂兒。」

〔五〕集解 漢書音義曰：「昭，明也。夏，大也。德明大，相繼封禪於泰山者七十有二人。」索隱 七十有二君，韓詩

外傳及封禪書皆然。

〔六〕集解 徐廣曰：「若，順也。」駟案：韋昭曰「疇，誰也。言順善必昌，逆失必亡」。

軒轅之前，遐哉邈乎，其詳不可得聞也。五三六經〔一〕載籍之傳，維見可觀也。書曰「元首明哉，股肱良哉」。因斯以談，君莫盛於唐堯，臣莫賢於后稷。后稷創業於唐，公劉發迹於西戎，文王改制，爰周邳隆，〔二〕大行越成，〔三〕而後陵夷衰微，千載無聲，〔四〕豈不善始善終哉。然無異端，慎所由於前，謹遺教於後耳。故軌迹夷易，易遵也；湛恩濛涌，易豐也；憲度著明，易則也；垂統理順，易繼也。是以業隆於緼祿而

崇冠于二后。^{〔五〕}揆厥所元，終都攸卒，^{〔六〕}未有殊尤絕迹可考于今者也。然猶躡梁父，登泰山，建顯號，施尊名。大漢之德，逢涌原泉，^{〔七〕}沕涌漫衍，旁魄四塞，雲專霧散，^{〔八〕}上暢九垓，下泝八埏。^{〔九〕}懷生之類，霑濡浸潤，協氣橫流，武節飄逝，邇陝游原，迴闊泳沫，^{〔一〇〕}首惡湮沒，闇昧昭哲，^{〔一一〕}昆蟲凱澤，回首面內。^{〔一二〕}然後囿騶虞之珍羣，徼麋鹿之怪獸，^{〔一三〕}藁一莖六穗於庖，^{〔一四〕}犧雙觥共抵之獸，^{〔一五〕}獲周餘珍收龜于岐，^{〔一六〕}招翠黃乘龍於沼。^{〔一七〕}鬼神接靈囿，賓於閒館。^{〔一八〕}奇物譎詭，倣儻窮變。欽哉，符瑞臻茲，猶以爲薄，不敢道封禪。蓋周躍魚隕杭，休之以燎，^{〔一九〕}微夫斯之爲符也，以登介丘，不亦惡乎！^{〔二〇〕}進讓之道，其何爽與？^{〔二一〕}

〔一〕〔索隱〕胡廣云：「五，五帝也。三，三王也。六，六經也。」案：六經，詩、書、禮、樂、易、春秋也。

〔二〕〔集解〕徐廣曰：「『郅』蓋字誤。」皇甫謐曰：「王季徙郅，故周書曰『維王季宅郅』。」孟子稱「文王（生）〔卒〕於畢郅」。或者「郅」字宜爲「郅」乎？或爲「胙」，北地有郅縣。胙，大也，音質。〔駟案〕漢書音義云「郅，至也」。

〔索隱〕爰，於，及也。郅，大也。隆，盛也。應劭曰「郅，至也」。樊光云「郅，可見之大也」。徐及皇甫之說皆非也。以言文王改制，及周而大盛也。

〔三〕〔集解〕漢書音義曰：「行，道也。」文王始開王業，改正朔，易服色，太平之道於是成矣。〔索隱〕案：行，道也。越，於也。以言道德大行，於是而成之也。

〔四〕〔集解〕徐廣曰：「周之王四海，千載之後聲教乃絕。」〔駟案〕韋昭曰「無惡聲」。

〔五〕集解 漢書音義曰：「繼祿謂成王也。二后謂文、武也。周公負成王致太平，功德冠於文武者，道成法易故也。」

〔六〕集解 漢書音義曰：「都，於；卒，終也。」

〔七〕集解 韋昭曰：「漢德逢涌如泉原也。」索隱 逢源泉。張揖曰：「逢，遇也。喻其德盛若遇泉源之流也。」又作

「峰」，讀曰烽。胡廣曰：「自此已下，論漢家之德也。」

〔八〕集解 徐廣曰：「專音布。」

〔九〕集解 徐廣曰：「音衍。」駟案 漢書音義曰「暢，達；垓，重也。汭，流也。埏音延，地之際也。言其德上達於九重之天，下流於地之八際也。」

〔一〇〕集解 漢書音義曰：「邇，近；原，本也。迥，遠；闊，廣也。泳，浮也。恩德比之於水，近者游其原，遠者浮其沫。」

〔一一〕集解 漢書音義曰：「始爲惡者皆湮滅。闇昧，喻夷狄皆化。」

〔一二〕集解 韋昭曰：「面，向也。」

〔一三〕集解 漢書音義曰：「微，遮也。麋鹿得其奇怪者，謂獲白麟也。」

〔一四〕集解 徐廣曰：「藁，瑞禾也。」駟案 漢書音義曰「謂嘉禾之米，於庖廚以供祭祀。」索隱 藁一莖六蕙。鄭

玄云：「藁，擇也。」說文云：「嘉禾一名藁。」字林云：「禾一莖六蕙謂之藁也。」

〔一五〕集解 徐廣曰：「抵音底。」駟案 漢書音義曰「犧，牲也。鰒，角也。底，本也。武帝獲白麟，兩角共一本，因以爲牲也。」

〔一六〕集解 徐廣曰：「一作『放龜』。」駟案 漢書音義曰「餘珍，得周鼎也。岐，水名也。」索隱 餘珍，案謂得周鼎

也。

〔一七〕集解 漢書音義曰：「翠黃，乘黃也。龍翼馬身，黃帝乘之而登仙。言見乘黃而招呼之。禮樂志曰：『營黃其何下來下』。余吾渥洼水中出神馬，故曰乘龍於沼。」索隱 服虔云：「龍翠色」。又云：「即乘黃也。乘四龍也。」周書云：「乘黃似狐，背上有兩角」也。

〔一八〕集解 徐廣曰：「言至德與神明連接，故靈囿爲賓旅于閒館矣。」郭璞曰：「靈囿，仙人名也。」

〔一九〕索隱 杭，舟也。胡廣云：「武王渡河，白魚入于王舟，俯取以燎。隕，墜之於舟中也。」

〔二〇〕集解 漢書音義曰：「介，大；丘，山也。言周以白魚爲瑞，登太山封禪，不亦慙乎！」

〔二一〕集解 徐廣曰：「爽，差異也。」駟案：漢書音義曰「進，周也。讓，漢也。言周未可封禪而封禪爲進，漢可封禪而不封禪爲讓也。」索隱 何其爽與。爽猶差也。言周未可封而封，漢可封而不封，爲進讓之道皆差之也。

於是大司馬進曰：「陛下仁育羣生，義征不憚，〔一〕諸夏樂貢，百蠻執贄，德侔往初，功無與二，休烈浹洽，符瑞衆變，期應紹至，不特創見。〔二〕意者泰山、梁父設壇場望幸，〔三〕蓋號以況榮，〔四〕上帝垂恩儲祉，將以薦成，〔五〕陛下謙讓而弗發也。挈三神之驩，〔六〕缺王道之儀，羣臣惡焉。或謂且天爲質闇，珍符固不可辭，〔七〕若然辭之，是泰山靡記而梁父靡幾也。〔八〕亦各並時而榮，咸濟世而屈，〔九〕說者尚何稱於後，〔一〇〕而云七十二君乎？夫修德以錫符，奉符以行事，不爲進越。〔一一〕故聖王弗替，而修禮地祇，謁款天神，〔一二〕勒功中嶽，以彰至尊，舒盛德，發號榮，受厚福，以浸黎民也。皇皇哉斯事！」

天下之壯觀，王者之不業，不可貶也。願陛下全之。而後因雜薦紳先生之略術，使獲耀日月之末光絕炎，以展采錯事，^{〔二〕}猶兼正列其義，校飭厥文，作春秋一藝，^{〔三〕}將襲舊六爲七，^{〔四〕}據之無窮，^{〔五〕}俾萬世得激清流，揚微波，蜚英聲，騰茂實。^{〔六〕}前聖之所以永保鴻名而常爲稱首者用此，^{〔七〕}宜命掌故悉奏其義而覽焉。^{〔八〕}

〔一〕集解 漢書音義曰：「大司馬，上公也，故先進議。懋音惠，順也。」

〔二〕集解 徐廣曰：「不但初顯符瑞而已，蓋將終以封禪之事。」索隱 文穎曰：「不獨一物，造次見之。」胡廣云：

「符瑞衆多，應期相繼而至也。」

〔三〕索隱 設壇場望幸華。案：諸本或作「望華蓋」。華蓋，星名，在紫微太帝之上。今言望華蓋，太帝耳。且言

設壇場望幸者，望聖帝之臨幸也，義亦兩通。而孟康、服虔注本皆云「望幸」下有「華」字，而摯虞流別集則唯云「望幸」，當是也，於義易通。直以後人見「幸」下有「蓋」字，又「幸」字似「華」字，因疑惑，遂定「華」字，使之誤也。

〔四〕集解 徐廣曰：「以況受上天之榮爲名號。」索隱 案：文穎曰「蓋，合也。言考合前代之君，揆其榮而相比況

而爲號也。」大顏云「蓋，語辭也。言蓋欲紀功立號，受天之況賜榮名也」。於義爲愜。然其文云「蓋」，詞義典質，又上與「幸」字連文，致令有「華蓋」之謬也。

〔五〕集解 徐廣曰：「以衆瑞物初至封禪處，薦之上天，告成功也。」索隱 薦，案漢書作「慶」，義亦通也。

〔六〕集解 徐廣曰：「挈猶言垂也。」駟案：韋昭曰「挈，缺也。三神，上帝、泰山、梁父也。」索隱 案：徐氏云「挈

猶垂」，非也。應劭作「絕」，李奇、韋昭作「闕」，意亦不遠。三神，韋昭以爲上帝、太山、梁父，如淳謂地祇、天神、

山岳也。

〔七〕集解漢書音義曰：「言天道質昧，以符瑞見意，不可辭讓也。」〔索隱〕孟康曰：「言天道質昧，以符瑞見意，不可辭讓也。」

〔八〕集解漢書音義曰：「太山之上無所表記，梁父壇場無所庶幾。」〔索隱〕案：幾音冀。

〔九〕集解漢書音義曰：「屈，絕之也。言古帝王但作一時之榮，畢代而絕也。」〔索隱〕言自古封禪之帝王，是各並時而榮貴，咸有濟代之勳；而屈者，謂言抑屈總不封禪，使說者尚何稱述於後代也，如上文云「七十二君」者哉？

〔一〇〕集解徐廣曰：「若無封禪之遺迹，則榮盡於當時，至於歷世之後，人何所述？」

〔一一〕索隱文穎曰：「越，踰也。不爲苟進踰禮也。」

〔一二〕集解漢書音義曰：「款，誠也。謁告之報誠也。」

〔一三〕集解徐廣曰：「錯音厝。」駟案：漢書音義曰「采，官也。使諸儒記功著業，得覩日月末光殊絕之用，以展其官職，設厝其事業者也。」

〔一四〕集解徐廣曰：「校，一作『拔』。被猶拂也，音廢也。」駟案：漢書音義曰「春秋者，正天時，列人事，諸儒既得展事業，因兼正天時，列人事，敘述大義爲一經」。

〔一五〕集解韋昭曰：「今漢書增一，仍舊六爲七也。」

〔一六〕集解徐廣曰：「據，一作『臚』。臚，敘也。」〔索隱〕廣雅云：「據，張舒也。」

〔一七〕索隱胡廣曰：「飛揚英華之聲，騰馳茂盛之實也。」

〔一〇〕索隱案：謂用此封禪。

〔一〇〕集解漢書音義曰：「掌故，太史官屬，主故事也。」

於是天子沛然改容，曰：「愉乎，朕其試哉！」乃遷思回慮，總公卿之議，詢封禪之事，詩大澤之博，廣符瑞之富。〔一〕乃作頌曰：

〔一〕集解漢書音義曰：「詩，歌詠功德也，下四章之頌也。大澤之博，謂『自我天覆，雲之油油』。廣符瑞之富，謂『斑斑之獸』以下三章，言符瑞廣大富饒也。」

自我天覆，雲之油油。〔一〕甘露時雨，厥壤可游。滋液滲漉，〔二〕何生不育；嘉穀六穗，我穡曷蓄。〔三〕

〔一〕集解漢書音義曰：「油油，雲行貌。」孟子曰：「油然作雲，沛然下雨。」

〔二〕集解徐廣曰：「滲，音色蔭反。」索隱案：說文云：「滲，漉，水下流之兒也。」

〔三〕集解徐廣曰：「何所畜邪？畜嘉穀。」

非唯雨之，又潤澤之；非唯濡之，汜專瀨之。〔一〕萬物熙熙，懷而慕思。名山顯位，望君之來。〔二〕君乎君乎，侯不邁哉！〔三〕

〔一〕集解徐廣曰：「古『布』字作『專』。」索隱胡廣曰：「汜，普也。言雨澤非偏於我，普徧布散，無所不瀨之也。」

〔二〕集解韋昭曰：「名山，大山也。顯位，封禪也。」

〔三〕索隱李奇云：「侯，何也。言君何不行封禪之事也。」案：邁，訓行也。如淳云：「侯，維也。」

般般之獸，「一」樂我君囿，白質黑章，其儀可（嘉）「喜」；
「二」眈眈陸陸，君子之能。「三」蓋聞其聲，今觀其來。厥塗靡蹤，天瑞之徵。「三」茲亦於舜，虞氏以興。「四」

〔一〕索隱案：般般，文彩之兒也，音班。胡廣曰：「謂騶虞也。」

〔二〕集解徐廣曰：「眈音旻，和貌也。能，一作『態』。」駟案：漢書音義曰「旻和穆敬，言和且敬，有似君子」。

索隱眈音旻。

〔三〕集解徐廣曰：「其所來路非有迹，蓋自天降瑞，不行而至也。」

〔四〕索隱文穎曰：「舜百獸率舞，則騶虞亦在其中者已。」

濯濯之麟，「一」游彼靈時。「二」孟冬十月，君俎郊祀。馳我君輿，帝以享祉。「三」
代之前，蓋未嘗有。

〔一〕索隱詩人云「麀鹿濯濯」，注云「濯濯，嬉遊兒」也。

〔二〕集解漢書音義曰：「武帝祠五時，獲白麟，故言游靈時。」

宛宛黃龍，「一」興德而升，采色炫燿，煥炳輝煌。「二」正陽顯見，「三」覺寤黎烝。

於傳載之，云受命所乘。「四」

〔一〕索隱胡廣曰：「屈伸也。」

〔二〕集解徐廣曰：「煥音晃。輝音魂。」

〔三〕索隱 文穎曰：「陽，明也。謂南面受朝也。」

〔四〕索隱 如淳云：「書傳所載，揆其比類，以爲漢土德，黃龍爲之應，見之於成紀，故云受命所乘也。」

厥之有章，不必諄諄。〔一〕依類託寓，諭以封巒。〔二〕

〔一〕集解 徐廣曰：「諄，止純反。告之丁寧。」駢案 漢書音義曰：「天之所命，表以符瑞，章明其德，不必諄諄然有語言也。」

〔二〕集解 漢書音義曰：「寓，寄也。巒，山也。言依事類託寄，以喻封禪者。」

披藝觀之，天人之際已交，上下相發允答。聖王之德，兢兢翼翼也。故曰「興必慮衰，安必思危」。是以湯武至尊嚴，不失肅祇，舜在假典，〔一〕顧省厥遺，此之謂也。

〔一〕集解 徐廣曰：「假，大也。」

司馬相如既卒，〔一〕五歲，天子始祭后土。八年而遂先禮中嶽，〔二〕封于太山，〔三〕至梁父禪肅然。〔四〕

〔一〕集解 徐廣曰：「元狩五年也。」

〔二〕正義 嵩高也，在洛州陽城縣西北二十二里。

〔三〕正義 在兗州博城縣西北三十里。

〔四〕集解 徐廣曰：「小山，在泰山下趾東北。」

相如他所著，若遺平陵侯〔一〕書、與五公子相難、草木書篇不采，采其尤著公卿者云。

〔一〕集解 徐廣曰：「蘇建也。」

太史公曰：春秋推見至隱，〔一〕易本隱之以顯，〔二〕大雅言王公大人而德逮黎庶，〔三〕小雅譏小己之得失，其流及上。〔四〕所以言雖外殊，其合德一也。相如雖多虛辭濫說，然其要歸引之節儉，此與詩之風諫何異。楊雄以爲靡麗之賦，勸百風一，猶馳騁鄭衛之聲，曲終而奏雅，不已虧乎？余采其語可論者著于篇。

〔一〕集解 韋昭曰：「推見事至於隱諱，謂若晉文召天子，經言『狩河陽』之屬。」〔索隱〕李奇曰：「隱猶微也。言其義彰而文微，若隱公見弑，而經不書，諱之。」

〔二〕集解 韋昭曰：「易本隱微妙，出爲人事乃顯著也。」〔索隱〕韋昭曰：「易本陰陽之微妙，出爲人事乃更昭著也。」

虞喜志林曰：「春秋以人事通天道，是推見以至隱也。易以天道接人事，是本隱以之明顯也。」

〔三〕集解 韋昭曰：「先言王公大人之德，乃後及衆庶也。」〔索隱〕文穎曰：「大雅先言大人王公之德，後及衆庶。」

〔四〕集解 韋昭曰：「小雅之人志狹小，先道己之憂苦，其流乃及上政之得失者。」〔索隱〕文穎曰：「小雅之人材志狹小，先道己之憂苦，其末流及上政之得失也。故禮緯云小雅譏己得失，及之於上也。」

【索隱述贊】相如縱誕，竊賞卓氏。燕學無方，其才足倚。
子虛過吒，上林非侈。四馬還邛，百金獻伎。
惜哉封禪，遺文卓爾。

